



HISTOR  
AN  
TESTAMANT  
COZ.

Blair 266.



100, 818, 913



HISTOR AN TESTAMANT COZ

HAG AN

TESTAMANT NEVEZ.

---



Rouantelez an eñv a zo d'ar re a zo heñvel outho.  
(S. Vaze, 19).

*J. P. Guerry  
Brest 1889*

# HISTOR AN TESTAMANT COZ

HAG AN

## TESTAMANT NEVEZ

DISCOUEZET SCLEAR DRE IMACHOU

HA LAKEAT E BREZOUNEC LEON


GANT AN

**AOTROU MORVAN,**

PERSOUN PLUGÜEN (E *GALLEC* PLUGUFFAN).

*Levr approuvet gant an Aotrou'n Escop a Gemper hag a Leon, gant an Aotrou'n Escop Mermillod ha gant an Tad Felix euz a urs an Tadou Jesuistet.*

Levr digemeret dre garantez gant Hon Tad Santel ar Pab Léon XIII.



MOULET EVIT AN PEVARE GUEI'CH.

EINSIEDELN ER SUISS, NEW-YORK, CINCINNATI HA ST. LOUIS.

**C. HA N. BENZIGER BREUDEUR MOULERIEN.**

**KEMPER.**

**J. SALAUN,**

MAR'HADOUR-LEVRIOC.



**BREST.**

**LEFOURNIER.**

1886.

LIBRARY OF SCIENCE  
D  
30 MY  
1958

A la sainteté de votre légation - le Pape Léon XIII.

Vrs. Saint Père.

Dans les nombreuses et excellents ouvrages, que le clergé des  
Froides Berges, à Lunenburg, dit et répand en Suisse et à l'étranger,  
se trouve un livre intitulé "Petite Bible illustrée", publié en  
allemand, traduit en six langues et approuvé par un grand nombre  
d'évêques de l'ancien et du nouveau Monde, comme tout à fait  
orthodoxe et très utile à la jeunesse des écoles.

Les honorables et intelligents auteurs mentionnent par mon intermédiaire  
offrir à la sainteté cette Petite Bible illustrée. Le président  
de l'œuvre l'a apprécié comme un hommage de leur profond respect  
et de leur filiale piété, et de leur ardeur à eux et à leurs  
travaux la Bénédiction apostolique en gage de la protection divine.

M'inspirant à leur égard, j'en est issu de renouveler à votre  
sainteté l'expression de la parfaite vénération avec laquelle  
je l'honneur d'être

Vrs. Saint Père

de votre Pédagogue

Le très humble et très obéissant serviteur

Rome le 8 Mars 1880

+ Eugène Luchat  
Evêque de Bâle.

Sanctae Aelionum vobis et obsequio meo, quos per episcopum Babilonensem fratres  
Berges' editores vobis oblatum, gratias omnes impertimus, vobis et eorum operibus  
et obsequio semper bene vobis. Apostolica Benedictione protegemus.

• Dec. 18. 8. 1111.



Respount an Tat Santel ar Pap.

*E Roum, an 8 euz a viz meurs 1880.*

*Bez' hor beuz bet gant anaoudêquez vac, digant Aotrou-n-Eskop Bâle, levr ar skritur sakr azo he hano ar vibl vihan gant taolennou.*

*Al levr-ze azo bet digasset d'e-omp euz a-berz an daou Aotrou Benziger, breudeur ha moullèrien, ha, gant-han ive, testenì ho men-nossiou a wirgaloun.*

*Rak-se ec'h aotreomp rei d'ezho ha d'ho labourou Hor bennoz abostolik, evit ma kresko bepred mad ar relijion.*

*Sinet: Léon XIII, pap.*

## APPROBATION AN AOTROU'N ESCOP A GEMPER HAG A LEON.

**H**ervez an desteni roët deomp gant an Aotrou LAMARQUE, persoun hon ilis cathedral, divar benn al levr brezouneec a reer anezhan : Ilistor an testamant coz hag an testamant nevez disconezet sclear dre imachou ; hag hervez an anaoudegez or boa hon unan euz al levr-se araoc m'eo bet lakeat e brezouneec ; e tiscleriomp ama a vouez huel ez eo unan euz al levriou a c'hell ober ar muia vad hag ar brassa plijadur d'an dud divar ar meaz euz hon escopti. Ar c'hentelliou caër hag an imachou a zo enghan a lakaïo ar guirioneziou euz ar relijion da bara sclear ha splamm dirac daoulagad ho speret. Ho zicour a raïnt, dreist oll, da goupren, guelloc'h eget n'o deuz great bete vrema marteze, petra eo al *lezen goz* hag al *lezen nevez*, e pe feson e teu an eil euz eben, ha penaoz kement a zo bet c'hoarvezet, pe discleriet a berz Doue, el lezen goz, ne oa nemet eur merk euz ar pezh a dliec erruout el lezen nevez. Setu perac e carfemp guelet al levr-ma etre daouarn kement den a gomz ar brezouneec en hon escopti, ha, dreist oll, etre daouarn ar vugale.

*Roët e Kemper ar 5 a viz c'houevrer 1869.*

† RENAT. CORISOPIT. et Leon. Eps.

De Mandato RR. DD. Episcopi :

J<sup>h</sup>. TEPHANY.

c. h. Sius.

Lizer scrivet gant an Aotrou'n escop **MERMILLOD** divar benn al  
levr-ma, araoc m'e bet lakeat e brezouneq.

*Jenev, ar 7 a vis du 1866.*

**D'AN AOTROUNEZ CHARLES HA NICOLAS BENZIGER  
BREUDEUR E EINSIEDELN.**

Aotrounez,

**E**ur blijadur eo evidon ho trugarekaat a vouez huel euz ar vad o peuz great meur a veich d'ar Relijion ha d'an Ilis, dre al levriou caër o peuz moullat. Unan euz ar re a istiman ar muia, eo **HISTOR AN TESTAMANT COZ HAG AN TESTAMANT NEVEZ, DISCOUEZET SCLEAR DRE IMACHOU**. O voulla al levr-se e langach allmand da genta, ha goudeze e gallec, o peuz great e guirionez eun dra vad ha meritabl dirac Doue. An oll gristenien o devezo plijadur oc'h he lenn, hag ar vugale a gavo enghan eur gelennadurez euz ar re vella. Ne c'hellan ket eta ho meuli re evit ar boan o peuz kemeret da voulla al levr bihan-ze en eur feson deread, ha carout a raffen e ve anavezet gant an oll gristenien catholic.

Va bennoz deoc'h, Aotrounez, ha countit var ar garantez am euz evidoc'h en hor zalver Jesus-Krist

sin. † **GASPARD**, escop Hebron,  
hanvet da zicour escop Jenev.



Lizer scrivet gant an Tad Felix, euz a urs an Tadou Jesuïstet.

*Paris, ar 25 a vis du 1866.*

Aotrounez,

**E**ur zonch vad o peuz bet o voulla, evit ar bobl, an dud iaouank hag ar vugale, **HISTOR AN TESTAMANT COZ HAG AN TESTAMANT NEVEZ DISCOUEZET SCLEAR DRE IMACHOU.** Credi a ran e rai al levr-se calz vad. Breuriez S. Mikeal a vezo joa ganthi he rei da anaout muia ma c'hello, brema p'e deuz lakeat he drei e gallec; rac leun eo a draou caer ha talvouduz meurbet evit an ene, hag, a hent all, n'e ket re ger ken nebeut dioc'h ar feson ma'z eo moulet.

Plijet ganeoc'h, Aotrounez moullerien, digemeret al lizer-ma evel eur merk euz ar garantez hag euz ar respet am euz evidoc'h.

**J. FELIX, S. J.**

EUR GER ARAOC A BERZ AR VOULLERIEN.  
(An dra-ma a zo tennet divar al levr gallec).

---

*B*reuriez S. Mikeal ha ni or beuz bet eun hevelep sonch da lakaat trei e gallec **Histor an Testamant coz hag an Testamant nevez discouezet selear dre imachou**. Al levr-se or boa dija moulet e langach allmand, hag a ioa bet digemeret mad er Suiss, en Allemagn hag en Americ. Hag e guirionez, caout a reer enghan an traou caëra a zo er Scritur Sacr merket e berr gomzon, hag en eur feson hag a ia var eün da voueled ar galoun. Ouspenn-ze, rei a ra da anaout selear penaoz e teu al lezen nevez euz al lezen goz. Credi a reomp eta e vezo lennet gant plijadur en tiegeziou, hag e c'hello servichout calz da zeski ar relijion gristen d'ar vugale, ken er Scoliou, ken en Ilis. Tost daou e'hant imach a zo ebarz; meur a escop o deuz dija great he veuleudi, hag her moulet or beuz gant ar brassa evez; setu perac ec'h esperomp e plijo al levr gallec-ma d'an oll, evel ma plije dija d'ar re hen anaë an hini or boa moulet da genta e langach allmand.

EINSIEDELN er Suiss, an 8 a vis kerzu 1866.

Charles ha Nicolas Benziger breudeur.

# HISTOR AN TESTAMANT COZ

LODEN GENTA.

HISTOR AN AMZER GENTA ADALEC ADAM BETEC ABRAHAM

adalec ar bloaz 4000 betec var dro ar bloaz  
2000 araoe donedigez hor zalver.

## 1. Crouïdigez ar bed.



Er penn kenta Doue a grouas an eñv hag an douar. An douar a ioa c'hoaz goullou ha teñval, ha goloët oll a zour. Ha Doue a lavaras: « ra vezo ar sclerijen ! » Hag ar sclerijen a oue. Ha setu an deiz kenta.

D'an eil dervez Doue a lavaras : « ra vezo great an oabl ! »

Ha kerkent an oabl glaz en em zavas azioc'h an douar evel eur volz dudiu.

D'an trede deiz Doue a lavaras : « ra'z aï en ho zu an douriou a zo var c'horre an douar, ha ra zeui an douar d'en em ziscouez ! » Ar pezh a oue great evelse. An douar hag ar mor, an eienennou, ar c'houërennou bihan hag ar steriou braz a ioa eno, peb hini el leac'h ma tlie beza. — Goudeze Doue a c'hourc'hemennas d'an douar dougen plant ha guez a bep seurt ; ha ker buhan an douar a deuas da veza marellet gant bokedou a bep seurt liou, ha goloët a wez glaz.

D'ar pevare dervez Doue a lavaras : « ra vezo en oabl traou da rei sclerijen ! » Hag an heol, al loar hag ar steret en em lakeas da bara.

D'ar pempet dervez Doue a lavaras : « ra vezo pesket en dour ha labouset en ear ! » Ar pezh a erruas dioc'htu.

D'ar c'houec'hvet dervez Doue a reas ar gourc'hemennma : « ra vezo var an douar loanet a bep seurt ! » Ha setu ractal a bep seurt loanet o tont var an douar. Neuze Doue a lavaras : « greomp an den dioc'h hor patrom hag hervez hon heñvedigez hon unan, ha ra vezo mestr var an oll grouadurien all euz an douar ! » Ha Doue a reas corf an den gant pri-douar, ha goudeze, dre eur c'hoëzaden oll-c'hallouduz, e roas dezhan eun ene ha ne c'hell ket mervel. Setu aze penaoz e oue crouët an den kenta. Doue a roas dezhan an hano a Adam, ar pezh a zinifi : *tennet euz a zouar*.

Doue a velas an oll draou en devoa great, hag ho c'havas mad. — D'ar seizvet dervez ec'h ehanas da labourat, ha setu perac e vennigas an dervez-se, hag e reas anezhan eun deiz santel.

Evel m'en deuz Doue crouët an den d'ar c'houec'hvet dervez euz ar zizun genta euz ar bed, evelse ive en deuz her prenet, da lavaret eo, roët dezhan eur vuez nevez,

d'ar c'houec'hvet dervez euz ar zibun zantel, da zeiz guener ar groaz. Hag evel corf hon tad kenta Adam a zo bet great gant pri tennet euz an douar, c'hoaz guerc'h ha nevez beniget gant Doue, evelse ive hor zalver Jesus-Krist, an eil Adam, a zo ganet euz ar Verc'hez Vari, euz ar grouadurezse a zo bet ato dibec'h-caër dirac Doue, ha leun euz he c'hrasou.

## 2. Crouïdigez an Elez.

Doue a grouas ouspenn crouadurien ha ne c'heller ket da velet, me lavar, an elez euz an eñv. Ar re-ma, p'oant crouët, a ioa oll santel hag eüruz euz eun eüruset eb he far.

Hogen, eleiz anezho en em zavas a enep an Aotrou Doue, ho c'hrouër, ha setu e oue eur vrezel vraz en eñv. Mikeal hag an elez a ioa chomet stard en ho dever a zalc'has penn d'an drouc-elez. An hini a ioa e penn ar re-ma a zo he hano



Satan, pe an diaoul. An drouc-elez a oue trec'het ha stlapet en ifern.

## 3. Eüruset hon tud kenta e baradoz an douar.

Doue en devoa great evit an den eur jardin ha ne c'houffet biken gullet caëroc'h eget-hi; ar jardin-ze eo a hanver *baradoz an douar*. Eno ez oä guez carget a frouez

euz ar re vella a c'houffet da dañva. E creiz ar jardin ez oa diou vezen hag a remerket dreist ar re all, *guezzen ar vuez*, ha guezzen *anaoudegez an drouc hag ar mad*. Ha Doue a lavaras da Adam: «dibri a c'hellit euz a gement seurt frouez zo er jardin nemet euz a eur seurt ebken, nemet euz a frouez guezzen anaoudegez an drouc hag ar mad; rac ma tebrit euz a frouez ar vezen-ze, oc'h sur da vervel.» Goudeze Doue a zigassas an oll loanet dirac Adam; Adam en devoue eur joa vraz ouz ho guelet, hag a roas he hano da bep hini anezho.

Ha Doue a lavaras: «n'e ket mad e ve an den he unan; greomp dezhan evit he zicour eun all heñvel outhan.» Doue a zigassas eta eur c'houket doun da Adam, hag epad he gousk e lamas unan euz he gostou evit ober anezhi ar vaouez. Pa zihunas Adam, Doue a lakeas ar vaouez dirazhan. Adam a zridas he galoun oc'h he guelet, hag a roas dezhi an hano a Eva, ar pez a zinifi, *mamm kement den a dle dont er bed*.

Ho daou e vevent eüruz e baradoz an douar. Doue en devoa eur vadelez vraz evitho, ar vadelez en deuz eun tad evit he vugale. Frouez guezzen ar vuez a dlie miret outho da gleñvel ha da vervel.

Guezzen ar vuez a verke sacramant an aoter, divar benn pehini en deuz lavaret Jesus-Krist: an nep piou bennac a gemero ar vagadurez-se, a vevo da virviken.

#### 4. Pec'het hon tud kenta e baradoz an douar.

An den a ioa eüruz. An diaoul, o caout avi ouz he eürusdet, a glaskas hen touella, hag evit kement-se ec'h en em zervichas euz ar zarpant.

Eun dervez m'oa tostet Eva oc'h guezzen anaoudegez an drouc hag ar mad, ar zarpant a lavaras dezhi: «perac en deuz Doue difennet ouzoc'h dibri euz a frouez ar vezen-ze?» Hag Eva a respountas: «gant aoun, emezhi, na varvchemp, ma teujemp da dañva ar frouez-se.» — «Nan, nan, eme ar zarpant neuze da Eva, ne varvoc'h ket; er c'hontrol eo: ho taoulagad a zigoro, hag e vioc'h

heñvel ous Doue he unan, dre ma'c'h anavezoc'n evel-dhan an drouc hag ar mad.» O clevet ar c'homzou-ze, Eva a zellas ouz ar vezen evit guelel peseurt doare o devoa ar frouez; ha seul-vui ma selle, seul-vui e cave dezhi o devoa doare gaër hag e tlient beza euz ar re vella. Poulzet gant an ioul direiz da velet peseurt blaz o devoa, e cutuillas eur frouezen hag he c'hassas d'he ginou. Goudeze ez eas da gass an tañva da Adam, hag hema a zebras ive. Evelse eo e oue great ar pec'het kenta. Ker-kent daou-lagad Adam hag Eva a zigoras, mes en eur feson disheñvel dioc'h m'o devoa sounjet. Anaout a rejont edont en noaz. Leun a vez d'en em velet er stat-se, e stagchont deliou fiez an eil ouz eben evit ober a bep a c'houriz d'en em c'holo. Goudeze e crogas aoun enno, hag ez ejont da guzet adreñ ar guez.

Dre eur vezen eo bet collet an den, ha dre eur vezen, guezen ar groaz, eo e bet saveteat, hag en deuz gellet adarre caout an tu da veza treac'h d'an drouc-speret.

##### **5. Ar pec'het punisset, hag ar zalver promettet evit ar veich genta.**

Neuze e oue clevet mouez an Aotrou Doue o comz evel-hen: «Adam, e peleac'h emaac'h?» Adam a respountas en eur grenn: «aoun em euz bet razoc'h abalamour m'edon en noaz.» — «Piou, eme an Aotrou Doue, en deuz lavaret deoc'h edoc'h en noaz? Daoust ha debret o peffe euz ar frouez difennet?» Hag Adam a respountas adarre: «Eva eo e deuz kinniget dinn, hag em euz debret.» Neuze Doue a lavaras d'ar vaonez: «perac o peuz-hu great an dra-ze?» — «Ar zarpant, emezhi, en deuz va zouellet, hag em euz debret euz ar frouez-se.»

Var gement-se Doue a zougas ar zetans, hag a lavaras da genta d'ar zarpant: «abalamour m'az peuz great an dra-ze, te a vezo milliget etre an oll loanet euz an douar; ne valeñ nemet a ruzou ha var da gof, ha poultren an douar a vezo da vagadurez pemdesiec. Me a lakaio cassouniou etre ar vaonez ha te, etre da vouenn hag he hini.



Hi a flastro d'id da benn, ha te a glasko he flemma e seul he zroad. »

Goudeze Doue a lavaras d'ar vaouez; « calz a boan o pezo o lakaat ho pugale er bed, ha bez' e vioc'h a zindan galloud ho pried. » Doue a lavaras erfin da Adam: « au douar a vezo milliget abalamour deoc'h; ne zougo anezhan he unan nemet spern ha drez, hag evelse e renkoc'h gounit ho para dioc'h ar c'houezen euz ho tal ken na zistrooc'h en douar-ze a behini oc'h bet tennet; rac ne d'oc'h e guirionez nemet poultr, ha distrei a reoc'h adarre e poultr. »

Doue a roas neuze da Adam ha da Eva crec'hinn loanet evit en em viska, ha goudeze e cassas anezho er meaz euz ar baradoz. Eun eal a oue lakeat da zivoal an or gant eur c'hleze a dan.

Ar Verc'hez Vari, dre ar frouez benniget euz he c'hof, Jesus, a dlie eun deiz flastra he benn da Zatan. Evel Adam en deuz lakeat an dud oll da gaout perz en he bec'het



hag er bunion en deuz ar pec'het-se tennet var he lerc'h, evelse ive, hor zalver Jesus-Krist, an eil Adam, a ro perz en he zantelez hag en he veritou da gement hini a fell dezhan hen anaout hag he zervicha evel he vestr hag he Zoue. Ha setu aze penaoz eo bet casset da netra ar zonzou fallac'r en devoa bet an diaoul e keñver an den.

## 6 Caïn hag Abel.

Adam hag Eva o devoue meur a grouadur. An daou genta oa Caïn hag Abel. Caïn en em daolas d'al labourdouar; mes eur goal den e oa. Abel a gemeras evit he vicher divoal an deñvet; hema avad a ioa eur paotr fur ha chentil. Ho daou e rejont sacrificiou d'an Aotrou Doue: Abel a ginnigas dezhan eun oan, ha Caïn, frouez euz au douar. Hogen, Doue, pehini a anaie caloun an eil hag egile, a reas eur zell a garantez var saerifis Abel, mes ne reas ket eun hevelep sell var hini Caïn. Hema, o veza remerket an dra-ze, a gemeras avi ouz he vreur, hag a deuas da veza teñval he benn.



Doue her scandalas, en eur lavaret dezhan: « pe-rac digeri da galoun d'an avi? Mar grez mad, e vezi ker mignoun dinn ha da vreur, mes mar grez fall, e tougi ar boan dleet d'az pec'het.

Dalc'h penn d'an teeh a boulz ac'hanoud varzu an drouc, ha bez treac'h dezhan. » — Couls goude Caïn a zalc'has cassouni en he galoun. Eun dervez, o veza pedet he vreur da vont ganthan da bourmen, e saillas varnhan en

eun taol-count, hag hen lazas var ar plas. Kerkent e oue clevet mouez ar barner a zo bet a oll-viscoaz hag a vezo da virviken : « Caïn, eme ar vouez, e peleac'h ema ho preur Abel? » Caïn a respountas gant eur vouez trenk, evel eur ginet : « me a c'hoar, me? Daoust ha me zo carget da zivoal va breur? » Neuze Doue a lavaras : « Caïn, petra o peuz great? Goad ho preur a zo evel eur vouez a zao euz an douar betec ennon. Setu perac c'houi a vezo milliget, hag heñvel ous eun den hag a renk ato bale eb caout repu e nep leac'h, var an douar-ze a zo bet rusiet gant goad ho preur. » O clevet ar zetans-se, Caïn en em lakeas da zizesperi, en eur lavaret : « re vraz eo va fec'het evit ma c'helfenn beza pardounet. » Neuze Doue a lakeas eur merk varnezhan, ha Caïn en em dennas ac'hano, hag a vevas goudeze ama hag a-hont, evel eun den hag a zo ato o tec'het araoc unan bennac.

Abel, lazet petra bennac n'oa netra da damall dezhan, a zo eur merk euz hor zalver Jesus-Krist. Ha Caïn a zo eur merk euz an treitour Judas hag euz an oll iuzevien o deuz lakeat d'ar maro salver ar bed.

## 7. An Dour-diluch.

(Var dro 2400 vloaz araoc donedigez hor zalver.)

Bugale vihan Adam en em rannas etre daou rumm, eur rumm hanvet *bugale Doue*, hag ar rumm all, *bugale an dud*. Doue en devoa roët da Adam eur c'hrouadur devot, he hano Seth, evit he gonzoli euz a varo Abel. Euz a lignez Seth, dreist oll, eo e teuas bugale Doue, ha bugale an dud, euz a lignez Caïn.

Nebeut a nebeut an dud oll en em roas d'an drouc ha d'ar pec'het; ne oue nemet Noë hag a zalc'has da ober ar mad ha da ren eur vuez santel. Setu perac Doue a lavaras : « c'hoaz c'houec'h ugent vloaz, ha me a garzo an douar dioc'h kement den a zo var he c'horre. » Neuze e comzas evel-hen ous Noë : « grit evidoc'h eun arc'h pe eul lestr braz hag en devezo 512 troatad a hirder, 85 troatad a ledander, hag 51 troatad a huelder. Var c'horre

an arc'h e reoc'h eur prenestr, hag eun or er c'hostez. Me a ia da zigass ar maro, dre eun dour-diluch, da gement tra a vev var an douar. Mes dec'houi ec'h astenniun va dorn evel da eur mignoun, hag e c'helloc'h en em zavetei ebarz en arc'h gant ho pried, ho pugale, ha priejou ho pugale. Kemeret a reoc'h ive ganeoc'h eur c'houblad euz a gement seurt loanet a zo var an douar, ha pe a dra da veva, evidoc'h hag evit al loanet-se, keit ha ma vioc'h eno.»



Noë a labouras epad cant vloaz da ober an arc'h. An dud all her guele o labourat, hag heñ a brezege dezho evit ho alia da ober pinijen; mes ne reant van ouz he glevet. Erfin Doue a lavaras dezhan: «it brema en arc'h, c'houi hag ho tud; abenn seiz dervez ama, me takai ar glao da goueza; ha coueza a rai dalc'h-mad, ha puill ha teo, epad daou-ugent dervez ha daou-ugent nozvez.»

Ar pez en devoa discleriet an Aotrou Doue a erruas

egiz m'en devoa lavaret. Abenn seiz dervez goude, rañvellou an eñv a zigoras, hag e tirollas ar glao da goueza evel pa vijet bet o teuler dour gant barazou. Hag an arc'h a zave dressic azioc'h an dour. An dud, evit savetei ho buez, a glaske pignat e beg ar guez, pe var gern ar menezioù; mes caer o devoa, ne c'hellent ket tec'het araoc ar maro. An dour a zave, a zave ato: sevel a reas betec ouspenn 25 troatad huelloc'h eget an huella menezioù. Evelse e oue beuzet kement tra a veve var an douar, adalec an den betec an aneñvalet, adalec al labouset a vev en ear betec al loanedigou a vale var ho c'hof, a ruzou. Ne jomas beo nemet Noë hag ar re a ioa ganthan en arc'h.

Hon tud kenta, hag ho bugale betec an dour-diluch, a vevas coz-coz. Mathusalem a vevas betec an oad a 969 vloaz. Er feson-ze Adam a vevas 56 vloaz gant tad Noë, ha Noë, 58 vloaz gant Abraham. Eaz oa eta, epad an anzer-ze, miret, ha cass a rumm da rumm, an anaoudegez euz ar guirioneziou en devoa discleriet Doue d'hon tad ha d'hor mamm genta.

An dour-diluch a zo eur merk euz ar varn diveza. Noë a zo eur merk euz hor zalver Jesus-Krist, hag an arc'h, eur merk euz an Ilis catholic.

## 8. Noë a drugareka an Aotrou Doue goude an dour-diluch.

An douar a jomas goloët a zour epad cant anter-cant dervez. Neuze Doue a lakeas eun avel domm da c'hoëza, hag an dour a deuas da izelaat a nebeut a nebeut. An arc'h a jomas a za var menez Ararat en Armenii. Eb dale kern ar menezioù a oue er meaz euz an dour. Evit guelet ha dizolo oa an douar, Noë a zigoras prenestr an arc'h, hag a laoskas eur vran er meaz, mes ar vran ne zistroas ket. Goudeze Noë a laoskas c'hoaz eur goulm; mes ar goulm a zistroas buhan d'an arc'h dre n'e devoa cavet plas ebet evit harpa he zreid. Abenn seiz dervez goude, Noë a laoskas adarre ar goulm, hag, en dro-ma, ar goulm a zistroas en eur zougen en he beg eur scour olivet. Noë a anavezas neuze, hag he galoun a zride gant

joa, oa en em dennet an dour divar c'horre an douar. Var ar gourc'hemenn roët dezhan gant Doue, e teuas er meaz euz an arc'h, heñ hag he dud, hag al loanet a ioa eat ganthan enni. Eur bloaz leun en devoa tremenet eno.



Leun a anaoudegez vad, Noë a zavas ractal eun aoter, hag a reas da Zoue eur sacrifis euz an oll aneñvalet pur. Doue a blijas dezhan ar sacrifis-se, hag a lakeas da lugerni en oabl eur ganeveden euz ar re gaëra. Goudeze e vennigas Noë hag he vugale, hag e lavaras dezho: «me fell dinn beza ho mignoun ha mignoun ho pugale var ho lerc'h. Hiviziken an douar ne vezo mui beuzet gant dourdiluch ebet. Keit ha ma vezo an douar, douar, an amzeriou euz ar bloaz a gendalc'ho da zont an eil varlerc'h eben, evel an noz varlerc'h an deiz. Ar ganeveden am euz lakeat e creiz ar c'hoabr a vezo ar merk euz an emglev a ran hirio ganeoc'h,»

Ar pec'her ne fell ket dezhan ober piniñ a zo heñvel ouz ar vran ne zistroas ket d'an arc'h. An ene fidel, er c'hountrol, pehini ne gav he reiz nemet e Jesus-Krist hag en he Ilis, a zo heñvel ouz ar goulm.

### 9. Bugale Noë. Tour Babel.

Noë en devoue tri mab: Sem, Kam ha Japhet. He vicher a oa labourat an douar gant he vugale, hag e plantas eur vinien. O veza ne anaë ket c'hoaz nerz ar guin, ec'h evas re ar veich genta hag e oue mezo: mont a reas neuze da gousket en he delt. Kam her c'hasas eno en eur stat diskempenn, ha, coulz lavaret, en noaz; ha setu heñ da vont ractal da gounta d'he vreudeur, en eur c'hoarzin, ar pez en devoa gullet. Mes ar re-ma, leun a respet hag a garantez evit ho zad, a gemeras eur vantel, hag a ias d'he zeuler var gorf Noë, en eur vale a-gil evit na c'hellent ket he velet en noaz. Pa zihunas Noë ha pa glevas petra o devoa great he vugale, e lavaras: « miliget ra vezo Kam! Ha benniget ra vezo Sem ha Japhet! »

Goude Noë, an niver euz an dud a deuas da greski kement ma oue red dezho clask broïou all evit mont da jom enno; rac er vro ma edont ne oa mui a blas. Couls-goude, araoc en em zispartia evit mont tu-ma, tu-hont, e leverjont entrezho: « greomp eur gear, hag er gear-ze, eun tour hag a zavo betec an eñv. » Dre ourgouil ha dre fougerez eo e comzent evelse. Mes Doue a gassas da netra ar zonch diskiant-se o devoa lakeat en ho speret. Epad m'edont guir vella o labourat evit sevel an tour-ze eb he bar, Doue a gemmeskas ho iez pe ho langach, da lavaret eo, Doue a lakeas anezho da gomz langachou disheñvel an eil diouz egile, en eun hevelep feson ma ne c'hellent mui en em goupren. Red mad e oue eta dezho lezel eno ho mansounerez hag ho darbarerez evit mont peb hini gant ar re a gomze eun hevelep langach ganthan. Bete neuze ne oa er bed nemet eul langach ebken; mes abaoe ez euz eleiz a langachou. An tour huel-ze, o devoa bet c'hoant an dud da zavel abarz en em zispartia, a zo hanvet tour Babel, ar pez a zinifi *kemmesk, rouestl*. Setu ama



penaoz ec'h en em rannas an dud goude ar c'hemmesk, pe ar rouestl-se euz ho langach: lignez Sem en em skignas dre an Asii, lignez Kam a ziskennas varzu an Afric, ha lignez Japhet en em dennas etrezec an Europ. Euz a lignez Sem eo e deuet pobl Doue, pe ar bobl a Israël.

Evel Noë, gourvezet en noaz en he delt, a lakeas Kam da c'hoarzin divar he goust, evelse ive hor zalver Jesus-Krist, dre he varo mezuz var ar groaz, en deuz lakeat ar baianet da ober goab anezhan, hag ar iuzevien da vlas-femi an hano santel a Zoue; mes evidompni, kristenien fidel, ez eo deuet da veza, dre ar maro mezuz-se, eur zoursen a c'hras hag a zilvidigez.



EIL LODEN

ADALEC ABRAHAM BETEG MOIZES

(Adalec ar bloaz 2000 betek ar bloaz 1500, pe var dro, araoc donedigez hor zalver.)

10. Galvidigez Abraham, pe, Abraham galvet gant Doue.

An dud, dre ma creske an niver anezho, a deuas adarre da ancounac'haat an Aotrou Doue, ha da zilezel he zervich, evit adori ar grouadurien, evit adori an traou crouët. Setu ar pec'het a reer anezhan ar pec'het a *idolatri*. Bez' ez oa coulsgoude e carter Haran, e bro Kaldee, eun den hag a veve en eur zantelez vraz. He hano a oa Abraham. Doue a jozas an den-ze evit ma teuje, heñ hag he lignez, da zalc'her var an douar ar guir feiz hag an esperans er zalver promettet. Doue a lavaras eta da Abraham: «Kuitañ ho pro ha ti ho tad, ha deuit d'ar vro a ziscouezinn deoc'h. Me ho lakaï da veza tad da eur bobl braz, hag ennoc'h e vezo benniget kement rumm-dud a deui er bed.»

Abraham a zentas; dont a reas da jom da vro Kanaan gant Sara, he bried, ha Lot, he niz, gant he zervicherien, he loanet, ha kement tra en devoa. Ar vro-ze a ioa ker mad ha ken druz an douar ennhi, ma'z oa hanvet: «ar vro e leac'h ma red al leaz hag ar mel.» An Aotrou Doue en em ziscouezas neuze da Abraham evit an eil gueich, hag a lavaras dezhan: «guel ar vro-ma! He reiñ a rinn d'az lignez.» Abraham a zavas ractal eun aoter evit discouez da Zoue he anaoudegez vad.

11. Vertuziou Abraham.

1. *He garantez evit ar peoc'h.* — Etre pastoret Abraham ha pastoret Lot e oa savet eun tamm trouz bennac divar benn ar peuri. Abraham, pehini a garie ar peoc'h, a lavaras neuze da Lot: «va mignoun, arabad eo e ve



tamm trouz ebet entrezomp; rac breudeur oump evel a c'houzoc'h. Er vro-ma ez euz plas aoualc'h da veva evidomp hon daou. Pellaït eta diouzinn, me ho ped, ha choazit evit mont da jom enghan al leac'h a gavoc'h guella. Mar d'it a zeou, me ielo a gleiz; mar d'eo guell ganeoc'h mont a gleiz, me ielo a zeou.» Lot a joazas ar vro gaër a zo e kichen ster ar Jourden, hag a ieas da jom da Zodom. Abraham a jomas e kichen Hebron.

2. *He galoun distag dioc'h an danvez.* — Nebeut amzer goude, kear Sodom a oue kemeret gant pevar roue euz ar broïou tosta. Ar re-ma a gassas gantho kement tra vad a gavchont e kear, ha, dreist oll, Lot hag he oll danvez. Abraham, o veza clevet ar c'helou-ze, a redas gant tri c'hant-trivac'h euz he zervicherien varlerc'h ar pevar



roue. Ho faka a reas, hag e lamas digantho kement tra o devoa kemeret: evelse e tennas euz a-dre ho daouarn Lot hag he zanvez. P'edo o tistrei d'ar gear goude an abaden-ze, Melchisedek, roue Salem ha belec ar guir Doue, a deuas var ne hent d'he ziarbenn, hag a reas eur sacrisfis da zoue, gant bara ha guin, evit he drugarekaat; ha

goudeze e vennigas Abraham he unan. Neuze roue Sodom a lavaras da Abraham: «roït dinn an dud o devoa ar rouanet fall-ze casset gantho evit beza ho esclavourien, ha dalc'hit ganeoc'h an oll draou all.» Mes Abraham ne falvezas ket dezhan kemeret netra evithan he unan.

Evel Abraham en deuz lamet digant ar ronanet-se kement tra o devoa casset gantho, evelse ive hor zalver Jesus-Krist en deuz diframmet euz a-dre daouarn an droucsperet an den a ioa couezet dre ar pec'het a zindan he c'halloud. Evit digass da zonch d'an dud euz ar victor-ze betec fin ar bed, hor zalver en deuz ive instituet eur sacrificis heñvel ouz hini Melchisedek, a zindan ar spesou euz ar bara hag euz ar guin, hag ar sacrificis-se eo ar sacrificis santel euz an oferen.

3. *Feiz Abraham.* — Eun nozvez Doue a gassas Abraham dirac he delt, hag a lavaras dezhan: «sao da zaoulagad etrezec an eñv, ha count, mar gelles, ar steret a zo o para e barr an oabl. Ker braz hag an niver anezho e vezo an niver euz an dud a deuio euz da liguez.» Divezatoc'h Doue en em ziscouezas dezhan adarre, hag a gomzas outhan evel-hen: «me fell dinn da gemeret evit va mignoun; me roïo d'id eul liguez ha ne c'hello den niveri an dud a deui anezhi. Ne c'houlennan diganes nemet eun dra, nemet ma talc'hi mad dinn bepret. Setu ama ar merk euz ar vignounach a vezo etre te ha me: an oll baotret a c'hano euz da liguez a vezo *circonciset* abenn eiz dez goude ho ginivelez. Rac Sara, da bried, a roïo d'id eur mab hag a vezo Isaac he hano.» Abraham a gredas an Aotrou Doue, hag, evel ma rene he vuez dioc'h he greden, he feiz a dennas varnhan gras ha carantez he grouër.

4. *An digemer calounec a rea d'an dremenidi.* — Eun dervez, epad an añv, d'ar mare m'oa tomma an heol, tri den divroad a ioa o tont gant an hent, tost da delt Abraham. Abraham, o veza ho guelet, a ieas ractal d'ho diarbenn, hag, en eur stoui dirazho, e lavaras d'an hini anezho en doa doare da veza dreist ar re all: «Aotrou, ne dremenit ket dirac va zelt eb ober eur pennadic ehan; deuit da ziscuiza dindan ar vezen-ma, ha kemerit eun

dra bennac da greñfaat ho caloun.» Sara en em hastas neuze da ober kouign gant ar flourra bleud e devoa, hag Abraham a roas urs da laza ha da lakaat da boazat guella leuë a ioa er c'hraou. P'oa poaz ar c'houign hag al leuë, e servichas anezho d'an dremenidi gant leaz da eva, hag amann da lakaat var ar c'houign. Goude ar pred-bouetze, an hini en doa doare da veza ar c'henta euz an tri den divroad, a lavaras da Abraham: «dout a rinn adarre abenn bloaz ama, ha neuze Sara e devezo eur mab.» Abraham a anavezaz kerkent oa an Aotrou Doue he unan, ha daou eal ganthan, eo a ioa deuet d'he di a zindan furm eun tremeniad.

5. *He garantez evit an nessa.* — Abraham a ieas eur pennad da ambroug an tri den divroad var hent Sodom. Neuze an Aotrou Doue a lavaras dezhan: «ar muzul euz a bec'hejou Sodom ha Gomorr a zo deuet da veza barr, hag ar pec'hejou-ze a c'houlen venjans.» Abraham en devoa eur garantez tener evit he vreudeur, peger braz pec'herien bennac ma'z oant. O clevet an Aotrou Doue o comz evelse, e oue spountet, hag e lavaras: «o va Doue, ha coll a reot-hu an hini a vev en ho toujans hag en ho carantez gant an den difeiz ha direol? Ma ve e Sodom anter-cant den a zoujans Doue, ha ne deuffac'h-hu ket da espern ar gear oll abalamour dezho?» Hag an Aotrou Doue a respountas: «eo, he espern a raffenn.» Abraham a gendalc'has neuze da bedi ha da azpedi betec ma lavaras dezhan an Aotrou Doue: «ma ve ebken e Sodom dec den hag e vevfe e va doujans hag e va c'harantez, e pardounfenn c'hoaz d'ar gear oll abalamour dezho.» Mes an dec den-ze ne ouent ket cavet, ha setu perac antronoz-vintin e oue sevenet ar gourdrouzou spountuz douget gant an Aotrou Doue. Goude m'o devoa an elez casset gantho Lot, niz Abraham ha den a zoujans Doue, gant he c'hreg hag he ziou verc'h, an Aotrou Doue a lakeas da goueza var Zodom ha var Gomorr eun diluch a zoufr hag a dan, hag an diou gear fallacr-se a oue devet ha pulluc'het gant kement den a ioa o chom



ennho. — Greg Lot, o veza sellet adreñ he c'hein en despét d'an difenn great dezhi gant an eal, a oue chenchet en eur bern c'hoalen. Ar vro oll a zo deuet da veza eul lenn dour sall kemmesket gant souffr, evit reiñ testeni betec fin ar bed e deuz tennet varnhi gueich all malloz an Aotrou Doue dre zizursiou ha fallagriesiou an dud a ioa o chom ennhi.

6. *He speret a zacrifis.* — Abenn bloaz goude, Sara a lakeas er bed eur mab. Abraham a roas d'ar mab-se an hano a Isaac. He garet a rea euz a greiz he galoun. Pa oue deuet ar c'hrouadur da veza braz, Doue a lavaras d'he dad eun nozvez a oue: « Abraham, kemerit Isaac, ar bugel-ze a garit kement dre n'o peuz ken mab nemethan, hag it ganthan var menez Moria evit ober eno dinnme ar zacrifis euz he vuez. » Eb lavaret gric hag eb ehom tamm da vare'hata, Abraham a zavas dioc'htu hag en em lakeas da faouta ar c'heuneud a dlie servichout da c'hoëza an tan evit ar zacrifis. Goudeze e sammas ar c'heuneud-se var eun azen, ha setu heñ en hent gant daou zervicher

hag Isaac. Abenn an trede dervez e velas a-ziabell al leac'h ma'z ea varzu enghan. Neuze e lavaras d'he zervicherien : « chomit ama d'am gortoz ; va mab ha me a ia da adori Doue var ar menez. » Kemeret a reas ar beac'h-keuneud divar gein an azen evit hen lakaat var chouc Isaac, ha goudeze ez ejont adarre ho daou en hent evit pignat var beg ar menez. Epad ma kerzent evelse ho daou, Isaac a lavaras evel-hen : « Va zad, setu ama zur pe a dra da c'hoëza an tan evit ar sacrificis, mes an bini a die beza kinniget da Zoue var an tan-ze, e peleac'h ema? » — « Va mab, eme Abraham, Doue a bourveo. » Pa ouent erruet el leac'h merket gant Doue, Abraham a

zavas eun aoter, ha, gonde beza renket ar c'heuneud var an aoter-ze, e liammas he dreïd hag he zaouarn da Isaac, hag hen iakeas var c'horre ar c'heuneud. Neuze ec'h asten-



nas he zorn hag e crogas en he gountel evit ober da Zoue ar sacrificis euz a vuez he vab. Mes kerkent eun eal en em zisconezas dirazhan, hag a lavaras dezhan a berz an Aotrou Doue ha gant eur vouez creñ : « Abraham, Abraham, ne astennit ket ho torn var ar bugel, ha ne rit drouc ebet dezhan. Anaout a ran brema ema doujans Doue en ho caloun, p'e guir, evit senti outhan, n'o peuz ket espernet ho mab, ha eoulsgoude n'o peuz ken mab nemethan. » Abraham, o veza savet he zaoulagad da zellet en dro dezhan, a velas adreñ he gein eur maont, ha ractal

e lazas ar maout-se evit her c'hinnig da Zoue e sacrificis e plas he vab. An eal a c'halvas Abraham evit an eil gueich, hag a lavaras dezhan a vouez huel: «hen touët em euz dreizon va unan, eme an Aotrou Doue: abalamour n'o peuz ket espernet ho mab, ha coulsgoude n'o peuz ken mab nemethan, me ho pennigo hag a lakaïo an niver euz an dud a deui euz ho lignez da veza par d'an niver euz ar steret a zo e barr an oabl, ha d'an niver euz ar greunennou treaz a zo var aochou ar mor. Hag an oll boblou euz an douar a vezo benniget en *Hini a dle genel euz ho lignez*.

Evel Abraham, dre m'eo en em skignet ar vouenn anezhan dre ar bed, a zo deuet da veza tad da eleiz a voblou, evelse ive hor zalver Jesus-Krist, dre he c'hoad scuillet var ar groaz, a zo deuet da veza tad d'an oll gristenien, d'ar hobl braz ha nevez-se a zo anezhan brema e kement corn zo var an douar. — Sara a zo eur merk euz an Ilis, pried Jesus-Krist. — An Ilis a dlie ive guelet he bugale genta, ar verzerien, casset d'ar maro evel Isaac, hag zr sacrificis-se a dlie ive divezatoc'h lakaat da greski muioc'h-mui an niver euz he bugale evit he brassa henor ha joa.

## 12. Isaac a zimez da Rebecca.

Abraham, o veza deuet da veza coz, a falvezas dezhan choaz evit he vab eur vaouez a zoujans Doue. Lavaret a reas eta d'he zervicher fidel, Eliezer: «kea d'ar vro ma'z oun ginidic anezhi, ha clask eno eur vaouez evit va mab Isaac; mes divoal avad da gemeret evithan unan euz a verc'het bro Kanaan, unan euz ar merc'het-se n'o deuz na feiz na doujans Doue.» Ar zervicher a roas he c'her e raje ar pez a c'houlenne Abraham. Setu heñ eta da gemeret dec cañval, da zamma varnho tenzoriou he vestr, ha d'en em lakaat en hent evit mont da Haran, d'al leac'h m'en doa bevet Nakor, breur Abraham. Pa erruas eno, e chomas a za gant he gañvalet dirac eur puns a ioa e kichen kear, hag e reas goustadic ar beden-ma da Zoue: «va Doue, emezhan, va zicourit en deiz-ma, ha grit trugarez da Abraham, va mestr. Merc'hed iaouank kear a

deuio bremaïc ama da gerc'hat dour. Ma lavar unan anezho dinn : evit euz va fod, ha va list da denna dour evit rei ive da eva d'ho cañvalet ; me anavezo dre eno, o va Doue, e vezo hounnez an hini o peuz galvet da veza pried da Isaac. »

Kerkente teuas dioc'h costez kear eur plac'h iaouank, he hano Rebecca, hag a ioa he modesti par d'he genet. Eur pod a ioa ganthi var he scoaz. Diskenn a reas e tal ar feunteun da garga he fod, ha p'edo o tont kuit, Eliezer a lavaras dezhi : « m'o peffe ar vadelez da rei dinn eur banne dour da eva? » — « Evit, emezhi gant eur vouez dudiuz, » ha ractal ec'h astennas he fod evit rei dezhan da eva. P'en devoue evet, hi a lavaras c'hoaz : « mont a ran da denna dour evit rei ive da eva d'ho cañvalet. » Neuze e tiscargas he fod en eul laouer, hag ez eas adarre da denna dour evit ar c'hañvalet. Eliezer a zelle outhi gant eun ear souezet hag eb lavaret ger. P'o devoue ar c'hañvalet evet leiz ho c'hof, e kinnigas dezhi ruillennou da lakaat ouz an dioucouarn, ha diou jadennic aour da lakaat en dro d'an divreac'h ; ha goudeze e c'houlennas diganthi da biou oa merc'h, hag ouspenn, ha plas a ioa en he c'hear evit he loja. Hag hi a respountas : « me zo merc'h da Vathuel, mab Nakor. E ti va zad ez euz colo ha foënn eleiz, ha plas, ar pez a renker, evit ho loja, c'houi, hag ar chañvalet a zo ganeoc'h. » Eliezer a adoras an Aotrou Doue hag a lavaras enghan he unan : « benniget ra vezo an Aotrou Doue en deuz va digasset da di breur va mestr ! »

Neuze e tiskennas e ti Vathuel ; mes ne falvezas dezhan dibri tamm ken n'en devije great he gevridi. Lavaret a reas eta dioc'htu : « mar o peuz c'hoant da ziscouez carantez d'am mestr, livirit-heñ dinn ; ma n'o peuz ket, me a ia en dro. » Laban, breur Rebecca, ha Bathuel, a respountas : « Doue eo en deuz great an taol-ma ; setu ama Rebecca, kemerit-hi, ha cassit-hi ganeoc'h. » Var gement-se Eliezer a drugarekeas adarre an Aotrou Doue. Neuze e roas da Rebecca podou aour hag arc'hant, ha dillad caër ; rei a reas ive a bep seurt traou d'he mamm

ha d'he breudeur. Goudeze e oue eur goan vraz; an oll a oue laouen epad ar goan-ze: caloun peb hini a zride gant ar joa. Antronoz-vintin, tad ha mamm ha breudeur Rebecca he bennigas, hag hi a gimiadas dioutho evit dont da veza pried da Isaac.

Abraham a vevas betec an oad a 175 vloaz, ha betec he varo e oue benniget gant Doue e peb tra.

### 13. Esaü ha Jacob.

Isaac ha Rebecca a jomas ugent vloaz eb caout bugale. Doue a zelaouas erfin ho fedennou hag a roas dezho daou vab. Ar c'henta a oue hanvet Esaü, hag an eil, Jacob. Esaü a ioa he groc'hen rouz ha goloët a vleo, hag he c'her huel ha dichec. Jacob a ioa flour ha flamm he groc'hen, hag eun den sioul ha didrouz. Esaü en em roas d'ar chasse ha d'al labour-douar; Jacob a oue pastor deñvet. Isaac a garie muioc'h Esaü, abalamour hema n'en devoa aoun rac netra; hag he vrassa plijadur oa dibri euz ar c'hig-gouez a deue gant Esaü d'ar gear, pa veze bet o chasseal. Rebecca, hi, a garie muioc'h Jacob, ar bugel dous ha didrabaz, abalamour Doue en devoa lavaret dezhi e vije Jacob savet eun deiz dreist he vreur.

Eun-dervez m'en doa Jacob lakeat poaza evithan eur pladad legumach, Esaü a erruas en ti, bet o chasseal. «Ro dinn ar pladad legumach-se, emezhan d'he vreur; rac dare oun da vervel gant an naoun.» — Mar kerez, eme Jacob, reï dinn d'az tro da vir a vab hena.» Hag Esaü a respontas: «mad! dare oun da vervel gant an naoun; da betra e servicho dinn va guir a vab hena?» — «Hen toui a rez var da le, eme Jacob?» Hag Esaü hen touas, ha goudeze e tebras hag ec'h evas, eb beza tamm nec'het gant he vir a vab hena en devoa guerzet ker buhan hag evit ken nebeut a dra.

Jacob a deuas evelse da gaout ar renk kenta var Esaü. Er memes tra ive, en amzer hor zalver Jesus-Krist, ar bafanet a deuas da gaout ar renk kenta var ar iuzevien, dre ho aket da zelaou an Aviel var behini ar iuzevien o devoa great faë.



Isaac, o veza deuet da veza coz ha fall-fall en he velet, a lavaras eun deiz da Esaü: « guelet a rit, va mab, oun dija oajet braz, hag e c'hellan mervel euz an eil dervez d'egile. Kemerit eta oc'h armou hag it da jasseal, ha, p'o pezo paket eun dra bennac, poazit-heñ er feson ma c'houzoc'h e cavan guella, ha goudeze me roio deoc'h va bennoz abarz mervel.» Esaü a ieas ractal er meaz. Hogen, Rebecca e devoa clevet ar c'homzou-ze, ha setu hi da vont d'ho c'hounta da Jacob, ha da alia hema da glask beza kemeret evit Esaü. Lakaat a reas da boazat diou c'havric vihan; rei a reas da Jacob dillad Esaü; en dro d'he zaouarn ha d'he c'houzoug e lakeas croc'hen blevec an diou c'havric, ha goudeze her c'hassas da gaout he dad gant ar pladad kig poaz.



Isaac a c'houlennas: «piou oc'h-hu, va mab?» Ha Jacob a respountas: «me eo Esaü, ho mab hena; debrit brema, va zad, ha roit dinn ho pennoz.» Neuze Isaac a lavaras c'hoaz: «tostañt ama, evit ma touchinn ouzoc'h, ha ma'c'h anavezinn ha c'houi eo e guirionez va mab Esaü.» Jacob a dosteas, hag Isaac, o veza touchet outhan gant he zaouarn, a lavaras adarre: «ar vouez a glevan eo mouez Jacob, mes an daouarn a douchan outho eo

daouarn Esaü.» Evelse Jacob ne oue ket anavezet. He dad, o veza debret hag evet, her bennigas en eur lavaret: «ra zeui an Aotrou Doue da rei deoc'h gant largentez ar gliz euz an eñv bag an druzoni euz an douar! Ra zeui an oll boblou euz ar bed da blega dindannoc'h ha d'oe'h henori! Ra vezo milliget an nep piou bennac a roi he valloz deoc'h, hag an nep ho pennigo, ra vezo hennez benniget cant ha cant mil gueich!!»

A veac'h oa eat Jacob dioc'h he dad pa erruas Esaü; ha setu hema o vont da lavaret da Isaac, en eur ginnig dezhan ar pez en doa paket o chasseal: «savit-la, va zad, ha debrit.» Isaac, souezet braz, a c'houlennas diganthan: «pion oc'h-hu-ta?» Hag Esaü a respountas: «me eo Esaü, ho mab hena.» Isaac a oue soueztloc'h eget biscoaz pa anavezaz penaoz oa bet faziet. Mes Esaü a icas eur gounnar direiz ennhan: «an troïdeller fall! Emezhan, en eur gomz euz a Jacob; dija en devoa lamet diganeñ va guir a vab hena, ha setu brema en deuz adarre laëret bennoz va zad!» Kement a zrouc a ioa ennhan ma lavaraz e lazche he vreur. Rebecea, o veza elevel an dra-ze, a oue spountet oll, hag a lavaraz da Jacob: «tec'hit ac'hann, va mab, hag it da Haran, da di va breur Laban, ken na vezo deuet ho preur da zoussaat en ho keñver.» Jacob a zentas hag en em lakeas ractal en hent.

#### 14. Jacob o tec'het euz ar gear hag o vont da jom da ñi Laban.

Epad m'edo Jacob o tec'het euz ar gear, e teuas an noz varnezhan. Skuiz gant an hent en devoa great, e kemeraz eur mean da lakaat a zindan he benn hag ec'h en em roas da gousket. Neuze e velas, en eun uvre, eur skeul a ioa he zroad var an douar hag he beg harp en eñv. Elez Doue a bigne hag a ziskenne euz an eil penn d'egile euz ar skenl, hag an Aotrou Doue he uman a ioa alcodet oe'h ar beg anezhi. Ac'hano e lavaraz da Jacob: «me eo Doue Abraham ha Doue Isaac. Me roi deoc'h ha d'an dud euz ho lignez an douar var behini e cous-



kit, hag an oll boblou euz ar bed a vezo benniget ennoc'h hag *en Hini a dle genel euz ho lignez.*» Jacob, o veza di-hunet, a lavaras gant eun doujans vraz: «an Aotrou Doue a zo e guirionez ama; ia, ama ema ti an Aotrou Doue ha dor an eñv.» Neuze e kemeras ar mean, e savas anezhan en he za, hag e scuillas eol var he c'horre evit he gonzacri d'an Aotrou Doue. Ar plas-se a oue hanvet ganthan Bethel, da lavaret eo, *ti Zoue.*

Al leac'h-se a zo eur merk euz hon ilizou e pere ema o chom an Den-Doue. En ilizou-ze ive, guelloc'h eget e leac'h all ebet, an elez a gass da Zoue hor pedennou hag a zigass deomp grasou Doue.

Goudeze Jacob a ieas adarre gant he hent, hag a erruas e kichen eur puns hag a ioa eur mean braz var he c'horre. Teir vanden-zeñvet a ioa gourvezet tro var dro. Jacob a lavaras d'ar bastoret: «va breudeur, euz a beleac'h oc'h-hu?» — «Euz a Haran,» emezho. — «Neuze, eme Jacob, ne anavezit-hu ket Laban, mab Bathuel?» — «Eo avad, a respountas ar bastoret; setu ama Rachel, he verc'h, o tont gant he banden-deñvet.» Jacob n'en devoue ket kent guelet Rachel o tont ma'z eas affo da lamet ar mean pounner a ioa var c'horre ar puns, evit rei da eva d'he deñvet; goudeze e saludas ar plac'h iaouank gant eun

ear laouen ha carantezuz. Daëlou a joa a deuas en he zaoulagad pa lavaras dezhi oa mab da Rebecca, c'hoar d'he zad. Rachel a redas ractal da gounta an dra-ze d'he zad, hag hema a deuas dioc'htu da zigemeret Jacob. Briata a reas he niz gant carantez, hag her c'hass a reas rac eün ganthan d'he di. Jacob a jomas eno ugent vloaz da zivoal deñvet Laban. Petra bennac ma claskas Laban bihannaat e meur a feson ar gommanant en doa lavaret a roje d'he niz, Jacob a oue coulsgoude benniget gant Doue, hag a deuas da veza pinvidic braz. Meur a vloaz a ioa m'oa dimezet, ha bez' en devoa cleiz a zervicherien, a zeñvet, a c'heor, a gañvalet hag a ezen.

### 15. Jacob o tistreï d'ar gear.

Laban, o velet Jacob ker pinvidic, en devoue avi outhan, hag ato e veze o clask noazout dezhan. Doue a lavaras neuze da Jacob: «distroït da vro ho tadou, me a vezo ganeoc'h.» Jacob en em lakeas ractal en hent gant kement tra en devoa. Erruet e kichen ster ar Jourden, el leac'h m'ema an disparti etre bro Kanaan hag ar vro ma teue anezhi, en devoue aoun rac he vreur Esaü. Cass a reas cannadet d'he gaout evit ober ar peoc'h ganthan. Ar re-ma a deuas en dro e berr amzer, en eur lavaret: «Esaü a zo erru d'ho tiarbenn, ha pevar c'hant den ganthan.» O clevet kement-se, Jacob a greskas muioc'h-mui he spount. Neuze e reas ar beden-ma. «Va Doue, emezhan, n'em oa nemet ar vaz-ma pa dreuzis ar Jourden brema ez euz ugent vloaz. Mes c'houi o peuz roët dinu ho pennoz, ha setu me o tistreï gant bandennadou vraz a loanet. Va zennit, me ho ped, euz a-dre daouarn va breur.» Epad an noz eun eal a deuas da c'hourin outhan a zindan furm eun den. Ha caër en devoue an eal, ne c'hellas ket reï lamm da Jacob. Chom a rejont evelse da c'hourin an eil ouz egile betec ar mintin. Neuze Jacob a lavaras d'an eal: «n'ho lezinn ket da vont kuit ken n'o pezo va benniget.» An eal her bennigas hag a lavaras dezhan: «hiviziken e vioc'h galvet Israël, da lavaret eo, *creñ a enep Doue.*

Evel Jacob n'en devoa mui a leac'h da gaout aoun rac netra goude ar victor-ze en doa gounezet var eun eal, evelse ive an Ilis catholic, goude ar victor e deuz gounezet var ar re a reas brezel dezhi epad an tri c'hant vloaz kenta, a zo sur hiviziken da veza ato treac'h d'he oll enebourien.

Pa zavas an heol, Jacob a velas Esaü o tont gant he bevar c'hant den. Neuze e reas teir vanden euz he vugale, euz he zervicherien hag euz he loanet, ha goudeze ez eas he unan araoc etrezec he vreur. En em strinka a reas d'an douar dirazhan abenn seiz gueich, abarz erruout betec ennhan. Esaü, oc'h he velet, a ziredas d'he gaout, hag en em daolas etre he zivreac'h, an daëlou en he zaoulagad. Bugale Jacob a dosteas neuze hag en em strinkas ive d'an douar dirac Esaü. Jacob a ginnigas goudeze d'he vreur diou vandennadic deñvet. Mes Esaü a lavaras dezhan: « va breur, me zo pinvidic aoualc'h, dalc'hit ganeoc'h ar pez o peuz. » Couls goude Jacob her pedas kement ha ker brao m'ho c'hemeras erfin.

Neuze Jacob a ieas adarre gant he hent varzu bro Kanaan evit mont da di he dad, Isaac. He galoun a ioa leun a anaoudegez vad e keñver an Aotrou Doue, abalamour d'ar grasou en devoa recevet diganthan. Isaac, he dad, a ioa beo c'hoaz: dridal a reas he galoun gant ar joa, pa erruas er gear ar mab-se a ioa bet keit all pell diouthan. Mes prest goude e varvas, d'an oad a 180 vloaz: Esaü ha Jacob hen lienas hag a lakeas he gorf er bez.

## 16. Joseph e ti he dad.

Jacob en devoue daouzec mab. Ar guella anezho oa Joseph; setu perac Jacob a garie Joseph muioc'h eget he vugale all, hag a lakeas ober dezhan eur zaë gaër, marellet. Breudeur Joseph, o velet kement-se, a deuas da gaout avi outhan.

Eun dervez m'edont o tivoal al loanet, ha Joseph gantho, hema ho guelas oc'h ober eun dra fall bennac, hag a ziscuillas an dra-ze d'he dad evit miret na deujent mui da goueza en eun hevelep pec'het. He vreudeur a zal-

c'has cassouni outhan abalamour da gement-se, ha n'o devoa mui ger mad ebet da lavaret dezhan.

Joseph a gountas dezho eun dervez eun uvre en devoa bet: « me zounje dinn, emezhan, edomp, c'houi ha me, oc'h endramm ed; ha va herdinn-me a zave hag a jome en ho za, e leac'h ho re-c'houi a ioa renket tro-var-dro dezho var ho gourvez, egis pa vijent oc'h ho adori. » He vrendeur a respontas: « daoust ha te a vezo roue var-nompni? » Eur veich all e lavaras dezho adarre: « me'm euz uvreet c'hoaz edo an heol, al loar, ha gantho unnee stereden, oc'h va adori. » He dad her scandalas var gement-se, en eur lavaret: « daoust ha da vamm, da vrendeur ha me, a dle en em strinka d'an douar dirazoud-te? » Divezatoc'h coulsgoude, o veza taolet muioc'h a evez ouz an uvre-ze, Jacob a deuas da zounjal oa marteze he vab ker, Joseph, galvet gant Doue da ober traou braz ha burzuduz. Mes he vugale all n'o devoue nemet muioc'h-mui a gassouni hag a vouarizi ouz ho breur, dre ma teue hema da gounta dezho ar seurt uvreou-ze.

#### 17. Joseph guerzet da varc'hadourien a zianveaz-bro.

Eun dervez Jacob a lavaras da Joseph: « ho preudeur a zo pell ac'hann o tivoal ho loanet; it da velet penaoz ema ar bed gantho. » Joseph en em hastas da zenti hag a ieas ractal en hent. Kerkent ha m'o devoue he vrendeur he velet o tont etrezec enno, e leverjont an eil d'egile: « setu a-hont an *uvreer*; saillomp varnhan ha lazomp-heñ. Goudeze ni daolo he gorf en eur puns, hag a lavaro e vezo bet taget ha lonket gant eul loan gouez bennac. Ni velo neuze da betra e vezo bet talvezet dezhan he uvreou. » Ruben, ar c'hossa anezho, o veza clevet he vrendeur all o comz evelse, a lavaras: « arabad eo, emezhan, arabad eo he laza, na scuill he c'hoad, taolit-heñ kent er puns seac'h-ma. » Ruben ne gomze evelse nemet evit clask an tu da zavetei he vuez da Joseph, ha d'her c'hass en dro da di he dad.

Hogen, a veac'h oa erruet Joseph e kichen he vrendeur ma teuas ar re-ma da lamet diganthan he zaë marellet,



ha d'hen teuler en eur puns coz ha seac'h. Neuze ec'h azezchont evit dibri ho fred. Epad m'edont o tibri, setu o tremen ebious dezho marc'hadourien a ziañveaz-bro, a ioa o vont d'an Ejipt gant ho c'hañvalet, hag ar re-ma sammou marc'hadourez gantho var ho c'hein. Juda, o velet ar varc'hadourien-ze, a lavaras d'he vreudeur: « petra dalvezo deomp beza lazet hor breur? Daoust ha n'e ket guelloc'h deomp he verza ha beza kuit da ruzia hon daouarn gant he c'hoad? » Ar pezh a lavare Juda a oue cavet mad gant he vreudeur. Ar re-ma eta a dennas Joseph euz ar puns seac'h hag her guerzas ugent pezh arc'hant. Caër en devoue Joseph gouela ha pedi he vreudeur da gaout truez outhan, ar varc'hadourien a ziañveaz-bro her c'hassas gantho d'an Ejipt.

Coulsgonde Ruben n'edo ket var al leac'h pa oue guerzet Joseph. O veza eat d'he glask d'ar puns, e rogas he zillad gant he c'hlac'har hag he zizesper pa velas n'edo mui eno, ha goudeze e lavaras d'he vreudeur: « ne velan mui ar bugel; petra deuinn-me da veza? » Mes he vre-

deur ne rejont van ebet ouz he glevet. Laza a rejont neuze eur c'havric, ha, goude beza soubet saë Joseph en he goad, e cassjont anezhi d'ho zad, en eur lavaret: «setu ama eur zaë hag or beuz cavet; guelit ha n'e ket hini ho mab eo?» An tad a lavaras dioc'htu: «eo zur, hini va mab eo; ah! eul loan gouez bennac en deuz taget Joseph.» Jacob a viscas ractal dillad caoñ, ha ne ehane da vouela gant ar c'heuz en devoa d'he vab. Bez' e oue pell amzer eb gellout kemeret plijadur gant netra, nag ober laouenedigez gant den.

Joseph, e ti he dad, e creiz he drubuillon, hag er renk huel da behini e oue savet erfin, a zo eur merk euz hor zalver Jesus-Krist.

Evel Joseph, hor zalver Jesus-Krist a denn varnhan cassouni ha gouarizi he vreundeur, abalamour d'he zantelez, d'ar prezegennou a rea a enep techou fall an dud, hag abalamour d'ar peñz o devoa discleriet ar brophetet divar benn ar c'hloar e pehini e thie erruout.

Evel Joseph, hor zalver Jesus-Krist a oue guerzet, tamallet e faoz ha beuzet he ene en eur mor a anken. E creiz he boaniou en devoue ive eun torfetour a bep tu dezhan; unan euz an dorfetourien-ze en em gollas evit biken; d'egile e lavaras e vije eüruz ganthan en he varadoz.

Evel Joseph, hor zalver Jesus-Krist a zavas euz ar stat a boan hag a zismegans e pehini oa bet lakeat evit mont da azeza, leun a c'hloar, en tu diou d'he dad; hag eno e ren hag e reno da virviken; ac'hano e ra d'an dud anaout he c'halloud, hag e tigass ive aveichou, evel Joseph, pennadou eucrez d'ar re a gar ar muia evit gulet peseurt caloun o deuz en he geñver; ac'hano c'hoaz e pardoun da gement hini en deuz fisians en he drugarez, hag e carg erfin euz he c'hrason ar re a laka ho oll zoursi d'he zervicha ha da blijout dezhan.

## 18. Joseph e ti Putiphar.

Coulsgoude ar varc'hadourien a ziañveaz-bro, o veza erruet en Ejipt, a verzas Joseph da Butiphar, cabiten goardou ar roue Pharaon. Hogen, Doue a ioa gant Joseph, hag a scuille he vennoz var gement tra a rea. Putiphar, o velet kement-se, a roas dezhan ar garg da gass he diegez en dro evel pa vije bet he unan ar mestr.



Abenn eun nebeut amzer, greg Putiphar a falvezas dezhi lakaat Joseph da ober eur pec'het mezuz. Mes heñ a respontas : « penaoz e c'helfenn-me ober eun torfet ker braz, ha pec'hi a enep va Doue? » Eun dervez ma n'oa nemet Joseph hag hi en ti, e rosa da anaout adarre an ioulou fall a ioa en he c'haloun, hag e crogas e mantel Joseph. Mes hema a lezas he vantel ganthi hag a dec'has kuit. Setu hi neuze o vont en egar hag o c'hervel oll dud he zi, en eur lavaret a bouez-penn : « guelit, emezbi, pebez den fallacr en deuz kemeret ama va fried. Deuet eo betec ennon da glask ober drouc dinn, ha pa'm euz savet va mouez evit goulenn sicour, en deuz lezet he vantel etre va daouarn, hag eo tec'het kuit. » Pa erruas he goaz er gear, e tiscouezas dezhan ar vantel, en eur ziscleria dirazhan ar pez e devoa dija discleriet dirac he zervicherien. Putiphar 'a ieas eun drouc braz enghan, hag a lakeas ractal teuler Joseph er prizoun, hag heñ divlamma-caër coulsgoude.

### 19. Joseph er prizoun.

Hogen Joseph a blijas kement da vestr ar prizoun ma roas hema dezhan ar garg da deuler evez euz ar brizounerien all. Prest goude e oue digasset d'ar prizoun-ze daou offiser euz a balez ar roue, an hini a zerviche guin, hag an hini a zerviche bara dezhan pa veze ous taol. Ho daou o devoue, en eun hevelep nozvez, eun uvre hag a roas dezho calz a nec'hamant. Joseph, ouz ho guelet, a c'houlennas digantho : « perac eo teñval ho penn evelse? » Hag hi a respontas : « eun uvre or beuz bet, ha n'or beuz den da lavaret deomp petra zinifi. » — « Daoust, eme Joseph, ha n'e ket da Zoue, ha da Zoue ebken, eo reiñ da anaout petra zinifi an uvreou? Livirit dinn e petra o peuz uvreet. » — « Me, eme an discarger-guin, a vele dirazon teir guinien o sevel dioc'h an douar, hag o tont da zougen deliou glaz, bleuñ, hag erfin rezinn dare. Astenn a rean va dorn da gutuill ar bodadou rezinn, ha goudeze ho goaskenn e gueren ar roue, hag e kinnigenn dezhan da eva. » Joseph a respontas : « an teir guinien a zinifi

tri dervez; abenn tri dervez ama ar roue a roïo deoc'h adarre ar garg o poa kentoc'h, hag e servichoc'h guin dezhan adarre evel a reac'h aziagent. O pet sonch ac'hanon-me neuze, ha pedit ar roue d'am zenna ac'hann; rac me zo bet taolet er prizoun-ma eb m'em beffe great drouc ebet.»

An offiser all a lavaras goudeze: «setu ama va uvre-me, emezhan; me zonje dinn em boa var va fenn teir banerad vleud; en hini a ioa var c'horre ez oa a bep seurt scaotennou ha pasteziou; mes ar re-ma a iea gant al labouset.» Joseph a respountas dezhan: «an teir banerad-se a zinifi ive tri dervez o peuz c'hoaz da veva; mes abenn an tri dervez-se ar roue a roïo urs d'ho tibenna, ha goudeze ho corf a vezo staget a zistribill ouz ar groug, hag eno e vezo debret gant al labouset.»

Tri dervez goude ec'h erruas ar pez en devoa discleriet Joseph. Ar roue a roas adarre he garg d'an discarger-guin, hag an offiser all a oue dibennet, hag he gorf staget a zistribill ouz ar groug. Mes an discarger-guin, eur veich ma oue lakeat a nevez en he garg, n'en devone mui sonch ebet euz a Joseph.

## 20. Joseph savet en eur renk huel.

Daou vloaz goude ar roue Pharaon he unan en devoe eun uvre. Caout a rea dezhan guelec seiz bioc'h lard o tifourcha euz a ster an Nil, hag o vont da beuri er guerniou a zo eno e kichen. Var ho lerc'h e teuas ive euz ar ster seiz bioc'h all hag a ioa treut evel gagnou; hag ar re-ma a lonkas ar seiz bioc'h lard. Var gement-se ar roue a zihunas. Mes o veza en em roët adarre da gousket, en devoe c'hoaz an uvre-ma: guelec a reas seiz penn-ed euz ar re gaëra, hag hi leun a c'hreun, o sevel var eun hevelep coloën. Mes ker buhan e velas seiz penn-ed all, seac'h ha moan, o tont da zibri ar re genta. Ha setu Pharaon o tibuna evit an eil gueich. Kerkent e reas clask an oll divinourien hag an oll dud desket euz an Ejipt, evit counta dezho an uvreou en devoa bet; mes



caër en devoue, ne gavas nicun hag a c'helje discleria dezhan da vad petra zinifie an uvreou-ze.

Neuze an discarger-guin a deuas erfin da zonch dezhan euz a Joseph, hag a lavaras d'ar roue : « bez' ez euz er prizoun eun den iaouank euz a vro an Hebreet hag en deuz discleriet dinn-me, ha d'an offiser all a ioa eno ganeñ, petra zinifie an uvreou on devoa bet ; hag ar pez en deuz lavaret deomp a zo deuet da veza guir evidomp hon daou. » Ractal e oue kemennet da Joseph dont da gaout ar roue, ha, pa oue erruet er palez, ar roue a gomzas outhan evel-hen : « me'm euz bet uvreou ha ne c'hell den lavaret dinn petra zinifont ; mes clevet em euz o peuz, e'houi, eur vouisiegez eb he far e keñver ar poënt-se. » Joseph a respountas : « n'e ket me, mes an Aotrou Doue ebken, eo a c'hell rei da anaout d'ar roue ar pez en deuz c'hoant da c'houzout. » Neuze, Pharaon o veza countet an daou uvre en devoa bet, Joseph a lavaras dezhan : « Doue a ro da anaout d'ar roue ar pez a dle c'hoarvezout abarz nemeur ama. Ar seiz bioc'h lard hag ar seiz penn-

ed leun a c'hreun a verk seiz bloavez e pere an eost a vezo mad ha puill, hag a roïo ed a fors. Ar seiz bioc'h treut hag ar seiz penn-ed seac'h a verk, er c'hontrol, seiz bloavez all a deuio varlerc'h ar seiz genta, hag e pere an eost a vezo fall ha scañv, ha ne roïo tamm ed ebet, coulz lavaret. Ar pez a vezo bet a re epad ar seiz vloaz kenta ne vezo ket aoualc'h evit beva epad ar seiz vloaz all-ze, hag eun naounegez vraz a vezo neuze dre ar bed oll. Mad e ve eta d'ar roue choaz eun den gouisic evit caout soursi, epad ar bloaveziou a eost mad ha puill, da lakaat dastum e grignoliou, e kement corn zo er vro, pe a dra da vaga pobl an Ejipt epad ar bloaveziou a eost fall ha tano a dle dont goudeze.»

Pharaon a blijas an ali-ze dezhan hag a lavaras: «e pelec'h e c'helfempni caout eun den hag a ve speret Doue enghan evel m'ema ennoc'h-lu? Me ro deoc'h eta galloud var an oll Ejipt; ar bobl oll a zento ouzoc'h ha ne vezo nemedon-me en tu all deoc'h.» Neuze e lamas divar he viz he voualen a roue evit he lakaat var biz Joseph; rei a reas dezhan ive da viska eur zaë euz ar re gaëra; en dro d'he c'houzoug e lakeas eur c'helc'h aour, ha goudeze e reas dezhan pignat en unan euz he girri evit ober tro kear. Eun embanner a iea araoc en eur lavaret a vouez huel: «ra zeui an oll da zoubla penn ho glin dirac an hini a zo lakeat da vestr var gement corn zo er vro!» Pharaon a jenchas hano Joseph, hag her galvas *salver ar bed*. Joseph en doa neuze tregont vloaz.

## 21. Breudeur Joseph a ia d'an Ejipt.

Dont a reas ar seiz bloavez a eost mad ha puill, hag epad an amzer-ze Joseph a roas urs da c'horren berniou braz a ed e kement kear a ioa er vro. Dont a reas ive ar seiz bloavez a eost fall, ha pobl an Ejipt a c'houlennas bara digant ar roue. Mes Pharaon a respountas: «it da gaout Joseph ha grit ar pez a lavaro deoc'h.» Joseph a reas neuze digeri ar grignoliou e pere oa gorroët an ed, hag a roas bara da gement den a ioa en Ejipt.

Coulsgoude e bro Kanaan ez oa ive naounegez, ha

setu Jacob o lavaret d'he vugale : « it d'an Ejipt da brena ed ; rac, anez, e varvimp ama gant an naoun. » Breudeur Joseph a deuas eta d'an Ejipt, dec anezho ; rac an tad en devoa dalc'het er gear Benjamin, ar iaouanka, gant aoun na vije erruet eun drouc bennac ganthan en hent.

Joseph o veza mestr var an ed, he vreudeur a renkas mont d'he gaout. En em strinka a rejont d'an douar dirazhan, mes eb he anaout. Joseph, er c'hontrol, ho anavezaz dioc'htu, hag a deuas sonch dezhan ractal euz he uvreou. Comz a reas outho eun tammic rust : « c'houi, emezhan, a zo deuet ama evit guelec doare ar vro, evit gouzout penaoz e ve eassa deoc'h dont a benn d'he c'hemeret divezatoc'h. » Hi a respountas en eur grenad : « nan, aotrou, n'ema ket ar zonch fallacr-se en hor speret. Ni a zo tud didrouz ha didrabaz, ha n'oump deuet ama nemet evit prena ed. Daouzec breur e oamp, ginidic, hon daouzec, euz a vro Kanaan. Ar iouanka ac'hanomp a zo chomet gant hon tad ; evit ar iaouanka nemet unan, hennez zo eat euz ar bed-ma. » — « Me velo, eme Joseph, ha guir eo ar pez a livirit. Evit kement-se, me ia da zalc'her ama unan ac'hanoc'h er prizoun, epad ma'z ai ar re all d'ar gear da gass an ed, ha da gerc'hat ho breur iaouanka. » He vreudeur a lavaraz neuze an eil d'egile : « n'e ket eb abeg eo e c'hoarvez an dra-ma ganeomp ; rac ni or beuz pec'het a enep hor breur. Guelec or beuz an anken euz he ene, pa bede ac'hanomp da gaout truez outhan, ha ni n'or beuz ket he zelaouet. Setu perac e couez varnomp ar barr-encrez-ma, hag emamp brema d'hon tro en drubuill hag er c'hlac'har. » Hi a zonje ne c'helle ket Joseph ho c'houmpren, rac e langach ho bro eo e comzent evelse, hag ar pez o devoa lavaret bete neuze a ioa bet troët da Joseph e langach an Ejipt. Mes Joseph n'en doa ket collet eur ger euz ar pez o devoa lavaret da ziveza entrezho, hag, o veza troët he benn en tu all, ec'h en em lakeaz da vouela.

Coulsgoude e roaz urs da gass Simeon d'ar prizoun, ha goudeze e lavaraz d'he zervicherien carga sier an divroïdi-ze a ed, ha lakaat da bep hini en he zac'h au ar-

c'hant en devoa roët, hag ouspenn, pe a dra da zibri epad an hent. An traou-ze oll o veza great egiz m'oant bet gourc'hemennet, breudeur Joseph a zammas ho zac'hadou ed var ho ezen, hag a zistroas d'ar gear.

Pa errujont e ti ho zad, e oue mall gantho counta dezhan ar pez a ioa c'hoarvezet epad ho beach. Mes pa'z ejont da c'houlouder ho zier, e ouent nec'hetoc'h eget biscoaz o caout, peb hini en he zac'h, ar priz euz he zac'had. Rac eb gouzout dezho eo oa bet lakeat an arc'hant en ho zier. Jacob, mantret-oll he galoun ha gant ar pez en doa elevet, ha gant ar pez a vele, a lavaras dezho neuze: « lamet a rit va bugale diganeñ an eil goude egile; setu aze, Joseph n'ema mui, Simeon a zo er prizoun, ha brema e fell deoc'h c'hoaz lamet diganeñ Benjamin. Nan, biken ne lezinn anezhan da vont ganeoc'h d'an Ejipt.

## 22. Benjamin a ia ive d'an Ejipt.

Coulskoude Jacob, o velet oa eñt adarre kement cuchen ed a ioa en ti, a c'hoanteas cass he vugale d'an Ejipt evit an eil gueich. Neuze Juda a lavaras dezhan: « mes, va zad, an hini a zo mestr er vro-ze en deuz lavaret a grenn, arabad oa deomp distreiñ d'he gaout nemet hor breur iaouanka a vije ganeomp. Roët deomp eta Benjamin, me a respount anezhan. » — « Mad, eme Jacob erfin, mar d'eo red he lezel da vont, grit ar pez a geroc'h. Cassit d'ar mestr-se ar pez or beuz a vella; kinnigit dezhan ive daou c'hement all a arc'hant, ha roët dezhan ouspenn ar pez o peuz cavet en ho sier gant aoun na ve bet lakeat eno dre fazi. Ra zeni an Aotrou Doue oll-challoudec da rei deoc'h ar c'hras da blijout d'an den-ze, evit ma laosko da zont d'ar gear ganeoc'h ho preur keaz en deuz dalc'het er prizoun, hag ive Benjamin, va mab muia caret! Epad an amzer-ze, me jomo ama va-unan evel pa venn o tougen caoñ d'am bugale. »

Setu eta breudeur Joseph oc'h erruout adarre en Ejipt. A veac'h en devoue Joseph ho remerket o tont, ha Benjamin gantho, ma lavaras d'he vevel: « grit d'an dud-ze

dont en ti; rac c'hoant em euz e leinfent hirio ganeñ.» Ar mevel a ieas ractal d'ho digemeret, hag a reas dezho mont en ti. Hi a grene kement a aoun o devoa, hag ho c'henta soursi a oue comz d'ar mevel euz an arc'hant o devoa cavet en ho zier. Mes heñ a respountas dezho: «n'o pezet aoun ebet!» Goudeze e tigassas Simeon d'ho c'haout, hag ez eas da rei bouet d'ho loanet.

Pa deuas Joseph dirazho, ec'h en em strinkchont d'an douar evit he zaludi, hag e kinnigchont dezhan ar pez o devoa digasset gantho. Joseph ho zaludas d'he dro gant eun ear chentil ha laouen, hag a c'houlennas outho: «hag ho tad, beo eo c'hoaz? iac'h eo ato?» Hi a respountas: «hon tad, ho servicher, a zo beo c'hoaz, hag a zo iac'h ato a drugare Doue.» En eur zellet ous Benjamin, Joseph a lavaras: «hag hennez eo ho preur iaouanka?» He vreudeur o veza respountet, «ia», Joseph a lavaras adarre: «Doue r'ho pennigo, va bugel!» Ha kerkent ez eas er meaz evit euzet an daëlou a garantez hag a joa a rede euz he zaoulagad. Goude beza goalc'het he vizach e teuas en dro, hag e roas urs da zervicha lein. Renka a reas he vreudeur ous taol, peb hini hervez he oad: ar pez a lakeas anezho da veza souezet-maro. Euz a gement seurt bouet a oue servichet, Benjamin en devoe eul loden pemp gueich brassoc'h eget an hini a oue roët d'he vreudeur. Coulskoude ar re-ma o devoe da zibri ha da eva leiz ho c'hof, hag a oue laouen braz epad lein.

Benjamin a ioa eur merk euz an abostol St. Paol, pehini a ziskenne euz he lignez. St. Paol a oue ive an diveza galvet da veza abostol, ha coulskoude e labouras muioc'h eget an oll ebestel all, hag e recevas muioc'h a c'hrasou eget n'euz fors pehini anezho. (St. Ambroas.)

### 23. Tass-arc'hant Joseph.

Joseph a falvezas dezhan gouzout hag he vreudeur o devoa kement a vouarizi hag eur galoun ker criz e keñver Benjamin evel m'o devoa bet en he geñver. Goude lein eta e lavaras d'he vevel: «cargit a ed sier an divroïdi-ze, ha lakiit arc'hant peb hini e ginou he zac'h; lakiit ouspenn

va zass-arc'hant-me e sac'h ar iaouanka anezho. » Great e oue evel m'en doa gourc'hemennet, hag he vreudeur a ieas kuit antronoz-vintiin. A veac'h oant eat er meaz euz a gear ma lavaras adarre Joseph d'he vevel : « it varlerc'h an divroïdi-ze, ha diarbennit anezho, en eur lavaret : perac, evit ar vad a zo bet great deoc'h, o peuz-hu bet ar fallagriez da laërez tass va mestr? »

Ar mevel a reas ar pezh a ioa gourc'hemennet dezhan. Paka a reas buhan bugale Jacob, hag ar re-ma, spountet-oll, a respountas d'ar pezh a damalle dezho : « penaoz e c'helfac'h-hu credi or be-ni laëret aour pe arc'hant e ti ho mestr? Evit laëroun avad ne d'oump ket, ha, mar bez cavet an tass gant unan bennac ac'hanomp, ni c'houlenn ma ve lakeat d'ar maro var an heur, ha ma teuimp oll da veza oc'h esclavourien ! » Neuze e tigorjont oll ho zier ; ar mevel a furchas ar zier-ze an eil goude egile, hag a gavas erfin an tass e sac'h Benjamin. O velet kement-se, breudeur Joseph a oue stravillet muioc'h eget biscoaz ; regi a rejont ho dillad dre an nerz euz ho dizesper, ha goudeze e tistrojont e kear da gaout Joseph. En eur erruout dirazhan, ec'h en em strinkchont oll d'an douar eharz he dreïd. Neuze Joseph a lavaras dezho : « perac o peuz-hu great an dra-ze? » Ha Juda a respountas : « ne c'hellomp lavaret netrà evit en em zifenn ; goualen Douc eo a sko varnomp abalamour d'hor peoc'hejou. Pa fell da zoue eta, ni a vezo oll esclavourien deoc'h. » — « Doue ra viro, eme Joseph, na raffenn kement all ! An hini en deuz kemeret va zass-arc'hant, hennez a vezo va esclavour ; evidoc'h-hu hag ar re all a c'hell distrei e peoc'h da gaout ho tad. » Juda a dosteas neuze ous Joseph evit counta dezhan pegement a boan en doa bet ho zad o lezel Benjamin da zont gant ho. « Ma tistroffemp brema d'ar gear eb ar bugel-ze, emezhan, hon tad a varvfe gant he c'hla-c'har. Me am euz respountet euz a vuez Benjamin ; list anezhan eta da vont en dro gant he vreudeur, ha va dalc'hit-me da esclavour en he blas. »



## 24. Joseph en em ro da anaout.

Caër en doa Joseph moustra var he galoun, deuet oa ar mare ne c'helle mui beza mestr dezhi. O veza eta roët urs d'an dud all a ioa eno da vont er meaz, e tirollas da leñva, hag e lavaras d'he vreudeur : « me eo Joseph! Ha



va zad, beo eo ato?» — Mes he vreudeur ne c'heljont respount netra, kement a aoun o devoa.

Neuze e comzas outho gant dousder hag e lavaras adarre : « me eo Joseph, ho preur, an hini o poa guerzet da varc'hadourien a ioa o tont d'an Ejipt. N'o pezet aoun ebet; rac an Aotrou Doue he unan eo en deuz va digasset en Ejipt evit ober vad deoc'h. N'e ket dre ho polontez-c'houi eo emoun ama, mes dre volontez Doue pehini en deuz roët dinn galloud var an oll Ejipt. Ha brema it buhan da gaout va zad, ha livirit dezhan : setu ama petra lavar deoc'h ho mab Joseph : Doue en deuz va lakeat da vestr var an oll Ejipt! Hastit affo dont ama, hag ez eoc'h da jom d'ar guella carter zo er vro, el leac'h m'o pezo peb tra hervez ho c'hoant; rac bez' e vezo c'hoaz pemp bloavez a eost fall.»

Pharaon en devoue ive calz plijadur o clevet ar c'he-lou-ze, hag a lavaras : « me roïo da Jacob ha d'he vugale oll vadou an Ejipt. » Joseph a gimiadas dioc'h he vreudeur, goude beza gourc'hemennet rei dezho kirri, dillad, arc'hant, ha pe a dra da zibri epad en hent.

### 25. Jacob o vont d'an Ejipt.

Pa errnas breudeur Joseph e ti ho zad, ho c'homz kenta a oue houma : « ho mab Joseph a zo beo, hag heñ eo a zo mestr var an oll Ejipt. » Jacob, o clevet ar c'he-lou-ze, a ioa heñvel ouz eun den o tihuna goude eur c'houisk tenn ha pounner, ha beac'h en devoa o credi ar pez a gleve. He vugale a gountas dezhan neuze var eun



ar pez a ioa c'hoarvezet ; hag, o velet kirri ar roue hag an traou caër a ioa ennho, e teuas erfin ennhan he unan hag e lavaras : « brema ne vank mui netra dinn p'e guir va mab Joseph a zo beo c'hoaz ; mont a rinn eta d'an Ejipt evit caout an eur d'he velet abarz mervel. »

Setu eta Jacob oc'h en em lakaat en hent gant oll dud he di : dec ha tri-ugent oant entrezho oll. Pa erruas el leac'h m'ema an disparti etre bro an Ejipt ha bro Kanaan, an Aotrou Doue en em ziscouezas dezhan hag a lavaras : « n'o pezet aoun ebet o vont d'an Ejipt ; me a lakaio ho lignez da veza eur bobl braz, hag eun dervez a zeui me denno adarre ar bobl-se euz an Ejipt. »

Juda a i eas araoc da gass da Joseph ar c'helou edo he dad en hent. Joseph a deuas ractal gant he gar da zigermeret he dad, ha kerkent ha m'her guelas e lammas d'he c'houzoug hag e vriatas anezhan en eur scuil daëlou a joa. Jacob a lavaras neuze : « brema e varvinn e peoc'h pa'm euz bet an eur d'ho cuelet eur veich c'hoaz. »

Evelse e comzas ive d'he dro an den coz Simeon, goude m'en devoue bet an eur da velet, en templ a Jerusalem, ar guir Joseph, Salver ar bed.

Joseph a i eas goudeze da gass he dad dirac ar roue, ha Pharaon o veza goulennet ous Jacob pe oad en doa, Jacob a respountas : « cant tregont vloaz zo ma'z oun beachour var an douar ; ar bloaveziou-ze a zo nebeut anezho, ha c'hoaz int bet fall : ne dostaont ket ouz an niver a vloaveziou m'o deuz bevet va zadou coz. » Joseph a roas d'he dad ha d'he vreudeur douar e carter Jessen, ar guella carter euz an Ejipt ; eno e c'heljont beva en ho eaz, ha ne vanke netra dezho euz a gement o devoa ezom.

## 26. Maro Jacob ha Joseph.

Seitec vloaz a ioa m'edo Jacob o ehom e carter Jessen, pa deuas da goueza clañv. Joseph a i eas ractal d'he velet gant he zaou vab, Ephraïm ha Manasse. Jacob a bokas d'ar vugale hag ho bennigas, ha goudeze e lavaras da Joseph : « me zo o vont da vervel ; mes Doue a vezo ganeoc'h hag a gasso ac'hanoc'h en dro da vro ho tadou coz. » Neuze e c'halvas en dro dezhan he vugale all hag he vugale vihan. Da Juda eo e roas he vrassa bennoz, en eur lavaret : « Juda, c'houi a vezo treac'h d'ar re a vezo a enep deoc'h, ha bugale ho tad en em strinko d'an douar dirazoc'h. Ar stur a jomo e lignez Juda ken na zeui *an Hini a dle beza diyasset, hag a vezo an oll boblou var c'hed anezhan.*

Ar c'homzou-ze a roë da anaout e teuje ar Messias er bed pa ne vije mui rouanet euz a lignez Juda; dont a rejont da vir en amzer ar roue Herodes, ar c'henta roue o devoue ar iuzevien ha n'oa ket euz a vouenn tud ar vro.

Erfin Jacob a lavaras : « lakiit ac'hanon e bez va zadou, e bro Kanaan, » ha goudeze e varvas. Joseph en em daolas var gorf he dad, hag her briatas c'hoaz en eur vouela. An Ejiptianet a zougas caoñ da Jacob epad dec dervez ha tri-ugent. Amzer ar c'haoñ o veza tremenet, Joseph a ieas gant he vreudeur, hag an dud a renk huela euz a lez ar roue, da gass corf he dad da vro Kanaan. Ar c'horf a ioa bet balsamet evit miret outhan da vreina.

Joseph he unan a vevas betec an oad a zec vloaz ha cant, hag a velas bugale he vugale betec an drede lignez. O velet e tostea he heur diveza, e lavaras d'he vreudeur : « Doue en devezo sonch ac'hanoc'h goude va maro, hag ho cass a rañ en dro d'ar vro en deuz lavaret da Abraham, da Isaac ha da Jacob, a roje d'an dud euz ho lignez; o pezet sonch neuze da gass va relegou ganeoc'h. » Var gement-se e laoskas he huanad diveza. He gorf a oue ive balsamet ha lakeat en eun arched. .

## 27. Patiantet Job.

En amzer ar Batriarchet e veve en Arabii eun den, he hano Job. Seiz mab en devoa ha teir merc'h; bez' en devoa, ouspenn, 7000 penn-dañvad, 3000 cañval, 500 coublad ejennet, 500 azennezet hag eleiz a zervicherien. Brudet braz oa e costez ar zao-heol abalamour d'he zanzev, ha muioc'h c'hoaz abalamour d'he zantelez.

Eun dervez, Doue lavaras da Zatan : « ac'hanta, n'az peuz-te ket guelet va zervicher Job, eun den ha n'en deuz ket he bar var an douar? » Ha Satan a respountas : « n'e ket souez e ve Job eur zervicher mad deoc'h. Daoust ha n'o peuz ket scuillet ho pennoz var he oll oberou, ha lakeat he zanzev da greski ato etre he zaouarn? Mes clas-kit eun tammic lamet diganthan ar pez en deuz, hag e veloc'h ha ne deuio ket da zilezel ho servich. » — « Mad! eme an Aotrou Doue, me ro galloud d'id var gement tra

en deuz, nemet na douchi ket outhan.» — Ha setu, eun dervez m'edo oll bugale Job o leina e ti ho breur cossa, (hema a ioa ganet da geñver an deiz-se), eun den a deuas da lavaret d'ho zad a ioa chomet he unan en he di gant he bried : «paotret Saba o deuz casset gantho oc'h ejennet hag oc'h azennezet, goude beza lazet ar re a ioa oc'h ho divoal ; n'euz nemedon-me hag en deffe gellet tec'het evit dont da zigass deoc'h ar c'helou.» An den-ze a gomze c'hoaz pa erruas eun all hag a lavaras : «tan an eñv a zo couezet var ho teñvet ha var ar bastoret, hag oll int bet pulluc'het. N'euz nemedon-me hag a ve bet espernet gant ar gurunn evit dont da zigass deoc'h ar c'helou.» A veac'h oa ar c'homzou-ze peur-achuet pa zigouezas eun trede cannad hag a lavaras : «paotret ar C'haldee o deuz casset gantho ho cañvalet ; n'euz nemedon-me hag en deffe gellet en em zavetei evit dont da zigass deoc'h ar c'helou.» Kerkent e teuas eur pevare cannad hag a gomzas evel-hen : «eur gorventenn e deuz pilet ti ho mab hena ; an ti a zo couezet en he boull, hag ho pugale a zo bet paket a zindan : oll int bet flastret ha lazet gant ar vein. N'euz nemedon-me hag en deffe gellet tec'het evit dont da zigass deoc'h ar c'helou.» O elevet ar c'heleier estlammuz-se, Job a zavas en he za, hag a rogas he zillad evit discouez pegement oa rannet he galoun. Goudeze ec'h en em strinkas d'an douar evit adori Doue, hag e lavaras : «Doue eo en devoa roët dinn va madou ha va bugale ; Doue eo en deuz ho lamet diganeñ ; ra vezo hano Doue bepret meulet ! »

Neuze an Aotrou Doue a lavaras adarre da Zatan : «guellet a rez, va zervicher Job n'en deuz ket nebeutoc'h a zoujans, na nebeutoc'h a garantez evidon, evithan da veza collet kement tra en devoa.» Ha Satan a respountas : «ia, mes an den a zo prest ato da rei he oll zanvez evit savetei he vuez hag he iec'het. N'o peuz nemet skei Job en he gorf, hag e veloc'h ha ne deuio ket d'en em dreï ha d'en em zével en oc'h enep.» — «Mad ! eme an Aotrou Doue, me hen laka etre da zaouarn ; gra dezhan ar pez a giri, nemet ne lami ket he vuez diganthan.»

— Ha setu Satan da zigass da Job eur c'hleñvet euzuz : adalec kern he benn betec plantou he dreïd, he gorf oll a oue goloët a c'houliou ; eun donjer oa sellet outhan. Ha Job, azezet var eur bern teil, a zec'he gant eun tamm pod-pri torret al lin-breïn a deue euz he c'houliou. Ebarz er stat-se, he c'hreg zoken a rea goab anezhan abalamour ma kendale'he ato da lakaat he fisians e Doue. Mes Job a scandalas anezhi, en eur lavaret : « daoust ha n'e ket



euz a zaouarn an Aotrou Doue eo or boa recevet hor madou? Perac eta ne recefempni ket ive euz he berz ar poaniou a blij ganthan digass deomp ? » Evelse Job ne zigoras ket he

vuzellou da lavaret goal gomz ebet a enep an Aotrou Doue.

Coulsgoude tri euz he vignounet, o veza clevet, petra a ioa c'hoarvezet ganthan, a deuas d'he velet. Pa errujont, ha pa daolchont ho daoulagad varnhan evit ar veich genta, ne c'heljont ket he anaout. He zaludi a rejont dre ho gouelvan hag ho hirvoud ebken, ha ne leverjont ger ebet dezhan ; rac guelet a reant oa beuzet he ene en eur mor a anken. Pa deuas erfin Job he unan da zigeri he c'hinou evit comz var eun ton clemmuz euz ar stat reuzeudic e pehini oa lakeat, he vignounet a zavas ho mouez d'ho zro evit rebech dezhan he fallagriez. Rac hi, ar spe-rejou berr ma'z oant, a zouje dezho ne c'hell Doue digass poaniou epad ar vuez-ma nemet d'an dud fall ha difeiz. Job a respountas dezho n'en devoa great biscoaz fallagriez ebet, hag a lavaras gant eun nerz-caloun ha ne vez ket aliez guelet he far : « ha pa deuffe an Aotrou Doue da

lamet diganeñ va buez, em beffe ato fisians enghan. Rac gouzout a ran em euz eur Zalver, hag e savinn adarre a varo da veo d'an deiz diveza euz ar bed; ha neuze, va c'horf o veza bet adarre roët dinn, e velinn va Doue gant an daoulagad a vezo em penn; ia, me va unan eo her guelo, ha nan eun all e va leac'h. »

N'e ket en aner eo e kendalc'has Job da gaout eun hevelep fisians e Doue. Abarz nemeur Doue her pareas dioc'h he gleñvet, hag a roas dezhan an anter muioc'h a vadou eget n'en devoa kent. Bez' en devoue adarre seiz mab ha teir merc'h, ha guelet a reas bugale he vugale betec ar bedervet lignez. Job a vevas c'hoaz 140 vloaz, ha ne oue den var an douar eürussoc'h evithan.

Patiantet Job a ioa eur merk euz a batiantet hor zalver Jesus-Krist. Abalamour d'hor pec'hejou-ni, hor zalver Jesus-Krist a zo bet ive goloët a c'houliou adalec ar penn betec an troad, ha disprijet gant ar re a ioa kent he vignounet evel eun den carget a fallagriez. — Histor Job a zesk deomp betec pegeit e c'hell mont, pa blij gant Doue, galoud an drouc-speret; kement-se a ro deomp ive da anaout perac e teu an Ilis da vennigen ha da gonzacri an dud hag an traou dre zin ar groaz ha dre an dour benniget.





### TREDE LODEN.

## AR BOBL A ISRAËL KELENNET CANT DOUE EN EUR FESON BURZUDUZ ADALEC MOIZES BETEC DAVID

(Adalec ar bloaz 1500 betec ar bloaz 1055 araoc donedigez  
hor zalver.)

### 28 Ginivelez Moïzes.

Lignez Jacob a greskas en Ejipt hag a deuas da veza eur bobl braz. Mes pignat a reas var an tron eur roue nevez, ha n'en devoa ket anavezet Joseph. Hema a deuas da gassaat ar bobl a Israëel ha da gaout aoun razhan. Reï a reas urs da laka't an Israëlitet da ober labouriou pounner, da zougen beac'hiou dreist ho galloud, ha gourc'hemenn a reas zoken ma vije taolet ha beuzet e ster an Nil an oll baotret a c'hanje etouez an Hebreet.

Hogen, eur c'hreg a Israëel a lakeas er bed eur paotr euz ar re goanta. Ar c'hreg-se ne zelaouas nemet mouez ar goad ha mouez he c'haloun, hag a guzas he hugel epad tri miz. Da fin an tri miz-se coulsgoude e velas ervad ne c'helje mui miret na vije anavezet ar pez e devoa great. Neuze petra reas? Kemeret eur baner-vrouan, starda ha cloza ar brouan tro-var-dro gant eur guiskad





pek, lakaat he bugel ebarz, ha goudeze her c'hass, paner hag all, etouez ar c'horz pe ar raoz a ioa var ribl ar ster. C'hoar ar c'hrouadur a jomas eno da gourzi, en eun tu hennac e kichen, evit guelet petra erruje. Ha setu, dre eun taol euz a Brovidans Doue, setu merc'h ar roue he unan o tont d'en em voalc'hi d'ar ster. Ar brinses-se, o veza remerket ar baner, a gassas d'he c'herc'hat unan euz ar merc'het a ioa oc'h ober coumpagnunez dezhi; hag, o veza he digoret, e cavas ennhi ar bugel o leñva. O velet ar paotric keaz-se, he c'haloun a deuas da dene-raat. — «Unan euz a vugale an Hebreet eo,» emezhi. C'hoar ar bugel a dosteas neuze, hag a lavaras dezhi: «mar kirit, me zo o vont da glask deoc'h eur vagerez evit ar c'hrouadur bihan-ze.» — «It-ta,» eme ar brinses. C'hoar ar bugel, leun a joa, a redas da glask he mamm; hag houma o veza deuet dioc'htu, merc'h ar roue a lavaras dezhi: «kemerit ar bugel-ma da vaga, ha me ho paëo.» Ar vamm a gassas ganthi ar bugel hag her magas. Divezatoc'h, pa oue deuet da veza brazic, merc'h ar roue

ñer c'hemeraz evit he mab, hag hen hanvas Moïzes, da lavaret eo, *tennet euz an dour*.

Moïzes a ioa eur merk euz hor zalver Jesus-Krist. Evel Moïzes, hor zalver Jesus-Krist a oue ive divoallet dioc'h ar maro da behini oa bet coundaonet, prest goude he c'hinivelez, gant eur roue criz ha dinatur. — Moïzes a ioa leun a furnez adalec he iaouankiz; hor zalver Jesus-Krist, d'au oad a zaouzec vloaz, a lakeas dre he gomzou an doctoret euz al lezen da veza sonezet hag estlammet-oll. — Moïzes a rannas ar mor etre daou; hor zalver Jesus-Krist en deuz great d'an avel paouez da c'hoëza. — Moïzes a ziscouezas d'ar bobl a Israël hent an douar promettet; hor zalver Jesus-Krist en deuz digoret d'an dud oll hent ar baradoz. — Moïzes, en eur ober burzudou braz, a roas d'ar iuzevien lezen an testamant coz; hor zalver Jesus-Krist, en eur ober burzudou c'hoaz brassoc'h, en deuz roët d'ar bed oll an testamant nevez. — Moïzes a vruzunas idolou an Hebreet; hor zalver Jesus-Krist en deuz lakeat an idolou da goueza dre ar bed oll. — Moïzes a dennas ar bobl a Israël euz a-dre daouarn roue an Ejipt; hor zalver Jesus-Krist en deuz tennet an dud oll euz a zindan galloud an drouc-speret. — Moïzes a iunas var ar menez epad daou-ugent dervez ha daou-ugent nozvez; n'en doa ket a c'hoant dibri o clevet ar pezh a lavare Doue dezhan; hor zalver Jesus-Krist en deuz great kement all en dezert. — Moïzes en devoa chenchet doare pa ziskennas divar menez Sinai; hor zalver Jesus-Krist a jenchas ive doare var menez Thabor. — Moïzes a recevas eur bouet celestiel, galvet ar Mann, evit maga ar bobl a Israël, dare da vervel gant an naoun ebarz en dezert; hor zalver Jesus-Krist en deuz ive, e creiz an dezert, carget ho c'hof da bemp mil den gant pemp bara, hag hor maga a ra oll gant ar Mann adorabl euz a zacramant an aoter. — Moïzes a bareas he c'hoar Mari dioc'h al lorgnez a ioa savet var he c'horf; hor zalver Jesus-Krist en deuz paret dioc'h al lorgnez euz ar pec'het ene Mari-Madalen hag eneo eleiz a bec'herien all. — Moïzes a ziellas gant goad al loanet ar vignounach a felle da Zoue a vije gueich all etre ar bobl a Israël hag heñ; hor zalver Jesus-Krist en deuz siellet gant he c'hoad he unan ar vignounach a felle dezhan a vije hiviziken etre Doue hag an dud oll.

## 29. Galvidigez Moïzes, pe, Moïzes galvet gant Doue.

Coulsgoude Moïzes a ioa erruet en oad a zaou-ugent vloaz. O velet peger reuzeudic oa an Israelitet, he vreu-

deur, e oue guell ganthan caout perz en ho foaniou eget beva e palez ar roue, e creiz ar madou hag ar plijadure-zou. Bep veich ma cave an dro, ne vanke ket da zifenn he vreudeur, goal-gasset gant an Ejiptianet. Setu perac ar roue a gemeras caz outhan, hag a glaske an tu d'hen lakaat d'ar maro. Moïzes, o c'houzout an dra-ze, a dec'has kuit hag a ieas da vro Madian. Eno e tremenas daou-ugent vloaz all o tivoal loanet eur belec euz an amzer-ze, he hano Jethro.

Hogen,  
eun dervez  
m'oa deuet  
gant he  
vanden lo-  
anet da  
gichen  
menez  
Horeb, an  
Aotrou  
Doue en  
em ziscoue-  
zas dezhan  
e creiz eur



voden a ioa e traon ar menez : ar voden-ze a ioa an tan ennhi tro-var-dro, ha coulsgoude ne zeve ket. Souezet o velet eun dra ker burzuduz, Moïzes a lavaras ennhan he unan : « red e dinn mont da velet petra zo a-hont. » Mes p'edo o vont, an Aotrou Doue a gomzas outhan evel-hen : « ne dostaït ket ama eb diviska ho poutou ; rac al leac'h e pehini emaac'h a zo eul leac'h santel. Me eo Doue ho tadou. » Moïzes, o elevet ar c'homzou-ze, a guzas he benn kement a aoun en devoa. Neuze an Aotrou Doue a lavaras dezhan : « guelet am euz anken va fobl a zo en Ejipt, hag hen tenna ac'hano a fell dinn. Me ho casso da gaout ar roue Pharaon, evit ober dezhan leusker ar bobl a Israël da zont kuit euz an Ejipt, ha goudeze c'houi a hencho ar bobl-se da vont da eur vro gaër ha braz, el leac'h ma red al leaz hag ar mel. » Ha Moïzes a respoun-

tas : « pïou oun-me evit mont da gaout Pharaon hag evit tenna an Israelitet euz an Ejipt? Ar re-ma ne gredint ket ac'hanon pa livirinn dezho : Doue en deuz comzet ouzinn. » — « Me a vezo ganeoc'h, » eme an Aotrou Doue. Mes Moïzes a lavaras adarre : « me n'oun ket eun den helavar, hag abaoue m'o peuz comzet ouzinn, va zeod a zo deuet da veza pounnerroc'h eget biscoaz. » — « Mad, a respountas an Aotrou Doue, ho preur Aaron a zo eun den helavar; lakiit en he c'hinou ar c'homzou a livirinn deoc'h, hag heñ ho disclerio d'ar bobl en ho leac'h. »

Var gement-se Moïzes a zistroas d'an Ejipt. Caout a reas var he hent he vreur Aaron; counta a reas dezhan ar pez en doa clevet he unan gant an Aotrou Doue, ha goudeze ez ejont ho daou da assambli ar bobl a Israël. Aaron a zisclerias d'ar bobl kement tra en devoa lavaret an Aotrou Doue da Voïzes. Moïzes, deuz he gostez, a reas burzudou, pe miraclou, dirac ar bobl; hag ar bobl, o velet ar burzudou-ze, a gredas oa e guirionez carget gant Doue d'hen tenna euz an Ejipt, ha, leun a anaoudegez vad, ec'h en em strinkas d'an douar evit trugarekaat an Aotrou Doue.

### 30. Goualigner pe Gouliou an Ejipt.

Moïzes hag Aaron, oajet ho daou a bevar-ugent vloaz, a ieas neuze da gaout ar roue Pharaon, hag a lavaras dezhan : « setu ama petra lavar an Aotrou, Doue an Hebreët : list va fobl da vont da ober eur sacrifis diun ebarz en dezert. » Mes Pharaon a respountas : « ne anavezan ket an Doue-ze, ha ne lezinn ket he bobl da vont el leac'h m'en deuz c'hoant. » Hag adalec an deiz-se, e roas urs da garga an Israelitet a labouriou tennoc'h eget biscoaz.

Coulsgoude an Aotrou Doue a c'houic'hemennas da Voïzes ha da Aaron mont adarre da gaout ar roue. Aaron a daolas he vialen d'an douar dirac Pharaon, ha setu ractal ar vialen-ze o tont da veza eun aër pe eur zarpant. Ar roue a oue spountet; mes he galoun a jomas caledet,



ha ne falvezas ket dezhan lezel ar bobl a Israël da vont euz an Ejipt.

Neuze an Aotrou Doue a skoas Pharaon hag he zujidi gant dec goualen hag a reer ive anezho *dec gouli an Ejipt*. Da genta Aaron, o veza savet he vialen, a skoas eun taol ganthi var dour ar ster, ha kerkent an dour-ze a oue chenchet e goad : setu aze ar voualen genta. Setu ama an eil : Aaron a astennas he zorn var an oll steriou, lennou ha poullou-dour euz an Ejipt, ha ker buhan e oue gullet o tifourcha euz ar steriou, lennou ha poullou-dourze, bandennadou ranet gant pere e oue goloët ar vro, ha carget zoken an tiez. Goudeze Aaron a skoas gant he vialen var ar boutren euz an douar, hag ar boutren-ze a oue chenchet e c'houibu, e kement corn a ioa en Ejipt : hounnez a oue an drede goualen. Ar bedervet a oue houma : varlerc'h ar c'houibu, Doue a zigassas dre an oll Ejipt a bep seurt kellienn braz gant pere e oue carget an tiez ha goloët an douar. Goudeze an oll loanet a deuas da gleñvel gant ar vossen : setu eno ar pempet goualen.

Setu ama ar c'houec'hvet : al loanet a ioa chomet beo a zilerc'h ar vossen, hag an dud ho unan, a oue goloët ho c'horf a c'horion hag a c'houliou. Ar zeizvet goualen a oue eur barr-cazarc'h spountuz, gant pehini e oue pilet ha dismantret an edou hag an traou all a ioa o tiouan pe o sevel er parkeier. An eizvet a oue eun arme a gilleienraden a en em daolas var ar vro, hag a scrapas gantho kement tra a ioa chomet a zilerc'h ar barr-cazarc'h. Goudeze an Ejipt oll a oue evel sebeliet epad tri dervez en eun deñvalijen ar vrassa : hounnez a oue an navet goualen. Hogen, keit ha ma'c'h en em vele, heñ hag he zujidi, skoët gant unan bennac euz ar gonaligner-ze, ar roue Pharaon a lavare bep tro e lezche ar bobl a Israël da vont kuit ; mes kerkent ha ma teue Moïzes da bedi an Aotrou Doue da lamet ar beac'h anezho divar ar vro, ar roue a ancounac'hea dioc'htu he bromessa, hag a iea adarre a enep he c'her. Erfin, d'an decvet, Doue her skoas gant eur voualen all ha n'oa bet hini ebet c'hoaz ker pounner ha ker spountuz hag hi.

**31. Maro ar mibien hena. — An oan pascal. — Ar bobl a Israël o vont kuit euz an Ejipt.**

Doue a lavaras da Voïzes ha da Aaron : « livirit d'ar bobl a Israël : d'ar pevarzevet dervez euz ar miz-ma, kemerit, peb hini ac'hanoc'h, eun oan-bloaz, hag heñ neat ; lazit-heñ dioc'h an abardaëz, ha goudeze livit gant he c'hoad postou ha treujou an or euz ho ti. Lakiit ar c'hig anezhan da boazat oc'h an tan ha debrit-heñ goudeze gant bara ha ne vezo tamm goell ebet enghan. Grit ar pred-bouët-se en ho sa, eur c'houriz en dro d'ho corf, ho poutou en ho treid, hag eur vaz en ho torn. Epad an noz-se me gasso va eal dre an Ejipt evit rei taol ar maro da oll vibien hena an Ejiptianet ; mes pa velinn liou ar goad var doriou ho tiez, me dremeno ebiou, ha goudeze m'ho tenno oll euz an Ejipt. »

An Israelitet a reas ar pezh a ioa bet gourc'hemennet dezho gant an Aotrou Doue. Var dro anter-noz an Aotrou Doue a roas taol ar maro, dre zorn an eal, da oll vibien



hena an Ejiptianet, adalec mah hena ar roue betec mah hena an disterra paour-keaz. An Ejipt oll a dregarnas gant an hirvoud hag ar goëlván a zirollas neuze euz an eil penn euz ar vro d'egile. Pharaon ne c'hortozas ket an deiz evit cass kemennadurez da Voïzes ha da Aaron da zont d'he gaout, hag evit lavaret dezho: «it kuit gant oc'h oll bobl ha gant ho loanet.» An Ejiptianet a lavare ive: «it buhan euz ar vro-ma, pe, a hent all, ne jomo beo nicun ac'hanompni.» An Israelitet a deuas eta euz an Ejipt en eur zigass gantho relegou Joseph: var dro 600,000 den a ioa anezho eb counta ar merc'hed hag ar vugale.

An oan pascal a verke Oan-Doue maro var ar groaz evit hor prena. Merket oump bet gant he c'hoad, ha dre eno eo bet lamet divarnomp ar zetans a varo eternal a ioa douget en hon enep. E sacramant an aoter e recevomp he gorf hag he c'hoad, a zindan furm eun tamin bara great ive gant toaz ha n'e ket bet lakeat e go. An Israelitet, tennet gant Moïzes euz a-dre daouarn Pharaon,



a verke an dud oll tennet gant hor zalver Jesus-Krist euz a zindan galloud an drouc-speret.

**32. Ar bobl a Israël o treuzi ar mor ruz.**

Doue a ziscouezas he hent d'ar bobl a Israël, en deiz, dre eur goabren pe eur gommoullen, hag en noz, dre eur sclerijen gaër. An eil hag eben a ioa heñvel ouz eun tour a zave en ear hag a gerze bepret araoc an Israelitet. Ar re-ma a erruas evelse betec ar mor ruz. — Coulskoude Pharaon a zavas keuz ganthan da veza laosket an Israelitet da vont kuit, ha setu heñ da vont var ho lerc'h gant he girri-brezel hag he zoudardet var varc'h. An Israelitet a oue spountet-oll o velet, pa zonzent nebeuta, an Ejip-



tianet adreñ ho c'hein, hag hi, ne oa nemet ar mor dirazho. Mes Moïzes a lavaras dezho : « n'o pezet aoun ebet ; an Aotrou Doue ho tifenno. » Neuze ar gommoullen a gerze kent en ho raoc a i eas adreñ ho c'hein, hag en em lakeas etre hi hag an Ejiptianet. Dioc'h costez



ar re-ma ar goummoullen a ioa ken du ha ken teñval ma tremenas an noz eb ma c'heljont tostaat ouz an Israelitet. Dioc'h costez ar bobl a Israël, er c'hountrol, ar goummoullen a ioa epad an noz sclear evel an deiz. Var gement-se Moïzes a astennas he zorn azioc'h ar mor, ha kerkent ar mor en em rannas etre daou, hag a jomas a za-sounn dioc'h an daou du, en eur lezel hent da dremen dre greiz evel etre daou gaë pe diou voger-zour. Evelse an Israelitet a c'hellas he dreuzi eb glibia ho zreïd. Pa deuas ar mintin, an Ejiptianet a ieas var ho lere'h dre eun hevellep hent; mes pa oant diskennet oll er mor, hag ar bobl a Israël dija var an aod en tu all, Moïzes a astennas adarre he zorn, dre urs an Aotrou Doue; ha ractal ar mor a zistroas d'he blas hag en em glozas, hag ar roue Pharaon a oue paket a zindan an dour, ha beuzet gant he girri, he gezec hag an oll zoudardet a ioa oc'h he heul, eb ma c'hellas nicun anezho en em zaveteï.

Ar goummoullen hag ar sclerijen-ze a henchas gueich all ar bobl a Israël a verke hor zalver Jesus-Krist. An nep a zo henchet gant hor zalver Jesus-Krist a c'hell ive kerzet, eb aoun, dre greiz an oll danjerou euz ar vuezma. Ar mor ruz a dlïe an Israelitet da dreuzi abarz erruout en dour promettet a ioa eur merk euz ar zacramant a vadiziant; evit mont d'an eñv e renker ive tremen dre an dour sacr euz a zacramant ar vadiziant.

### 33. Ar C'hoaillet, ar Mann, hag an dour en dezert.

Goude beza treuzet ar mor ruz, an Israelitet a erruas en eun dezert braz; ne gavent eno netra da zibri, ha setu hi d'en em glemm oc'h Moïzes en eur lavaret: «salo e vijemp maro en Ejipt, el leac'h m'or boa kig ha bara da zibri leiz hor c'hof!» Neuze an Aotrou Doue a lavaras da Voïzes: «comzit ouz ar bobl ha livirit dezhan: Douc a roïo deoc'h, e verr, kig da zibri, ha varc'hoaz-vintin o pezo bara leiz ho cof. Evelse ec'h anavezoc'h eo me an Aotrou, ho Toue.» Hag eleal, dioc'h an abardaëz, bandenadou labouset hag a reer *coaillet* anezho, en em daolas var ar *c'hamp*. Al labouset-se ne reant van evit cregi enno; eaz oue eta ho faka. Antronoz-vintin an dezert a

ioa goloët a c'hreunennouigou guen egiz pa vije bet reo en noz. O velet kement-se, an Israelitet a oue souezet,



hag a lavaras en ho iez pe en ho langach :  
« Man-hu ! »  
Ar pez a zinifi :  
« Sell-ta !  
petra an dra-ze ? »  
Ha Moïzes a respountas dezho :  
« an dra-

ze eo ar bara a zigass deoc'h an Aotrou Doue ; kemerit anezhan, peb hini ac'hanoc'h, kement ha m'o peuz ezom. » Hen ober a rejont laouen, ha caout a rejont ar greunennouigou guen-ze mad-dreist ha dous evel ar mel. Gant ar bara-ze, a c'halvjont *Mann*, eo e kendalc'has Doue d'ho maga epad daou-ugent vloaz, betec ma'z ejont da vro Kanaan.

Ar mann a zo eur merk eus a zacramant an aoter, e pehini hor zalver Jesus-Krist en em ro deomp a zindan furm eun tamm bara, da c'hortoz ma c'hellimp he velet egiz m'ema, pa'z aïmp d'an eñv, hor guir bro.

Nebeut amzer goude, o veza ne gavet ket a zour da eva, an Israelitet en em glemmas adarre oc'h Moïzes. Hema a zavas neuze he vouez varzu an Aotrou Doue, en eur lavaret : « petra rinn-me d'ar bobl-ma ? Ema dija prest da vanna mein ouzinn evit va laza. » Hag an Aotrou Doue a respountas : « kemerit ho kuialen, it var menez Horeb, ha skoït var ar garrec. » Moïzes a zentas, ha kerkent e tilmmas kement a zour euz ar garrec m'en devoue ar bobl oll pe a dra da derri he zec'het.



An eienen-zour-ze a verk ar grasou a recevomp er zacamanchou dre zaouarn ar veleien.

**34. An dec gourc'hemenn. Doue a gemer ar bobl a Israël evit he vobl muia caret.**

D'an trede miz goude m'oant deuet euz an Ejipt, an Israelitet a erruas eharz menez Sinaï. Moïzes a bignas var ar menez, hag eno Doue a lavaras dezhan: «setu ama petra zisclerioc'h da vugale Israël: guelet o peuz ar pez am euz great d'an Ejiptianet evit ho tenna euz a-dre ho daouarn. Mar kirit eta delc'her mad da zelaou va mouez ha da viret va lezennou, c'houi a vezo va fobl muia caret.» Moïzes o veza discleriet d'an Israëlitet ar pez en devoa an Aotrou Doue lavaret dezhan, ar bobl oll n'en devoue nemet eur vouez evit respount: «ia, ia, ni a raïo kement tra a c'hourc'hemenno deomp an Aotrou Doue.» — Neuze Doue a lavaras c'hoaz da Voïzes: «grit d'ar bobl en em gempenn ha goalc'hi he zillad hirio ha varc'hoaz, ha poania d'en em zalc'her neat a galoun hag a gorf abenn goude varc'hoaz.» D'an trede deiz dioc'h ar mintin, setu ar gurunn o croza hag al luc'het o strinka en ear. Menez Sinaï a oue goloët oll gant eur goabren teñval-teñval; orjella a rea dioc'h an traoñ, ha



divar c'horre e taole tan ha moged. Er memes amzer an dezert tro-var-dro a dregarne gant soun an droumpillou. An traou-ze oll a lakea an Israelitet da greua gant ar spount. Couls goude Moïzes a gassas anezho betec traon ar menez dirac fas an Aotrou Doue, ha neuze an Aotrou Doue a gomzas outho evel-hen :

- I. « Me eo an Aotrou, ho Toue ; n'o pezo ket a zoueou all dirazon-me ; ne adoroc'h imach ebet great gant daouarn an den , na patrom netra euz a gement zo en eñv, var an douar, pe e goueled ar mor.
- II. Ne gemeroc'h ket en aner hano an Aotrou, ho Toue.
- III. O pezet sonch da zantifia deiz ar repoz.
- IV. Henorit ho tad hag ho mamm evit ma vevoc'h pell var an douar.
- V. Ne lazoc'h ket.
- VI. Ne reoc'h ket a avoultriach.
- VII. Ne laëroc'h ket.
- VIII. Ne zougoc'h ket a falz testeni.

IX. Ne c'hoantaoc'h ket caout greg ho nessa.

X. Ne c'hoantaoc'h ket caout ti ho nessa, nag he bark, nag he zervicher, nag he zervicherez, nag he ejen, nag he azen, na netra euz a gement a zo dezhan.»

Ar bobl a Israël, o veza clevet ar c'homzou-ze, a respountas gant eur vouez leun a zoujans : « ni a raïo kement tra en deuz lavaret deomp an Aotrou Doue.» Neuze Moïzes a zavas eun aoter, hag a reas eur sacrifis da Zoue. Goudeze e kemeras goad an aneñval en doa lazet evit ober ar sacrifis, ha gant eur sparfe strinkas ar goad-se oc'h ar bobl, en eur lavaret : « ar goad-ma eo ar ziel euz ar vignounach en deuz great ganeoc'h an Aotrou Doue.»

Var menez Sinai eo e reas Doue gueich all mignounach gant ar bobl a Israël; var menez Calvar eo en deuz great a nevez mignounach gant ar bed oll. Eno Doue en em ziscouezas e creiz an oll merkou euz he veurded hag euz he c'halloud; ama n'eo en em roët da anaout nemet dre he garantez hag he drugarez. An eil hag eben euz an diou vignounach-se a zo bet siellet gant goad : ar vignounach a reas Doue gant ar bobl a Israël var menez Sinai, gant goad eun aneñval; hag ar vignounach en deuz great gant ar bed oll var menez Calvar, gant goad hor zalver Jesus-Krist, guir Oan-Doue.

### 35. Al leue aour.

Moïzes a bignas adarre var ar menez hag a jomas eno da gomz gant Doue epad daou-ugent dervez ha daou-ugent nozvez. Doue a roas dezhan goudeze diou zaolenvean var bere oa scrivet an dec gourc'hemenn.

Coulsgoude ar bobl a lavaras da Aaron : « ne c'houzomp ket petra eo deuet Moïzes da veza; grit deomp doucou evel re an Ejiptianet.» Evit distrei an Israelitet dioc'h ar pez o doa c'hoant da ober, Aaron a respountas dezho : « n'o peuz nemet digass dinn ar ruillennou aour a zo gant ho cragez hag ho merc'het iaouank oc'h ho diouscouarn.» Sonjal a rea ne vije biken dalc'het e ger, ha coulsgoude setu petra erruas. Hogen, o velet an aheurtamant-se euz ar bobl, Aaron ne gredas mui enebi outhan. Teuler a reas eta en teuz ar ruillennou aour a ioa digasset dezhan, ha, pa oant teuzet, e reas gantho patrom eu!



leue ; ha goudeze e savas eun aoter evit lakaat al leue-ze var he gorre. Neuze an Israelitet a reas sacrificiou en honor d'al leue aour, hag en em lakeas

da zibri ha da eva, da vragal ha da zansal en dro dezhan, egiz ma rea ar baïanet.

Pa ziskennas Moïzes divar ar menez, ha pa velas oc'h ober petra edo ar bobl, ez eas kement a zrouc ennhan ma stlapas d'an douar taolennou al lezen a ioa ganthan etre he zaouarn, ha ma ho bruzunas. Goudeze e crogas el leue aour hag hen taolas en tan da boazat evel ma vez poazet ar vein da ober raz. Neuze e lavaras da vugale Levi : « tremenit dre douez an Israelitet, ar c'hleze en ho torn, ha lakiit d'ar maro kement hini a gavoc'h oc'h adori an idolou. » Ar re-ma a zentas, hag a lazas evelse meur a vil den dioc'htu.

Goudeze Moïzes a bignas c'hoaz var ar menez, hag a c'houlennas pardoun evit ar bobl diskiant ha displeal. An Aotrou Doue a zelaouas he beden, hag a lavaras dezhan kempenn diou zaolen all heñvel ouz ar re en doa torret. Hen ober a reas, ha var an diou zaolen nevez-se Doue a scrivas adarre an dec gourc'hemenn en doa roët d'ar bobl a Israël. Pa ziskennas Moïzes divar ar menez gant an diou zaolen-ze, he dal a ioa ker skeduz ma ne grede ket an Israelitet sellet outhan en he fas.

### 36. Lezennou divar benn ar pezh a zell ous servich Doue.

Ouspenn an dec gourc'hemenn, Doue en devoa c'hoaz roët da Voïzes, var ar menez, eleiz a lezennou all evit ar bobl. Etouez al lezennou-ze ez oa meur a hini hag a verke petra a dliet da ober evit henori Doue egiz ma'z eo dleet. Moïzes a reas a boënt da boënt kement en devoa gourc'hemennet dezhan an Aotrou Doue.

1. AN TABERNACL. Da genta, Moïzes a reas eun telt hag a ioa savet var beuliou, pe bostou, great gant coat setim; ar peuliou, pe ar postou-ze, a c'hellet da lamet kuit ha lakaat adarre en ho flas, pa gariet. An telt-se en doa var dro 43 troatad a hirder, 17 troatad a buelder ha kement all a ledander. An aour a lugerne enghan tro-var-dro, ha Moïzes en devoa lakeat d'he c'holo pallennou great gant danvez a briz. Eur ridoeb euz ar re gaëra a ranne an telt etre diou loden, unan brassoc'h hag eun all bihannoc'h: al loden vihanna a ioa hanvet *al leac'h santela*, hag al loden vrasa, *al leac'h santel*. El *leac'h santela* Moïzes a lakeas an *Arc'h a allians*, couffric bihan great

gant coat a briz, eur guiskad aour pur en dro dezhan, ha var he c'horre patromiou daou Cherubim. Er c'houffric-se oa gorroët an diou zaolen m'en devoa



Doue he unan skrivet varnho an dec

gourc'hemenn euz al lezen. *El leac'h santel* ez oa tri zra consacret da zervich Doue: 1<sup>o</sup> *taol an daouzec bara* a dlie

beza dalc'h-mad kinniget da Zoue e sacrificis; ar bara-ze a veze great gant bleud euz an hini flourra, hag eb tamm goell ebet; 2° *ar c'hantolor a zeiz brank pe a zeiz bez*, a behini ar goulaon a dlie chom var elumm epad an noz-pad; 3° erfin, *aoter ar c'houez-vad*, var behini e veze devet ezans euz an hini finna. Moïzes a reas sevel en dro d'an tabernacl eur porched braz hag a ioa c'hoaz enghan daou zra zacr: 1° *aoter ar sacrificsou*, ha 2° eur *vassin-goueur* vraz e pehini ar veleien a voalc'he ho daouarn abarz ober ar pez a ioa en ho c'harg.

An tabernacl-se a ioa eur merk euz hon ilizou-ni. Al leac'h santela a verke hon aoteriou-ni, var bere e vez kinniget da Zoue sacrificis an allians pe ar gevidigez nevez, da lavaret eo, sacrificis an oferen; al leac'h santel a verke ar c'heur, el leac'h ma vez ar veleien; hag ar porched a verke ar penn izela euz an iliz, adalec ar c'heur betec an or zal.

II. AR SACRIFISOU à ioa daou seurt anezho: lod a veze great *en eur scuill goad*, en eur laza eun aneñval bennac, evel eun ouenner, eun dañvad, eur c'havric, eur goulm; lod all a veze great *eb scuill goad*, en eur ginnig da Zoue kouign, bara great eb goell, ha guin.

Ar sacrificsou great en eur scuill goad a verke sacrifics hor zalver Jesus-Krist var ar groaz; ar sacrificsou great eb scuill goad a verke sacrifics santel an oferen.

III. AR GOUELIU a ioa: 1° *Pask*: da geñver ar gouel-ze, an Israelitet a zebre eun oan d'ho c'hoan, hag epad seiz dervez dioc'htu ne zebrent nemet bara great eb goell, e memor euz ar feson m'oant bet tennet euz an Ejipt. — 2° *Gouel ar Pantecost*, pehini a veze celebret seiz sizun goude Pask, e memor euz an deiz m'oa bet roët al lezen gant Doue var menez Sinaï. D'ar mare-ze euz ar bloaz e tliet kinnig da Zoue ar frouez kenta euz an east. — 3° *Gouel an Tabernaclou*, pehini a veze celebret e memor euz an amzer o devoa an Israelitet tremenet en dezert. (Ar ger *tabernacl* a zinifi telt). Da geñver ar gouel-ze, ar bobl oll a dlie mont da jom a zindan teltou great gant scourrou-guez. — 4° *Gouel ar binijen*, pehini a veze celebret evit



pañã da Zoue ar boan dleet da bec'hejou an dud, hag e pehini ar belec braz a laze eun ouner e sacrifis evit he bec'hejou he unan, hag eur bouc'h evit pec'hejou ar bobl. Goudeze ez ea *el leac'h santela* gant goad an aneñval en doa lazet ha gant an ezansouer aour, hag eno ec'h ezanse an arc'h a allians, ha gant ar sparf e strinke goad outhi ha var ar pave.

Pask ha Pantecost ar iuzevien a verke Pask ha Pantecost ar gristenien; ha gouel an tabernaclou a verke gouel ar Zacramant, meulet ra vezo.

IV. AR RE A IOA CARGET EUZ AR PEZ A ZELL OUS SERVICH DOUE: 1° *Ar belec braz*. Moïzes a gonzacras he unan Aaron evit ar garg-se en eur scuill oleo var he benn, hag he unan e viskas dezhan an dillad a dlie ar belec braz da zougen. 2° *Ar veleien all*: ar re-ma a ioa carget da ginnig da Zoue ar sacrifisou ordinal; Moïzes a gonzacras evit ar garg-se bugale Aaron. 3° *Al levitet*, da lavaret eo an oll dud euz a lignez Levi: ar re-ma a ioa carget euz al labouriou all a ioa da ober var dro an tabernacl.

Er velegiach catholic ez euz ive meur a renk, ha meur a rumm-dud hag o deuz cargon disheñvel evel a ioa gueich all e belegiach ar iuzevien. Da gentã ema hon Tad santel ar Pab, ha goudeze an Eskibien, ar Veleien, an Avielerien etc. O renka ar velegiach catholic evelse, hor zalver Jesus-Krist en deuz discouezet sclear n'oa ket deuet da freuza ha da zis-mantra al lezen, mes da rei dezhi ar pez e devoa ezom da gaout evit beza evit ar guella.

**37. Ar c'hannadet fallacr; ar bobl o c'hrozmolat;  
Doue a deu d'he bunissa.**

An Israelitet a jomas eur bloaz leun e kichen menez Sinaï. Goudeze ez ejont ac'hano, ha Moïzes a jozas daouzec den, hag en ho zouez Caleb ha Josue, evit ho c'hass da ober eur bale var douar Kanaan, da velet doare ar vro. Douar Kanaan oa an donar promettet gant Doue. An dud-se a zistroas abenn daou-ugent dervez, ha gantho a bep seurt frouez euz ar vro. Da gentã ez oa eur pez bodadrezinn hag a ioa re veac'h da eun den. Setu perac oa



staget a istribill ouz eur giffien, ha daou c'hoaz hen douge a zibrad, eur penn euz ar giffien var scoaz peb hini anezho. Bez' ez oa gantho, ouspenn, avalou, fiez, hag a bep seurt frouez all. Hogen, pa ouent erruet, ar gannadet a lavaras: «guir eo e red er vro-ze al leaz lag ar mel; mes an dud a zo o chom ennhi a zo kement ha Jeantet, ha ni ne d'oump nemet killeien-raden da velet en ho c'hichen.» En eur glevet ar c'homzou-ze, ar bobl en em lakeas da vonela ha d'en em glemm a enep Moïzes hag Aaron en eur lavaret: «perac n'oumpni ket maro en Ejipt pe en dezert?» Caër o devoa Caleb ha Josue rei testeni oa mad ar vro ha ne vije ket diez beza treac'h d'an dud a ioa o chom ennhi, ar bobl a zave goassoc'h-goaz he vouez en eur lavaret: «deomp en dro d'an Ejipt.» Neuze an Aotrou Doue a lakeas he c'hloar da bara azioc'h an arc'h a allians, hag a gomzas evel-hen oc'h Moïzes: «achann da beur e laoskinn-me ar bobl difeiz-se da vlasfemi va hano? Me ia da zigass ar vossen varnhan, hag e vezo scubet gant ar c'hleñvet betec an diveza, ha goudeze m'ho lakaïo, c'houi, da veza ar penn euz a eur bobl all hag a vezo c'hoaz brassoc'h ha galloudussoc'h eget hema.» Hogen, Moïzes n'en doa ket he bar evit an dousder; pedi a reas eta an Aotrou Doue da gaout truez ouz ar bobl en eur lavaret: «o va Doue, ho trugarez a zo

braz hag eb muzul; pardounit eta d'ar bobl-ma.» Hag an Aotrou Doue a respountas: «pa fell deoc'h, me a bardouno. Coulskoude, erruout a rañ gant ar bobl-se ar pez en deuz goulennet: mervel a rañ en dezert, ha nicun euz ar re a zo brema ugent vloaz achu ne velo an douar promettet, nemet Caleb ha Josue. Ho bugale avad a gassinn di. Evitho a jomo da vale ama hag a-hont dre an dezert epad daou-ugent vloaz, ken aliez a vloaz evel a zeiz m'eo bet ar gannadet oc'h ober ho zro e bro Kanaan.» Kerkent an dec cannad fallacr a oue skoët gant taol ar maro.

An histor-ze a verke ar pez a dlie erruout en amzer Jesus-Krist. Ar iuzevien a zisprijas ar rouantelez spirituel a bromette dezho hor zalver, hag en em zavas en he enep, en eur lavaret: «he c'hoad ra gouezo varnomp ha var hor bugale!» Divar ar groaz Jesus-Krist a c'houlennas pardoun evit ar bobl; he beden a oue selaouet, ha coulskoude an darn-vuia euz ar iuzevien a ioa en amzer-ze n'o devoue ket a berz en he rouantelez. Hag abaoe, bugale Israël a zo o vale tu-ma tu-hont dre bevar c'horn ar bed, ha, keit ha ma chomo ar bed en he za, ec'h erruo ive gantho ar pez o deuz goulennet: «he c'hoad ra gouezo varnomp ha var hor bugale!»

### 38. Core, Dathan hag Abiron.

Nebeut amzer goude, daou-c'hant anter-cant euz al levitet, ha Core, Dathan hag Abiron er penn araoc, en em zavas a enep Moïzes hag Aaron, en eur lavaret: «ni zo skuiz ganeoc'h; ar bobl oll a zo santel: perac e fell deoc'h-hu en em lakaat dreist ar re all?»

Antronoz, Moïzes a ieas gant Aaron da gichen teltou al levitet-se, hag eno e lavaras d'ar bobl: «pellañt dioc'h teltou an dud difeiz-ma, ha ne grogit e netra a gement a zo dezho gant aoun na stagfe ho fec'het ouzoc'h. Pa deui an douar da zigeri ha d'ho lonka, pa ho gueloc'h o tiskenn ez veo en ifern, neuze c'houi a anavezo eo Doue he unan en deuz hon digasset ha roët deomp ar garg or beuz kemeret.» A veac'h oa ar gomz-se ganthan peur-lavaret, ma teuas an douar da zigeri a zindan treid Core, Dathan hag Abiron, ha d'ho lonka ez veo gant ho zeltou

ha kement tra o devoa. Er memes amzer eun tan, c'hoëzet gant an Aotrou Doue, a lakeas e ludu an daou c'hant anter-cant levit all.

Brema, evel gueich all, e veler a amzer da amzer tud direiz hag ourgouilluz oc'h en em zewel a enep ministret ar relijion; mes brema, evel gueich all, ar seurt tud-se ne zaleont ket ive da veza skoët gant an dorn pounner euz a justis Doue.

### 39. Difisians Moïzes; ar zarpant koueur-ha-stean

Eun dervez an Israelitet a deuas adarre an dour da vankout dezho, hag an Aotrou Doue a lavaras da Voïzes skei var ar garrec evel m'en doa great dija kentoc'h.



Hogen Moïzes en devoue eun tammic difisians hag a lavaras d'ar bobl: «daoust ha me a c'hello lakaat dour da zont euz ar garrec evit tud dizent eveldoc'h-hu?» Var gement-se e skoas daou daol var ar garrec gant he vialen, ha d'an eil taol ebken e oue guelet

an dour o tilammet anezhi. An tammic difisians-se en devoa bet Moïzes a zisplijas d'an Aotrou Doue pehini a lavaras dezhan ractal: «abalamour n'o peuz ket bet a feiz aoualc'h em c'homzou, n'e ket c'houi eo a gasso ar bobl-ma d'an douar promettet.» Ne oue ket pell na deuas an Israelitet d'en em glemm a nevez. Neuze an Aotrou Doue a lakeas da zont en ho zouez sarpantet, pe aëret binimuz. Flemm an aëret-se a zeve evel an tan, hag eur maread a varvas e creiz ar poaniou ar re grissa goude beza bet flemmet gantho. Ar bobl, o velet an dra-ze, a grogas aoun ennhan, hag a deuas da gaout Moïzes en eur lavaret: «pec'het or beuz a enep Doue, hag en oc'h enep-c'houi; mes brema, pa anavezomp hor faot, pedit an Aotrou Doue da lamet divarnomp ar voualen-ze.» Moïzes a reas ar pezh a c'houlenne ar bobl, ha neuze Doue a lavaras dezhan: «grit eur zarpant koueur-ha-stean, ha lakit-heñ e beg eur peul; ar re a vezo bet flemmet gant an aëret n'o devezo nemet sellet ouz ar zarpant-se evit beza pare.» Moïzes a zentas, ha kement hini a ioa bet flemmet, hag a zelle ouz ar zarpant koueur-ha-stean, a deue dioc'htu da barea.

Ar zarpant-se a verke hor zalver stag ouz ar groaz. Hor zalver a bare ive ar re a zell outhan gant feiz dioc'h ar gouliou en deuz great d'ho ene ar zarpant infernal. Ar zarpant koueur-ha-stean-ze a verk c'hoaz ar zacramanchou, e pere gras Doue a zo ive cuzet a zindan eur sin sclear hag eaz da velet.

#### 40. Moïzes o rei he aliou diveza d'ar bobl; he varo.

Erruet oa an amzer ma tlie Moïzes kuitaat he bobl. Doue a lavaras eta dezhan: «lakiit ho torn var Josue dirac oll vugale Israël evit ma vezo sentet outhan hiviziken.» Moïzes her greas, ha goudeze e comzas evel-hen ouz ar bobl: «mont a ran da vervel; ne dreuzinn ket ster ar Jourden ha ne d'inn ket ganeoc'h d'ar vro ma'z it da jom ennhu. Ne ancounac'hañt morse ar vignounach en deuz great an Aotrou Doue ganeoc'h. Carit anezhan euz oc'h oll galoun, euz oc'h oll ene hag euz oc'h oll nerz. O pezet sonch euz ar pezh en deuz great evidoc'h,

euz ar zoursi en deuz kemeret d'ho tenna euz an Ejipt ha d'ho maga en dezert epad daou-ugent vloaz. Lakiit he oll gomzou doun en ho speret, ha deskit-hi d'ho pugale. He vennoz pe he valloz a zo hirio dirazoc'h; deoc'h eo da joaz etre an eil hag eben: bez' o pezo he vennoz mar mirit he c'houre'hemennou, hag he valloz, ma ne zelaouit ket he vouez.»

Moïzes a lavaras c'hoaz d'ar bobl: «an Aotrou Doue a zigasso deoc'h eur prophet all eveldon-me; selaouit-heñ, pa vezo deuet.» Goudeze e vennigas ar bobl hag e pignas var ar menez. Eno, an Aotrou Doue a ziscouezas dezhan oll vro Kanaan, en eur lavaret: «setu aze an douar am euz promettet da Abraham, da Isaac, ha da Jacob.» Moïzes a zridas he galoun o velet ar vro-ze; trugarekaat a reas an Aotrou Doue, ha goudeze e varvas e peoc'h dan oad a c'houec'h ugent vloaz. Oll vugale Israël a zougas caoñ dezhan epad tregont dervez.

Ar prophet all-ze ma comze Moïzes anezhan eo hor zalver Jesus-Krist.

**41. Ar bobl a Israël o vont d'an douar promettet**  
(1450 vloaz araoc donedigez hor zalver.)

Goude maro Moïzes, an Aotrou Doue a lavaras da Josue: «savit, ha trenzit ar Jourden. Me a vezo ganeoc'h.» Ar bobl en em lakeas ractal en hent; ar veleien a vatee er penn araoc en eur zougen an arc'h a allians. A veac'h oa erruet ar re-ma betec ar Jourden, ma oue guelec an dour a deue divar laëz o chom a za, hag oc'h en em zele'her evelse a bez egiz eun dorgenn pe eur menez. Er memes amzer an dour a ioa izelloc'h en em daolas oll er mor, en eun hevelep feson ma c'hellas an Israelitet mont en tu all d'ar ster eb glibia ho zreïd. Goudeze, p'oant eat dija tost da Jeriko, e rejont eun ehan; an ehan-ze a badas meur a zervez, hag epad an amzer-ze e oue celebret gouel Pask.

Hogen Jeriko a ioa eur gear greñ ha divoallet mad. An Aotrou Doue a lavaras da Josue: «grit bemdez an dro da gear epad c'houec'h dervez dioc'htu. D'ar seizvet der-



vez ar veleien a ielo ebarz gant an arc'li a allians, ha setu ama penaoz : n'o devezo ken da ober nemet sini an droumpill, hag ar bobl oll respount dezho en eur leusker iouc'hadennou a bouez-penn.» Josue a reas ar pez en devoa gourc'hemennet dezhan an Aotrou Doue. Ha setu, d'ar seizvet dervez, pa zounas an droumpill ha p'en em lakeas ar bobl da iouc'hal, mogeriou Jeriko a gouezas anezho ho unan, hag an Israelitet a ieas oll e kear. Goudeze Josue a deuas ive da veza mestr euz an douar a ioa tro-var-dro. Neuze e reas daouzec loden euz an douar-ze, hag e lakeas tenna plouz berr evit ingala al lodennou-ze etre an daouzec rumm-dud a ziskenne euz a zaouzec mab Jacob.

#### 42. Ar Varnerien.

An Israelitet a dlie beza anaoudec-braz e keñver an Aotrou Doue evit ar vro gaër en devoa roët dezho. Mes en em lezel a rejont da veza touellet gant ar baïanet a ioa o chom er broïou tosta d' ho hini, hag e teujont a nebeut a nebeut da goueza er pec'het a idolatri. Neuze

an Aotrou Doue a lakea ho enebourien da veza treac'h dezho. Oc'h en em gaout evelse a zindan galloud ar boblou all, an Israelitet a zave keuz gantho, a zistroë oc'h Doue hag a c'houlenne pardoun outhan. Ractal e vije guelet o sevel en ho zouez unan bennac euz an dud-se a galoun hag a zoujans Doue, a reer *barnerien* anezho : ar varnerien-ze eo a denne ar bobl euz a-dre daouarn he enebourien. Mes kerkent ha ma teue ar maro dezho, an Israelitet en em daole adarre da adori an idolou ; ha setu aze petra oue ho buez epad pevar c'hant vloaz. An daouzec barner a zigassas an Aotrou Doue d'ar bobl epad an amzer-ze, evit hen lakaat da c'hounit var he enebourien, a oue : Othoniel, Aod, Samgar, Barac, Jedeon, Thola, Jaïr, Jephthe, Abesan, Ahialon, Abdon, Samson, eb counta Heli ha Samuel.

Unan euz ar re zo muia brudet etouez ar varnerien-ze eo Samson. Hema en doa kement a nerz ma lazas ha ma tispennas eun deiz, gant he zaouarn ebken, eul leoun counnaret. Eur veich all e lazas mil enebour gant eur javed azen. Divezatoc'h e oue kemeret epad he gousk gant ar Philistinet, hag ar re-ma hen liammas gant seiz corden. Samson, en eur zihuna, a dorras ar c'herdinn-ze evel m'en devije torret seiz neuden. Erfin e oue kemeret adarre gant ar Philistinet ; ar re-ma o devoue neuze ar grisderi da ziframma he zaoulagad euz he benn. Goudeze e casshont anezhan da eun ti braz, el leac'h ma'z oa tri mil anezho, ha tri mil euz ar renk huela, oc'h ober eur fest en honor d'ho doueou faoz. Eno, Samson a oue staget ous daou bilier a ioa oc'h harpa hag o scora an ti. Neuze e teuas en he speret en em lakaat, evithan da veza dall, da heja an daou bilier-ze gant he zaou zorn, unan gant peb dorn. Hen ober a reas, ha ker buhan an ti oll a gouezas en he boull. Samson a oue paket a zindan ; mes ne oue ket paket he unan : an tri mil Philistin a oua paket ive ha lazet kercouls hag heñ ; hag evelse, betec en eur vervel, an den nerzuz ha calounec-se a zifenne c'hoaz he vro hag he bobl.



Jedeon, ar barner humbl ha devot, an hini a reas brezel d'ar Madianitet, a oue c'hoaz brudetoc'h he hano.

An daouzec barner ne rejont kement all a draou burzuduz nemet dre ma'z oant kennerzet gant an Aotrou Doue; rac en amzer-ze an Aotrou Doue he unan, hag heñ eken, eo a rene e guirionez ar bobl a Israël petra bennac n'en em roë ket dezhan da velet. Evelse ive an daouzec abostol n'o deuz discaret ar relijion baian dre ar bed nemet gant sicour gras Jesus-Krist, pehini a anaïent ive evit ho guir mestr hag ho guir roue, petra bennac n'her guelent ket ken nebeut gant daoulagad ar c'horf.

### 43. Ruth, ar verc'h-caër carantezuz.

En amzer ar varnerien, eun den divar dro Bethleem a ieas da jom da vro ar Moabitet gant he c'hreg hag he zaou vab. He hano a ioa Elimelek, ha Noëmi, hano he c'hreg. He zaou vab a zimezas da ziuu vaouez euz ar vro-ze. Abenn nebeut amzer Elimelek hag he zaou vab a varvas,



ha Noëmi a zistroas da Vethleem. He diou merc'h-caër, hanvet Orpha ha Ruth, a deuas d'he ambroug var an hent.

Eur pennad a ioa m'edont o vale ho zeir assambles pa lavaras Noëmi d'an diou all: «distroït d'ar gear brema, ha Doue r'ho paëo evit ar vad o peuz great dinn-me ha d'am daou vab.» Neuze an diou verc'h-caër a zirollas

da vouela en eur lavaret : « ni ielo ganeoc'h da gaout ho pobl. » Abarz ar fin coulsgoude caloun Orpha a deuas da laoskaat, ha setu hi da gimjada dioc'h Noëmi ha da vont var he c'hiz da vro ar Moabitet. Mes Ruth a lavaras a-grenn d'he mamm-gaër : « evidon-me a jomo ganeoc'h ; ho pobl a vezo va fobl, hag ho Toue, va Doue ; hag el leac'h ma vezo ho pez me a fell dinn ive mervel. » Erruout a rejont eta ho diou e Bethleem. Hogen an dra-ma a ioa e mare an eost, ha Ruth a zonjas mont da bennaoui evit caout pe a dra da veva. Dorn Doue he c'hassas var douar Booz, eun den pinvidic-braz hag a ioa car da Elimelek. Booz a deuas var an deiz da velet he zervicherien a ioa o tastum ed en he barkeier. O veza guelet eno Ruth o pennaoui, hag o veza clevet gant pebez carantez e devoa heuliet he mamm-gaër, ez eas d'he c'haout hag e lavaras dezhi : « va merc'h, chomit e kichen va flac'het, hag it var ho lerc'h e kement leac'h ma vezint oc'h endramm. P'o pezo sec'het, evit euz ar pod a zo ama evit va zervicherien, ha da vare ar pred deut da zibri assambles gantho. » Booz a lavaras ive d'he zervicherien : « pa vioc'h oc'h endramm, lezit ama hag a-hont eur penn bennac da goueza euz o'ch herdinn evit n'e devezo ket a vez oc'h ho dastum. »

Nebeut amzer goude Booz a lavaras da Ruth : « an oll a c'hoar oc'h eur vaouez leun a furnez, » hag e kemas anezhi evit pried. An Aotrou Doue a vennigas an dimizi-ze, hag a roas dezho eur mab, he hano Obed. Hema a oue tad da Isaï ha tad-coz da Zavid. Euz al lignez-se eo e tiskenn hor zalver Jesus-Krist.

Ar Moabitet n'e ket iuzevien oant, mes divroïdi, hag aliez zoken enebourien. En eur ziskenn euz a lignez Ruth, an intañvez-se a vro ar Moabitet, hor zalver Jesus-Krist a felle dezhan discouez n'e ket salver ar iuzevien ebken eo e tlie beza, mes salver an oll dud a volontez vad.

#### 44. Samuel. Bugale Heli.

En amzer m'oa ar belec braz Heli barner en Israël, e veve daou bried a zoujans Doue, Elcana hag Anna ; Anna

n'e devoa ket a vugale, hag an dra-ze a rea eur'hoan vraz dezhi. Eun dervez ez eas da dabernacl an Aotrou Doue a ioa savet neuze e Silo. Eno e pedas hag e lavaras en eur vouela: «Aotrou Doue an armeou, ma roït dinn eur mab, me hen gouestlo d'ho servich.» Doue a zelaouas he feden, hag a roas dezhi eur mab: hema a oue hanvet Samuel.

Pa oue crog en he dri bloaz, he vamm a deuas d'hen digass da Zilo d'ar belec braz Heli. Samuel a zerviche an Aotrou Doue ebarz entabernacl, ha, dre ma creske en oad, e plije muioc'h-mui da Zoue ha d'an dud.



Samuel a verke S. Ian-Vadezour. Ho daou int bet roët gant Doue da bedennou ho zud; ho daou int bet gouestlet abred d'an Aotrou Doue; ho daou o deuz prezeget ar binijen d'ar bobl. Samuel a oue ar barner diveza, hag a deuas araoc ar roue braz, David. S. Ian-Vadezour a oue an diveza prophet, hag a deuas araoc Jesus-Krist, rcue an eñv hag an douar. Samuel a zacras David, ha S. Ian a vadezas hor zalver.

Hogen Heli en devoa daou vab fallacr, ho hano Ophni ha Phinees. Pa deue unan bennac euz ar bobl da Zilo da lakaat ober eur sacrifics, an daou zen iaouank-se a ziframme digantho aliez kig al loanet a ioa bet lazet evit ar sacrifics, ha calz fallagriezou all a reant c'hoaz el leac'h santel. Heli ho scandale, evit guir; mes ne zalc'he ket berr aoualc'h varnezho: re chentil oa en ho c'heñver. —

Eun nozvez m'edo Heli o cousket e kichen an tabernacl, ha Samuel en eur guele all a dost dezhan, an Aotrou Doue a c'halvas e creiz an noz: «Samuel, Samuel!» Hema a gredas oa Heli her galve, ha setu heñ buhan var zao, ha da gaout ar belec braz en eur lavaret: «emaoun ama.» Mes Heli a respountas: «n'em euz ket ho calvet; distroït eta d'ho kuele, ha couskit e peoc'h.» Samuel a zentas hag a zistroas da gousket. Abenn eun tachadic goude, an Aotrou Doue a c'halvas evit an eil gueich: «Samuel, Samuel!» Ha Samuel da zével evel ar veich genta, ha da vont adarre da gaout Heli en eur lavaret: «Setu me ama; rac va galvet o peuz.» Hag Heli a respountas: «nan, va mab, n'em euz ket ho calvet; distroït d'ho kuele ha eouskit dizoursi.» Ar memes tra a erruas evit an drede gueich. Neuze Heli a gouprenas oa an Aotrou Doue he unan a c'halve ar bugel, hag a lavaras dezhan: «distroït d'ho kuele, ha, mar clevit ho kervel eur veich c'hoaz, livirit evel-hen: «comzit, Aotrou, ho servicher a zo oc'h ho selaou.» Pa oa Samuel en em roët adarre da gousket, an Aotrou Doue a c'halvas a nevez gant eur vouez creñ: «Samuel, Samuel!» Ha setu kerkent Samuel da respount: «comzit, Aotrou, ho servicher a zo oc'h ho selaou.» Neuze an Aotrou Doue a lavaras dezhan: «ema tost an deiz ma astenninn an dorn pounner euz va justis var Heli ha var he vugale; rac dizursiou ar re-ma a ioa anavezet gant ho zad, hag Heli n'en deuz ket ho funisset evel ma tlie hen ober.» Antronoz-vintin Heli a lavaras da Samuel: «ac'hanta, petra en deuz lavaret deoc'h an Aotrou Doue? Ne guzit netra ouzinn, me ho ped.» Samuel a gountas dezhan var eün ar pez en doa clevet, hag Heli en em rezinas da volonteiz Doue, en eur lavaret: «Doue eo ar mestir; heñ a raïo ar pez a blijo ganthan.»

Ar pez en devoa discleriet an Aotrou Doue a deuas da veza guir eb dale. Bez' e oue etre ar Philistinet hag an Israelitet eun emgann hag a lakeas calz a c'hoad da redet. Tregont mil den a oue lazet dioc'h costez an Israelitet, ha bugale Heli a ioa en ho zouez; ouspenn, an arc'h a

allians a jo-  
mas etre  
daouarn an  
enebourien.  
Pa glevas ar  
c'helou scri-  
juz-se, Heli  
a gouezas  
dreist choug  
he gil divar  
he gador; he  
benn a i eas  
da steki oc'h  
dor he gambr,  
hag ar stokaden a oue ker creñ ma roas dezhan taol  
ar maro.



Ar Philistinet o devoa c'hoant da zalc'her an arc'h gantho; mes Doue ho skoas gant meur a voualen. Ar razet a reas eun drouc braz en ho douarou, hag eur maread-tud a gouezas clañv hag a varvas, ken er c'hearieu, ken var ar meaz. Neuze ar Philistinet a gemeras aoun, hag a lavaras: « arabad eo delc'her ganeomp arc'h Doue Israël; rac goa. reuzeudic oump lakeat dre'n abeg dezhi.» Cass a rejont eta an arc'h a allians en dro da vro an Israelitet.

An arc'h a allians a zo eur merk euz a sacramant an aoter. An nep a receo ar sacramant-ze e stat fall a denn ive varnhan malheuriou braz.

Couls goude Samuel a ioa deuet da veza barner varlerc'h Heli. Assambli a reas an Israelitet, ha, goude beza digasset da zonch dezho euz ho fec'hejou, e lavaras: « mar kirit distrei ous Doue euz a greiz ho caloun, heñ ho tenno euz a-dre daouarn ar Philistinet.» An Israelitet a zentas; ober a rejont pinijen en eur anzaio o doa pec'het a enep an Aotrou Doue. Neuze Doue a roas dezho ar victor, hag ho enebourien ho lezas e peoc'h epad meur a vloaz.

#### 45. Kenta roue a Israël: Saül.

Samuel a ioa deuet da veza coz, hag he vugale ne vevent ket e doujans Doue. Neuze ar bobl a lavaras dezhan: «lakiit unan bennac da roue varnomp evel ma'z euz en oll broïou all.» Ar c'homzou-ze a zisplijas da Zamuel abalamour ma felle dezhan n'en devije ar bobl a Israël ken roue nemet an Aotrou Doue he unan. Couls-goude, dre urs Doue, e lakeas Saül da roue. Saül a ioa eun den brao ha calouneec, ha braz a vent: treuz he benn en doa dreist an Israelitet all. Samuel hen digassas dirac ar bobl, ha kerkent ar bobl oll a lavaras a vouez huel: «ra vevo pell ar roue!»

An Aotrou Doue a oue gant Saül hag a roas dezhan ar victor var oll enebourien Israël. Eun dervez Samuel a lavaras d'ar roue: «setu ama petra lavar an Aotrou, Doue an armeou: grit brezel d'an Amalecitet ken na jomint oll var an dachen, ha ne zalc'hit ganeoc'h netra euz ar pezh o deuz.» Saül a zavas eun arme a 200,000 den, hag a drec'has an Amalecitet. Foug enghan gant he victor, e c'hoanteas caout eun dra bennac da ziscouez en devoa gounezet var he enebourien, hag e talc'has ganthan ar peb guella euz ho loanet. Samuel o veza rebechet dezhan ar pezh en doa great, Saül a glaskas digareziou en eur lavaret: «espernet em euz ar guella ounniri hag an deñvet guella evit ober gantho sacrificiou d'an Aotrou Doue.» Mes Samuel a respountas: «guelloc'h eo senti eget ober sacrificiou gant loanet. Evel m'o peuz great faë var gomzou Doue, evelse ive Doue a ra brema faë varnoc'h.»

Ar roue Saül a verke ilis ar iuzevien, pe ar sinagog. An ilis-se a ioa bet *choazet gant Doue he unan*, ha n'e devoa ket he far evit ar grasou e devoa recevet euz an eñv, hag evit an anaoudegez e devoa euz ar guir Doue. Nebeut a nebeut e couezas euz ar stat caër-ze: ancounac'haat a reas senti, beza humbl ha trugarezuz, hag e falvezas dezhi tenna he oll gloar euz he zacrifisou. Setu perac Doue he zaolas a gostez, hag a lakeas en he flas an Ilis catholic. Evel Saül a gemeras caz ous David, evelse ive ar sinagog a gemeras caz ous Jesus-Krist, mab

David. Evel David a scuillas daëlou pa glevas ar c'helou euz a varo Saül, evelse ive Jesus-Krist a vouelas var Jerusalem ha var dempl ar iuzevien, en eur zounjal en dismantr a vije great anezho; hag evel Jonathas, unan euz a vugale Saül, a oue mignoun braz da Zavid, evelse ive s. Paol hag an ebestel all, pere a ioa bugale d'ar sinagog, a oue choazet gant hor zalver Jesus-Krist evit beza he vrasa mignounet.

#### 46. David, ar pastor-denved.

Eun dervez Doue a lavaras da Zamuel: «it da Vethleem da di Isai, rac choazet em euz unan euz he vugale evit beza roue e plas Saül.» Samuel a deuas eta da Vethleem. Eno e velas da genta mab hena Isai, eun den braz ha coant. Mes an Aotrou Doue a lavaras da Zamuel: «ne zell ket ouz he c'henet; n'e ket hennez eo am euz choazet;



me ne varnan ket an dud dioc'h an doare o deuz a ziañveaz.» Isai a zigassas neuze he c'houec'h vab all, an eil goude egile, dirac Samuel; mes Samuel a lavaras: «Doue n'en deuz choazet nicun euz ar re-ma. It da glask David, ho mab iaouanka, a zo o tivoal al loanet.» Pa erruas David er gear, an Aotrou Doue a lavaras da Zamuel: «sao da zacri anezhan; rac hennez eo am euz

choazet.» Neuze Samuel a gemeras corn an oleo hag a zacras David roue dirac he vreudeur. Kerkent David a oue leun euz a speret Doue. Er memes amzer an drouc-speret a deuas da veza mestr var Zaül, ha lakaat a rea aveichou ar prins-ze da veza diez ha teñval he benn. He zervicherien a lavaras dezhan neuze: «kemennit d'ar iaonanka a vugale Isai dont ama da c'hoari gant an delen dirazoc'h, ha marteze e vellaï deoc'h.» Setu aze penaoz ec'h erruas David e ti Saül. Ne oue ket pell eno na deuas Saül d'he garet ha da rei dezhan eur garg a honor en he balez; rac ne c'houïe dare oa bet David sacret roue. Bep veich ma teue an drouc-speret da veza mestr varnhan, David a c'hoarie gant an delen, ha Saül en em gave eassoc'h.

#### 47. David hag ar jeant Goliath.

En amzer-ze ar Philistinet a zavas adarre armeou evit ar vrezel. Edont var eur menez, hag an Israelitet var eur menez all rac enep dezho. Ha setu eur jeant, he hano Goliath, o tifourcha euz a douez ar Philistinet. Ar jeant-se en doa ouspenn dec troatad a huelder; eun toc koueur-ha-stean a ioa ganthan var he benn, hag he gorf oll a ioa goloët a armou pounner. Troad he lans a ioa heñvel ous carvan eur guiader. Dont a reas dirac arme an Israelitet en eur lavaret a vouez huel: «digassit unan bennac ac'hanoc'h d'en em ganna ouzinn, ha, mar laz ac'hanon, ni oll, ken entrezomp Philistinet, a vezo esclavourien deoc'h; mes ive, ma lazan anezhan, c'houï oll a vezo hon esclavourien-ni.» Ar jeant a gendalc'has epad daou-ugent dervez dioc'htu da zont evelse, diou veich bemdez, dioc'h an noz ha dioc'h ar mintin, da ober goab euz ar bobl a Israël. Ha den ebet ne grede mont outhan; ha Saül hag he oll arme a grene gant ar spount.

Erfin David a lavaras da Zaül: «me, ho servicher, eo a ielo d'en em ganna ouz ar Philistin-ze.» — «C'houï zo re iaouank, eme Zaül; hennez a c'hoar embrega an armou a bell zo.» Mes David a respountas: «p'edon er gear o tivoal al loanet, mar gueljen eul leoun pe eun ours



bennac o cass ganthan eur maout euz a douez va deñved, me a rede var he lere'h hag a ziframme va fenn-dañvad euz a-dre he zent; ha, mar tilamme varnon, me groge en he c'houzoug hag a voaske varnhan ken n'em beze he vouget. Mont a rinn eta d'en em ganna ouz ar Philistin-ze eb aoun ebet, hag evelse e lakinn fin d'ar vez a denn var ar bobl. Doue en deuz va difennet a enep skillfou al leounet hag an oursien; heñ a roïo dinn ive ar c'hras da veza treac'h d'ar jeant-se, en despet d'he oll nerz.» Var gement-se Saül a lavaras: «mad! kit-ta, ha Doue ra



vezo ganeoc'h!» Saül a roas neuze he armou da Zavid; mes hema n'oa ket evit bale gantho, ker pounner oant. Ho zeuler a reas eta a gostez, ha ne gassas ganthan nemet eur vaz hag eur valtamm. Goudeze e tastumas en eur c'houëren pemp mean euz ar re flourra a gavas, hag, o veza lakeat ar vein-ze er zac'h bihan a veze ganthan o lakaat bara pa veze o tivoal al loanet, setu heñ, he valtamm en eun dorn hag he vaz en he zorn all, o vont rac eun etrezec ar Philistin. Hema, oc'h he velet o kerzet

varzu enghan evelse, a lavaras gant eur vouez goapaüz : «petra? evit eur c'hi e kemeres ac'hanon-me, ma téues evelse d'en em ganna ouzinn gant eur vaz? Tosta ama-la, ha bremaïc me roïo da gorf da zibri d'al labouset euz an eñv ha d'al loanet euz an douar.» David a respountas : «te deu ouzinn gant ar c'hleze, al lans hag a bep seurt armou, ha me ia d'id gant eun arm c'hoaz galloudussoc'h, me ia d'id en hano an Aotrou, Doue an armeou.» Ar Philistin a reas neuze eur gammed bennac araoc ; mes kerkent David a gemeras eur mean en he sac'h bihan, hag her bannas gant he valtamm ouz ar jeant. Hema a oue tizet e creiz he dal, ha ken abafet e oue gant an taol ma couezas var he benn d'an douar. David a redas ractal d'he gaout, hag evel n'en doa ket a gleze he unan, e tic'houinas hini ar jeant, ha gant ar c'hleze-ze e trouc'has dezhan he benn. — Ar Philistinet, o velet oa maro ar c'hreñfa anezho, a gemeras an teac'h ; an Israelitet a ieas var ho lerc'h hag a lazas eun niver braz anezho.

Victor David var Goliath a verke victor Jesus-Krist var an diaoul. Evel Goliath a reas goab euz ar bobl a Israël epad daou-ugent dervez, evelse ive an diaoul en deuz great goab, epad daou-ugent cantvet, euz a ren Doue var an douar. Evel David a ieas d' en em ganna ous Goliath gant eur vaz ebken ha pemp mean, hag a oue treac'h d'ar jeant, evelse ive Jesus-Krist en deuz gounezet ar victor var an diaoul dre he groaz ha dre he bemp gouli ; *rac euz ar pemp gouli-ze* eo deuet ar goad gant pehini eo bet prenet ar bed oll.

#### 48. Carantez Jonathas ha cassouni Saül evit David.

Goude ar victor-ze, dre gement kear ma tremene an arme, ar merc'hed a deue euz ho ziez en eur gana : «Saül en deuz lazet mil, ha David dec mil.» Neuze Saül a gemeras gouarizi ous David, hag eun dervez m'edo hema o c'hoari gant an delen, e vannas he lans outhan. Mes David a c'hellas tec'het araoc an taol. Nebeut goude, Saül a lavaras da Zavid e roje dezhan he verc'h Michol da bried mar lazche cant Philistin. N'en devoa ken sonch, o comz evelse, nemet da lakaat David da goueza etre

daouarn ar Philistinet. Mes David a lazas daou c'hant e leac'h cant, hag a c'hounezas calounou an oll Israelitet. Hogen, Saül n'endevoue nemet muioc'h-mui a gaz outhan, hag a roas urs d'hen lakaat d'ar maro.

Coulsgoude Jonathas, mab Saül, a garie David evel he vreur : ho daou o devoa touet e vijent ato mignounet an eil d'egile. Jonathas a roas eta da anaout da Zavid ar gassouni en doa he dad outhan. Lavaret a reas ive d'he dad : « o roue, ne rit droue ebet da Zavid. A volonté vad en deuz riselet he vuez evidoc'h, hag en deuz lazet ar Philistin. Perac mont da scuill goad eun den ha n'en deuz great torfet ebet ? » O clevet ar c'homzou-ze, speret Saül a deuas da zoussaat, hag e reas al le-ma : « ker guir ha ma'z eo Doue, Doue, ne lakinn ket David d'ar maro. » Ha David a jomas adarre e ti Saül evel a ziagent. — Mes, goude m'en devoue trec'het ar Philistinet evit an drede gueich, Saül a vannas adarre he lans outhan. Dre ehans, David a c'hellas tec'het araoe an taol evel an dro genta. Neuze Jonathas a glaskas doussaat speret he dad evel m'en doa great ar veich all ; mes Saül, eur gounnar vraz enghan, a respountas : « gouzout a ran e carit mab Isaï ; hogen, gaou a rit ouzoc'h oc'h unan evelse ; rac keit ha ma vezo beo hennez, c'houi ne c'helloc'h biken beza roue. Livirit dezhan dont ama dioc'htu, ma vezo lakeat d'ar maro. » — « Mes, eme Jonathas, perac hen lakaat d'ar maro ? Peseurt droue en deuz-heñ great ? » Ar c'homzou-ze a greskas muioc'h-mui buanegez Saül ; tenna a reas he gleze evit laza Jonathas he unan ; mes hema a dec'has kuit hag a ieas da gaout David. Reï a reas ali d'he vignoun da jom eb dont mui dirac Saül ; neuze David hag heñ en em daolas an eil etre divreac'h egile en eur gemmesk ho daëlou. Erfin Jonathas a lavaras : « it e peoc'h ; ar pezh or beuz touet hon daou dirac an Aotrou Doue a bado da virviken. »

#### 19. Trugarez David e kenver Saül. Maro Saül.

David a dec'he araoe Saül hag a ioa bepret e risel euz he vuez. Mes lakaat a reas he fisians e Doue, hag an

Aotrou Doue a viras outhan da goueza el lasou a steigne dirazhan he enebourien.

Eun dervez Saül a iea var he lerc'h a dreuz eur menez gant 300 soudard. Bez' ez oa dre eno eur c'havarn, ha Saül a iegas er c'havarn-ze da gousket. Hogen, David a ioa cuzet e goueled ar c'havarn gant an dud a ioa oc'h he heul. Ar re-ma a lavaras neuze dezhan: «setu ama deiz ar venjans; brema e c'hellit ober d'oc'h enebour



ar pezh a gero-  
roc'h.» Mes  
David a res-  
pountas :  
« Doue ra  
viro na  
astennfenn  
va dorn  
varnhan ;  
rac sacret eo  
bet a berz  
Doue.» Ha  
ne reas  
drouc ebet  
da Zaül,

nemet trouc'ha eur penn euz he vantel epad m'oa cousket.  
— Eur veich all Saül a iegas var he lerc'h en dezert, hag a jomas gant he arme da dremen an noz var grec'hien Hachila. Pa oa Saül, Abner he jeneral, hag he oll zoudardet, en em roët da gousket, David a dosteas gant he vignoun Abisaï. Ha setu hema da lavaret da Zavid: «henoz, Doue en deuz lakeat oc'h enebour etre ho taouarn; bremaïc me ia d'hen treuzi gant va c'hleze en eun hevelep feson ma ne vezo ket ezom da rei dezhan eun taol all evit he beur-gass.» Mes David a respountas: «arabad eo he laza; ker guir ha ma'z eo Doue, Doue, ne astenninn ket va dorn varnhan. Gortoz a rinn ken na vezo skoët gant Doue he unan, pe sammet gant eur c'hleñvet bennac, pe lazet er vrezel. Kemerit ebken ar c'hleze a zo e tal he benn, hag he veren, ha deomp kuit.»

Kement-se a oue great eb gouzout dare da zen. Pa oa eat David eur pennadic dioc'h telt Saül, e e'halvas Abner, en eur lavaret: «hag evelse eo e tivoallit ar roue? It da velet-ta e peleac'h ema he gleze hag he veren!» Kerkent Saül he unan a zihunas, hag a c'houlennas: «daoust ha n'e ket mouez va mab David eo a glevan?» Ha David a respountas: «eo, va aotrou ha va roue! Perac e talc'hit-hu ato cassouni ouz ho servieher?» Saül a anavezas neuze ne rea ket mad, hag a lavaras: «pee'het em euz; distroït d'am e'haout, va mab David. Hiviziken ne rinn drouc ebet deoc'h. Benniget ra viot, va mab David!» Mes David a ieas gant he hent, ha Saül a zistroas d'ar gear.

Nebeut amzer goude Saül a oue goal dizet en eun emgann a enep ar Philistinet; kement a rann-galoun en devoue da veza collet ar victor ma'c'h en em lazas he unan gant he gleze. Evelse David n'en devoue mui var he zeuliu he enebour touet. Coulskoude ne oue ket evit miret da vouela pa oue digasset dezhan ar c'helou euz a varo Saül. Mes eur c'heuz braz en devoue, dreist oll, da Jonathas pehini a ioa bet lazet ive, ha elevet e oue o lavaret dre he hirvoud hag he voëlvan: «Jonathas, va breur ker, bez' em oa evidoc'h siousas! ar garantez e deuz eur vamm evit he mab, pa n'e deuz ken crouadur nemethan.»



PEDERVET LODEN

AR BOBL A ISRAEL E BARR HE VRUD HAG HE C'HALLOUD ;  
AZALEC DAVID BETEC MA OUE RANNET AR ROUANTELEZ  
EN AMZER ROBOAM.

(Adalec ar bloaz 1055 betec ar bloaz 975 araoc donedigez  
hor zalver.)

50. David, ar roue braz ha santel.



Goude maro Saül, ar bobl a jozas David evit he roue. David a deuas neuze da jom da Jerusalem, e kichen menez Sion, hag he hano a oue brudet dre ar bed oll. Bez' en doa daouzec arme, ha pevar mil den var-n'-ugent e peb hini; e penn peb arme ez oa eur jeneral, ha dreist an oll jeneralet all edo Joab. David a deuas a benn da lakaat he oll enebourien da blega dindanhan, ha trec'hi

a reas evelse ar Philistinet, ar Moabitet, ar Sirianet, an Edomitet hag an Ammonitet.

Digasset e oue da Jerusalem armou aour hag eur maread traou all kemeret var an enebourien. Rouantelez Israël en em astenne neuze adalec an Ejipt betec ar ster hanvet Euphratt.

Mes ar pez a reas d'ar roue David muioc'h a honor c'hoaz eget ar victoriou gounezet ganthan var he enebourien, a oue ar zoursi a gemeras euz a eürusdet he zujidi. Bez' e oue ato leal ha guirion e keñver peb hini anezho; choaz a reas tud leun a furnez evit rei euzul dezhan he unan hag evit barn ar bobl, ha carga a reas re all, hag a c'hellet fisiout peb tra enno, da zivoal an tenzoriou, an tiez hag an douarou a ioa en he zalc'h. Evelse peb tra a ioa en urs ha renket mad ken e diabarz, ken a ziañveaz ar rouantelez.

David a labouras gant eun aket eb he bar da lakaat ar guir Doue da veza anavezet hag henoret muioc'h-mui. Ober a reas sevel, var menez Sion, eun telt euz ar re gaëra evit an arc'h a allians, hag an arc'h a oue casset di gant ar brassa lid. E creiz eur bobl-tud ha n'oa ket eaz da niveri, e oue guelet ar brinset a Israël gant ho mantillimoug, ar veleien gant ho braoa guiskamanchou, ha 3000 soudard dindan ho armou. Ar re a ioa er penn araoc, kercoulz hag ar re a ioa er penn adreñ, a c'hoarie gant telennou, troumpillou, taboulinou, hag a bep seurt benviachou all evelse. David he unan a gerze araoc ar veleien en eur c'hoari gant an delen. Bep c'houec'h cammed a rea al levitet a ioa o tougen an arc'h, David a ginnige eun ejen hag eur maout e sacrifis d'au Aotrou Doue.

Ar roue David a rannas ive ar veleien etre pevar rumm var-n'-ugent, hag ar rummou-ze a ioa carget an eil goude egile euz ar pez a zell ous servich Doue. Etouez al levitet e choazas, ouspenn, 4000 caner hag a dlie, peb hini d'he dro, cana meuleudiou an Aotrou Doue, ha c'hoari gant a bep seurt benviachou.

51. Absalon a glask didroni he dad.  
Penaoz eo punisset.

David a gouezas e daou bec'het euz ar re c'hrevussa : lakaat a reas greg Urii da avoultri, ha goudeze e reas laza Urii he unan er vrezel. Neuze an Aotrou Doue a zigassas d'he gaout ar prophet Nathan evit rebech dezhan he dorfet. David a anzañas he bec'het, en eur lavaret : « bec'het am euz a enep an Aotrou Doue. » Dre an anzañ-ze, great a greiz caloun ha gant eur c'hlaç'har vraz, ec'h obtenas pardoun digant Doue ; mes calz a boaniou hag a drubuilou en devoue da c'houzañv goudeze abalamour d'he bec'het. David ho gouzañvas oll eb en em glemm, hag a reas pinijen ar rest euz he vuez.

Unan euz he vugale, Absalon, den a zoare evit eur guel, mes bugel dinatur, en em zavas en he enep. Absalon a ioa deuet a benn da c'hounit calounou an oll dre he gomzou touelluz, hag ar bobl dallet a ziredas euz a bep corn ar vro d'en em lakaat a du ganthan. Pa glevas David ar c'helou-ze, e kuiteas Jerusalem gant he zervi-cherien fidel ; treuzi a reas dour Cedron, ha goudeze



e pignas  
var menez  
Olivet, diar-  
c'hen, en eur  
vouela, hag  
he benn  
chouchet.  
Epad m'edo  
o tec'het eun  
tammic  
c'hoaz pel-  
loc'h, eun  
den euz a di  
Saül, he

hano Semeï ; en em lakeas da deuler mein outhan, ha da leusker he valloz varnhan en eur lavaret : « it kuit euz ar vro, it, den a c'hoad. » Abisaï, unan euz ar re a ioa oc'h ober coumpagnunez da Zavid, en devoa c'hoant



da laza Semeï. Mes ar roue a lavaras dezhan gant dousder: «arabad eo; list anezhan da rei dinn he valloz; marteze an Aotrou Doue, o velet peger reuzeudic oun, en devezo truez ouzinn, hag a lakaï malloz an den-ze da dreï evidon e bennoz.»

Couls goude Absalon a ieas varlerc'h he dad en tu all d'ar Jourden. Neuze David a renkas he arme evit ar vrezel. An Aotrou Doue a oue a du ganthan hag e c'hounezas var he vab. Hema a gemeras au teac'h a c'haoliad var eur mul. En eur dremen a zindan eur vezen vraz a zero, he benn a oue paket etre ar scourrou, hag e chomas eno a istribill a bouez he vleo hir. Joab, o veza clevet an dra-ze, a ziredas da gaout ar vezen, hag a dreuzas caloun ar mab dinatur gant tri denn bir. Corf Absalon a oue taolet goudeze en eun toul doun ha var c'horre e oue savet eur bern mein.

David a oue mantret ha glac'haret oll pa oue digasset dezhan ar c'helou euz a varo he vab. Gouela a rea hag hirvoudi, en eur lavaret: «Absalon, va mab; va mab Absalon! Salo e vijenn maro en ho plas! Absalon, va mab; va mab ker Absalon!» Goudeze e tistroas da Jerusalem, hag ar bobl oll a deuas d'he zigemeret hag a roas dezhan ar brassa merkou a garantez hag a henor.

E buez David e cavomp eleiz a verkou a heñvedigez gant buez hor zalver Jesus-Krist. David a ioa ginidic a Vethleem; hor zalver a zo ganet eno ive. David en deuz renet eur vuez cuzet en he iaouankis; hor zalver ive betec an oad a dregont vloaz. David zo bet treac'h d'ar jeant Goliath; Jesus-Krist en deuz gounezet ar victor var an diaoul. David en deuz treuzet dour Cedron e kichen menez Olivet, he ene beuzet en eur mor a anken; Jesus-Krist ive, an noz kent he varo. David a oue digemeret e Jerusalem gant calz a henor, goude maro Absalon; hor zalver ive, da geñver ar zul-bleunion. David en deuz bet daou enebour braz, Saül, an hini a ioa roue en he raoc, hag Absalon, he vab; hor zalver Jesus-Krist en deuz bet ive daou enebour dreist ar re all: da genta, ar sinagog, pe ilis ar iuzevien, pehini a ioa carget en he raoc da zalc'her var an douar ar guir relijion, hag e plas pehini en deuz lakeat an Ilis catholic; ha goudeze, an heretiket a zo en em zavet a enep an Ilis catholic, ho mamm,

hag a zo deuet a benn, en eur reiñ cabestr da dechou fall an den, da ziframma diouthi eur maread poblou. — Hogen, Saül hag Absalon a zo bet skoët ho daou gant Justis Doue.

## 52. David var fin he vuez.

Daou-ugent vloaz a ioa abaoe m'oa pignet David var an tron. O credi n'en doa mui pell da veva e c'halvas dirazhan ar brinset a Israël hag an dud a renk huela etouez ar bobl, hag e lavaras dezho : «sonch em oa da zevel eun ti d'an Aotrou Doue ; lakeat em euz a gostez evit kement-se aour hag arc'hant, koueur ha stean, houarn, coat, ha mein euz ar re dalvoudussa. Mes Doue en deuz lavaret dinn : abalamour m'o peuz scuillet calz a c'hoad er brezelliou m'oc'h bet enno, n'e ket c'houi, mes ho mab Salomon, eo a zavo eun ti evidon. Hogen, eul labour braz a zo eno da ober ; rac n'e ket da eun den, mes da Zoue he unan eo ez euz menec da zevel eun ti. Roït eta, c'houi ive, ar pez a zo en ho calloud evit sicour sevel an ti santel.» Ar brinset hag ar bobl oll a roas profou a galoun vad ha gant joa evit sicour sevel eun ti d'an Aotrou Doue.

Neuze David a lavaras da Zalomon : «Savit eta an ti santel, ha Doue a vezo ganeoc'h. Dalc'hit mad da zervicha an Aotrou Doue gant eur galoun sentuz. Mar her c'blas-kit, oc'h sur d'he gaout ; mes mar hen dilezit, heñ ho tilezo d'he dro.»

David a varvas goudeze, hag he gorf a oue lakeat en douar var menez Sion ; he vab Salomon a oue roue var he lerc'h : an dra-ma a erruas var dro ar bloaz 1014 araoc donedigez hor zalver.

## 53. Furnez Salomon.

Salomon a garas an Aotrou Doue hag a gerzas var roudou he dad. An Aotrou Doue en em ziscouezas dezhan en eur lavaret : «goulennit diganeñ ar pez a geroch, ha me hen roïo deoc'h.» Salomon a respountas : «va Doue, lakeat o peuz ac'hanon da roue ; mes iaouank braz

oun c'hoaz, ha n'em euz ket calz a vouisiegez. Roït dinn eta eur galoun fur evit ma c'hellinn barn ho pobl hervez ar guir hag al lealdet.» Doue a blijas dezhan ar beden-ze hag a lavaras da Zalomon: «abalamour n'e ket madou, nag eur vuez hir, mes ar furnez ebken eo o peuz goulennet diganeñ, me roïo deoc'h, hervez ho c'hoant, eur galoun fur evel n'en deuz bet biscoaz den hag evel den n'en devezo birviken mui. Ouspenn, me roïo deoc'h ive ar pez n'o peuz ket goulennet, da lavaret eo, madou, henoriou hag eur vuez hir.»

An Aotrou Doue a roas eta da Zalomon eur guir anaoudegez euz a gement tra zo. Coumpren a reas ar feson burzuduz ma'z eo renket entrezho an oll draou crouët, an nerz hag ar c'halloud a zo ennho. Gouzout a reas penaoz e teu ar bloaveziou an eil varlerc'h ègile, penaoz e tro ar steret, petra a laka al loanet da ober ar pez a reont, ha peseurt sonjou a dremen dre speret an den. Anaout a reas kement seurt plant ha kement seurt louzeier a zao en douar, da betra eo mad peb hini anezho, ha petra a c'heller da ober gant ho griziou: ar bed oll a ioa evel eul levr hepret digor dirac daoulagad he speret. Setu perac an dud gouisiec hag ar brinset a bep bro a deue d'he velet evit beza test ho unan euz he furnez eb he far.

Eun dervez diou c'hreg a deuas d'he gaout evit he bedi da veza barner entrezho. Unan euz an diou c'hreg-se a gomzas evel-hen: «ar c'hreg all-ma ha me, emezhi, n'euz nemedomp hon diou o chom en ti m'emaomp ennhan. Hogen, peb hini ac'hanomp e devoa eur c'hrouadur. Eun nozvez mab ar c'hreg-ma a varvas, rac hi e devoa mouget anezhan dre he gousk. Petra reas neuze? Sevel euz he guele epad m'oan cousket, me, kemeret va mab, ha lakaat en he blas he bugel maro. Pa zavis dioc'h ar mintin, e veljon ar bugel maro; mes, a bouez sellet pis outhan, e velis ervad n'e ket va mab-me oa.» Var gement-se ar c'hreg all a lammas var gaoz an hini e devoa comzet da genta, en eur lavaret: «n'e ket evelse eo; ho mab-c'houi a zo maro e guirionez, ha va



hini-me eo a zo beo.» Mes an hini e devoa comzet da genta, a respontas : «nan, geier a livirit ; ar bugel beo a zo dinn-me, hag an hini maro eo oc'h hini-c'houi.» Herpel a reant evelse an eil oc'h eben dirac ar roue. Neuze Salomon a lavaras : «digassit ama eur c'hleze ma vezo rannet ar bugel beo etre daou, ha ma vezo roët eun anter da bep hini euz an diou c'hreg-ma.» Mamm ar c'hrouadur beo a oue spountet o clevet ar c'homzou-ze. An encrez en he c'haloun, ha leun a garantez evit he mab, e lavaras da Zalomon : «aotrou roue, me ho ped, roët kent ar bugel beo d'ar c'hreg all ; mes en han' Doue n'hen lazit ket.» Ar c'hreg all, er c'houtrol, a lavare : «ia, ia, mad eo evelse ; ra vezo daou-anteret ar c'hrouadur.» Salomon a zougas neuze ar zetans-ma : «roët ar bugel beo d'an hini e deuz comzet da genta euz an diou c'hreg-se ; rac hounnez eo e guirionez he vamm.» Ar zetans-se a oue anavezet e kement corn a ioa er vro, hag an oll a oue leun a respet evit Salomon ; rac anad oa da bep hini edo speret Doue ganthan.

#### 54. Dedi an templ a Jerusalem.

Ar pevare bloaz goude m'oa pignet var an tron, Salomon a reas digeri al labour evit sevel eun ti d'an Aotrou Doue, e Jerusalem, var menez Moria. 70 000 den a oue lakeat da zougen beac'hiou, 80 000 den da denna ha da gempenn mein, ha 36000 den all da deuler evez euz al labourerien. 10 000 den all c'hoaz a oue casset var menez Liban da bilat guez ha da gempenn coat. Evelse e oue savet d'an Aotrou Doue eun ti euz ar re vrasa hag euz ar re gaëra a c'houfflet da zounjal. Bez'en devoa ouspenn daou droatad ha cant a hirder, var dro pevar droatad ha tregont a ledander, ha tost da dri droatad ha tri-ugent a hueder, eb counta ar porchedou a ioa a bep tu, hag ar pondalez a ioa tro var dro evit ar veleien hag evit ar bobl. En diabarz, al lambrusk a ioa great gant coat *cedr*, ha varnhan oa kizellet patromiou elez, bodou palmez hag a bep seurt bokedou. Kement tra a zerviche da zeremoniou ar relijion a ioa en aour fin; remerkout a reat enghan dec daol, eleiz a gantoloriou ha cant calir. Al *leac'h santel* hag al *leac'h santela* a ioa goloët penn-da-benn gant feuilennou aour staget gant tachou aour.

Seiz vloaz leun a oue lakeat da zevel an ti-ze d'an Aotrou Doue. Pa oue peur-c'hreat, Salomon a assambles ar brinset hag an dud a renk huela etouez ar bobl evit cass an arc'h a allians divar menez Sion d'an templ nevez. Kerzet a rejont en he raoc gant calz a zevotion, ha kinnig a rejont e sacrifis da Zoue eun niver braz a ounniri hag a zeñvet. Al levitet a c'hoarie gant telennou ha gant benviachou all, ha c'houec'h ugent belec a zoune an droumpill. Oll e savent ho mouez en eur lavaret: « meulit an Aotrou Doue abalamour ma'z eo leun a vadelez, abalamour he drugarez a zo bet a oll-viscoaz hag a vezo da virviken.» Pa erruas an arc'h el *leac'h santel*, an templ a oue carget gant eur goabren pe eur goumoullen. Salomon en em strinkas neuze d'an daoulin, hag a astennas he zaouarn etrezec an eñv, en eur lavaret: «Aotrou, Doue Israël! Netra ne c'hell beza lakeat par deoc'h, hag



an eñvou ho unan a zo re vilhan evidoc'h ; petra eo eta an ti-ma e scoaz ho meurded-c'houi ? Her savet am euz couls-goude evit ma plijo ganeoc'h selaou ennhan peden-

nou ho pugale, hag evit ma vioc'h trugarezuz en ho c'heñver.» Var gement-se tan an eñv a ziskennas en templ nevez hag a zevas ar pez a ioa bet kinniget e sacrificis d'an Aotrou Doue. Goudeze an Aotrou Doue en em ziscouezas da Zalomon, hag a lavaras dezhan : « selaouet am euz ho peden ha great em euz euz an ti-ze eul leac'h santel ; va daoulagad ha va c'haloun a vezo bepret troët varzu ennhan, evit guelet ar re a deuio di d'am fidi, hag evit rei dezho ho goulenn.»

Templ Salomon a ioa, evel an tabernacl, eur merk euz hon ilizou-ni.

### 55. Madou braz Salomon. He varo.

Salomon a renas, evel David, epad daou-ugent vloaz, hag he hano a oue brudet dre ar hed oll. Eleiz a voblou o devoa guiriou da baëa dezhan. He listri a iea d'an Indes, d'ar Spagn, hag a zigasse ac'hano d'ar Judee aour, coat *eben*, ha mein a briz. Lakaat a reas sevel eur maread keariou, hag ober a reas euz a Jerusalem eur gear euz ar re gaëra a c'houffet da velet. N'ema ket e galloud an den rei da anaout mad aoualc'h ar madou braz a ioa en he balez : he dron a ioa great gant olifant, mes eur guis-

kad aour a ioa var he c'horre tro-var-dro. Armou aour, eleiz anezho, a ioa a istribill ama hag a-hont ebarz er palez. Var blajou aour e veze servichet ar bouet d'ar prejou; gant loaïou aour e veze debret, hag evit eva ez oa ive tassou pe caliriou aour. En amzer ar roue Salomon, ar boblou a veve dizoursi hag e peoc'h; ar brinset divar dro hag ar re a bell a zigasse dezhan calz traou evel merkou euz ho doujans hag euz ho c'harantez. Rouanez Saba a deuas he unan a bell-bro evit beza test euz he c'halloud hag euz he furnez eb he far.

David, ar roue brezelekaër, a verke hor zalver Jesus-Krist, e kement ha m'en deuz gounezet ar victor var ar bed ha var an drouc-speret. Salomon, ar roue fur, ato e peoc'h gant he amezeien, a verke hor zalver Jesus-Krist e kement ha ma'z eo doctor ar furnez celestiel ha prins ar peoc'h. Salomon en deuz savet eun templ e Jerusalem; hor zalver Jesus-Krist en deuz fountet an llis catholic.

Salomon o veza deuet da veza coz, ar merc'hed païan a droas he galoun en eun hevelep fesoun m'ac'h en em daolas da adori an idolou. Sevel a reas zoken eun templ evit-ho. Neuze an Aotrou Doue a lavaras dezhan: «abalamour m'o peuz great an dra-ze, me lamo ar rouantelez digant ho mab evit he rei da unan euz ho servicherien. Coulsgoude, dre garantez evit David, ho tad, e lezinn gant ho mab daou rummad-tud var daouzec.» Salomon ne reas van ebet evit clevet ar c'homzou-ze; coueza a reas en dallentez, hag ec'h en em lakeas da voal-gass he zujidi. Ar re-ma a deuas neuze d'en em zével en he enep, ha setu ar freuz hag ar rouestil e peb corn ar vro. Var gement-se e varvas ar roue Salomon.

### 56. Ar rouantelez rannet.

Goude maro Salomon, ar bobl a deuas da gaout Roboam, he vab, hag a lavaras dezhan: «scanvaït ar beac'h pounner en deuz lakeat varnomp ho tad.» Roboam a respountas: «distroït d'am c'haout abenn tri dervez.» Epad an amzer-ze e c'houlennas ali, da genta, digant ar re goz m'oa boaz he dad da c'houlenn cuzul digantho;

an dud-se a roas ali dezhan da veza dous ha chentil e keñver ar bobl. Mes goudeze e c'houlennas ive cuzul digant an dud iaouank euz he oad, hag ar re-ma a lavaras dezhan, er c'hountrol : «setu ama petra dleit da respount d'ar bobl : va zad en deuz lakeat varnoc'h eur beac'h pounner ; an hini a lakinn-me a vezo pounnerroc'h c'hoaz ; va zad en deuz ho renet a daoliou baz, ha me ho reno a daoliou horz.»

An ali-ze a berz an dud iaouank euz he oad eo a oue heuliet gant Roboam. Hogen, pa glevas eun hevelep respount, ar bobl a lavaras : «ha ni ra forz a Roboam?» Ha goudeze e lazas a daoliou mein Aduram, unan euz a ofliserien Roboam. Neuze dec rummad-tud euz ar bobl a gemeras evit ho roue Jeroboam pehini a ioa bet gueich all e servich Salomon ; ne jomas gant Roboam nemet an daou rummad a ziskenne a lignez Juda hag a lignez Benjamin.

Ar iuzevien a oue evelse rannet etre diou rouantelez, rouantelez Israël ha rouantelez Juda. Jerusalem a gendalc'has da veza ar gear-benn euz a rouantelez Juda ; Samarii a deuas divezatoc'h da veza ar gear-benn euz a rouantelez Israël.

An dec rummad-tud-ze euz ar bobl a Israël a deuas gueich all d'en em zispartia anezho ho unan dioc'h Roboam, ho guir roue, a verke eleiz a voblou kristen a zo deuet ive d'en em zispartia dioc'h an Ilis catholic, dioc'h an Ilis-se n'ez euz ha ne c'hell beza ken guir ilis nemethi.

Jerusalem a gendalc'has da veza ar gear-benn euz a rouantelez Juda ; eno edo an templ el leac'h ma tliet kinnig da Zoue ar sacrificon a blije dezhan ; eno c'hoaz edo an arc'h a allians hag an oll draou sacr ; eno erfin edo ar velegiach hervez m'oa bet instituet gant Moïzes dre urs an Aotrou Doue. Evelse ive en Ilis catholic, hag en Ilis-se ebken, ema hag e vezo ato ar guir sacrificis, ar velegiach hag ar zacramanchou, hervez m'int bet instituet gant hor zalver Jesus-Krist he unan.

An dec rummad-tud a ioa en em zispartiet dioc'h Roboam evit ober eur rouantelez nevez, a ioa an darn vrasa euz ar bobl a Israël ; coulsgonde, abenn eun nebeut bloavezion, ez ejont da netra, ha ne oue mui hano ebet anezho. Doue, er c'hountrol, a oue trugarezuz e



keñver an daou rummad o devoa dalc'het mad d'ho guir roue, hag, abenn mil bloaz goude an disparti, e lakeas salver ar bed da c'henel en ho zouez. Evelse ive an heretiket hag ar chismatiket, a zo en em zispartiet dioc'h an Ilis catholic, a zo eat da netra gant an amzer, e leach an Ilis-se, mes hi ebken, a zo chomet ato stard en he za, ha leun a nerz hag a vuez, abaoe ouspenn trivaoc'h cant vloaz zo.



### PEMPET LODEN.

## AR BOBL A ISRAEL O VONT VAR AN DISCAR A NEBEUT A NEBEUT ADALEC ROBOAM BETEC DONEDIGEZ HOR ZALVER.

Al loden-ma a vezo great diou lodennic anezhi.

### KENTA LODENNIC.

HISTOR ROUANTELEZ ISRAEL BETEC MA OUE DISMANTRET  
HA CASSET DA NETRA GANT AR ROUANET A ASSIRII.

(Adalec ar bloaz 975 betec ar bloaz 722 araoc donedigez  
hor zalver.)

#### 57. Taol-lagad var an histor-ze a bez.

Rouantelez Israël a gouezas buhan er pec'het a idolatri goude he disparti dioc'h rouantelez Juda. Ar roue Jero-boam a zonjas enghan he unan: «mar d'a va fobl da Jerusalem da ober sacrificiou, ne vezo ket pell evit trei adarre gant ar roue Roboam, hag evit va dilezel.» Setu perac e savas daou idol, daou leue aour, en he vro, hag e lavaras d'he bobl: «ne d'it ket da Jerusalem; rac ho toueou a zo ama.» Ar bobl a zentas outhan hag a adoras an idolou.

Roboam a oue epad he vuez-pad e brezel ous Jeroboam. Ar re a bignas, varlerc'h an daou roue-ma, var dron Juda ha var dron Israël, ne ouent ket brassoc'h mignounet:

ato, coulz lavaret, roue Israel ha roue Juda a veze an eil a enep egile. Aliez zoken e c'halvent d'ho zicour poblou a ziañveaz-bro, poblou païan. Rouantelez Israël a behini ar gear-benn oa Samarii, a gendalc'has epad 253 vloaz en he disparti dioc'h rouantelez Juda. Bez' e devoue, epad an amzer-ze, naontec roue ; mes ar re-ma, an darn-vuïa anezho, ne c'heljont pignat var an tron nemet dre nerz, hag aliez zoken en eur laza an hini a ioa roue en ho raoc. An dizurs, an techou fall, ar pec'het a idolatri gant an traou mezuz a laka an den da ober, a rene e peb leac'h.

Evit punissa ar rouanet ha kelen ar bobl, Doue a zigassas a vare da vare tud santel, harvet *prophetet*, ken e rouantelez Israël, ken e rouantelez Juda. Ar brophetet-se a brezege ar binijen, a rea burzudou braz, hag a roë aliez da anaout ar pezh a dlie erruout en amzer da zont, ha, dreist peb tra, ar pezh a zelle ous ginivelez, poaniou, maro, ha gloar hor zalver Jesus-Krist. — Doue en devoa great kement a c'helle da ober evit savetei he vobl muïa-caret. Ar brophetet o devoa eta leac'h da lavaret d'ar bobl aheurtet-se, ne felle ket dezhan senti, hag a deuas erfin d'en em goll: «o Israël, mar teuit d'en em goll, ne c'helloc'h tamall nemedoc'h oc'h unan.» (Osee, 13, 9).

### 58. Doue a zigass ar prophet Elias.

Akab a oue unan euz ar falla rouanet e devoue rouantelez Israël (916—896 araoc J. K.). A unan gant he c'hreg, ar baïanez Jezabel, en devoa savet eun templ d'ar fals doue Baal, ha carget 450 belec païan da ober ar zervich var dro an templ-se, goude beza lakeat d'ar maro beleien ar guir Doue. Neuze Doue a zigassas ar prophet Elias. Ar prophet-se a deuas da gaout ar roue, hag a lavaras dezhan: «ker guir ha ma'z eo Doue, Doue, me dou ama dirazoc'h ne gouezo ket eur banne glao, nag eur berad gliz euz an eñv ken na blijo ganeñ.» Akab a ieas eur gounnar vraz enghan o clevet ar c'homzou-ze, ha clask a reas laza ar prophet dre guz. Setu perac an

Aotrou Doue a lavaras da Elias : «tec'hit kuit, hag it da guzet e kichen dour Carith. Roët am euz urs d'ar brini da gass bouet deoc'h.» Ar prophet a reas ar pezh en devoa lavaret dezhan an Aotrou Doue, hag ar brini a deue noz ha mintin da zigass dezhan kig ha bara, hag e dour Carith e cave pe a dra da derri he zec'het.

Abenn eun nebeut amzer, an dour-ze a deuas da zizec'ha. Neuze an Aotrou Doue a lavaras d'ar prophet : «it da gear Sarepta, e bro Sidon; roët em euz urs da eun intañvez euz ar gear-ze d'ho maga.»

Elias a zentas. An intañvez a erruas ganthan dirac dor kear. Hogen ar prophet a ioa daregant ar zec'het, ha



setu heñ da lavaret dezhi : «roët dinn eur banne dour, mar plij.» Epad m'edo an intañvez o vont da glask dour, Elias a lavaras dezhi adarre : «digassit dinn ive, me ho ped, eur c'hinaouad vara.» Mes ar vaouez geaz a respountas : «Ker guir ha ma'z eo Doue, Doue, n'em euz mui eur begad bara em zi; ne jom ganeñ nemet eun dornad bleud en eur c'helorn hag eun nebeut eol en eur pod all. Dont a rean ama da glask eur guchen geunneud evit aoza c'hoaz eur pred-bouet dinn va unan ha d'am mab; mes goude ar pred-se n'or bezo ken da ober nemet en em rezina da vervel gant an naoun.» Elias a lavaras neuze : «bezit dizoursi ha lakiit eaz ho speret; grit dinn da genta gant an dornad bleud a jom ganeoc'h eun tamm bara poazet el ludu, ha digassit-heñ dinn da zibri. Gou-

deze e c'helloc'h ober kement all evidoc'h oc'h unan hag evit ho mab ; rac setu ama petra lavar an Aotrou Doue : ar bleud en ho kelorn ne vanko ket , nag an eol en ho pod all ken nebeut , betec an deiz ma tle an Aotrou Doue lakaat adarre ar glao da goueza var an douar.» An intañvez a ieas da ober ar pezh en devoa lavaret dezhi ar prophet , hag azalec neuze ar bleud en he c'helorn ne vankas ket , nag an eol en he fod all ken nebeut . Prest goude , mab an intañvez a varvas . Neuze Elias a zavas he vouez varzu an Aotrou Doue , en eur lavaret . «Aotrou Doue oll-c'haloudec , grit , me ho ped , ma tistroïo ene ar c'hrouadur-ze en he gorf.» An Aotrou Doue a zelaouas peden ar prophet , hag ar bugel a zavas a varo da veo . He vamm , leun a anaoudegez vad , a lavaras neuze da Elias : «brema e velan ervad ez oc'h eun den Doue.»

### 59. Elias ha beleien Baal.

Epad tri bloaz-anter ne gouezas ket eur banne glao var an douar . Da fin an amzer-ze Elias a deuas adarre da gaout ar roue Akab . Ar roue a ieas drouc enghan oc'h he velet , ha setu heñ da lavaret d'ar prophet : «pe-rac o peuz-c'houi tennet eun hevelep goualen var rouantelez Israël?» Elias a respountas : «n'e ket me eo am euz tennet ar voualen-ze var rouantelez Israël , mes c'houi oc'h unan eo , dre m'az oc'h en em daolet da adori an idolou . Brema , me ho ped da assambli ar bobl var menez Carmel , ha da reiñ urs da veleien Baal d'en em gaout ive eno.» Akab a assantas , hag he unan ec'h en em lakeas en hent evit erruout var ar menez d'an deiz merket .

Pa oa ar roue , ar bobl ha beleien Baal assamblet eno , ar prophet Elias a zavas he vouez dirac an oll , hag a gomzas evel-hen : «me , n'euz ken nemedon dez va c'hostez , ha beleien Baal a zo 450 anezho . Mad ! n'o peuz nemet reiñ deomp daou ejen : beleien Baal a gemero unan evitho , ha , goude beza he lazet , e lakaïnt anezhan var eur bern keuneud , mes eb c'hoëza tan a zindan ; me a gemero egile , ha , goude beza he lazet , m'hen lakaïo

ive var eur bern keuneud, eb c'hoëza ken nebeut tamm tan ebet a zindan. Neuze hi a c'houlenno sicour digant ho doue, ha me digant va hini; hag an Doue a lakañ an tan da gregi er c'heuneud ha da zevi ar sacrificis, hennez a vezo anavezet evit ar guir Doue.» Ar bobl oll n'en devoue nemet eur vouez evit respount: «hag a zo mad! hag a zo mad!»

Ha setu beleien Baal d'en em gempenn ha d'en em ficha evel evit eur gouel euz ar re vrasa: eun dudi oa ho guelel, a bep a gurunen gantho var ho fenn. Laza a



rejont unan euz an ejennet, hag hen lakaat a rejont var eun aoter gant eun hordenn geuneud bennac a zindan. Goudeze ne ehanjont, adalec ar mintin betec cresteiz da c'houlenn sicour digant Baal, en eur lavaret: «Baal, selaouit ac'hanomp!» Mes caër o doa pedi, Baal ne rea van ebet. Elias a rea goab anezho, en eur lavaret: «savit ho mouez huelloc'h; ho toue Baal a zo marteze o caozeal gant eun all, pe o veachi; marteze zoken eo cousket. Comzit outhan creñvoc'h evit ma tihuno.» Ha setu hi

da zevet ho mouez huelloc'h adalec cresteiz betec an noz; mes coll a rejont ho foan hag ho amzer: an doue Baal ne roas ket an disterra sin a vuez. Neuze Elias a zavas eun aoter vean, ha tro var dro d'an aoter-ze e reas ober eur foz. Gondeze e lazas an ejen all, e traillas anezhan a dammou, hag e renkas an tammou-ze var an aoter gant eur guchen geuneud a zindan. Ouspenn-ze e reas teuler dour abenn teir gueich var ar e'big ha var ar e'heuneud, ha kement a zour a oue taolet evelse ma tiruille a bep tu d'an aoter, ha ma oue earget ar foz a ioa tro var dro. Neuze ar prophet en em lakeas da bedi evel-hen: «Aotrou Doue oll-e'halloudec, diseouezit hirio eo e'houi Doue Israël, evit ma teui ar bobl-ma da zistrei ouzoc'h.» Kerkent tan an eñv a ziskennas hag a zegas ar sacrifis, ar e'heuneud a ioa a zindan, ar vein a ioa oc'h ober an aoter, ha betec an dour a ioa er foz. O velet ar burzud-se, ar bobl oll en em strinkas d'an douar var he e'hinou, en eur lavaret: «Doue Elias eo ar guir Doue! Doue Elias eo ar guir Doue!» Nebeut amzer goude, an oabl a deuas da goe'henna, hag e couezas eun dour-bill vraz a e'hlaou.

Elias ne lavaras ket calz a gorzou; mes abalamour m'oa eun den digasset gant Doue, ar e'homzou-ze, hag hi nebeut anezho, o devoue eur e'halloud burzuduz. Evelse ive, ar e'homzou a lavar ar veleien, pa vezont oc'h olerenna pe o rei ar zacramanchou, o deuz eur e'halloud eb he far, abalamour ar veleien a zalc'h neuze ive plas an Aotrou Doue he unan.

## 60 Guinien Naboth.

Eun den, he hano Naboth, en devoa eur parkad-rezinn tost da balez ar roue Akab. Eun dervez ar roue a lavaras d'an den-ze: «roït dinn ar park el leac'h m'ema ho rezinn, ma rinn eur jardin anezhan. Me roïo deoc'h eur park all en he blas, pe, mar cavit guell, me her paëo deoc'h en arc'hant.» Mes Naboth a respountas: «Doue ra viro na'z affen da verza ar pez am euz bet digant va zad!» Neuze Akab a ieas eun droue braz enghan, hag ar rouanez Jezabel, o veza clevet n'oa ket bet falvezet da

Naboth rei he bark d'ar roue, a scrivas evel-hen d'ar pennou braz euz a gear : « claskit daou zen fallacr hag a ve prest da zougen eur fals testeni a enep Naboth, en eur lavaret : ni or beuz elevel an den-ze o voal-gomz a enep Doue hag a enep ar roue ; ha var an testeni-ze roët urs da gass Naboth er meaz euz a gear, ha d'hen labeza, d'hen laza a daoliou mein.» Ar pez a c'houre'hemenne ar rouanez en he lizer a oue great egiz m'e devoa merket. Naboth, hag heñ neat he goustians dioc'h ar pez a damallet dezhan, a oue lazet a daoliou mein, hag ar chass a deuas da lipat he c'hoad gant ho zeod.

Akab a oue mall ganthan kemeret park ar vinien. Neuze an Aotrou Doue a roas urs da Elias da zont da gaout ar roue, ha da lavaret dezhan : « setu ama petra lavar an Aotrou Doue : lakeat o peuz Naboth d'ar maro ha kemeret he dra a enep peb guir ha lealdet ; setu perac ar chass o deuz lipet goad Naboth a lipo ive oc'h hini-c'houi, ha Jezabel a vezo ive, d'he zro, lonket he c'horf gant ar chass.»

Ar pez en doa discleriet an Aotrou Doue dre c'hinou ar prophet a deuas da veza guir ger evit ger. Abenn tri bloaz goude, Akab a oue goal dizet en eun emgann, hag he c'hoad a oue e guirionez lipet gant ar chass. Ar rouanez Jezabel, hi, a oue, dre urs ar roue Jehu, stlapet d'an douar divar c'horre eur voger buel, ha, goude he maro, he c'horf a oue ive e guirionez debret gant ar chass.

### 61. Ar prophet Elisee.

Hervez ar goure'hemenne roët dezhan gant an Aotrou Doue, Elias a jozas Elisee evit delc'her he blas var he lerc'h. Eun dervez m'edont ho daou oc'h ober hent an eil e coumpagnunez egile, Elisee a velas en eun taol count he goupagnoun dibradet dioc'h an douar gant eur gorventenn, ha casset d'an eñv gant an Aotrou Doue en eur c'har-tan. Adalec neuze Elisee a deuas da veza heritour euz ar c'halloud en doa Elias da ober miraclou.

Eun droïat, eur vanden aillounet iaouank a reas goab



c'hoat a ioa eno e kichen, hag a dagas daou ha daou-  
gent anezho.



anczhan, en  
eur lavaret:  
«deus ama,  
penn moal,  
deus ama,  
penn moal!»

Elisee a  
c'hourdrou-  
zas ar vuga-  
le-ze a berz  
an Aotrou

Done, ha  
kerkent daou  
ours a zilam-  
mas euz eur

Prest gou-  
de, Naaman,  
cabiten bru-  
det, ginidic  
euz ar Sirii,  
a deuas da  
gaout Elisee  
evit beza pa-  
reet dioc'h al  
lorgnez.

P'edo erruet  
charz dor ti  
ar prophet,  
hema a gas-  
sas he zer-

vicher da lavaret dezhan: «n'o peuz nemet mont d'en  
em voalc'hi abenn seiz gueich e ster ar Jourden, hag e  
vioc'h pare.» Naaman a i eas drouc enghan o elevet an  
dra-ze hag a respountas: «perac e renkan-me mont  
d'en em voalc'hi er Jourden? Me zonje dinn ar prophet



a vije deuet he unan d'am farea.» Mont a reas coulsgoude d'en em voalc'hi abenn seiz gueich e ster ar Jourden, ha ractal e oue pareet.

Naaman a renkas plega ha mont d'en em voalc'hi gant feiz e dour ar Jourden, petra bennac an dour-ze n'en doa ket dreizhan he unan ar vertuz d'he barea. Evelse ive, p'o deuz ar gristenien ezom euz eur c'hras bennac evit ho ene, Doue n'en em ziscouez ket dezho he unan; mes gourc'hemenn a ra dezho, dre c'hinou ar belec, he zervicher, tostaat ouz ar zacramanchou, hag er zacramanchou-ze, pa dostaont outho gant feiz ha gant devotion, e cavont ive an oll grasou a zilvidigez a bere o deuz ezom.

Naaman, leun a anaoudegez vad, a zistroas da gaout Elisee hag a lavaras dezhan : « brema e velan ervad n'euz ken Doue nemet Doue Israël. Kemerit, me ho ped, eun dra bennac diganeñ evit ar vad o peuz great dinn.» Mes Elisee a respountas : « ker guir ha ma'z eo Doue, Doue, ne gemerinn netra diganeoc'h.» Pa oa eat Naaman kuit, Jiezi, servicher Elisee, a redas dre guz var he lerc'h, hag a lavaras dezhan : « setu ama petra en deuz lavaret va mestr dinn da lavaret deoc'h : daou euz a vugale ar brophetet a zo nevez erruet em zi ; roit dinn evitho, mar plij, eur pez arc'hant euz a dalvoudegez eun *talant*, ha dillad da jench.» Naaman a respountas ker buhan : « setu ama daou *dalant* e leac'h unan, ha dillad da jench evit daou zen.»

Var gement-se Jiezi a zistroas da di he vestr en eur zonzal en doa great eun taol caër ; rac euzet mad en devoa an arc'hant hag an dillad. Ha setu, pa deuas an noz, Elisee da gomz outhan evel-hen : « peleac'h oc'h bet, Jiezi ? » Ha Jiezi da respount : « me ? N'oun bet e nep leac'h.» — « Penaoz, gaouiat zo ac'hanoc'h, a lavaras neuze ar prophet, n'oc'h bet e nep leac'h ? Me a ioa a speret o sellet ouzoc'h p'eo diskennet Naaman euz he gar evit dont d'ho caout. Brema, evit guir, o peuz arc'hant ha dillad a forz ; mes ive cleñvet Naaman a stago ouzoc'h hag ouz ho lignez evit ato.» Ha kerkent corf Jiezi a deuas da veza goloët oll gant al lorguez.

Dont a reas erfin ar maro da Elisee, hag e oue lakeat he gorf er bez. Nebeut amzer goude, edot o vont da enterri eun den all e kichen bez Elisee, pa deuas da zifourcha var ar plas eur vanden laëroun hag a rea, d'ar mare-ze, eun drouc braz dre ar vro. O velet al laëroun-ze ken tost dezho, ar re a ioa o tougen ar c'horf maro a oue ken stravillet ma hen taoljont, eb he zonzal, e bez Elisee. Hogen, a veac'h en devoue ar c'horf maro-ze touchet oc'h eskern ar prophet santel ma savas adarre var he dreïd, leun a vuez evel biscoaz.

Setu aze eun desteni sclear hag anad e teue an Aotrou Doue, gueich all evel brema, d'en em zervichout euz a relegou ar zent evit ober miracloù.

## 62. Ar prophet Jonas.

Goude maro Elisee, Doue a lavaras d'ar prophet Jonas : « it da Niniv da brezeg ar binijen ; rac fallagriez tud ar gear-ze a c'houlenn venjans ous va justis. » Niniv oa ar gear-benn euz a rouantelez Assirii, ha Jonas a vije bet guell ganthan en devije an Aotrou Doue dismantret



dioc'htu ar gear bañan ha direol-ze. Setu perac, eleac'h mont di, ez eas varzu ar mor, hag o veza cavet eul lestr o vont d'ar Spagn, e pignas ennhan evit tec'het araoe an Aotrou

Doue. Mes an Aotrou Doue a lakeas eun avel greñ da c'hoëza var ar mor, ha setu al lestr paour var var da

veza casset d'ar goueled gant an tarziou-mor spountuz a deue da steki outhan. O velet kement-se, ar vartolodet a gemeras aoun, ha setu hi da c'houlenn sicour digant Doue. Dont a reas neuze en ho speret tenna plouz berr evit gouzout piou a ioa kiriec dezho da veza evelse e riscl euz ho buez. Hogen, ar blouzen verr a zigouezas gant Jonas. Neuze ar prophet a anzavas he bec'het hag a lavaras: «taolit ac'hanon er mor; rac guelet a ran ervad eo abalamour dinn-me e deuet varnoc'h ar goal varr-amzer-ma.» Ractal ar vartolodet a grogas ennhan hag hen stlapas er mor, ha kerkent an avel a davas hag ar mor a deuas da veza reiz ha sioul.

Mes an Aotrou Doue a zigassas eur pesk braz-braz da lonka Jonas. Ar prophet a dremenas tri dervez ha teir nozvez e cof ar pesk-se; en em lakaat a reas eno da bedi, ha da c'houlenn sicour digant an Aotrou Doue. He beden a oue selaouet, hag abenn an trede deiz ar pesk hen dislonkas var an aod.

Jonas a verke hor zalver Jesus-Krist: evel Jonas a dremenas tri dervez ha teir nozvez e cof ar *balan*, hag a deuas ac'hano d'an trede deiz leun a vuez, evelse ive hor zalver Jesus-Krist en deuz tremenet tri dervez ha teir nozvez e caloun an douar, ha d'an trede deiz eo savet ive leun a vuez euz ar bez.

Neuze Jonas a ieas da Niniv hag en em lakeas da brezeg a vouez huel: «c'hoaz daou-ugent dervez, ha kear Niniv a vezo dismantret!» O clevet eun hevelep kelou, tud kear a iunas hag a reas pinijen. Ar roue he unan a reas pinijen evel ar re all, hag a reas embann dre gear an urs-ma: «ra zeui an oll da guitaat ho buez fall; piou a c'hoar ha ne blijo ket c'hoaz gant Doue pardouni deomp, ha distrei divarnomp ar voualen euz he justis?» Ar pez en devoa sonjet ar roue a deuas da veza guir: Doue, o velet pinijen ar bobl-se, en devoue truez outhan, ha n'her skoas ket evel m'en doa lavaret e rajé. Hogen, Jonas a ioa kintou ennhan abalamour m'oa plijet gant Doue espern Niniv. Neuze an Aotrou Doue a lakeas eur vezenic ilio da zével el leac'h m'oa boaz ar prophet da vont

bemdez da azeza, eun tammic er meaz euz a gear. Jonas a gave gras caout an disheolien-ze; rac scaota a rea an heol ken tomm oa. Mes antronoz-vintin an Aotrou Doue a lakeas eur preñv da grignat griziou ar vezennic ilio, ha setu hi o tizec'ha hag o vervel en eun taol. Pa deuas ar prophet di hervez he gustum, ha pa velas oa manket he zisheolien, ez eas adarre drouc enghan; rac en dervez-se oa tommoc'h eget biscoaz, ha d'ar mare-ze an heol a bare varnhan a bloumm. Ker feaz oa eat gant ar c'hor, hag he galoun a ioa deuet da veza ker sempl, ma c'houlennas mervel. Neuze an Aotrou Doue a lavaraz dezhan: «petra, Jonas, ker fall-ze ez a ho penn abalamour da varo eur vezennic n'o peuz na plantet, na maget, hag e fell deoc'h n'em beffe-me ket a zamant da gear Niniv, el leac'h ma'z euz ouspenn 120,000 crouadur ha ne c'houzont ket c'hoaz anaout ho dorn deou dioc'h ho dorn cleiz?»

**63. Rouantelez Israël casset da netra.**

(Var dro ar bloaz 722 araoc donedigez hor zalver.)

Ar gear baïan Niniv o veza great pinijen a ioa bet pardounet gant Doue. An Israelitet, er c'hountrol, a gendale'has muioc'h-mui da ober faë var ar guir relijion, ha da zisprijout an aliou mad a roë dezho ar brophetet. An Aotrou Doue, skuiz oc'h ho gedal da zistreï outhan, a astennas erfin varnho an dorn pouner euz he justis. Salmanasar, roue an Assirii, a erruas er vro en eun taol count gant eun arme vraz; abenn tri bloaz e kemeras Samarii, ar gear-benn euz ar rouantelez, hag e cassas ganhan d'an Assirii an darn-vuïa euz an Israelitet. Ar re a jomas er vro en em gemmeskas gant ar baïanet, hag ho relijion a deuas ive eb dale da veza eur c'hemmesk euzuz euz a relijion ar iuzevien hag euz a relijion ar baïanet. Setu perac ar Samaritanet a oue ato casset ha disprijet gant tud rouantelez Juda. Ar re a ioa bet casset e captivite d'an Assirii ne zistrojont mui ac'hano, hag evelse ne oue mui hiviziken hano ebet euz a rouantelez Israël.

64. Tobias coz.

Etouez an Israelitet casset e captivite ez oa eun den a zoujans Doue, he hano Tobias. An den-ze n'en devoa bet morse darempred ebet gant an dud difeiz, hag aketuz oa bet ato da viret gourc'hemennou Doue. Mont a rea bendez da velet ar gaptivet all euz he anaoudegez, evit ho c'honzoli, hag ho zicour hervez he c'halloud, en eur rei da zibri d'ar re o devije naoun, hag en eur gass dillad da viska d'ar re a gavje en noaz; ha pa deue an noz, ez ea da zebelia pe da enterri corfou ar re anezho a vije bet lakeat d'ar maro. — Eun nozvez m'oa bet evelse o sebelia ar re varo, e tistroas d'ar gear, beac'h dezhan o ehom en he za ker skuiz e oa. En em deuler a reas da c'hourvez eharz eur voger hag ec'h en em roas da gousket. Hogen, epad he gousk, eun dra zomm bennac a gouezas varhe zaoulagad euz a eun neiz guennili a ioa eno azioc'h, hag e teuas da veza dall. Tobias ne laoskas ket eur glemmaden evit kement-se, mes kendelc'her a reas calounec da veva e doujans an Aotrou Doue, ha ne vanke, dervez ebet, da veuli ha da drugarekaat he grouër.

Anna, he c'hreg, a iea bemdez da labourat da di eur guider, ha dre he labour e c'houneze bara dezhi he unan ha d'he fried. Eun dervez e teuas ganthi d'ar gear eur



c'havric e devoa bet digant ar guider ouspenn ar baëamant m'oa boaz da gaout. Tobias a ziseredas n'oa ket ar c'havric-se d'an hini en devoa he roët da Anna, ha

setu heñ da lavaret d'he c'hreg : « m'em euz aoun na ve bet laëret ar c'havric-se divar goust unan bennac. Cassit-hi buhan d'he ferc'hen ; rac arabad eo deomp dibri na delc'her en hon ti netra laëret. »

### 65. Aliou Tobias coz d'he vab.

Tobias en devoa bet kement a drubuillou en he amzer ma sonje dezhan n'en doa mui pell da veva. Gervel a reas eta he vab da zont d'he gaout, ha nenze e roas dezhan evel-hen he aliou diveza.

« Va mab, emezhan, p'en devezo an Aotrou Doue va galvet euz ar bed-ma, enterrit va c'horf, há kendalc'hit dá henori ho mamm keit ha ma vevoc'h. O pezet sonch euz ar boan e deuz bet oc'h ho sevel hag oc'h ho lakaat er bed ; ha p'e devezo, hi ive, roët he speret d'he c'hrouër, enterrit he c'horf e kichen va hini-me.

« Kerzit bepret er guel a Zoue, ha divoallit da zigeri ho caloun d'ar pec'het. En em virit, dreist oll, dioc'h kement tra a zo countrol d'ar burete, há ne lezit morse an ourgouil da ren en ho caloun, na d'en em ziscouez en ho comzou ; rac kement seurt pec'het a zo a deu euz an ourgouil. Goulennit ato cuzul digant eun den fur.

« Ne rit ket d'ar re all ar pez ne garfac'h ket a ve great deoc'h oc'h unan. Roët an aluzen hervez ho tanvez. Mar o peuz calz, roët calz ; mar o peuz nebeut, roët nebeut ; mes roët ato a galoun vad.

« Meulit Doue da bep mare, ha pedit-heñ d'oc'h hench. N'o pezet aoun rac netra, va mab. Ar vuez a renomp a zo paour ; mes pinvidic aoualc'h e vezimp ato mar bevomp e doujans Doue, mar pellaomp dioc'h ar pec'het ha mar greomp ar mad. »

Mab Tobias, he galoun tenereat oll o clevet he dad o comz evelse, a respountas : « va zad, me heulio var eñ an aliou o peuz roët dinn. »

## 66. Beach mab Tobias.

Goude beza roët an aliou-ze d'he vab, Tobias a lavaras dezhan c'hoaz en doa c'hoant d'he gass da eur gear, hanvet Rajes, da c'houlenn eur guchen arc'hant en devoa prestet gueich all da eun den euz ar gear-ze. O veza ma'z oa eur pennadic brao a hent da vont di, mab Tobias a ioa nec'het o clask gouzout e peleac'h caout eur c'houmpagnoun evit ober eur veach ken hir. Epad m'edo ar zonch-se en he speret, setu eun den iaouank a zoare, tress eur beachour varnhan, o tremen dirac an ti. An den iaouank-se oa an eal Raphaël. Mes mab Tobias ne c'houïe dare piou oa; her c'hemeret a rea ebken evit eun den oc'h ober hent. Mont a reas eta d'he gaout, hag e c'houlennas diganthan: «va den mad, gouzout a rit-hu an hent da vont ac'han da Rajes?» — «Ia zur,» eme an tremeniad. Mab Tobias a ziredas ractal da zigass ar c'helou-ze d'he dad, hag an tremeniad iaouank, o veza het pedet da zont en ti, a lavaras neuze dâ Dobias coz: «bezit dizoursi divar benn ho mab; me her c'hasso da Rajes hag hen digasso en dro d'ar gear eb na erruo drouc ebet ganthan.» — «Mad! a respountas Tobias, it eta en hent ho taou, ha beach vad deoc'h! Doue hag he elez ra vezint ganeoc'h bepret!»

Da fin àn dervez kenta an daou veachour a erruas gant eur ster vraz. Mab Tobias a c'hoanteas goalc'hi he dreid er ster-ze, hà setu eur picol pesk o tilammet varnhan egiz p'en devije c'hoant d'he lonka. Tobias a oue spoutet. Mes an eal a lavaras dezhan: «crogit e diou-scouarn ar pesk ha chassit-heñ varzu ennoc'h.» Tobias a zentas, ha neuze an eal a lavaras dezhan adarre: «digorit ha goullonderit ar pesk; mes divoallit avad da deuler kuit ar galoun, ar vestl hag an evu; rac an traou-ze a zo mad d'ober louzou.» Tobias a heulias an ali a roët dezhan. Goudeze an daou goumpagnoun a boazas ar pesk, hag ar pez ne c'heljont ket da zibri dioc'htu a zallchont hag a gasschont gantho da zibri en hent.

O veza erruet en eur gear, an eal a lavaras da Dobias:



« ama ez euz  
o chom eun  
den, hanvet  
Ragel, hag a  
zo cardeoc'h.  
An den-ze en  
deuz eur  
vere'h, he  
hano Sara ;  
goulennit ar  
vere'h-se di-  
gant he zad  
evit pried,  
hag o pezo  
anezhi. Ha,

goude an eured, tremenit ganthi an tri dervez kenta o pedi Doue, evit na c'hoarvezo drouc ebet ganeoc'h.»

Var gement-se ez ejont ho daou da di Ragel. Hema ho digemeras gant joa. P'en devoue Tobias en em roët da anaout, Ragel her briatas en eur lavaret : « benniget ra viot, va mab ! Ho tad eo guella den a zo var an douar.» Raetal e roas urs da bourchass coan d'an daou veachour. Mes Tobias a lavaras kerkent : « evidon-me ne zebrinn na ne evinn ken n'o pezo selaouet va feden, ken n'o pezo roët dinn ho merc'h Sara evit pried.» Ragel a jomas mantret o elevet ar goulenn-ze ; mes an eal a lavaras dezhan : « n'o peuz ket da vare'hata ; hastit affo rei ho mere'h da Dobias, rac eun den a zoujans Doue eo.» Ragel a assantas neuze, hag o veza great da Dobias ha da Zara rei ho dorn an eil d'egile, e vennigas anezho a vouez huel. Goudeze ec'h en em lakejont oll ous taol da goania. Tobias ha Sara a dremenas an tri dervez kenta euz ho eured o pedi Doue, hag an eal, evit ober plijadur da Dobias, a ieas he unan da Rajes da gere'hat ar guchen are'hant m'oant deuet da glask.



**67. Mab Tobias o tistrei d'ar gear.**

Abenn pemzec dez, Ragel a lavaras da Dobias: «chomit ganeomp c'hoaz eur pennadic.» Mes Tobias a respountas: «ne c'hellan ket chom; me zo sur va zad ha va mamm a zo dija nec'het ganeñ.» Neuze Ragel a roas dezhan an anter euz he zanvez hag her bennigas. Tobias a gimias dioc'h he dad-caër hag en em lakeas en hent gant Sara, he bried.

Eur veich en hent, Tobias a ieas araoc assambles gant Raphaël. Hema a lavaras dezhan neuze: «pa vioc'h erruet er gear, frottit daoulagad ho tad gant vestl ar pesk o peuz lazet en eur zont; ractal e teuint adarre da veza selear, hag ho tad a zrido he galoun oc'h ho cuelet.»

Coulsgoude tad ha mamm Tobias a ioa nec'het maro o clask gouzout e peleac'h oa chomet ho mab abaoue keit all a amzer. He vamm ne rea nemet gouela, ha bemdez e save var gern eur menez divar behini e c'hellet guelet a bell. Erfin, eun dervez e remerkas he mab ker o tont, ha kerkent setu hi da redet da gaout he fried, ha da lavaret dezhan: «ema erru ar paotr!» Ar c'hi en doa casset Tobias iaouank ganthan a zilmmas neuze en ti en eur ficha he lost, hag ar c'heaz coz dall a zavas buhan da vont da zigemeret he vab; eur moussic biban a ioa crog en he zorn evit he ren, ha pa erruas gant he vab, e vriatas anezhan calounec, hag he c'hreg hag heñ a scuille daëlou a joa.

P'o devoue oll trugarekeat Doue, Tobias iaouank a frottas daoulagad he dad gant vestl ar pesk en doa lazet en hent, ha ker buhan he dad a devas adarre ar guelet dezhan. Neuze ec'h en em lakejont oll da veuli Doue mui eget biscoaz, ha Tobias coz a lavaras: «me ho trugareka, Aotrou, Doue Israël, dre m'eo plijet ganeoc'h digass dinn ar boan o poa digasset, ha va farea brema, evit m'em bije c'hoaz an eur da velet va mab.» Abenn seiz dervez goude, Sara a erruas ive gant he flac'het, ha gant ar vandennadou deñvet, ar c'hañvalet, hag an arc'hant a ioa bet roët dezhi evit he argoulou. Neuze e oue great

eul lein vraz ; peb hini a drugarekeas adarre an Aotrou Doue, ha calounou an oll a zride gant eur joa santel.

Da fin ar banket mab Tobias a lavaras d'he dad : « ha brema penaoz recoumpansi egiz ma'z eo dleet an den mad-se a zo bet ganeñ oc'h ober va beach ? En he goumpagnenez onn eat ha deuet en dro eb na ve c'hoarvezet drouc ebet ganeñ ; bet eo bet he unan o clask an arc'hant a vanke deoc'h Gabelus ; great en deuz dinn caout eur pried dioc'h va doare ; va divoallet en deuz rac ar pesk a ioa prest d'am lonka, ha deoc'h-hu oc'h unan en deuz roët ar guelec. Petra a c'helfempni kinnig dezhan hag a ve din euz ar pez en deuz great evidomp ? En han' Doue, va zad, livirit dezhan kemeret an anter euz ar pez a zo deuet ganeomp. » Var gement-se an daou Dobias a c'halvas an eal a gostez, hag her pedas da gemeret ar pez m'oant en em glevet da ginnig dezhan. Neuze an eal a respountas : « trugarekañ an Aotrou Doue dre ma'z eo bet trugarezuz en ho keñver. Ar beden, ar iun hag an aluzen a dal hirroc'h eget an oll denzoriou euz an douar. Selaouit, Tobias coz : pa bedac'h en eur vouela, ha pa'z eac'h en noz da zebelia ar re varo, me a gasse ho peden betec tron an Aotrou Doue. Mes abalamour m'oac'h caret gant Doue, oa red o pije eur boan bennac da c'houzañv. Hogen, brema Doue en deuz va digasset evit ho para ; rac me eo Raphaël, unan euz an elez a zo ato en ho za dirac tron an Aotrou Doue. » O clevet ar c'homzou-ze, an daou Dobias a oue spountet, hag en em strinkas var ho fenn d'an douar. Mes an eal a lavaras dezho : « ar peoc'h ra vezo ganeoc'h ! N'o pezet aoun ebet ! Doue eo en deuz va digasset d'ho caout ; trugarekañ anezhan ha canit he veuleudiou ! » Ha var gement-se an eal ho c'huiteas, ha n'her gueljont mui. Evitho a jomas teir heur dioc'htu da veuli Doue, ho fenn harp en douar. — Beva a rejont c'hoaz pell, an eil hag egile anezho, ha bez'o devoue erfin ho daou eur maro mad ha santel.

EIL LODENNIC.

ROUANTELEZ JUDA ADALEC AR BLOAZ 975 BETEC  
GINIVELEZ HOR ZALVER JESUS-KRIST.

**68. Taol-lagad var ar pez a zo c'hoarvezet  
a vrasa epad an amzer-ze.**

Varlerc'h ar roue Roboam, naontec prins euz a ligned David a bignas var dron Juda an eil goude egile betec ar bloaz 588 araoc donedigez hor zalver. Meur a hini euz ar brinset-se a oue rouanet fur, rouanet a zoujans Doue, rouanet hag a zelaoue comzou ar brophetet a zigasse Doue en ho amzer. Mes en ho zouez e oue ive rouanet fall, prinset hag en em daolas da adori an idolou, hag a lakeas ar bobl da gemeret scouer dioutho. Setu perac, er bloaz 606 araoc donedigez hor zalver, ar iuzevien a renk huela, da genta, ha goudeze ar bobl oll, a oue casset e captivite da Vabilon; er bloaz 588, ne oa mui a rouantelez Juda.

Ar iuzevien a jomas dec vloaz ha tri-ugent e captivite e Babilon. Eno e teujont da anaout ho fec'hejou ha d'en em greñvaat er feiz. Scleraat a rejont ive sperejou ar bañanet, hag ho lakaat a rejont, dreist oll, da veza muioc'h-mui var c'hed euz eur zalver.

Abenn 70 vloaz ar iuzevien a c'hellas erfin distrei d'ho bro, (er bloaz 536 araoc donedigez hor zalver). Sevel a rejont a nevez kear Jerusalem hag an templ, ha neuze e vevchont e peoc'h epad 200 vloaz. Mes goude maro ar roue a Vacedoan, Alexandr-ar-braz (323), e oue great brezel dezho adarre gant meur a enebour, betec ma teuas erfin eur prins ha n'oa ket euz ar vro, ar roue Herodes, da bignat var dron David. An amzer merket evit donedigez hor zalver a ioa neuze erruet.

KENTA PENNAD.

*Rouantelez Juda betec captivite Babilon.*

**69. Ar rouanet betec Ezechias.**

Abia, mab da Roboam, a oue roue var he lerc'h. Eur prins oa ha ne lamme ket araoc he skeud pa veze hano da vrezelekaat; mes a hent all oa eun den difeiz. An hini a bignas var an tron en he c'houde a oue Asa. Hema a oue da genta eur roue euz ar re vella; gounit a reas zoken calz victoriou var enebourien ar vro; mes dont a reas ive erfin da ancounac'haat an Aotrou Doue.

Ar roue Josaphat a oue guelloc'h eget an tri a ioa bet en he raoc. Reñ a reas urs da ziscar an aoteriou savet en honor d'an idolou; henvel a reas da varnerien tud a zoujans Doue, ha cass a reas da gement kear a ioa er rouantelez doctoret evit kelen ar bobl var ar relijion. Evelse ive an Aotrou Doue a roas dezhan ar victor var he oll enebourien.

Joram, he vab, en em daolas adarre da adori an idolou, hag, ouspenn, e oue ive eur roue criz ha digaloun. An hini a bignas var an tron en he c'houde, he hano Okozias, a oue ker fall hag heñ. Goude maro Okozias, Athalii, he bried, eur vaouez fallaer mar deuz bet biscoaz, a renas epad seiz vloaz, hag a reas a bep seurt traou euzuz. Lakaat a reas d'ar maro kement hini a ioa euz a vouenn ar rouanet coz. Unan ebken, eur bugel iaouank, he hano Joas, a oue saveteet he vuez dezhan gant ar belec braz Joïada, hag a oue erfin lakeat var an tron. Keit ha ma vevas Joïada, Joas a oue eur prins fur; mes divezatoc'h e couezas ive er pec'het a idolatri.

Amasias, Ozias ha Joathan a oue rouanet var he lerc'h an eil goude egile. E meur a feson ar rouanet-se a ioa guelloc'h eget ar re a ioa bet en ho raoc. Coulskoude ho c'haloun a ioa ive daou-anteret etre servich ar guir Doue ha servich an doueou faoz. Ozias, o caout re a fisians enghan he unan, a falvezas dezhan ober ar pez ne zelle nemet oc'h ar veleien. O veza eat eun dervez

d'an templ e c'hoanteas kinnig he unan ezans d'an Aotrou Doue. Ar veleien a glaskas miret outhan en eur lavaret: « o roue, n'e ket ho carg-c'houi eo devi ezans dirac an Aotrou Doue. It ac'hann, ha ne zaotrit ket al leac'h santel evelse.» Ar roue a ieas drouc enghan o clevet kement-se, hag a c'hourdrouzas stleper an ezansouer oc'h penn ar veleien. Mes kerkent e oue goloët gant al lorgnez, hag ar c'hleñvet-se a jomas stag outhan betec he varo.

### 70. Ar roue devot Ezechias.

Varlerc'h Akaz, mab da Joathan, ha roue fallaer ha difeiz, Ezechias a bignas var an tron. Ar prins-se a oue, evel David, eur roue hervez caloun an Aotrou Doue. Karza a reas an templ hag ar vro euz a gement tra en devoa servichet da henori an idolou. Evelse e tennas varnhan bennoz an Aotrou Doue, hag e roas eul lufr nevez da rouantelez Juda.

En he amzer, Sennacherib, roue an Assirii, a deuas gant eun arme vraz da glask kemeret Jerusalem. Ezechias a ieas d'an templ da bedi. Cass a reas ive beleien, guisket e caoñ, da gaout ar prophet Isaias, evit ma plichesse gant ar prophet-se goulenn sicour digant an Aotrou Doue. Ha setu, eun nozvez, eun eal a ziskennas euz an eñv, hag a lazas 185,000 Assirian; ar re all a gemeras an teac'h.

E tro ar mareou-ze Ezechias a gouezas clañv. Ar prophet Isaias a deuas d'he gaout hag a lavaras dezhan: « lakiit urs e peb tra en ho ti; rac emac'h o vont da vervel.» Ezechias a oue spountet; coulsgoude ne gollas ket a fisians. Trei a reas he benn etrezec an templ, ha neuze e reas ar beden-ma en eur vouela: « Aotrou Doue, emezhan, o pet sonch em euz kerzet dirazoc'h, hag em euz great ato ar pez a blije deoc'h.» An Aotrou Doue a recoumpansas he fisians o rei dezhan c'hoaz pemzec vloaz buez; hag ar pemzec vloaz-se a oue ive bemzec vloaz a beoc'h hag a eürusdet evit ar rouantelez.

## 71. Ar rouanet diveza araoc captivite Babilon.

Mab Ezechias, ar roue Manasses, ne gerzas ket var roudou he dad. Pec'hi a reas a enep an Aotrou Doue : lakaat a eure d'ar maro tud ha n'oa netra da damall dezho, ha sevel a reas a nevez aoteriou en honor d'an doueou faoz, en eun hevelep feson ma teuas ar bobl, en he amzer, da veza direolloc'h eget ar baïanet ho unan. Setu perac an Aotrou Doue à lakeas Manasses da goueza etre daouarn an Assirianet. Ar re-ma hen dalc'has e captivite, hag her c'hassas gantho da Vabilon. Eno Manasses a anavezas he faotou, a reas pinijen hag a c'houlennas pardoun ous Doue. An Aotrou Doue a zelaouas he beden, hag a zigassas anezhan adarre da Jerusalem.

He vab Ammon ne heulias nemet ar scouer fall en devoa roët he dad da genta; mes Josias, he vab bihan, a heulias ar scouer vad en doa roët he dad coz var fin he vuez. Ar roue Josias a oue aketuz da zervicha an Aotrou Doue; lamet a reas euz ar vro kement tra a c'helle digass da zoncl euz an idolou, ha soursiuz e oue da lakaat celebri ar goueliou euz ar relijion egiz m'oa gourc'hemennet e lezen an Aotrou Doue. Ne oa nemet nao bloaz m'edo var an tron pa denas ar maro dezhan. O veza m'oa mignoun da Zoue, Doue hen tennas abred euz ar bed-ma, evit na vije ket test euz a zismantr ar rouantelez.

Ar pevar roue a bignas var an tron en he c'houde, Joakaz, Joakim, Jekonias ha Sedecias, en em daolas adarre da adori an doueou faoz, hag erfin e couezas var rouantelez Juda ar voualen a ioa abaoue pell amzer dija o para aziout-hi, da lavaret eo, captivite Babilon.

## 72. Ar Brophetet.

En amzer rouanet Juda, adalec Roboam betec Sedecias, Doue a gargas tud, dibabet gantho euz a douez ar re all, da brezeg ar binijen d'ar rouanet ha d'ar bobl, da ziscleria dezho he varnedigeziou, hag ive d'ho c'honzoli en eur lavaret dezho euz he berz e teuje ar Messias abarz

nemeur. An dud-se eo a hanver prophetet, hag ar re vrudeta anezho, eb counta Elias hag Elisee, a oue, epad an amzer ma comzomp anezhi, Joël, Michee hag Isaias.

Tud paour ha dister hervez ar bed, ar brophetet-se a veve e doujans Doue. Mes sevel a reant ho monez gant calz a nerz en hano an Doue-ze en doa roët dezho he speret, en eun hevelep feson ma teue aliez ar rouanet hag ar bobl da veza gounezet gantho, ha da zistrei a greiz caloun ouz ho e'lhrouër hag ho Mestr oll-c'halloudec. Mes aliez ive siouas! an distro-ze ne bade ket pell, ha meur a brophet a oue zoken lakeat d'ar maro gant rouanet fallaer pe gant ar bobl difeiz. Couls goude ho c'homzou o deveze bepret eur c'halloud bennac var galounou an dud just, hag a rea d'ar re-ma delc'her mad d'ar feiz ha beza ato var c'hed euz a zalver ar bed.

#### EIL PENNAD.

##### *Amzer captivite Babilon.*

(Adalec ar bloaz 606 betec ar bloaz 536 araoc donedigez hor zalver.)

#### 73. Rouantelez Juda casset d'an traon.

Goude maro ar roue Josias, Nabukodonosor, roue Babilon, a zaillas var Jerusalem gant eun arme, hag a gassas gantho da Vabilon ar iuzevien a renk lueta, hag eul loden euz ar e'haliriuou sacr euz an templ. An drama e erruas er bloaz 606 araoc donedigez hor zalver, hag hennez eo ar bloaz kenta euz a gaptivite Babilon.

Abenn tri bloaz goude, Nabukodonosor en em daolas adarre var Jerusalem gant he zoudardet. Keimeret a reas ar roue Jekonias, hag he gass a reas gantho da Vabilon gant eul loden euz ar bobl ha calz a denzoriou. Sedecias a lakeas da roue e plas Jekonias. Mes Sedecias o veza en em zavet ive a enep Nabukodonosor, hema a zaillas var Jerusalem gant he arme evit an drede gueich, hag en dro-ma e cassas gantho an oll iuzevien, coulz lavaret, hag e lakeas an tan e kear hag en templ. Ar roue Sede-

cias a oue flastret he zaoulagad dezhan en he benn, ha casset da Vabilon earget a chadennou. Evelse ez eas rouantelez Juda d'an traoñ er bloaz 588 araoe donedigez hor zalver.

En amzer-ze e veve ar prophet Jeremias. Pell a ioa dija m'en doa ar prophet-se discleriet e tlie Jerusalem beza dismantret. Eun den oa hag a veve he unan, he galoun beuzet en eur mor a anken o sonjal er voualen spountuz a ioa prest da goueza var he vro. Eun dervez oa en em ziscouezet dirac ar bobl, eur jaden ganthan en dro d'he c'houzoug, evit rei da anaout d'he genvrois e pe stat e vijent lakeat abarz nemeur. Mes ar bobl ne reas van evit he glevet: goapeat ha goal-gasset e oue gant an oll. Pa oue dismantret Jerusalem, e chomas eno da gonzoli an dud keiz ha reuzeudic en devoa roue Babilon lezet var he zilere'h. Ne ehane da vouela var ar stat truezuz e pehini oa lakeat he vro ger, ha setu ama penaoz e comz er guerziou clemmuz en deuz savet var gement-se: «siouas! emezhan, henchou Sion a zo e caoñ; rac den ne zeu mui dreizho d'ar goueliou braz. Oll doriou kear a zo pilet; ar veleien ne reont nemet hirvoudi; ne veler mui ar merc'hed iaouank gant ho dillad brao: eur beac'h-anken scrijuz a zo couezet var Jerusalem. Dre an doare anezhi e lavar da gement hini a dremen: evessañ ouzinn ha guelit hag ez euz eur c'hlac'har heñvel ous va hini. Hag e guirionez ar re a dremen dre ar vro a jom mantret o velet e pe stat emañ; strakal a reont ho daouarn gant ho estlamm, ha clevet e vezont o lavaret en eur heja ho fenn: hag hounnez eo ar gear-ze ker caër gueich all, ar gear-ze eb he far a rea dudi ar bed oll?»

Coulsgoude ar iuzevien a reas pinijen e Babilon, hag a zistroas ous Doue euz a greiz ho c'haloun. Nabukodonosor a oue chentil ha damantuz en ho c'heñver. Mes eur c'heuz braz o doa ato d'ho bro muia caret ha da Jerusalem, ar gear-ze ker brudet gueich all. Setu ama penaoz e comzent entrezho var gement-se: «pa vezomp azezet ama var ribl steriou Babilon, n'oump ket evit miret



da vouela en eur zonzal ennoe'h, o Sion. Hon telennou or beuz lakeat a istribill ouz ar seourrou halec a zo hed ar steriou-ze. Hogen, ar re o deuz hon digasset gantho e captivite a lavar deomp cana : canit deomp, emezho, uuan bennac euz ar e'hanaouennou-ze a ganac'h gueich all e Sion. Mes penaoz e c'helfempni, pell dioc'h hor bro evel m'emaomp, sevel hor mouez da gana hor c'hanaouennou santel? — O Jerusalem, ra zounno va breac'h ouzinn, mar teuan biken d'oc'h ancounac'haat ! Ra stago va zeod ous va staoñ ma n'em euz ket a zonch ac'hanoe'h, ma ne lakar ket va brassa plijadur da zonzal ennoe'h !»

#### 74. Daniel hag an tri den iaouank.

Etouez ar iuzevien casset da Vablon ez oa meur a zen iaouank euz a vouenn ar rouanet. Nabukodonosor a roas urs da joaz evit he zervich ar re anezho o doa guella doare ha muia descadurez, ha da rei dezho da zibri euz ar bouet a zebre he unan. Ar prophet Daniel hag he dri vignoun, Ananias, Misaël hag Azarias, a oue choazet gant ar re genta. Evel lezen ar iuzevien a zifenne meur a seurt bouet, ar re-ma a bedas an hini a ioa lakeat da vestr varnezho d'ho lezel da veva divar louzou ha dour ebken. Mes an hini a ioa lakeat da vestr varnezho a respoutas : « me'm euz aoun rac ar roue ; mar cav ac'hanoc'h treutoc'h eget an dud iaouank all euz oc'h oad, e tamallo dinn-me hag e coundaono ac'hanon d'ar maro.» Neuze Daniel a lavaras : « list ac'hanomp da ober an esse epad dec dervez, ha goudeze e'houi a rai ho polontez.» An hini a ioa lakeat da vestr varnho a assantas, hag abenn dec dervez Daniel hag he dri goumpagnoun o doa bravoc'h ha guelloc'h doare eget an dud iaouank all a zebre euz ar pez a zebre ar roue. Adalec neuze e ouent lezet da veva divar louzou ha dour ebken. Mes Doue a roas dezho eur furnez vraz ; ha pa ouent casset dirac ar roue, nebeut amzer goude, Nabukodonosor, o veza comzet gantho, a velas dioc'htu n'o devoa ket ho far etouez an dud iaouank all evit ar furnez hag ar vou siegez : ho delc'her a reas eta ganthan evit he zervich.

**75. Daniel a zavete he buez d'ar c'hreg chast Suzanna.**

Suzanna a ioa eur c'hreg brudet dre he genet; hogen, he vertus a ioa c'hoaz treac'h d'he genet. Joakim, he fried, a ioa unan euz ar gaptivet a renk huela. Ar iuzevien all a ioa boaz d'en em zastum en he di, ha daou euz ar re gossa anezho a varne eno ar re ne vije kei dirouestl aoualc'h ho c'huden. An daou zen coz-se a ioa bet lakeat da varnerien abalamour m'o c'hemeret evit tud a benn ha tud a goustians; mes ne oant ket, sious! Daou fallaer euz ar re voassa ne oant ken. — Joakim en devoa eul liorz e kichen he di, ha Suzanna a ioa boaz da vont di bemdez da ober eur bale, e mare cresteiz. An daou varner her gouïe. Eun dervez eta ez ejont da guzet d'al liorz, ha pa erruas Suzanna eno hervez he c'hustum, ec'h en em ziscouezchont dirazhi, hag e falvezas dezho he lakaat da bec'hi ganto. Lavaret a rejont dezhi: «ma ne gounzantit ket, ni a damallo ac'hanoc'h hag a lavaro or beuz ho cavet ama o pec'hi gant eun all.» Suzanna a respountas en eur huanadi: «n'euz fors e pe du dinn treï, nemet reuzeudic ne vinn: mar gran ar pez a fell deoc'h, setu me collet dirac Doue, ha ma n'her gran ket, ne c'hellinn ket en em denna euz a dre ho taouarn. Couls-goude va joaz n'ema ket da ober; rac guell eo ganeñ cant mil gueich coueza dibec'h etre ho taouarn-c'houi eget pec'hi dirac an Aotrou Doue.» Ha kerkent e savas he mouez da c'hervel sicour. An daou zen coz a zavas ive ho hini, ha pa erruas tud an ti var al leac'h, e ouent digoustians aoualc'h evit tamall Suzanna e gaou.

Antronoz, an oll iuzevien euz a gear o veza en em zastumet e ti Joakim, e oue galvet Suzanna dirac ar varnerien. Erruout a reas, he zud hag he c'herent tosta oc'h ober coumpagnunez dezhi; kement hini he anaïe ne oa ket evit miret da vouela. Hogen, an daou libertin coz a lavare ato o devoa he c'havet o pec'hi gant eun all. Credet e ouent, ha Suzanna a oue coundaonet d'ar maro. Neuze e lavaras a vouez huel: «o Doue a zo bet a oll-viscoaz hag a vezo da virviken, c'houi a anavez an traou



cuzet, ha c'houi a c'hoar ervad o deuz douget eun desteni faoz em enep.» An Aotrou Doue a zelaouas he feden.

Epad m'edot oc'h he c'hass d'ar maro, Daniel, sclerijennet gant speret Doue, a zavas he vouez en eur lavaret : «evidon-me ne fell ket dinn caout perz en he maro ; barnit anezhi eur veich c'hoaz, rac ar varnerien o deuz douget eun desteni faoz.» O clevet kement-se, ar bobl a zistroas var he giz. Daniel a zispartias neuze an daou varner an eil dioc'h egile, hag a c'houlennas digant ar c'henta anezho : «den fallacr, brema da bec'hejou a ia da goueza varnoud. Mar e peuz guelet Suzanna o pec'hi, lavar deomp dindan peseurt guezen az peuz he guelet.» — «Dindan eur vezen graoñ,» emezhan. — «Gaouiad, eme Zaniel, da benn a baëo ar gaou az peuz lavaret!» Goude beza roët urs da gass hema a gostez, Daniel a lakeas digass egile dirazhan hag a c'houlennas outhan d'he dro : «dindan peseurt guezen az peuz-te

guellet ar c'hreg-se o pec'hi?» — «Dindan eur vezen brun,» emezhan. — «Geier a leveres, eme Zaniel, ha da benn a baëo ar geier-ze.»

Evelse an daou zen coz a iea an eil a enep egile en ho zesteniou. Ar bobl a anavezaz dre eno n'oa ket guir ar pez o devoa tamallet da Zuzanna, hag a drugarekeas an Aotrou Doue pehini ne lez morse en abandon ar re a laka enghan ho oll fisians. An daou varner a oue labezet, da lavaret eo, lazet a daoliou mein, hag adalec an deiz-se Daniel a oue doujet muioc'h-mui gant ar bobl.

### 76. An tri den iaouank e fournez Babilon.

Nabukodonosor a lakcas ober eun idol aour, hag he zevel e beg eur peul huel. Goudeze e c'hourc'hemennas da gement den a ioa e carg en he rouantelez stoui betec an douar dirac an idol-ze evit he adori. An oll a zentas nemet Ananias, Misaël, hag Azarias. Daniel n'edo ket dre eno neuze; rac, ma vije bet, en devije great evel he dri vignoun. Coulskoude, tud Babilon, o velet ne felle ket d'an tri den iaouank-se adori an idol aour, a zougas clemm en ho enep dirac ar roue.

Ar roue, o clevet ar c'helou-ze, a iegas kement a zrouc enghan ma roas urs da viri fourn ar palez seiz gueich goassoc'h eget ar c'hustum, ha da deuler enghi ez veo, pa vije goret evelse, an tri den iaouank dizent. Ar pez en doa gourc'hemennet ar roue a oue great egiz m'en devoa lavaret. Mes eun eal a ziskennas er fourn gant an tri den iaouank hag a belleas dioutho ar flammou tan; hag ar flammou-ze, poulzet gant an eal er meaz euz ar fourn, a zevas hag a vougas ar re o doa taolet ebarz Ananias, Misaël hag Azarias. Evit ar re-ma n'o devoue drouc ebet; an tan ne zevas nemet al liammou a ioa oc'h ho staga. E creiz ar fourn ez oa eun ezennic fresk ha c'houec, evel an hini a c'hoëz en añv dioc'h an abardaëz, hag an tri den iaouank a gane eno gant eur vouez creñ meuleudiou an Aotrou Doue.

An tri den iaouank-se, chomet en tan eb beza devet, a verke ar verzerien-ze, ker stank en amzer genta euz an

Iis, ha n'o devez ive drouc ebet, caer a vije ho zeuler e creiz ar flammou. Merka a reant, ousspenn, ar re a zalc'h ho ene neat dioc'h ar pec'het e creiz touellerez ha scoueriou fall ar bed.

Pa glevas ar roue petra a ioa c'hoarvezet, e teuas he unan da gichen ar fourn, hag o veza sellet eharz, e oue spoutet oll, hag e lavaras : «daoust ha n'e ket tri den, hag hi liammet, eo or beuz-ni taolet en tan? Brema me



vel pevar, hag hi distag hag eb drouc ebet, hag ar pevare anezho a zo heñvel ouz eun Doue.» Neuze e tosteas c'hoaz ous dor ar fourn, hag e lavaras : «deuit ama, servicherien an Doue oll-c'halloudec.» An tri den iaouank a deuas ractal er meaz, ha n'oa ket zoken var ho fenn eur vleven hag a vije bet rostet. Souezet gant ar burzudse, Nabukodonosor a lavaras : «benniget ra vezo an Doue en deuz digasset he eal da zavetei he zervicherien ! Ra vezo lakeat d'ar maro kement hini a voal-gomzo euz an Doue-ze ; rac n'euz Doue all ebet hag en devije gellet ober eun hevelep burzud.» Ar roue a reas goudeze ar brassa stad euz an tri den iaouank.

### 77. Daniel hag ar roue Balthasar.

Goude maro Nabukodonosor, Balthasar, he vab bihan, a bignas var dron Babilon. En eur goan vraz a roas d'an offiserien genta euz he balez ha d'he verc'het, ar roue a reas elask ar c'haliriou aour a ioa bet deuet gant he dad coz euz an templ a Jerusalem, hag a lakeas ar re a ioa oc'h he daol da eva gantho. Kerkent e oue gullet eun dorn, ha n'oa stag ous corf ebet, o scriva var moger ar zal eun nebeut geriou ha ne c'helle den ho lenn. Ar roue a oue spountet, hag a reas gervel Daniel evit gullet hag heñ a c'helje rei dezhan da anaout petra verke al lizerennou estlammuz-se. Daniel a erruas hag a lavaras d'ar roue : «o roue, en em zavet oc'h hirio a enep roue an eñv oc'h ober goal uzach euz ar c'haliriou sacr. Setu perac ar Mestr oll-c'halloudec-se en deuz lakeat scriva var moger ho sal ar geriou-ma : *Mane, Thecel, Phares*. *Mane* a zinifi niver, da lavaret eo, Doue en deuz niveret an dervezioù ma tliac'h ren ha setu ama an diveza anezho. *Thecel* a zinifi pouez, da lavaret eo, Doue en deuz pouezet ho meritou, hag en deuz ho c'havevet re scañv. *Phares* a zinifi rann, da lavaret eo, ho rouantelez a vezo rannet etre ar Medet hag ar Perset.» Ar pez en devoa discleriet ar prophet Daniel a deuas da veza guir en noz-se zoken. Balthasar a oue lazec, hag ar Medet hag ar Perset a rannas he rouantelez entrezho.

### 78. Daniel hag idol Bel.

Cirus, roue ar Perset, a deuas eb dale da veza mestr euz a oll rouantelez Babilon. Ar roue-ze en devoa calz a respet evit Daniel, hag aliez e pede anezhan da zibri ouz he daol. Eun dervez e c'houlennas digant ar prophet : «perac eta ne adorit-hu ket Bel, doue ar vro-ma?» Daniel a respountas : «abalamour ne adoran nemet ar guir Doue, an Doue beo en deuz crouët an eñv hag an douar, hag a zo mestr var gement tra zo.» — «Ha c'houi zonch deoc'h, eme Cyrus, Bel a zo eun doue ha n'euz ket a vuez enghan? Dibri a ra bemdez daouzec sac'had

bleud ha daou-ugent penn-dañvad, hag eva a ra, ouspenn, c'houec'h podad guin.» Neuze Daniel a lavaras en eur vouze'hoarzin : «o roue, ne lezit ket ober goab ac'hanoc'h evelse. Bel ne zebr na ne ev, rac ne d'eo nemet pri ha douar.» O clevet kement-se, Cyrus a ieas eun drouc braz enghan. Kemenn a reas ractal da veleien an idolou dont d'he gaout, hag e comzas outho evel-hen : «ma ne livirit ket dinn piou a zebr hag a ev ar pez a vez kinniget e sacrifis d'an doue Bel, me ho lakañ oll d'ar maro. (Ar veleien-ze a ioa dec ha tri ugent anezho). Mes ma roñt dinn da anaout sclear eo Bel he unan a zebr hag a ev ar pez a vez kinniget dezhan e sacrifis, neuze Daniel eo a vezo lakeat d'ar maro, abalamour m'en deuz goal-gomzet divar benn an doue-ze.» — «O roue, eme Zaniel kerkent, ra vezo great hervez m'o peuz lavaret!» Var gement-se Cyrus hag heñ a ieas d'an templ, ha beleien an idolou a lavaras : «o roue, ni jomo er meaz epad ma vioc'h o lakaat dirac Bel pe a dra da zibri ha da eva ; goudeze e c'helloc'h serra an or oc'h unan, hag he ziella gant ho coualen a roue. Mar chom eun dra bennac a zilerc'h Bel abenn vare'hoaz vintin, ni c'houlenn beza lakeat d'ar maro.» Great e oue evel ma c'hoantea ar veleien. Cyrus a lakeas dirac Bel ar c'big hag ar guin a veze kinniget d'an idol-ze e sacrifis. Neuze Daniel a lavaras digass dezhan ludu fin, hag a scuillas al ludu-ze dirac ar roue var oll have an templ. Goudeze e oue serret an or ha siellet gant goualen ar roue.

Epad an noz, ar veleien a deuas d'an templ, hervez ho c'hustum, dre eun or-guz a ioa dindan taol ar sacrifis, ha kement tra a ioa bet lakeat var an daol-ze evit Bel a oue lipet gantho, ha gant ho gragez hag ho bugale.

Antronoz, Daniel hag ar roue a deuas d'an templ mintin mad. Caout a rejont merk ar ziel en he bez, ha setu hi da zigeri an or. Ar roue, o veza sellet var an daol, a lavaras ractal : «O Bel, c'houi zo eun done braz, ha n'euz troïdel ebet ennoc'h.» Mes Daniel a respountas en eur vouze'hoarzin : «sellit-ta var ar pave ; roudou piou ar re-ma?» Cyrus hag heñ a ieas neuze da furcha en dro

da daol ar sacrificis, ha ker buhan e cavchont an or-guz. Ar roue, oc'h anaout ar virionez, a ieas eur gounnar direiz ennhan, hag a roas urs da lakaat d'ar maro oll veleien an idolou. Daniel a lakeas discar Bel ha pilat an templ.

### 79. Daniel e foz al leounet.

Tud Babilon a adore ive eur zarpant braz. Eun dervez Cyrus a lavaras da Zaniel: «ne leveroc'h ket da vihana n'e ket hennez eun doue beo?» Ha Daniel da respount: «o roue, mar kirit, me lazo ar zarpant-se eb cleze na baz ebet.» — «Mad, eme Cyrus, grit-la, mar gellit.» Neuze Daniel a reas egiz pouloud gant peg, soa ha bleo lakeat da virvi en eun douez, hag a stlapas ar pouloud-se e ginou ar zarpant; ar zarpant ho lonkas, mes mervel a reas gantho. Var gement-se Daniel a lavaras: «guelit-ta peseurt doue a adorac'h!» Hogen, tud Babilon, o veza clevet ar c'helou-ze, en em zastumas en eur vanden, hag a deuas evelse da lavaret d'ar roue lakaat Daniel etre ho daouarn. Cyrus a garie Daniel; coulsgoude, gant aoun rac ar bobl, ec'h assantas d'ar pez a c'houlennet diganthan. Ar bobl, deuet da veza mestr enz ar prophet, hen taolas e foz al leounet, el leac'h ma'z oa seiz leoun leun a gounnar. Lezet oant bet eb tamm, evit ma lonkchent Daniel buhannoc'h a-ze. Mes ne rejont drouc ebet dezhan.

Abenn m'en devoue tremenet c'houec'h dervez er foz-se, Daniel a zavas naoun ganthan. D'ar mare-ze e veve e kichen al leac'h m'edo gueich all Jerusalem eur prophet all, he hano Habacuc. Eun dervez m'edo ar prophet-se o vont da gass ho mern d'he dud a ioa o vidi en he barkeier, eun eal a deuas da lavaret dezhan: «cassit ar pez a zo aze ganeoc'h da Zaniel a zo e foz al leounet e Babilon.» Mes Habacuc a respountas: «Aotrou, n'oun bet biscoaz e Babilon, ha ne anavezan ket ar foz ma comzit anezhi.» Neuze an eal a grogas e kern he benn, hag her c'hassas var bouez he vleo, ha ker buhan hag an avel, da foz al leounet e Babilon. Errnet eno,



Habacuc a c'halvas Daniel, en eur lavaret : «servicher Doue, setu ama al lein a zigass deoc'h an Aotrou Doue.» Daniel, leun a anaoudegez vad, a respontas : «Aotrou Doue, sonch o peuz bet ac'hanon ha discouezet o peuz dinn selear ne ancounac'hañt morse ar re ho car.» Neuze e savas en he za da zibri, ha kerkent an eal a gassas adarre Habacuc d'al leac'h m'en devoa he gemeret.



D'ar seizvet dervez, Cyrus he unan a deuas da foz al leounet; Daniel a ioa eno, azezet, dizoursi-meur, e creiz al loanet gouez. Ar roue, estlammet o velet kement all, a lavaras ractal : «na c'houi zo braz ha gallouduz, o Doue Daniel!» Neuze e lavaras d'ar prophet dont er meaz euz ar foz, hag e reas teuler ebarz en he blas ar re o devoa clasket he lakaat d'ar maro. Ar re-ma a oue ractal dispennet ha lonket gant al leounet. Goudeze Cyrus a roas an urs-ma : «ra zeui an oll da zouja Doue Daniel ; rac n'euz nemethan hag a c'houffe ober burzudou evel ar re or beuz guelet!»

Daniel, evel an tri den iaouank er fourn c'horet, a verke ar verzerien gristen, hag ive an oll guir gristenien e creiz poaniou ar vuez-ma. Daniel a deuas euz a foz al leounet eb caout drouc ebet; evelse ive hor zalver Jesus-Krist a zavas euz ar bez leun a vuez. Evel Daniel a jomas gant ar iuzevien, he vreudeur, adalec ar penn kenta betec ar penn diveza euz a gaptivite Babilon, evelse ive hor zalver Jesus-Krist a jom gant he Ilis betec fin ar bed.

### TREDE PENNAD.

*An histor santel adalec captivite Babilon betec donedigez hor zalver.*

(536 Vloaz araoc Jesus-Krist.)

#### 80. Distro ar iuzevien d'ho bro.

Pa oue tremenet an dec vloaz ha tri-ugent euz a gaptivite Babilon, Doue a lakeas eur zonch e speret Cyrus, roue Pers ha roue Babilon var eun dro. Ar roue-ze a reas embann e kement corn a ioa en he rouantelez : « ar re a zo euz a vobl Doue n'o deuz nemet distrei da Jerusalem, ha sevel a nevez templ an Aotrou Doue. » Ouspenn daou-ugent mil euz ar iuzevien a zistroas ractal d'ho bro; Zorobabel, unan euz an dud a renk huela en ho zouez, a ioa oc'h ho ren. Cyrus a roas dezho en dro ar c'haliriou aour hag arc'hant a ioa bet digasset gant Nabukodonosor euz an templ a Jerusalem. Eur veich erruet en ho bro, ar iuzevien en em lakeas da genta da zavel eun aoter en honor d'an Aotrou Doue. An templ nevez ne c'hellas beza peur-achuet nemet abenn eur bloaz var-n'ugent goude. Mes ar re goz, o devoa guelec an templ all, ne reant nemet gouela hag hirvoudi abalamour an hini nevez a ioa pell dioc'h beza ker brao ha ker caër hag heñ.

Pevar ugent vloaz goude m'oa erruet Zorobabel e Jerusalem, ar belec santel Esdras a zastumas calz iuzevien a ioa chomet c'hoaz e Babilon, hag a zistroas ive gantho d'ar Judee. Esdras hag he vignoun santel Nehemias a boanias da ober d'ar bobl delc'her mad d'ar feiz, ha da

viret outhan d'en em gaillara ha d'en em sclabeza dre ar pec'het. Eun dervez Nehemias a lavaras: « va breudeur, deomp da zevel a nevez kear ha mogeriou Jerusalem!» An oll a i eas d'he heul, ha peb hini a stagas d'al labour adalec ar belec braz betec an disterra den a ioa etouez ar bobl. Ar Samaritanet a glaskas ober an heg outho; mes caër o devoue, abenn daou zervez hag anter-cant e oue peur-zavet mogeriou Jerusalem, kercoulz hag an doriou hag an touriou.

### 81. Ar brophetet goude ar gaptivite.

Jeremias, Daniel hag Ezechiël o devoa kelennet ar iuzevien, ha dousseat ho foaniou epad ar gaptivite, dre ar pez a zisclerient dezho a berz Doue. Goude m'oa distroët ar iuzevien d'ho bro, e savas c'hoaz en ho zouez prophetet all, ha, dreist oll, Agjee ha Zakarias. Ar re-ma a roas calounn d'ar bobl da zevel a nevez an templ hag ar gear zantel, en eur gomz outhan evel-hen: «*An Hini m'ema an oll boblou var c'hed anezhan*, ar Roue hag ar Zalver, a deuio d'an templ nevez ha d'ar Jerusalem nevez-ma; rac-se an templ nevez-ma en devezo brassoc'h henor eget n'en deuz bet hiscoaz egile.»

An diveza euz ar brophetet, a zavas gueich all etouez ar iuzevien, a oue Malachias. Ar prophet-se a veve var dro ar bloaz 400 araoc donedigez hor zalver, hag a roas da anaout e vije taolet a gostez ar sacrificiou coz, hag e vije lakeat en ho flas eur *sacrifis nevez ha ne c'helle ket beza eun all quelloc'h evithan*.

Scridou ar brophetet-se, hag ar scridou all euz an testamant coz, a oue troët euz a iez pe langach an Hebreet e gregach var dro ar bloaz 300 araoc donedigez hor zalver. 72 den euz ar re zesket a euz ar vro a oue carget euz al labour-ze. Evelse ar baïanet a c'hellas anaout ar Scritur santel, ha dreist oll ar pez a ioa merket ennbi divar benn ar Messias; rac ar gregach a ioa eul langach hag a gomzet, d'ar mare-ze, en oll broïou euz ar bed, coulz lavaret.

E tro ar mareou-ze ive, eun den a zoujans Doue, he hano Jesus, mab da Zirak, a scrivas, gant sicour ar Speret-Santel, eul levr leun a gentelliou mad ha devot evit deski d'an dud hent ar guir furnez hag ar zantelez. Al levr-ze eo an hini a c'halver levr an *Ecclesiastic*.

## 82. Esther.

Rouanet Pers a ioa chentil meurbet e keñver ho zujidi. Setu perac oa chomet calz iuzevien e rouantelez Babilon. Euz an niver-ze e oue Esther. En amzer ar roue Assuerus houma a veve gant eun contr dezhi, hanvet Mardochee. Eun dervez ar roue he guelas, ha kement e plijas dezhan ma he c'hemeras evit pried. Hogen, Mardochee, ato nec'het divar benn an hini a garie evel he verc'h, en em zalc'he bemdez dirac dor ar palez. Heñ eo a deuas da c'houzout, eun deiz, ez oa daou offiser hag a ioa en em glevet evit lamet he vuez digant ar roue. Cass a reas ractal ar c'helou-ze da Esther, hag houma a roas da anaout d'ar roue ar pez a ioa bet kemennet dezhi. An daou offiser a oue coundaonet d'ar maro, hag ar pez a ioa c'hoarvezet a oue merket el levr ma verket ennhan ar pez a c'hoarveze a vrasa er rouantelez.

Nebeut amzer goude, Assuerus a roas ar garg hueia euz he balez da eun der, hanvet Aman. Oll zervicherien ar roue a zouble penn ho glin dirac an den-ze hag hen henore evel eun doue, nemet Mardochee ebken n'her grea ket. Aman, o veza gouezet ne rea ket Mardochee evel ar re all, a ieas eun drouc braz ennhan. Evit gellout en em venji eassoc'h a-ze, e falvezas dezhan rei da gredi d'ar roue edo ar iuzevien, a ioa chomet c'hoaz er rouantelez, prest d'en em zével en he enep, hag e lakeas e speret he vestr rei urs d'ho laza oll, en eun hevelep deiz, gant ho gragez hag ho bugale, ha da gemeret ho danvez. Ar brud euz a gement-se o veza eat dre gear, ne oue elevet nemet leñv hag hirvoud etouez ar iuzevien. Mardochee a roas da anaout da Esther ar brud a ioa e kear, evit ma plicheuse ganthi goulenn digant ar roue gras he fobl.



Mes bez' ez oa eul lezen hag a zifenne, a zindan boan a varo, mont da gaout ar roue eb beza bet galvet. N'euz fors : Esther a ra faë var al lezen-ze, ha setu hi, goude beza pedet stard an Aotrou Doue, oc'h en em lakaat en he c'haëra, hag o vont evelse da gaout ar roue. Ar roue a ioa azezet var he dron, an aour hag ar perlez o lugerni eu dro dezhan. Esther en em strinkas d'he dreïd ; mes, oc'h he velet o sellet du outhi, e semplas, kement a aoun e devoue. Neuze Assuerus a deuas he galoun da deneraat ; disken a reas divar he dron evit cregi er rouanez, hag he scora a reas gant he zaou zorn evit he delc'her en he za, ken na deuas adarre ennhi he unan. Ila goudeze e lavaras dezhi : « n'o pezet ket a aoun, Esther ; ne vioc'h ket lakeat d'ar maro : al lezen-ze n'e ket great evidoc'h. Livirit dinn-ta petra zo a nevez ganeoc'h ? » Esther a respontas : « c'hoant am euz o peffe ar vadelez da zont da leina ganeñ vare'hoaz, hag e teuffe Aman da ober cumpagnunez deoc'h. » — « Mad, eme ar roue, mont a rinn. »

Couls goude ar roue ne c'helle ket cousket epad an noz varlerc'h, ha setu heñ da lakaat lenn dezhan al levre e pehini e veze merket ar pezh a c'hoarveze a vrasa er rouantelez. Pa errujot gant histor an daou offiser a ioa

en em glevet evit he laza, hag a vije deuet abenn euz ho zaol pa n'effe Mardochee, ar roue a c'houlennas : «peseurt recoumpans en deuz bet Mardochee evit ar vad-se en deuz great evidon?» — «Recoumpans ebet,» a respountas an offiserien a ioa eno. Neuze ar roue a reas gervel Aman hag a c'houlennas outhan : «petra dleer da ober da eun den hag en deuz c'hoant ar roue da garga a henor?» Aman a zonjas dioc'htu ne felle d'ar roue henori den all ebet nemethan; setu perac e respountas : «red e ve ober d'an den-ze guiska mantel ar roue, dougen he gurunen ha pignat var he varc'h, ha goudeze pourmen anezhan dre ruïou kear, ar c'henta euz a offiserien ar palez o ren ar marc'h gant he zorn, hag oc'h embann a vouez huel : setu aze peseurt stat a dleer da ober euz an hini en deuz c'hoant ar roue da henori.» — «Mad, eme ar roue, it buhan-ta da ober an dra-ze da Vardochee, a zo azezet aze dirac dor ar palez.» O clevet an urs-se, Aman a venne he galoun ranna en he greiz, kement a boan hag a vez en devoa o sonjal e vije Mardochee henoret en he blas, ha savet huelloc'h evithan dirac an oll. Red mad e oue dezhan coulsgoude senti ouz ar roue.

Etre daou e teuas ar mare da vont da leina gant ar rouanez, hag Aman a oue mall ganthan en em gaout eno. Hogen, ar roue a lavaras epad lein : «petra o peuz c'hoant da gaout diganeñ, Esther? Me roïo deoc'h ar pez a geroc'h da c'houlenn, ha pa ve an anter euz va rouantelez e ve.» Esther a respountas : «o roue, mar em euz cavet gras dirac ho taoulagad, me ho ped da rei dinn va buez hag hini va fobl ; rae va fobl ha me a zo coundaonet da vervel, hag a dle beza lazet eb truez na damant ebet.» — «Ha piou eta, eme ar roue, piou en deuz an hardisegez da ober kement all?» — «Piou? a respountas Esther ; hon enebour touet eo Aman, an den fallaer a zo ama.» O clevet ar c'homzou-ze, Aman a oue spountet oll, ha ne grede ket digeri he c'hinou da lavaret eur ger. Var gement-se ar roue a zavas dioc'h taol, droue enghan. Unan euz he offiserien a lavaras dezhan neuze : «e ti Aman ez euz eur groug huel-huel en devoa lakeat da

ober evit Mardochee.» — «Mad, eme ar roue, stagit Aman ouz ar groug se.»

Abarz fin an dervez-se, ar roue a roas da Vardochee ar garg en devoa Aman, hag ar zetans a varo douget gant hema a enep ar iuzevien a oue torret. An oll iuzevien a ioa c'hoaz e rouantelez Pers ha Babilon, a zride ho c'haloun gant ar joa o clevet eun hevelep kelou, ha calz paianet a guiteas ho c'hredennou faoz evit heul ar guir relijion.

Histor Esther, ar rouanez a zoujans Doue, a verke petra vije ar Verc'hez Vari, rouanez an eñvou. Al lezen a zifenne, a zindan boan a varo, mont da gaout ar roue eb beza bet galvet, a ioa great evit an oll nemet evit Esther ebken; evelse ive, hervez al lezen douget gant Doue, ar c'haillar pe ar zouilladur euz a bec'het Adam a stag ouz he oll vugale kerkent ha ma vezont concevet, nemet ouz ene ar Verc'hez ebken n'e ket bet staget. Esther, gueich all, a obtenas gras evit he fobl coundaonet d'ar maro; evelse ive ar Verc'hez Vari a obten dalc'h-mad digant Doue, dre he fedennou oll-c'hallouduz, pardoun ha trugarez evit ar bec'herien. — Mardochee, pehini a daole kement a evez euz a Esther hag a zaveteas he vuez d'ar roue, a verke sant Joseph. Sant Joseph en deuz ive saveteet he vuez d'ar mabic Jesus, o cass anezhand d'an Ejipt d'ar mare m'edo Herodes o clask hen lakaat d'ar maro; ha den n'en devoue ken nebeut kement a aket hag heñ evit teuler evez na erruje drouc ebet gant ar Verc'hez. Setu perac en deuz brema ive en eñv ar renk huela goude ar Verc'hez Vari.

### 83. Judith.

Doue a roas ive d'ar iuzevien a ioa distroët d'ho bro eur zicoar burzuduz dre zaouarn eur vaouez. Holo-phernes, jeneral a Assirii, o veza deuet er vro gant eun arme vraz, en devoa dija kemeret calz keariou euz ar Judee, ha lezet e peb leac'h merkou euz he galoun criz ha didruez. Ne respete na sacr, na dizacr, ha kement tra a gave var he hent a veze ractal dismantret ganthan dre an tan hag ar c'hleze. Erruout a reas evelse dirac Bethulii. Hogen, er gear-ze ne oa na puns, na feunteun ebet; mes bez'ez oa cur c'han pe eur gorzen, hag a gasse

dour enghi euz eur feunteun hag a ioa a ziañveaz kear. Kenta tra a reas Holophernes a oue lakaat troue'ha ar c'han pe ar gorzen-ze, evit miret ous tud kear da gaout dour, hag evit gellout dont abenn anezho eassoc'h a-ze. An dud keiz a velas dioc'htu neuze ne c'heljent ket herzel pell, hag e renkchent en em rei ma ne deuje ket a zicour dezho abarz pemp dervez.

D'ar mare-ze ez oa e Bethulii eun intañvez iaouank, he hano Judith. Petra bennac ma'z oa pinvidic braz, ha ma n'oa ket eur vaouez all braoc'h evithi, e veve pell dioc'h trouz ar bed. Ar binijen eo a garie. Clevet a reas coulsgoude e pe stat reuzcudic edo Bethulii, ha kerkent setu hi da vont da gaout ar pennou braz euz a gear, ha d'ho scandalat a zoare abalamour m'o doa lavaret e renkchent en em rei ma ne deuje ket a zicour dezho abarz pemp dervez. « Perac, emezhi, merka evelse eun termen da drugarez an Aotrou Doue? Greomp pinijen hag an Aotrou Doue a roïo deomp ar victor var hon enebourien.» Ar pennou braz euz a gear a respountas : « guir a livirit; pedit eta evidomp, iac c'houi a zo eur vaouez santel.» Neuze Judith en em dennas en he orator, hag eno ec'h en em strinkas d'an daoulin, he fenn goloët a ludu, hag e pedas calounec an Aotrou Doue.

Doue a zelaouas he feden, hag a roas dezhi da anaout e pe feson e c'helje savetei he fobl. Sevel a reas eta en he za, ha, goude beza divisket ar c'houriz-reun hag an dillad caoñ a zouge bepret, setu hi d'en em gempenn, da lakaat ouz he bleo louzou a c'houez-vad, d'en em ficha caëra ma c'helle, ha da vont evelse da gaout Holophernes, eur plac'h ebken oc'h ober coumpagnunez dezhi. Holophernes a reas dezhi eun digemer euz ar re vella, dre ma crede oa eur vaouez ha ne glaske nemet tec'het euz a douez ar iuzevien. Rei a reas urs ractal d'he lezel da vont ha da zont dre ar c'hamp, p'e devije c'hoant. Hogen, abenn pevar dervez goude, Holophernes a roas eur goan vraz d'an offiserien genta euz he arme, hag o veza evet re epad ar goan-ze, ec'h en em daolas var he vele hag ec'h en em roas da gousket. An offiserien a ioa bet





o coania gant ar jeneral en em dennas ive peb hini d'he delt, hag eb dale an oll a oue cousket ebarz er c'hamp. Neuze Judith en em zilas e kichen guele Holophernes, hag, o veza great goustadic ar beden-ma da Zoue : « va Doue, roit dinn brema an nerz a behini am euz ezom, » e tistagas cleze ar jeneral a ioa a zistribill ouz unan euz a bostou he vele, ha gant ar c'hleze-ze e tarc'hoas daou daol ganthan var he c'houzoug hag e trouc'has dezhan he benn. Reï a reas hema d'he flac'h a ioa chomet d'he gortoz e tal an or, en eur lavaret dezhi he lakaat er zac'h e devoa pourchasset evit kement-se, ha goudeze ez ejont ho diou etrezec Bethulii.

Pa errujont eno, Judith a c'halvas oll dud kear en dro dezhi, hag, en eur ziscouez dezho penn Holophernes, e lavaras : « trugarekaït an Aotrou Doue, n'en deuz ket lezet en abandon ar re a lakea ho fisians ennhan, hag a zo plijet ganthan laza dre va dorn-me enebour he bobl. Ouspenn-ze, carget en deuz he eal d'am divoal keit ha m'oun bet pell diouzoc'h, ha great en deuz dinn ar c'hras da zistrei en ho touez, va ene ken neat dioc'h ar pec'het

evel pa'm boa ho kuiteat.» Neuze an oll a drugarekeas an Aotrou Doue, hag Ozias, prins ar bobl, a lavaras da Judith : « o merc'h, c'houi zo benniget gant an Aotrou Doue dreist an oll gragez all euz an douar.» Ar iuzevien a zaillas goudeze var an Assirianet en eur leusker iouc'hadennou braz. An Assirianet, o velet penn ho jeneral beuzet er goad, a gemeras oll an teac'h.

Neuze tud Bethulii a zavas ho mouez, oll a-tuan, evit reiñ meuleudi da Judith, en eur lavaret : « c'houi eo gloar Jerusalem, c'houi eo joa Israël hag honor hor bobl-ni.» Goudeze e rejont eun dervez gouel evit trugarekaat Doue euz ar victor o devoa gounezet, ha Judith en em lakeas da gana eur ganaouen zantel evit meuli galloud an Aotrou Doue hag he vadelez e keñver he bobl. Ar brud euz an intañvez calounec-se a ieas buhan e kement corn a ioa er vro, ha pa varvas, en eun oad braz, ar bobl oll a zougas caoñ dezhi.

Judith, kercoulz hag Esther, a verke ar Verc'hez Vari. Ar Verc'hez Vari e deuz trec'het, dre he mab Jesus, an diaoul, enebour touet an den. Setu perac e deuz canet ive eur ganaouen a victor, ar *Magnificat*, hag euz bet lavaret dezhi gant an elez ha gant an dud oa benniget dreist an oll gragez all euz ar bed. Ni oll ive a lavar d'ar Verc'hez Vari ar pezh a lavaret gueich all da Judith : « pedit evidomp, rac c'houi a zo eur vaouez santel.»

#### 84. Merzerenti Eleazar.

Er bloaz 333 araoc donedigez hor zalver, Alexandr-ar-braz a gassas d'an traoñ rouantelez Pers. Ar Judee a ioa bet stag ouz ar rouantelez-se abaoue Cyrus. Neuze e couezas a zindan galloud rouanet an Ejipt, ha goudeze etre daouarn ar rouanet a Sirii. Unan euz ar re-ma, Antiokus he hano, prins criz ha digaloun, a reas goal vuez d'ar iuzevien abalamour d'ho relijion. Lakaat a reas teuler en tan al levriou santel, ha difen a eure, a zindan boan a varo, heul ar pezh a ioa merket el lezen. Eleiz a iuzevien a nac'has ho feiz, mes eleiz a re all ive a zalc'has mad d'ho relijion, hag a oue guell gantho mervel eget mont a enep lezen Doue.

Euz an niver-ze e oue eun doctor euz al lezen, oajet a naontec vloaz ha pevar-ugent, he hano Eleazar. Pa falvezas da dud ar roue ober dezhan dibri euz ar c'hig a ioa difennet gant al lezen, e lavaras dioc'htu oa guell ganthan mervel eget ober eun dra countrol d'he goustians. Coulskoude ar re hen anaïe, gant damant d'he oad ha dre druez outhan, her pede hag hen aspede da ober an neuz ebken da zibri evit savetei he vuez. Mes Eleazar a zalc'has mad hag a respountas : «ne zere ket ouz eun den euz va oad-me ober an neuz evelse. An dud iaouank a c'helfe credi e ve deuet Eleazar goz da veza païan, ha d'en em lezel da veza touellet. Ouspennze, petra dalvezfe dinn en em denna euz a-dre daouarn an dud? Ne c'helfen ket evit kement-se en em denna euz a-dre daouarn an Aotrou Doue. Setu perac eo guell ganeñ mervel calounec evit hon lezennou santel, evit deski d'an dud iaouank chom ato stard en ho feiz.» Kerkent e oue casset d'ar maro, ha leusker a reas he huanad diveza en eur lavaret : «o va Doue, gouzout a rit e c'houzañvan a galoun vad, abalamour ne zoujan nemedoc'h.»

### 85. Merzerenti ar seiz breur Makabee.

Antiokus a c'halvas ive dirazhan eur vamm hag e devoa seiz mab, hag a roas urs dezho da zibri euz ar c'hig difennet. Mes hi a lavaras n'her grajent ket; hag, evit ho lakaat da zenti, e ouent scourjezet. Ar c'hossa euz ar vugale a lavaras neuze : «prest oump da vervel kent eget ober netra a enep lezen Doue.» O clevet ar c'homzou-ze, ar roue a ieas drouc enghan, hag a lavaras ober fan a zindan eur gaoter vraz. Goudeze e reas trouc'ha he deod, discroc'henna he benn ha trouc'ha begou he dreïd hag he zaouarn d'an hini en devoa comzet evelse; ha, pa oue tomm-scaot ar gaoter, e roas urs d'hen teuler ebarz evit he zevi ez veo. He vamm hag he vreudeur a ioa o sellet outhan, hag ar guel euz he verzerenti a roë muioc'h-mui a galoun dezho, hag ho lakea da veza startoc'h-starta er feiz.

Pa oue maro ar mab cossa, e oue croget en eil, ha, goude ma oue discroc'hennet ha disvlevet, e oue goulennet outhan ha dibri a raje euz ar c'hig a ginniget dezhan. Respount a reas grons n'her graje ket. Neuze e oue merzeriet evel he vreur. En eur vervel e lavaras c'hoaz d'ar roue: « prins fallacr, lamet a rit diganeomp buez ar bed-ma; mes roue an eñv hag an douar a roïo deomp e plas ar vuez-ma eur vuez all hag a bado da viken.»



An trede a oue mall ganthan astenn he zaouarn d'ar bourreo en eur lavaret: « Doue eo en deuz roët dinn an ijili-ma; esper am euz ho roïo dinn adarre eun deiz a zeui.» Ar pevare, ar pempet hag ar c'houec'hvet a oue merzeriet evel an tri genta. Ken nebeut a van a reant evit beza bourrevet ma oue souezet ar roue, hag ar re a ioa en dro dezhan, o velet peger calet oant ouz ar boan, ha gant pebez nerz-caloun e c'houzañvent ar maro.

Ne jome mui nemet ar iaouanka. Ar roue a douas da hema var he le e lakaje anezhan da veza eüruz ha pinvidic, hag her c'hemerje evit he vignoun, ma carje dilezel

religion he dud coz. Mes ar paotr ne reas van evit he glevet. Neuze ar roue a bedas ar vamm da alia he mab da zenti outhan evit savetei he vuez. Ar vamm a dosteas eta ouz ar mab-se ne jome mui nemethan ganthi, hag a lavaras dezhan gant eur vouez tener: «va c'hrouadur, emezhi, evessaït ouz an eñv, an douar, hag ouz kement tra a zo enno; sonjit eo Doue en deuz great a netra an traou-ze oll. N'o pezet eta aoun ebet rac ar bourreo-ma; mes discouezit ez oc'h din euz ho preudeur evit m'am bezo an eur d'ho cuelet eun deiz gantho er baradoz.» A veac'h oa ar c'homzou-ze ganthi peur-achuet, ma lavaras ar paotr a vouez huel: «o c'hortoz petra emaac'h? N'e ket ous lezen ar roue eo e fell dinn senti, mes ous lezen Doue a zo bet roët deomp dre zaouarn Moïzes. Evidoc'h-hu, o roue, a ra kement a voal vuez d'ar iuzevien, buanegez Doue a gavo ive he zro varnoc'h.» Ar roue a ieas neuze en egar, hag a roas urs da vourrevi ar bugel-ze en eur feson crissoc'h c'hoaz eget m'oa bet bourrevet he vreudeur. Erfin ar vamm a oue lakeat ive d'ar maro evel he bugale

## 86. Mathathias ha Judas Makabee.

En amzer-ze e veve er Judee eun den a galoun, he hano Mathathias, hag en devoa pemp mab. O veza clevet e pe stat reuzeudic ha truezuz oa lakeat he vro hag he genvrois gant ar roue Antiokus, e santas he c'hoad o virvi gant eur vuanegez santel, hag e lavaras: «an nep piou bennac a gar c'hoaz lezen Doue n'en deuz nemet dont d'am heul!» Neuze ec'h en em dennas var eur menez gant he vugale ha calz a iuzevien all leun a zoujans Doue evelghan, hag ac'hano e tisclerias brezel d'ar baianet evit difen en ho enep he vro hag he religion.

Mathathias o veza deuet da vervel, Judas, he vab, a gemeras he blas. Hema a oue hanvet Makabee abalamour n'oa den evit beza treac'h dezhan. Heñvel oa oc'h eul leoun pa veze o vrezelekaat. Gounit a reas evelse meur a victor var jeneralet Antiokus, ha lamet a reas euz a-dre

ho daouarn Jerusalem hag an templ. Al leac'h santel hag an aoter a ioa truez gullet e pe stat edont : ar geot a ioa savet hir el leac'h ma teue kent ar bobl da bedi Doue. Judas a lakeas netaat ha kempen an templ, ha goudeze e reas ober eur gouel braz evit trugarekaat Doue euz ar victor en devoa gounezet. An aoter a oue consacret a nevez e creiz ar c'hanaouennou a joa hag an trouz euz ar benviachou muzic.



Antiokus a ias kement a gounnar ennhan pa glevas oa bet trec'het he jeneralet gant Judas Makabee, ma sonjas dont ractal da Jerusalem evit en em venji. Mes dorn Doue a ioa ouz he c'hedal var an hent. Coueza a reas euz he gar hag e oue goal-c'hlazet. Sevel a reas preñvet var he gorf hag e oue debret gantho ez veo : ar c'hig, dija brein, a zistage a dammou dioc'h he eskern, hag eur c'houez ker creñ a ioa gant he c'houliau ma'z oa eun donjer tostaat outhan ha ma na c'helle ket en em c'houzañv he unan. Neuze e teuas da zonch dezhan ez

oa eur mestr all brassoc'h evithan, hag ee'h en em lakeas da bedi Doue. Lavaret a reas zoken e raparje an drouc en devoa great, hag e roje da anaout dre ar bed oll galloud an Aotrou Doue. Mes ne rea ar promessaou-ze nemet gant aoui rac ar maro; setu perac an Aotrou Doue ne zelaouas ket he beden, ha ne zoussas ket he boan. Ar roue criz ha difeiz-se a varvas erfin evel eun den ha n'euz ket eun all ker reuzeudic hag heñ,



e creiz ar poamou ar re scrijussa a c'houffet da zonjal. He vab a glaskas dont da veza adarre mestr euz ar Judee. Mes Judas hag ar iuzevien all a ioa ganthan a zavas ho mouez varzu an eñv, ha setu hi d'ar vrezel leun a fisians e Doue. P'edont guir vella oc'h en em ganna oc'h enebourien ho bro hag ho relijion, e oue gulet o tisken euz an eñv en eun taol-count pemp den var varc'h, a bep a gabestr aour gantho o tele'her ho c'hezec. Daou anezho a deuas d'en em lakaat e kichen Judas Makabee, unan a bep tu, evit he zifenn gant ho armou; an tri all en em lakeas da vanna birou ha luc'het var

arme roue ar Sirii. Tud an arme-ze, dallet gant an tan, a gouezas ractal d'an douar, pe a gemeras an teac'h. Pa'z ejot da gounta ar re varo, e veljot o devoa an enebourien collet en deiz-se ouspenn 20000 soudard var droad, ha 6000 soudard var vare'h.

Gant sicour Doue, Judas a c'hounezas c'hoaz meur a victor all var enebourien Israël. Eur veich evelato, petra bennac m'o devoa gounezet ar iuzevien, oa chomet biniennou anezho var an dachen. Pa'z ejot antronoz da liena ho c'horfou, e ouc cavet a zindan ho dillad traou hag a ioa deuet gantho euz a demplou ar baïanet. Hogen, al lezen a zifenne delc'her ar seurt traou-ze. Ar iuzevien all a anavezas eta oa dorn Doue en devoa skoët an dud-se abalamour d'ho fec'het, ha setu perac ec'h en em lakejont dioc'htu da bedi evitho. Goudeze Judas a reas eur gest en he arme, hag a gassas 12000 pez arc'hant da Jerusalem, en eur c'houre'hemenn ober pedennou ha kinnig sacrificiou da Zoue evit repoz da eneou ar re a ioa bet lazet; «rac, emezhan, eun dra vad ha santel eo pedi evit ar re a zo eat da anaoun, abalamour dezho da c'hellout en em zislea dirac Doue.»

### **87. An amzeriou diveza araoc donedigez hor zalver.**

Goude maro Judas, he vreudeur en em lakeas e penn ar bobl an eil goude egile, hag a c'hounezas ive victorieu braz. Mes ar re a deuas var ho lerc'h ne ouent ket heñvel outho : lakaat a rejont ar bobl, dre ar scouer fall a roënt dezhan, da goueza en dizurs hag en direolamant. Evelato ar iuzevien a anaveze bepret ar guir Doue ; mes n'her servichent mui a galoun ha gant carantez. An daou rummad-tud a zavas en ho zouez, ar Pharizianet hag ar Saduceanet, a beur-gollas ar bobl, en eur lamet euz he galoun kement pleg mad a c'helle beza chomet c'hoaz enni. Ar pharizianet o devoa doare da gaout calz a relijion, mes n'o devoa nemet an doare : en diabarz oant disheñvel-braz dioc'h ar pez ma'z oant a ziañveaz. Ar saduceanet n'o devoa tamm feiz ebet, hag a rea faë var an oll guirioneziou euz ar relijion.



En oll broïou all euz an douar ec'h adoret doueou faoz, hag e vevet e creiz an dizursiou ar re vezussa: calounou ar baïanet a ioa brein-tuf gant ar pec'het vil. E kement corn a ioa er bed ez oa eta ezom braz euz ar Messias.

Peb tra a ioa prest evit he zonedigez. An diveza euz ar brophetet en devoa lavaret gant joa: «abarz nemeur ama e teui an Hini m'o peuz kement a vall da velet o tont.» Ne vanke mui nemet eun dra, nemet ma vije deuet da vir ar pez en devoa lavaret Jacob d'he vab Juda. An dra-ze a erruas eb dale. Ar re a ioa e penn ar bobl, abaoe Judas hag he vreudeur, a veze ato e brezel an eil ouz egile. Betec ar breudeur ho unan en em dage hag en em laze aveichou. Evit lakaat ar peoc'h entrezho, e c'halyjont ar Roumenet, o devoa neuze enr c'balloud eb he far dre ar bed oll. Ar re-ma, eur veich digouezet er vro, a reas ho mistri, hag a lakeas da roue eun divroad, he hano Herodes. Brema eta n'edo mui ar stur gant lignez Juda, ha setu deuet ar mare ma tlie beza digasset an Hini m'edot var c'hed anezhan abaoe keit all a amzer,

**hor Zalver Jesus-Krist,**  
meulet ha benniget ra vezo da virviken!





## HISTOR AN TESTAMANT NEVEZ.



KENTA LODEN.

HISTOR HOR ZALVER JESUS-KRIST.

KENTA PENNAD.

*Ginivelez ha bugaleach ar Mabic Jesus.*


1. Eun eal a deu da lavaret da Zakarias e vezo tad da s. Ian-Vadezour.

En amzer ar roue Herodes, e veve e creiz menéziou ar Judee eur belec santel, he hano Zakarias. Ar belec-se en devoa evit pried eur vaouez a zoujans Doue eveldhan, hanvet Elizabeth. Coz oant dija ho daou, ha n'o devoa ket a vugale. Aliez coulsgoude o devoa pedet an Aotrou Doue da rei dezho eur mab; mes evit c'hoaz ho feden n'oa ket bet selaouet.

Hogen, dont a reas tro Zakarias da ober ar zervich var dro an templ a Jerusalem. Eun dervez eta m'edo el leac'h santel oc'h ezansi dirac an aoter, epad m'edo ar bobl o pedi er meaz, e oue spountet oll o velet, pa zonje nebeuta,

eun eal en he gichen, en tu deou d'an aoter. Mes an eal a lavaras dezhan : «n'o pezet aoun ebet, Zakarias ; ho peden a zo bet selaouet : ho pried Elizabeth e devezo eur mab da behini e rooc'h an hano a lan. Ar mab-se a lakañ ho ealoun da zridal gant ar joa, hag he e'hinivelez a rañ plijadur da galz a dud. Rac eun den santel e vezo,

ha lakaat a rañ eun ni-verbraz euz a vugale Israël da zistreñ ous Doue.» Mes Zakarias, o sonjal peger coz oa, heñ hag he bried, en devoue beac'h o credi ar pez



a lavaret dezhan. Neuze an eal a gomzas outhan evel-hen : «me eo an eal Gabriel a vez ato em za dirac tron an Aotrou Doue, hag am euz bet urs da zont da zigass deoc'h ar c'helou eüruz-se. Mes abalamour n'o peuz ket bet a fisians aouale'h em c'homzou, c'houi a jomo mut brema ken na deui da veza guir ar pez am euz lavaret deoc'h.» Var gement-se an eal a zisparissas, hag adalec neuze Zakarias a deuas da veza mut.

**2. An eal Gabriel a zisken adarre euz an env da lavaret d'ar Verc'hez Vari e vezo mamm da Jesus.**

Abenn c'houec'h miz goude, an eal Gabriel a oue casset da Nazareth, kear vihan euz ar Galilee, da di eur vere'hez a ioa Mari he hano, hag a ziskenne euz a ligned ar roue David. Ar vere'hez-se a ioa paour a vadou an douar, mes pinvidie-braz oa dirac Doue abalamour d'he zantelez. Dimezet oa da eun den a zoujans Doue, hanvet Joseph. Hema a ioa eur e'halvez paour, hag a ziskenne ive euz a ligned

David ; Eun dervez m'edo ar Verc'hez Vari o pedi he unan en he c'hambr, an eal Gabriel en em ziscouezas dirazhi, en eur lavaret : « me ho salud, o c'houi a zo leun a c'bras ; an Aotrou Doue a zo ganeoc'h ; benniget oc'h dreist an oll gragez. » Ar Verc'hez a oue nec'het o clevet ar c'hom-



zou-ze, ha ne c'houie ket petra da zonzjal var gement-se. Mes an eal a lavaras dezhi : « n'o pezet aoun ebet, Mari ; rac cavet oc'h euz gras dirac an Aotrou Doue. Dont a ran da lavaret deoc'h e conceived

hag e lakeoc'h er bed eur mab da behini e rooc'h an hano a Jesus. Ar mab-se n'en devezo ket he bar, ha galvet e vezo mab an Hini a zo dreist peb tra. An Aotrou Doue a roïo dezhan tron David, he dad, ha ren a raïo da virviker, e ti Jacob. » Neuze Mari a lavaras d'an eal : « pe-naoz e c'hello an dra-ze dont da vir ? Rac me ne vevan gant va fried nemet evel eur c'hoar gant he breur. » Hag an eal a respountas : « ar Speret-Santel a zickenno var-noc'h, hag an Hini a zo dreist peb tra a c'holoïo ac'hano-c'h gant ar skeud euz he c'halloud. Setu perac ar frouez santel ! a lakeoc'h er bed a vezo galvet Mab Doue. Setu Elizabeth, ho kiniterv, e deuz ive, hag hi coz dija, concevet eur mab hag a deui er bed abenn tri miz ama ; rac n'ez euz netra dreist oll-galloud Doue. » Mari a lavaras neuze erfin : « ne zervichan ken mestr nemet Doue ; ra vezo great eta he volontez e keñver he zervicherez. » Var gement-se an eal a zisparissas.

En eul levr euz an testamant coz oa merket e vije ene ar Verc'hez caër ha flamm a bep hent. Mari a zo eta ar scouer euz an oll vertuziou. Dre ma'z eo mamm d'hor zalver, eo deuet ive da veza hor mamm-ni. Hor ganet e deuz d'ar vuez eüruz euz ar bed all, e leac'h Eva n'e devoa roët deomp nemet ar vuez poaniuz euz ar bed-ma. Euz ar Verc'hez Vari eo e comze an Aotrou Doue d'hon tud kenta, pa lavare dezho e tlie ar vaouez flastra he benn d'ar zarpant.

### 3. Mari a ia da velet Elizabeth.

Goude m'oa eat an eal kuit, Mari a ieas ractal a-dreuz ar menezioù da velet he c'hiniterv Elizabeth. Houma, kerkent ha m'he c'hlevas o tont en he zi, a lavaras a vouez huel : (ar Speret-Santel eo he lakea da gomz evelse) : « benniget oc'h dreist an oll gragez, ha benniget eo ar frouez a zoug. Euz a beleac'h e teu dinn-me an henor hag an eur-vad-ma, ma plij gant mamm va Doue dont d'am gue-

let? Na c'houi zo eüruz da veza credet e teui da vir ar pez a zo bet discleriet deoc'h a berz

Doue ! »  
Neuze Mari a lavaras d'he zro,



(ar pez a zo ama varlerc'h eo ar *Magnificat* e brezounec) : « va ene a ro gloar ha meuleudi da Zoue, ha va c'haloun a zrid gant ar joa o sonjal er pez en deuz great em c'heñ-ver va Doue ha va zalver. Rac, pegen dister bennac ma'z oun, eo plijet ganthan sellet ouz he zervicherez, ha setu hiviziken an oll boblou euz an douar am galvo eüruz. Ia,

an Hini a zo oll-c'halloudec hag oll-zantel en deuz great traou burzuduz em c'heñver. Evelse en deuz roët a bep amzer merkou euz he drugarez d'ar re a veve en he zoujans. Meur a veich en deuz discouezet an nerz euz he zivreac'h, ha casset da netra sonjou an dud ourgouilluz. Discaret en deuz divar ho zron ar re a ioa braz ho galloud, hag ar re n'o doa doare a netra en deuz savet huel. Carget en deuz a vadou ar re a ioa o tua gant an naoun, hag ar re o devoa danvez eleiz en deuz lakeat var ar zeac'h. Kemeret en deuz erfin truez ouz Israël, he zervicher, hervez ar bromessa trugarezuz en doa great gueic'h all da Abraham ha d'he vugale a rumm da rumm.»

Mari a jomas var dro tri miz e ti Elizabeth, ha goudeze e tistroas d'he c'hear, da Nazareth.

#### 4. Ginivelez S. Ian Vadezour.

Pa oue deuet an termen, Zakarias hag Elizabeth o devoue ar mab a ioa bet lavaret dezho o devije. Ho c'herent hag ho amezeien a gemere perz en ho joa, hag o devoa c'hoant e vije roët d'ar bugel hano he dad. Mes Elizabeth ne felle ket dezhi, hag a lavare ato : « nan, nan, Ian a vezo he hano. » — « Mes, eme ar re all, n'euz nicun euz ho kerent hag a zougfe eun hevelep hano. » Neuze e oue goulennet oc'h Zakarias peseurt hano en doa c'hoant a vije roët d'he vab. Zakarias a ioa ato mut; mes ober a reas sin da zigass dezhan eun tamm scilent, hag e scrivas var c'horre an tamm scilent-se : « Ian eo he hano. » Kerkent e c'hellas manea he deod kercoulz ha biscoaz, hag e teuas ar prezec dezhan adarre. An oll a oue estlamm et velet kement all, hag a lavaras : « petra deui eta ar bugel-ze da veza? Anad eo ema dorn Doue varnezhan. » Neuze Zakarias, he ene leun euz a sclerijen ar Speret-Santel, a lavaras : « benniget ra vezo an Aotrou, Doue Israël, abalamour m'eo plijet ganthan dont da velet ha da brena he bobl, hervez ar bromessa en deuz great meur a veich dre c'hinou ar brophetet! » Goudeze e comzas evel-hen ouz he vab : « ha c'houi, va mab, emezhan,

c'houi a vezo galvet prophet an Hini a zo dreist peb tra ; rac kerzet a reoc'h araoc an Aotrou Doue evit dressa ha compeza an henchou dirazhan, hag evit deski d'he vobl an tu da veza salvet ha da obten ar pardoun euz he bec'hejou.» Ar brud euz ar burzudou-ze a ieas dre oll veneziou ar Judee, ha kement hini a gleve hano anezho ho gorroë gant respet e goueled he galoun. Coulskoude ar bugel a greske en oad, ha, dre ma creske he gorf, e creske ive he speret hag he furnez. Eu em denna a reas abred en eul leac'h gouez ha distro, ha chom a reas eno ken na deuas ar mare evithan d'en em lakaat da brezec ar binijen d'ar bobl a Israël.

Ar prophet Malachias en devoa roët da anaout a betra e vije carget S. Iau Vadezour, p'en devoa lavaret a berz Doue : *«me gasso va eal da zressa an hent dirazon»*.

### 5. Ginivelez hor zalver Jesus-Krist.

4000 bloaz goude m'oa bet crouët Adam.

Doue a roas ive da anaout da S. Joseph petra a ioa c'hoarvezet gant ar Verc'hez Vari. Eun eal a deuas d'he gaout hag a lavaras dezhan : «Joseph, mab da Zavid, n'o pezet ket aoun o telc'her Mari ganeoc'h. Dre vertus ar Speret-Santel eo e deuet da veza mamm. Reï a reoc'h d'he mab an hano a Jesus, ar pez a zinifi salver ; rac heñ eo a zavetaïo ar bobl a Israël, hag a lamo divarnhan ar beac'h euz he bec'hejou.»

Nebeut amzer goude, an impalaër August a falvezas dezhan gouzout pet den a ioa en he rouantelez. Reï a reas eta urs d'he oll zujidi da vont da lakaat ho hano var ar rollou a vije digoret evit kement-se ebarz er c'heariou. Mes peb hini a renke mont da lakaat he hano d'ar gear a behini, pe, divar dro pehini oa deuet ar vouenn anezhan. Joseph ha Mari, o veza euz a lignez David, a dlie eta dont da Vethleem da lakaat ho hano ; rac e Bethleem eo e oa ganet ar roue David. Hogen, kement a dud a ioa dija digouezet er gear-ze, pa erruas ennhi Joseph ha Mari, ma ne gavas ar re-ma plas ebet en hostaliriou. Red e oue dezho mont da loja en eur c'hraou dirapar, e kichen

kear. Er c'hraou-ze, e creiz an noz, eo e teuas er bed hor zalver Jesus-Krist, guir Vab Doue. Mari, mamm ha guerc'hez, he c'haloun o tridal gant eur joa zantel, a vailluras he mab hag hen lakeas da c'hourvez var ar c'holo.

Deuet oa da vir ar pez en devoa lavaret ar prophet Michee: «ha te, Bethleem, emezhan, te eo, evit guir, ar vihanna euz a geariou Juda; mes ac'hanoud-te eo e teuio salver Israël, an Hini a zo ganet en eñv a oll-viscoaz.» Jesus n'en deuz evit guele nemet ar c'holo; Moizes, pehini a verke gueich all hor zalver Jesus-Krist, a ioa bet lakeat ive da c'hourvez en eur baner etouez ar c'horz.

### 6. Ar Bastoret o tont d'ar c'hraou.

Epad an noz eüruz-se ma c'hanas hor zalver Jesus-Krist, ez oa pastoret o tivoal ho loanet var ar meaz, tost da Vethleem. Ha setu, e creiz an noz, eun eal d'en em ziscouez e kichen ar bastoret-ze, hag eur sclerijen gaër o



para en dro dezho. Hag hi da gemeret aoun ken na grenent. Mes an eal a lavaras dezho: «n'o pezet aoun ebet; rac dont a ran da zigass deoc'h eur c'helou a joa: ganet ez euz evidoc'h hirio eur zalver e kear David. Ha setu ama penaoz ec'h anavezoc'h anezhan: caout a



reoc'h eur bugel mailluret ha gourvezet en eur c'hraou.» Kerkent eur maread elez all a unissas ho moueziou gant hini an eal-ma, evit meuli Doue, en eur lavaret: «gloar da Zoue e barr an eñvou, ha peoc'h var an douar d'an dud a volonteze vad!»

Pa oue eat an elez kuit, ar bastoret a lavaraz an eil d'egile: «deomp da Vethleem da velet ar pez zo c'hoarvezet eno a nevez, hervez ar c'helou digasset deomp gant an Aotrou Doue.» Mont a rejont eta d'ar c'hraou, tiz varnho, hag e cavhont ar Mabic Jesus gourvezet var ar c'holo.



Counta a rejont da Vari ha da Joseph ar pez o doa clevet divar benn ar bugel-ze, ha, goude beza he adoret gant an devotion an tenerra, e tistrojont d'ar gear en eur rei gloar ha meueudi da Zoue.

Eiz dervez goude, e oue circonciset ar bugel, hag e oue roët dezhan an hano a Jesus.

## 7. An tri roue euz ar zao-heol.

Goude eta m'oa ganet Jesus e Bethleem, prinset euz a gostez ar zao-heol a erruas e Jerusalem en eur lavaret : «e peleac'h ema ar roue zo nevez ganet d'ar iuzevien ? Rac guelel or beuz he stereden e costez ar zao-heol, ha ractal oump deuet d'he adori.» O veza clevet menec a gement-se, ar roue Herodes a oue nec'het-braz, ha tud Jerusalem ken nec'het hag heñ. Herodes a c'halvas d'he balez prinset ar veleien hag an doctoret euz al lezen, evit goulenn digantho e peleac'h e thie genel ar C'hrist pe ar



Messias. N'o devoue nemet eur vouez evit respount e thie genel e Bethleem, var douar Juda. «Rac, emezho, scrivet eo e levr ar prophet Michee: ha c'houi, Bethleem, douar Juda, n'e ket c'houi eo an disterra euz a geariou Juda; rac ae'hanoc'h-hu eo e teuio an hini a dle ren Israël, va fobl.»

Neuze Herodes a gassas dre guz kemennadurez d'an

tri roue euz ar zao-heol da zont d'he gaout, hag a lavaraz dezho : « it ha claskit mad ar bugel-ze, ha p'o pezo he gavet, deuit d'hel lavaret dinn evit ma'z inn ive d'he adori.» Setu eta an tri brins divroad o vont adarre en hent, ha kerkent ar stereden o doa guelet e costez ar zao-heol en em lakeas da gerzet adarre en ho raoc, ken na jomas a za azioc'h ar c'hraou el leac'h m'edo ar c'hrouadur a glaskent. An tri roue, o veza eat er c'hraou-ze, a gavas eno ar Mabic Jesus gant ar Verc'hez Vari, he vamm, ha gant S. Joseph. En em strinka a rejont ractal d'an douar evit he adori. Goudeze e tispakjont an traou a briz a ioa deuet gantho euz ho bro, hag e rojont dezhan aour, ezans ha mirrh, evit discouez hen anaïent evit ho roue, ho Doue hag ho zalver.

En noz varlerc'h e oue kemennet dezho, a berz Doue, arabad oa mont mui da gaout Herodes ; kemeret a rejont eta eun hent all evit distrei d'ho bro.

Rouanet a ziañveaz-bro a ioa deuet ive gueich all da velet Salomon, hag o doa ive kinniget dezhan traou caër evit he henori, ha discouez ar stat a reant anezhan. An henor-ze great d'ar roue Salomon gueich all a ioa eur merk euz an hini a dlie beza great d'hor zalver Jesus-Krist. — Eur stereden hor c'hass, ni ive, betec Jesus. Ar stereden-ze eo ar sclerijen euz ar c'hras a deu da scleraat hor sperejou ha da domma hor c'halounou. Ar stereden-ze eo c'hoaz comzou Doue, prezeget deomp gant ar guir Ilis.

### 8. Ar Mabic Jesus casset d'an templ.

Daou-ugent dervez goude m'oa ganet hor zalver Jesus-Krist, Mari ha Joseph her c'hassas d'an templ evit he ginnig da Zoue, hag evit rei evithan ar prof a dlie ar beorien da rei hervez al lezen, da lavaret eo, eur c'houblad turzunellet.

Bez' ez oa neuze e Jerusalem eun den a zoujans Doue, he hano Simeon. An den-ze a ioa ato var c'hed euz a zonedigez hor zalver; rac ar Speret-Santel en doa roët dezhan da anaout en devije an eur da velet ar Messias abarz mervel. P'edo eta Mari ha Joseph oc'h erruout en templ gant ar Mabic Jesus, Simeon a ioa eno ; ha kerkent, he speret sclerijennet gant ar Speret-Santel, e kemas



ar bugel euz a-dre ho daouarn hag her briatas gant carantez. Ha goudeze e trugarekeas Doue, en eur lavaret : « brema, o va Doue, e c'hell ho servicher mervel e peoc'h, p'en deuz bet an eur da velet ar zalver o peuz digasset var an douar evit beza sclerijen ar boblou païan ha gloar ar bobl a Israël. » Simeon a roas ive he vennoz da Joseph ha da Vari, hag a lavaras d'ar Verc'hez : « ar bugel-ma a vezo kiriec da galz a dud d'en em goll dre ho dallentez ; mes rei a raio ive tro da galz a re all da zistrei ons Doue ha d'en em zavetei. En despet d'ar burzudou a raï, eleiz a euebourien a zavo en he enep, ha c'houi oc'h uvan a vezo treuzet ho caloun gant eur c'hleze a c'hlac'har. »

D'ar mare-ze, ez oa ive e Jerusalem eun intañvez santel, he hano Anna. An intañvez-se a ioa oajet a bevar bloaz ha pevar-ugent, ha ne denne penn euz an templ. Na noz, na deiz, ne ehane da bedi, hag ouspenn-ze e iune bemdez. Ar vaouez-se a erruas ive var al leac'h p'edo Mari ha Joseph o tigass ar Mabic Jesus d'an templ. Ractal ec'h anavezas evit he zalver ar bugel a zougent,

ha goudeze e comze anezhan da gement hini a ioa var c'hed euz a zonedigez ar Messias.

### 9. Ar Mabic Jesus casset d'an Ejipt.

Herodes, o velet ne zistroë ket d'he gaout an tri roue euz ar zao-heol, a ieas eun drouc braz ennhan, hag a roas urs da laza an oll vugale vihan a ioa e Bethleem ha tro var dro betec an oad a zaou vloaz. Sonjal a rea e c'helje evelse lamet he vuez digant ar Mabic Jesus. Mes eun eal a deuas da gaout Joseph hag a lavaras dezhan dre he gousk :

« savit, kemerit ar bugel hag he vamm, ha te-  
c'hit gantho d'an Ejipt; ha chomit eno ken na livirinn deoc'h. Rac Herodes a zo o clask ar bugel evit hel lakaat d'ar maro.»



Joseph a zentas

eb lavaret ger: kemeret a reas ar bugel hag he vamm fenez, hag ec'h en em dennas gantho en Ejipt.

Kerkent e teuas bourrevien Herodes da Vethleem. Diframma a rejont ar vugaligou vihan euz a-dre daouarn ho mammou, hag ho laza a reant eb damant ebet d'ho oad. E kement corn a ioa er vro ne glevet nemet hirvoud ha goëlvann. Abenn eur bloaz bennac goude, Herodes a varvas ive e creiz poaniou ker braz ma'z oa eur scrij hag eun euz he velet. Neuze eun eal a deuas adarre da gaout Joseph, hag a lavaras dezhan: «savit, kemerit ar bugel hag he vamm, ha distroït da vro Israël; rac maro eo



brema ar re a glasse lamet he vuez digant ar bugel.» Joseph a zavas, a gemeras ar bugel hag he vamm, hag a zistroas gantho da vro Israël, e pe-leac'h ez eas da jom da gear Nazareth, e Galilee.

Ar Mabic Jesus, salver ar bed oll, a zo saveteet dre viracl. Evelse ive Moizes, salver ar bobl a Israël gueich all, a ioa bet saveteet he vuez dezhan en eur feson burzuduz ebarz en Ejipt.

### 10. Ar Mabic Jesus en templ.

Mari ha Joseph a iea hep bloaz da Jerusalem da c'houeliou Pask. Ar mabic Jesus a i eas gantho d'an oad a zaouzec vloaz. Da fin ar goueliou, Mari ha Joseph a zistroas d'ar gear; mes ar Mabic Jesus a jomas e Jerusalem eb gouzout dare dezho. Credi a reant edo gant unan bennac euz ho c'houmpagnunez, ha dija o devoa great eun dervez bale pa remerkjont n'edo ket. Neuze ec'h en em lakejont da c'houlenn hano anezhan digant ho c'herent hag ho anaoudeien, hag, o veza ne glevent menec ebet, e teujont var ho c'hiz da Jerusalem, ho speret nec'het braz. Goude beza he glasket, epad tri dervez, e kement corn a ioa e kear, e cavcbont anezhan erfin ebarz en templ. Edo eno, azezet e creiz an doctoret, oc'h ho zelaou hag oc'h ober ive goulennou dezho. Kement hini her c'hleve a ioa souezet o velet he skiant hag he furnez. He vamm a lavaras dezhan neuze: «va mab, perac o peuz great kement all deomp? Ho tad ha me a ioa nec'het-mar o clask ac'hanoc'h.» Mes Jesus a respountas



gant eur vouez dous: «perac clask ac'hanon? Ha ne c'houñac'h-hu ket e tlean implija va amzer er pez a zell ouz va Zad pehini zo en eñv?» Evelato distrei a reas dioc'htu goudeze da Nazareth gant ar Verc'hez Vari ha S. Joseph. Eno e sente ouz ar re-ma, hag e creske bemedez en oad, e furnez hag e gras dirac Doue ha dirac an dud.

O teuler evez ouz ar pez a lavare an doctoret en templ, ar Mabic Jesus en deuz roët d'an dud iaouank eur scouer euz ar re gaëra.

#### EIL PENNAD.

*Jesus-Krist oc'h en em ziscouez d'ar bed.*

#### II. Ian Vadezour o prezec, hag o vadezi.

Jesus, guir Vab Doue, en devoa bevet var dro tregont vloaz e Nazareth, eb beza anavezet evit ar pez ma'z oa. Tostaat a rea ar mare ma thie en em ziscouez d'ar bed hag en em rei da anaout evit ar Messias. Setu perac an



Aotrou Doue a roas urs da Ian, a ioa ato o veva en eul leac'h gouez ha distro, da zont da brezec ar binijen d'ar bobl a Israël, evit hel lakaat e stat da zigemeret he zalver evel ma'z oa dleet. Ian-Vadezour a zentas ous mouez an



Aotrou Doue, hag a deuas ractal da brezec var dro ster ar Jourden. N'en devoa ken dillad nemet eur zaë hir great gant bleo cañval, hag eur c'houriz ler en dro d'he ziou groazel;

ha ne zebre nemet killeien-raden, hag ar mel a gave er guez cleuz e creiz ar c'hoajou. Hogen, sevel a rea he vouez en eur lavaret: «grit pinijen; rac ema erru rouantelez an eñv» Euz a Jerusalem hag euz a gement corn a ioa er Judee e tirede tud d'he gaout en eur anzaio ho fec'hejou. Ian ho badeze oll e dour ar Jourden. Calz Pharizianet ha Saduceanet a deuas ive d'he zelaou. Ian a gomzas rust outho: «tud savet divar aëret-viber, emezhan, pion en deuz desket deoc'h tee'het araoc buanegez Doue, ha caout aoun rac he varnedigez? Grit eta eur binijen vad, ha ne d'it ket da lavaret: ni zo bugale da Abraham. Rac me lavar deoc'h: Doue a e'hell, pa garo, lakaat bugale da Abraham da zével euz ar vein a zo ama. Divoallit! Dremm ar vouc'hal a zo dija var griziou ar vezen. Kement guezhen ne zougo ket a frouez mad a vezo trouc'het ha stlapet en tan.»

Ian-Vadezour a brezege gant kement a nerz ma sonje da veur a hini oa heñ ar Messias. Mes he unan e lavaras n'oa ket: «nan, emezhan, n'e ket me eo ar C'hrist. Mes



bez' ez euz  
en ho touez  
eun all hag  
a zo gallou-  
dussoc'h  
evidon, eun  
all ha n'oun  
ket din, me,  
da zilassá  
dezhan he  
voutou. Me  
a vadez  
ac'hanoc'h  
gant dour,  
mes hennez  
ho padezo



dre an tan hag ar Speret-Santel. Ar c'hrouër a zo ganthan  
en he zorn evit nizat an ed a zo var he leur; ar greun  
mad a zastumo en he c'hriñol; mes ar re fall hag ar  
c'holo a daolo da zevi en eun tan ha ne vougo biken.»

## 12. Jesus badezet gant S. Ian, ha tentet goudeze gant an diaoul.

Jesus-Krist a deuas ive da gaout Ian var ribl ar Jour-  
den evit beza badezet ganthan. Mes Ian a argile dre respet  
evit he Vestr hag he zalver, hag a lavare: «c'houi eo  
a dleffe va badezi-me, hag e fell deoc'h beza badezet  
ganeñ!» Mes Jesus a respontas: «list ac'hanon da ober  
ar pezh am euz c'hoant; red e deomp rei scouer vad d'ar  
re all e peb hent.» Neuze Ian ne varc'hatas mui, hag a  
vadezas hor zalver. Ha setu kerkent an eñv o tigeri, hag  
ar Speret-Santel o tisken var benn Jesus a zindan furm  
eur goulm. Er memes amzer e oue clevet eur vouez o  
tont dioc'h an eñv, hag ar vouez-se a lavare; «Hema eo  
va Mab muia caret e pehini em euz lakeat va oll flijadur.»

Goude beza bet badezet gant S. Ian, Jesus a oue casset  
gant ar Speret-Santel da eul leac'h gouez ha distro evit  
beza tentet gant an diaoul. Tremen a reas eno daou-ugent



dervez ha daou-ugent nozvez eb dibri tamm, hag erfin e teuas naoun dezhan. Neuze an diaoul a dosteas outhan en eur lavaret: «mar d'oc'h Mab da Zoue, n'o peuz nemet ober bara euz ar vein a zo aze.» Mes Jesus a respontas: «scrivet eo: an den ne vev ket ebken gant bara; comzou Doue a zo ive eur vagadurez hag a zo red dezhan da gaout.» Satan n'hen lezas ket e peoc'h evit kement-se, mes hen tenti a reas evit an eil gueich. Her c'hass a reas ganthan da Jerusalem, var lein an templ, hag eno e lavaras dezhan: «mar d'oc'h Mab da Zoue, en em daolit ac'hann d'an traoñ; rac scrivet eo: Doue en deuz roët d'he elez ar garg d'ho tivoal, hag hi a gemero ac'hanoc'h etre ho daouarn gant àoun na deuffe ho treïd da steki ouz eur meañ bennac.» Mes Jesus a respontas: «scrivet eo ive: ne dentoc'h ket an Aotrou, ho Toue!» Couls goude an diaoul n'hen lezas ket c'hoaz e peoc'h, hag hen tentas evit an drede gueich. He gass a reas en dro-ma var geru eur menez huel; ac'hano e tiscouezas dezhan oll rouanteleziou ar bed gant an trao

caër a ioa ennho, ha neuze e lavaras : « setu aze petra'm euz da rei deoc'h, mar kirit en em strinka d'an douar dirazon evit va adori.» O clevet ar c'homzou-ze, Jesus a ieas eur vuanegez santel ennhian, hag a respountas : « kea kuit, Satan; rac skrivet eo : adori a reoc'h an Aotrou, ho Toue, ha ne zervichoc'h nemethan ebken.» Neuze an drouc-speret hen lezas e peoc'h, ha kerkent e teuas elez euz an eñv da zigass dezhan ar pezh en doa ezom.

Ebarz en diluch, an dour a roas ar maro d'an dud oll; ebarz er vadiziant, an dour a ro dezho eur vuez nevez.

### 13. Jesus, Oan Doue

Jesus a zistroas d'ar vro, el leac'h m'edo Ian o vadezi. Ian-Vadezour, oc'h he velet o tont, a lavaras a vouez huel : « setu a-hont Oan Doue a lam pec'hejou ar bed ! Henez eo an hini m'am euz lavaret divar he benn : dont a rañ unan var va lere'h hag a ioa em raoc-me. Me ro testeni eo henez Mab da Zoue; rac gulet em euz ar Speret-Santel o tisken hag o chom varnhan a zindan furn eur goulm.»

El lezen goz e veze kinniget bemdez eun oan da Zoue var aoter ar sacrificou. Jesus-Krist eo an oan a vez kinniget da Zoue el lezen nevez : goude beza bet lakeat d'ar maro var menez Calvar, e kendalc'h d'en em ginnig bemdez da Zoue he Dad, er sacrificis santel euz an oferen, evit obten d'an dud pardoun ha trugarez.

### 14. Kenta diskibien hor Zalver Jesus-Krist.

Antronoz, Jesus a zistroas var ribl ar Jourden, ha daou euz a ziskibien Ian a ieas d'he heul. Jesus a c'houlennas outho : « petra glaskit ? » Hag hi a respountas : « Mestr, e pelec'h emaoch o chom ? » Neuze Jesus a lavaras dezho : « deuit ganeñ hag e veloc'h. » Mont a rejont, ar joa en ho c'haloun, ha chom a rejont ganthan hed an deiz. An daou ziskib-se a ioa ho hano Andre ha Ian. Andre a ieas goudeze da glask he vreur Simon, hag a lavaras dezhan :

«cavet or beuz ar Messias!» Ha ractal her c'hassas da gaout Jesus. Jesus hen digemeras en eur lavaret: «c'houi eo Simon, mab Jonas; mad! hiviziken c'houi a vezo galvet Per.»

An dervez varlerc'h, Jesus a gavas Philip, hag a lavaras dezhan: «deuit d'am heul.» Hogen, Philip en devoa eur breur, he hano Nathanaël, hag a ioa eun den a zoujans Doue eveldhan. Mont a reas d'he glask, hag, o veza he gavet a zindan eur vezen fiez, e lavaras gant joa: «cavet or beuz an hini m'o deuz Moïzes hag ar brophetet comzet anezhan. Ar zalver-ze or boa kement a vall da velet o tont, eo Jesus, mab da Joseph, euz a Nazareth.» Mes Nathanaël a respountas: «daoust hag e c'hell eun dra bennac a vad dont euz a Nazareth?» — «Deuz, eme Philip, hag e veli.»

Jesus, o veza remerket Nathanaël o tont varzu ennhian, a lavaras: «setu aze eur guir vab da Israël, eun den ha n'euz ket a droïdellerez oc'h he heul.» Nathanaël a glevas ar c'homzou-ze, hag a c'houlennas ouz hor zalver gant eun ear souezet: «penaoz ec'h anavezit-hu ac'hannon-me?» — «Me, eme Jesus, am euz ho cuelet araoc m'oc'h bet galvet gant Philip, p'edoc'h c'hoaz a zindan ar vezen fiez.» Neuze Nathanaël a lavaras gant an doujans ar vrasa: «Mestr, c'houi zo Mab da Zoue, c'houi eo roue Israël.» Ha Jesus a respountas: «credi a rit abalamour ma'm euz lavaret deoc'h em euz ho cuelet a zindan ar vezen fiez. Test e vioc'h a draou all calz burzudussoc'h.»

Nathanaël en doa c'hoaz eun hano all; Barthelemi a veze great ive anezhan.

### 15. Eured Cana.

Tri dervez goude m'oa bet galvet Philip da veza abostol, ez oa eun eured e bourg Cana, e Galilee. Mari, Jesus, hag he ziskibien, a ioa bet pedet da vont d'ar banket. Epad m'edo an dud oc'h taol, e teuas ar guin da vankout. Neuze Mari a lavaras da Jesus: «n'euz mui a vin.» Mes

Jesus a respountas : « va heur n'e ket deuet c'hoaz.»  
Mari a anavezaz dre ar c'homzou-ze petra a raje he mab  
pa vije deuet he heur. Lavaret a reas eta d'ar zerviche-  
rien : « grit ar pez a lavaro deoc'h.»

Hogen, bez' ez oa eno c'houec'h pod mean hâg a iea  
meur a litrad e peb hini anezho. Jesus a lavaraz d'ar  
zervicherien : « cargit ar podou-ze a zour.» Hen ober a



rejoint ractal. Neuze Jesus a lavaraz adarre : « discargit  
ar podou-ze e boutailloù, ha cassit ar re-ma d'an hini a  
zo carget euz ar guin.» Ar zervicherien a zentas evel an  
dro genta. An hini a ioa carget euz ar guin, o veza tan-  
veat an dour a ioa bet lakeat er boutailloù-ze, hag a ioa  
chenchet oll e guin, a oue souezet braz. Gervel a reas ar  
goaz nevez d'he gaout, hag e lavaraz dezhan : « peur-vuïa  
e vez servichet ar guin mad da genta, ha goudeze, p'o  
deuz an dud evet dija leiz ho c'hof, e vez servichet hini  
disterroc'h. Mes c'houi n'o peuz ket great evelse ; c'houi

o peuz miret ar guin guella evit ar fin.» Setu aze ar miracl kenta a reas hor zalver. Kement hini a oue test euz ar miracl-se a gredas oa e guirionez Mab da Zoue.

Jesus a iegas d'ar banket-eured-se evit santifia ar briedez. — Ar guin chenchet e goad hor zalver, er sacrifis santel euz an oferen, a zo eun dra burzudussoc'h c'hoaz eget an dour chenchet e guin en eured Cana e Galilee.

### TREDE PENNAD.

*Ar blavez kenta m'ac'h en em lakeas Jesus-Krist da brezec.*

#### 16. Gant pebez nerz ec'h en em zav a enep ar re a vanke a respet d'an templ.

Tostaat a rea goueliou Pask, ha Jesus a iegas da Jerusalem da dremen ar goueliou-ze. Caout a reas e porz an templ a bep seurt marc'hadourien, marc'hadourien ejennet, deñvet ha coulmet, ha tud all alcodet ous taoliou a ioa mouniz varnho da rei d'ar varc'hadourien pe d'ar brenerien, p'o devije ezom. O velet kement-se, ez eas eur vuanegez santel enghan: ober a reas eur fouet gant pennadou kerdinn, ha ractal e cassas kuit an oll varc'hadourien gant



ho loanet, hag e pilas d'an douar taoliou ar re a ioa o kinnig mouniz, gant an arc'hant a ioa var ho gorre. Lavaret a rea d'ar re a ioa o verza coulmet: «cassit an traou-ze

ac'hann, ha ne d'it ket da ober eur c'hoc'hi euz a di va Zad». Den ne gredede herpel outhan, hag eb dale e oue

goulloù ar porz, ha ne oue mui trouz ebet ennhan. Ar iuzevien a ioa chomet eno e kichen a lavaras neuze da Jesus : «penaoz e c'helloc'h-hu discouez deomp-ni o peuz guir da ober ar pez o peuz great aze?» Jesus a respountas, en eur goniz anezhan he unan : «setu ama ar merk a roïnn deoc'h : dismantrit an templ-ma, mar kirit, ha me her savo a nevez abenn tri dervez.» Ar iuzevien, o credi e comze euz an templ great gant mein, a lavaras dezhan adarre : «petra! c'houec'h vloaz ha daou-ugent zo bet lakeat da zevel an templ-se, ha c'houi her saffe a nevez e tri dervez!» Mes n'e ket euz an templ-se eo en doa comzet hor zalver; euz he gorf he unan oa. — Epad m'edo Jesus e Jerusalem, e mare goueliou Pask, e reas c'hoaz meur a viracl, ha calz tud a gredas ennhan.

#### 17. Nicodem kelennet gant Jesus.

Unan euz ar pennou braz euz a gear, he hano Nicodem, a deuas da gaout hor zalver en noz, hag a lavaras dezhan : «me c'hoar oc'h deuet a berz Doue d'hor c'helen; rac den ne c'helfe ober ar burzudou a rit, ma na ve ket Doue ganthan.» Nicodem en doa c'hoant da c'houzout penaoz e c'helje en em zavetei. Hogen, Jesus a lavaras dezhan : «e guirionez, e guirionez m'hel lavar deoc'h, den ne c'hell mont da rouantelez an eñv nemet en eur c'henedel a nevez dre an dour hag ar Speret-Santel. Hag evel Moïzes a zavas gueich all eur zarpant en dezert, evelse ive Mab an den a renk beza savet en ear evit rei ar vuez a bado da viken d'an nep piou bennac a gredo ennhan. Rac Doue en deuz bet kement a garantez evit ar bed ma en deuz digasset he Vab, ha n'en deuz nemethan, evit rei ar vuez a bado da viken d'an nep piou bennac a gredo ennhan. Doue n'en deuz ket digasset he Vab er bed evit coundaoni ar bed, mes evit ma vezo ar bed saveteet dreizhan. An nep piou bennac ne gred ket er Mab-se a zo dija barnet.»

Ne c'heller ket mont da rouantelez an eñv eb beza badezet. Dre zour ar vadiziant oump tennet euz a-dre daouarn an

drouc-speret, evel an Israelitet gueich all a oue tennet euz a-dre daouarn Pharaon, en eur dremen dre zour ar mor ruz.

### 18. Jesus e tal puns Jacob.

Goude goueliou Pask, Jesus a ieas da ober eur bale dre ar Judee, ha goudeze e tistroas da Nazareth. Hogen, evit mont di e renke tremen dre ar Samarii. Erruout a reas eta e kichen eur gear euz ar vro-ze, hanvet Sichem. Dirac dor ar gear-ze ez oa eur puns, a ioa bet toullet gueich all dre urs ar patriarch Jacob. Jesus, deuet da skuiza gant an hent en doa great, a azezas e tal ar puns-se, epad ma'z ea he ziskibien e kear da brena eun tamm bennac da zibri.

Ha setu eur vaouez euz ar vro o tont da gerc'hat dour, ha Jesus da lavaret dezhi : « roït dinn eur banne dour da eva. » Ar vaouez-se a oue souezet-marzo ouz he glevet ;



rac ar Samaritanet a ioa ken dispriet gant ar iuzevien ma vije bet guell gantarre-ma gouzañv an naoun hag ar zec'het kentoc'h eget kemeret netra digant eur samaritan. Setu perac e respountas

d'hor zalver evel-hen : « c'houi zo euz ar Judee dioe'h an doare ac'hanoc'h ; penaoz eta e credit-hu goulenn diganeñ-me eur banne dour da eva? » Neuze Jesus a lavaras dezhi adarre : « m'o pije gouezet piou eo an hini a c'houlenn eur banne dour diganeoc'h, marteze o pije goulennet



diganthan oc'h unan da eva, hag heñ en devije roët deoc'h eur banne dour, ha n'e ket eur banne dour glao e vije bet.» — «Aotrou, eme ar vaonez-se ractal, euz a beleac'h o pije-c'houi gellet caout ar banne dour-ze? N'euz netra ganeoc'h da denna dour; daoust ha c'houi zo brassoc'h ho calloud eget hini Jacob, hon tad coz, pehini en deuz roët deomp ar puns-ma, hag en deuz evet he unan dour anezhan?» Ha Jesus a respountas: «an nep a evo euz a zour ar puns-ma en devezo sec'het c'hoaz; mes an nep a evo euz an dour a roïnn-me dezhan n'en devezo mui sec'het hiviziken.» — «Aotrou, eme ar vaouez adarre kerkent, roët dinn eta euz an dour-ze!» Hor zalver a ziscouezas neuze d'ar c'hreg-se ec'h anaïe an dizursiou euz he buez. O clevet kement all, hi a oue souezettoc'h eget biscoaz, hag a lavaras: «brema me vel ervad oc'h eur prophet.» Goudeze e c'houlennas digant Jesus: «hon tud coz-ni o deuz kinniget sacrificiou da Zoue var ar menez-ma, ha c'houi, iuzevien, a lavar ne blij da Zoue nemet ar sacrificiou a ginniger dezhan e Jerusalem. Gant piou ema ar virionez?» Jesus a respountas: «credit ac'hanon, maouez, ema deuet an amzer ma n'e ket ama nag e Jerusalem ebken eo e vezo kinniget sacrificiou da Zoue. Ia, deuet eo an amzer ma vezo henoret Doue gant he vir zervicherien a speret hag a galoun, evel ma c'houlenn beza henoret. Rac Doue a zo eur speret, ha setu perac e fell dezhan dreist peb tra beza henoret a speret hag a galoun.» — «Gouzout a ran, eme ar vaouez, eo prest ar Messias da zont; eur veich ma vezo deuet, hennez a zesko deomp an traou-ze.» Neuze Jesus a lavaras dezhi: «me va unan eo ar Messias.» O clevet ar gomz-se, ar vaouez a Samarii a lezas eno he fod, hag a redas e kear en eur lavaret da gement hini a gave var he hent: «deuit da velet eun den hag en deuz discleriet dinn kement tra am euz great em buez: daoust ha n'e ket heñ e ve ar C'hrist?»

Coulsgoude, diskibien hor zalver a ioa distroët, hag a lavare dezhan dibri: «Mestr, emezho, debrit-ta.» Ha Jesus a respountas: me'm euz eur bouet da zibri ha ne

anavezit ket. Va bouet-me eo ober bolontez an Hini en deuz va digasset.»

Var gement-se tud Siehem a deuas d'he gaout, hag her pedas da jom gantho. Chom a reas daou zervez evit ho e'helen, ha calz anezho a gredas ennhan.

An dour a ro Jesus eo ar c'hras a gass an den d'ar baradoz, e pelec'h n'en devezo mui netra da c'hoantaat, dre ma vezo eno da viken en eun eürusdet ha ne c'houffet sonjal e netra par dezhi. — Evit beza guir zervicher da Zoue, n'e ket aoualc'h ober an neuz da veza devot; red eo dreist peb tra caout eur galoun pur, humbl, ha leun a garantez evit Doue hag evit an nessa.

### 19. Jesus o prezec e Nazareth.

Jesus a zistroas da Nazareth a beleac'h oa ginidic. Hervez he gustum ez eas d'ar zadorn d'ar sinagog. Pa oue deuet an doctoret d'ho flas, e savas en he za da lenn. Roët e oue dezhan levr ar prophet Isaias, hag, o veza he zigoret, e couezas var ar c'homzou-ma: «Speret Done a zo varnon; setu perac en deuz va merket gant an oleo sacr, ha va digasset da brezec an aviel d'ar re baour, ha da gonzoli ar re o deuz eur rann-galoun bennac.»

Var gement-se e serras al levr, hag, o veza he roët en dro d'an doctoret, ez eas da azeza. Kement hini a ioa er sinagog a ioa he zaoulagad o para varnezhan. Neuze ec'h en em lekeas da gomz evel-hen: «hirio eo e teu da vir evidoc'h ar c'homzou-ze o peuz clevet.» Discouez a reas gondeze oa divar he benn, da lavaret eo divar benn ar Messias, en devoa ar prophet Isaias comzet evelse. An oll o devoa plijadur oc'h he glevet, ha coulsgoude ne gredent ket anezhan. Mes lavaret a reant entrezho: «ha n'e ket hennez eo mab Joseph, ar c'halvez paour?» Neuze Jesus a lavaras: «e guirionez, prophet ebet ne vez digemet mad en he vro. Evelse ive, en amzer Elias, ez oa meur a intañvez paour etouez ar bobl a Israël, ha coulsgoude Elias ne oue casset da gaout nicun anezho; mes casset e oue da gaout eun intañvez paian a Sarepta.»

O clevet ar c'homzou-ze, ar re a ioa er sinagog a ieas drouc enno. Sevel a rejont en ho za, ha cass a rejont hor zalver er meaz euz a gear, var beg ar menez m'edo Nazareth harp outhan. Ho zoncl a oa d'he deuler ac'hano d'an traoñ, etouez ar vein hag ar c'herrec. Mes Jesus a zistroas outho, hag a dremenas dre greiz ar vanden a iea var he lerc'h, eb ma credas nicun cregi ennan : hen lezel a rejont da vont kuit evel tud hag a vije sounnet ho divreac'h hag ho divesker outho.

## 20. Miraclou Jesus e Capharnaüm.

Euz a Nazareth Jesus a ieas da Gapharnaüm, hag eno e kelenne an dud bep sadorn er sinagog. An oll a ioa souezet oc'h he glevet; rac he gonizou o devoa kement a nerz ma'z eant betec goueled ar galoun. Eun dervez, eun den, hag a ioa an diaoul en he gorf, en em lakeas en eun taol-count da grial a bouez-penn : «dist ac'hanomp ! Petra o peuz da ober ganeompni, Jesus a Nazareth ? Ha denet oc'h-hu ama evit hor c'holl ? Gouzout a ran ervad oc'h eun den Doue.»

Jesus a scandalas an diaoul, hag a lavaras dezhan : «chom peoc'h, ha deuz er meaz euz a gorf an den-ze.» Hag an diaoul, o veza pilet an den-ze d'an douar, a deuas ractal er meaz euz he gorf. An oll a oue spoutet o velet kement all, hag a lavare : «petra zinifi an dra-ma ? Gourc'hemenn a ra d'an drouc-sperejou evel pa ve mestr dezho, hag hi a zent outhan.»

En eur zont euz ar sinagog Jesus a ieas da di Simon-Per hag he vreur Andre. Hogen, mamm-gaër Simon-Per a ioa dalc'het var he guele gant eur goal derzien. Simon-Per hag Andre a bedas Jesus da gaout truez outhi. Jesus a dosteas eta ouz ar guele, hag, o veza eroget e dorn an hini glañv, e reas dezhi sevel en he gouañvez. Kerkent e oue pareet, hag e teuas er meaz euz he guele da aoza eun tamm-bouet d'hor zalver ha d'he ziskibien.

Dioc'h an abardaëz, goude cuz-heol, e oue digasset dirac dor ti Ber kement den clañv a ioa e kear, ha kement hini a ioa an diaoul en he gorf. Jesus, o veza eat da gaout an dud-se, ho fareas oll.

Goudeze e teuas kuit euz a Gapharnaüm, hag e kendal-c'has da vale dre ar Galilee, en eur brezec e peb leac'h, hag en eur rei ar iec'hel d'an oll dud clañv pe ma-c'haniet.

Ar zent euz al lezen goz a rea miraclou, hag a gelenne ar bobl, dre c'halloud hag en hano Doue, en devoa ho c'harget a gement-se. Jesus-Krist a gelen hag a ra miraclou en he hano ha dre he c'halloud he unan.

## 21. Ar besketerez miraculuz.

Jesus a erruas evelse dirac lenn Jenezareth, hag, o veza cavet eno diou vag, e pignas en unan anezho pehini a ioa da Ber ha d'he vreur. Rac kement a dud a deue var he lerc'h evit selaou he gelennadurez m'en devoa beac'h o vale gantho. Neuze e lavaras da Ber pellaat he vag eun tammic dioc'h an douar, hag, o veza azezet ennhi, e savas he vouez evit prezec ac'hano d'ar bobl.




Pa oue achu he brezegen gantho, e lavaras da Ber ha d'he vreur: «it brema larcoc'h el lenn, ha taolit ho rouejou da besketa.» Per a respontas: «Mestr, labouret

or beuz hed an noz ha n'or beuz paket netra ; coulsgoude, p'hel livirit dinn, me ia da deuler ar rouejou.» Ho zeuler a reas eta, ha kement a besket a oue paket ma roge ar rouejou gant ar beac'h a ioa enno. Per hag Andre a reas neuze sin da dud ar vag all da zont d'ho zicour. Dont a rejont, hag an diou vag a oue ker carget gant ar pezh a ioa er rouejou m'o devoa beac'h o chom var c'horre an dour. O velet kement-se, Simon-Per en em strinkas da dreid Jesus, he speret leun a estlamm hag an doujans en be galoun, hag a lavaras : « it pell diouzinn, Aotrou ; rac ne d'oun nemet eur pec'her.» Mes Jesus a respoun-tas dezhan : « n'o pezet aoun ebet ; hiviziken c'houi a vezo pesketer-tud.» Kerkent, Per hag Andre, o veza digasset ho bag da ribl al lenn, a guiteas peb tra evit heul hor zalver.

Jesus-Krist a joazas hag Per evit prezec ac'haou d'ar bobl. En Ilis sant Per, da lavaret eo, en Ilis catholic ha roumen, eo e kendalc'h da zeski ar virionez d'an dud dre c'hinou Per hag ar Pabet a zo deuet var he lerc'h. — Ar besketerez miraculuz a zinifi c'hoaz eun dra all : ar mor a verk ar bed, hag ar rouët, an Ilis ; ar besketerien eo an eskibien hag ar veleien, hag ar pesket eo ar gristenien en em lez, dre ho bolontez ho unan hag evit silvidigez ho ene, da veza paket e rouët an Ilis.

## 22. An den seïzet.

Eun dervez m'edo Jesus o prezec en eun ti e Capharnaüm, en dro dezhan pharizianet ha doctoret euz al lezen diredet di a bep corn euz ar Galilee, pevar goaz a zonjas dougen betec ennhan eun den seïzet, astennet var eur guele. Mes an ti o veza leun-chec, ne c'hellent ket mont ebarz dre an or. Petra rejont neuze ? Pignat var an doën a ioa plat hag eun toull enni hervez gis ar vro, ha disken an hini clañv e creiz an ti dre an toull-ze, guele hag all. O velet feiz an dud-se, Jesus a lavaras ractal d'an den seïzet : « va mab, ho pec'hejou a zo pardounet deoc'h.» Neuze an doctoret euz al lezen hag ar pharizianet en em lakeas da zonjal enno ho unan : « an



den-ze a gomz a enep Doue. Piou a c'hell pardouni ar pec'hejou nemet Doue ebken?» Mes Jesus, o c'houzout petra dremene en ho speret, a lavaras: «perac e lezit-hu ar zonzou-ze da rodella en ho speret? Petra zo eassa da lavaret euz an daou zra-ma: ho pec'hejou a zo pardounet deoc'h; pe: savit en ho sa ha kerzit? Hogen, evit discouez deoc'h en deuz Mab an den var an douar ar c'halloud da bardouni ar pec'hejou, me lavar d'an den seizet-ma sevel en he za, cass he vele ganthan ha distrei d'ar gear.» Ha ker buhan an den seizet a zavas, a gassas he vele ganthan, hag a zistroas d'ar gear en eur drugarekaat Doue. Kement hini a ioa eno a oue estlammet, hag an oll a veule Doue en eur lavaret: «guellet or heuz hirio traou burzuduz meurbet.»

Hon tad kenta Adam 'en deuz sammet varnomp ar pec'het hag eur beac'h cleñvejou; Jesus-Krist, an eil Adam, en deuz kemeret ar zamm-ze varnhan, hag en deuz hor pareet.

## 23. Ar zarmoun var ar menez.



Eun dervez, o velet eur bobl-tud en dro dezhan, Jesus a bignas var eur menez. O veza azezet eno, hag he ziskibien o veza en em renket en he gichen, ec'h en em lakeas ac'hano da gelen ar bobl evel-hen :

### 1. An eiz eürusdet.

«Eüruz ar re zo paour a speret, rac dezho eo rouantelez an eñv.

Eüruz ar re zo dous, rac bez' o devezo ar guir douar a bromessa.

Eüruz ar re a vouel, rac al levenez a deui evitho goude ar c'hlac'har.

Eüruz ar re a zo naoun ha sec'het ar zantelez en ho ene ; rac an naoun hag ar zec'het-ze a vezo torret dezho.

Eüruz ar re a zo trugarezuz, abalamour ma vezo great ive trugarez en ho c'heñver.

Eüruz ar re a zo pur ho c'haloun, abalamour ma velint Doue.

Eüruz ar re a gar ar peoc'h; rac galvet e vezint bugale Doue.

Eüruz ar re a zo goal-gasset er bed-ma abalamour ma reont ho dever; rac dezho eo rouantelez an eñv.»

## 2. Renk ha deveriou an ebestel.

En eur dreñ neuze ouz he ebestel, a dlie beza ar pennou euz he Ilis, Jesus a lavaras dezho: «c'houi eo ar c'hoalen euz an douar. Mar teu ar c'hoalen da goll he zaour, gant petra e vezo sallet? N'eo mui mad da netra, nemet da veza stlapet er meaz ha bresset a zindan an treïd. — C'honi eo sclerijen ar bed. Ne allumer ket eur c'houlouen evit he lakaat a zindan eur boezel, pe a zindan eur guele; mes he lakaat a reer var eur c'hantolor evit ma roï sclerijen da gement den a zo en ti. Evelse ive ra zeni ho sclerijen-c'houi da bara dirac an dud, evit ma velint oc'h oberou mad, ha ma roïnt gloar ha meuleudi d'ho Tad pehini zo en eñv.»

## 3. Deveriou ar gristenien.

Jesus a lavaras neuze d'ar bobl: «arabad eo deoc'h sonjal e venn denet da freuza lezen Moïzes ha da gass da netra ar pez o deuz discleriet ar brophetet; n'oun ket deuet da freuza, mes da lakaat da vont var vell ar pez a ioa em raoc, ha da gass da benn ar pez o deuz discleriet ar brophetet. Rac e guirionez m'hel lavar deoc'h, ma n'oc'h ket santeloc'h eget an doctoret euz al lezen hag ar pharizianet, n'o pezo ket a berz e rouantelez an eñv. — Gouzont a rit euz bet lavaret d'ho tud coz: arabad eo laza. Mes me a lavar deoc'h ouspenn: an nep piou bennac a ielo drouc enghan ouz he vreur a vezo great barnedigez varnezhan; hag an nep a roï he valloz d'he vreur a vezo coundaonet da dan an ifern. Mar o peuz eta eun dra bennac da zigass d'an templ e prof, ha mar teu da zonch deoc'h en hent o peuz great poan d'ho preur hag en deuz drouc ouzoc'h, list eno ho prof hag it da genta d'en em unani gant ho preur; ha goudeze deuit da zigass ar pez o peuz lavaret rei e prof, evit ma vezo par-



dounet deoc'h ho pec'hejou gant ho Tad pehini zo en eñv. Rac ma ne bardounit ket, ho Tad pehini zo en eñv ne bardouno ket deoc'h ken nebent. — Gouzout a rit ez euz bet lavaret c'hoaz gueich all : o pezet carantez evit ho mignounet ha cassouni ouz oc'h enebourien. Mes me a lavar deoc'h : carit oc'h enebourien, grit vad d'ar re o deuz caz ouzoc'h, ha pedit evit ar re a voal-gass ac'hanoc'h hag ho tamall e gaou, evit ma vioc'h guir vugale d'ho Tad pehini zo en eñv ha pehini a laka he heol da bara var ar re fall evel var ar re vad, hag ar glao da goueza var an dud santel kercoulz ha var ar bec'herien. Ma ne garit nemet ar re ho car, peseurt mirit o pezo-c'honi? Daoust hag ar publicanet ne reont ket evel doc'h? Ma ne zaludit nemet ho preudeur, petra rit-hu muioc'h eget ar re all? Daoust hag ar baïanet ne reont ket evel doc'h? Bezit eta parfet, c'houi, evel ma'z eo parfet ho Tad pehini zo en eñv.»

#### 4. Divar benn santelez ar briedelez.

«Gouzout a rit ez euz bet lavaret d'ho tud coz : ne reoc'h ket a avoultriach. Mes me a lavar deoc'h penaoz an nep piou bennac a zell ouz eur c'hreg gant daoulagad a voal-ioul a zo dija avoultrer en he galoun. An den ne dle ket dispartia ar pez a zo bet unanet gant Doue ! An nep a gass he c'hreg kuit, hag a gemer eun all en he flas, a ra eun avoultriach, hag an nep a zimez da eur c'hreg, casset kuit gant he goaz, a ra ker braz pec'het ; hag ar c'hreg a ia kuit dioc'h he goaz, evit dimizi da eun all, a ra ive eun avoultriach.»

#### 5. Divar benn ober ar mad er gue! a Zoue ebken.

«Divoallit ne raffac'h ar pez a rit a vad nemet evit plijout d'an dud. Pa roït an aluzen, arabad e c'houffe ho torn cleiz ar pez a ro ho torn deou ; mes grit oc'h aluzennou e cuz, hag evelse e vioc'h recoumpanset gant ho Tad pehini zo en eñv ha pehini a vel an traou cuzet. — Pa hedit, en em dennit en ho cambr ha serrit an or

varnoc'h, hag ho Tad pehini zo en eñv, ha pehini a vel an traou cuzet, a zelaouo ho peden. — Pa iunit, ne rit ket ar penn teñval evit discouez d'an dud e rit pinijen, hag evelse e vioc'h paët mad gant ho Tad pehini zo en eñv, ha pehini a vel an traou cuzet.»

6. Peseurt soursi a dle eur c'hristen da gaout dreist peb tra.

«Ne d'it ket da zastum tenzoriou evit ar vuez-ma; tenzoriou ar bed-ma a deu da vergli ha da breñvedi gant an amzer, hag al laëroun a zo ato o clask an tu da astenn ho c'hraban varnho. Dastumit eta tenzoriou evit an eñv, el leac'h ne c'hell nag ar mergl staga outho, nag ar preñvet ho c'hrignat, na craban al laëroun tizout betec ennho. El leac'h m'ema ho tenzor ema ive ho caloun. Den ne c'hell servicha daou vestr assambles; ne c'hellit



ket eta servicha assambles Doue hag ar bed. Setu perac e lavar an deoc'h: n'en em nec'hit ket re o clask gouzout penaoz o pezo bouet da zibri ha dillad da lakaat var ho tro.

Sellit ouz al labouset: ne c'hounezont netra, n'o deuz ket a eost da zastum ha da c'horren, ha coulsgoude ho Tad pehini zo en eñv ne lez ket anezho eb tamm. Daoust ha c'houi ne dalvezit ket calz muioc'h eget al labouset-se? Sellit c'hoaz ouz ar bleun-lili hag ouz ar bokedou all euz ar parkeier. Ne velit ket anezho o neza nag oc'h ober

labour all ebet evelse ; ha couls goude, m'hel lavar deoc'h, biscoaz Salomon, e creiz an oll sked euz he c'hloar, n'eo bet guisket evel unan euz ar bokedou-ze. Ma ro an Aotrou Doue eur viscamant ker caër d'ar bokedou euz ar parkeier, pegement muioc'h a zoursi n'en devezo-heñ ket da rei dillad deoc'h-hu, tud a nebeut a feiz ? N'en em nec'hit ket eta evel a ra ar baïanet. Ho Tad a c'hoar euz a betra o peuz ezom. Poaniit da genta da c'hounit rouantelez Doue, ha da veva er bed-ma en he c'hras hag en he garantez, hag an traou all a vezo roët deoc'h var ar marc'had.»

7. Arabad eo barn eb guir abeg.

«Ne varnit ket evit na viot ket barnet. Ne goundaonit ket evit na viot ket coundaonet ; pardounit, hag e vezo pardounet deoc'h. — Dioc'h m'o pezo great d'ar re all, e vezo great deoc'h oc'h unan. — Perac e velit-hu eur goloën e lagad ho preur, ha ne velit ket an treust a zo en oc'h hini ? Den fallacr ma'z oc'h, lamit da genta an treust a zo en ho lagad oc'h unan, ha goudeze e veloc'h ha c'houi a c'hello lamet ar goloën a zo e lagad ho preur. — Grit d'ar re all kement a garfac'h a ve great deoc'h oc'h unan ; setu aze petra zinifi beva hervez al lezen ha scridou ar brophetet.»

8. Lavaret an traou egiz m'emaïnt.

«Gouzout a rit ez euz bet lavaret d'ho tud coz : en em virit dioc'h ar fals leou-douet. Ha me a lavar deoc'h : arabad eo toui e feson ebet. Ra vezo ho comz : ia, ia ; nan, nan ; ar pez a livirit ouspenn a deu a berz fall.»

9. Fin ar zarmoun var ar menez.

Goude beza roët d'ar bobl ar c'hentelliou-ze ha calz re all ouspenn, Jesus a lavaras : «an nep am zelaou-me, hag a ra ar pez a lavaran, a zo heñvel ouz eun den hag en deuz savet eun ti var ar c'herrec. Dont a ra barrou-glaou, barrou-avel, barrou-dour-beuz euz ar steriou, n'euz

fors : an ti-ze a jom en he za abalamour m'eo diazezel var ar c'herrec. Mes an nep am zelaou, ha ne ra ket ar pez a lavaran, a zo heñvel oc'h eun den diskiant hag en deuz savet eun ti var an treaz; dont a ra ar glao, an dour-beuz, pe an avel foll, ha kerkent an ti-ze a zo pilet d'an traoñ hag a gouez en he boull.»

Epad ma prezege hor zalver evelse, an oll o devoa plijadúr oc'h he glevet; rac kelen a rea ar bobl evel eun den hag en devoa galloud evit kement-se a berz Doue, ha nan evel ar pharizianet hag an doctoret euz al lezen.

#### 24. An den lor. — Servicher ar c'hantener.

Eun den lor a deuas da gaout Jesus goude m'oa diskenet divar ar menez, hag en em strinkas d'he dreïd en eur lavaret : «Aotrou, mar kirit, c'houi a c'hell va farea.» Jesus a respountas en eur astenn he zorn da douch outhan : «mad ! ra vioc'h pare !» Ha ractal e oue pareet. Neuze Jesus a lavaras dezhan : «divoallit ne lavarfac'h an dra-ma da zen ; mes it d'en em ziscouez d'ar veleien ha da gass ar prof a zo gourc'hemennet e lezen Moïzes.»

Hervez al lezen goz, pa deue eun den lor da barea, e renke mont da gaout ar veleien, hag ar re-ma neuze a zisclerie dezhan e c'helle mont adarre etouez an dud. Ar zetans-se a zouge ar veleien euz al lezen goz e keñver an dud clañv gant al lorgnez, a verke ar zetans a absolven a zoug ar veleien euz al lezen nevez e keñver ar bec'herien.

Jesus a ieas goudeze da Gapharnaüm. Eur c'hantener roumen, da lavaret eo, eun olliser hag a ioa e penn eur goumpagnunez a gant soudard, a deuas di d'he gaout, hag a lavaras dezhan : «me'm euz eur zervicher en zi hag a zo seïzet; truez eo guelet pegement a boan en deuz gant an dra-ze.» — «Mad, eme Jesus, me ielo d'he barea.» Mes ar c'hantener a lavaras : «Aotrou, me n'oun ket din e teuffac'h d'am zi; n'o peuz nemet lavaret eur ger ebken ha va zervicher a vezo pare.» Jesus a oue souezet o clevet an den-ze, hag a lavaras d'ar re a ioa oc'h he heul : «e guirionez m'hel lavar deoc'h, n'em

euz ket cavet  
kement a feiz  
en Israël.  
Setu perac e  
lavarar  
deoc'h ive e  
teui calz tud  
euz ar zao-  
heol hag euz  
ar c'huz-heol  
da gemeret  
perz e rouan-  
telez an eñv  
assambles  
gant Abra-  
ham, Isaac



ha Jacob, ha bugale ar rouantelez a vezo taolet er meaz, en eun toull teñval, el leac'h ma vezo leñv ha scrign-dent.» Neuze Jesus a lavaras d'ar c'han-tener: «it, ha ra vezo great deoc'h hervez m'o peuz credet.» Hag ar zervicher a bareas d'an heur ma comze hor zalver evelse.

Ar iuzevien a reas muoc'h a faë var hor zalver Jesus-Krist eget ar baianet. Evelse, gueich all, bugale Jacob a zisprijas ho breur Joseph, hag an Ejiptianet, er c'hontrol, a one leun a istim evithan.

## 25. Den iaouank Naïm.

Jesus a ieas da eur gear, hanvet Naïm. He ziskibien, hag eleiz a dud all, a ioa oc'h ober coumpagnunez dezhan. P'edont dija tost da gear, ec'h erruas gantho eur c'horf maro, corf eun den iaouank, mab da eun intañ-vez ha n'e devoa ken crouadur nemethan. He vamm, mantret gant ar c'hlac'har, a ioa oc'h ben! ar c'horf, hag en dro dezhi calz tud all euz a gear. Jesus, o velet ar vamm geaz-se, a oue tenereat he galoun, hag a lavaras dezhi: «ne vouelit ket.» Goudeze e tasteas ouz an



arched, hag, o veza touchet outhan, e lavaras: «den iaouank, m'hel lavar deoc'h, savit alesse!» Ha ker buhan an hini maro a zavas, hag en em lakeas da barlant; ha Jesus hen roas en dro d'he vamm. Kement hini a ioa eno a oue estlammet o velet eun hevelep burzud, hag an oll a veule Doue en eur lavaret: «eur prophet braz a zo savet en hon touez, ha Doue a zo deuet da velet he bobl.»

Eun dervez a zeui, Jesus a zihuno an dud oll euz a gousket ar maro, evel a lavare gueich all an den santel Job. A vrema dija e ro adarre ar vuez, ebarz er zacramant a binijen, d'ar re a ioa maro dirac Doue dre ar pec'het marvel.

## 26. Ar bec'herez Madalen.

Eur pharizian, he hano Simon, a bedas Jesus da vont da leina d'he di. Hor zalver a ieas hag en em lakeas ous taol. Hogen, er gear-ze, ez oa eur plac'h, he hano Madalen, hag a ioa anavezet gant an oll evit eur plac'h fall. Ar plac'h-se, o veza clevet edo Jesus e ti ar pharizian, a

deuas di gant  
eur pod leun  
a louzou a  
c'houez-vad.  
Ha setu hi  
d'en em  
strinka da  
dreïd hor  
zalver, d'ho  
goalc'hi gant  
he daëlou ha  
d'ho zec'ha  
gant he bleo;  
goudeze e  
poke dezho



hag e scuille varnho al louzou a c'houez-vad a ioa deuet ganthi. O velet kement-se, ar pharizian a lavaras ennhan he unan : « ma vije bet an den-ma eur prophet, ne vije ket bet eb gouzout petra eo ar vaouez-se a zo eharz he dreïd. Anavezet en devije dioc'htu ne d'eo nemet eur pez fall.» Jesus, o c'houzout petra zonje ar pharizian, a lavaras dezhan : « Simon, m'em euz eun dra da lavaret deoc'h : daou zen a vanke arc'hant da eun all ; unan a vanke pemp cant diner, hag egile, anter-cant. Evel n'o doa ket a be a dra da baëa, an hini m'oant dleour dezhan a bardounas da bep hini anezho ar pez a vanke. Brema me c'houleunn ouzoc'h pehini anezho ho daou a dlie caout brassa carantez evit eun hevelep madoberour?» Simon a respountas : « an hini, mechans, a zo bet pardounet ar muia dezhan.» — « Ne c'houffet ket comz gant muioc'h a skiant, » eme Jesus ; hag, o trei neuze oc'h ar bec'herrez, hor zalver a lavaras d'ar pharizian : « guelel a rit ar vaouez-se? Me zo deuet d'ho ti, ha n'o peuz ket roët a zour dinn da voale'hi va zreïd hervez giz ar vro ; mes hi e deuz ho goale'het gant he daëlou hag ho zec'het gant he bleo. N'o peuz ket sonjet poket dinn pa'z oun erruet, hag hi, abaoue m'eo deuet en ti, n'e ket bet ehanet da boket da va zreïd. N'o peuz ket scuillet a eol var va fenn,

hag hi e deuz scuillet var va zreïd eur podad *folleou* a c'houez-vad. — Setu perac m'hel lavar deoc'h, calz a bec'hejou a zo pardounet dezhi abalamour m'e deuz discouezel calz a garantez.» Goudeze e lavaras d'ar bec'herez: «ho pec'hejou a zo pardounet; it e peoc'h!»

### 27. Cannadet Ian-Vadezour.

Jesus a veve paour ha dianavezet; setu perac eleiz a dud ne gredent ket e vije heñ ar Messias. — Ian-Vadezour a c'hoanteas rei tro dezhan da ziscleria dirac an oll e teue a berz Doue. Cass a reas eta d'he gaout daou euz he ziskibien da c'houlenn diganiban: «*hag heñ ou an hini a dlie dont, pe eun all a dllet da c'hortoz?*» Evit oll respount, Jesus a lavaras d'ar gannadet-se, en eur gomz euz ar miraclou m'edo o paouez ober: «it da gounta da



Ian ar pez o peuz guelet ha clevet: ar guelet roët d'ar re zall, ar c'hlevet d'ar re vouzar, ar c'herzet d'ar re gamm, ar iec'het d'ar re lor, ar vuez d'ar re varo, hag an Aviel prezeget d'ar re

baour. Hag eüruz an nep ne gavo ket abeg ennon abalamour m'eo paour ha dister va doare!»

Ar prophet Isaiäs en devoa lavaret gueich all: «Doue a deuio he unan d'ho savetei. Neuze ar re zall a zigoro ho daoulagad da velet, hag ar re vouzar, ho diouscouarn da glevet.»



PEVARE PENNAD.

*An eil blavez ma prezegus Jesus-Krist.*

**28. Jesus a bare eun den clanv 38 vloaz a ioa.**

Jesus a ieas da Jerusalem evit goueliou Pask. Hogen, bez' ez oa e Jerusalem eur pinsin, hanvet pinsin Bethsaïda, hag a ioa pemp porched da vont d'he gaout. Ebarz er porchedou-ze e veze bandennadou tud clañv, tud dall, tud camm, tud seïzet, o c'hedal ma vije fiñvet an dour er pinsin. Rac eun eal a deue bep ar mare da fiñval an dour, hag ar c'henta a ziskenne er pinsin, goude ma veze bet an eal oc'h ober he dro, a veze pareet dioc'htu, n'euz fors peseurt cleñvet en devije. Bez' ez oa eno eur

den hag a ioa clañv eiz vloaz ha tregont a ioa. Jesus, o veza remerket an

den-ze etouez ar re all, a c'houlennas diganthan :

«ha c'hoant o peuz-c'houi da veza pare?» Hag heñ a



respountas: «Aotrou, n'em euz den d'am zeuler er pinsin pa vez bet fiñvet an dour; hag epad ma vezan o clask tostaat, eun all a ia ato e va raoc.» Jesus a lavaras dezhan: «savit, cassit ho cuele ganeoc'h, ha kerkzit d'ar gear.» Ha kerkent an den-ze a oue pareet; cass a reas he vele ganthan, ha ractal ez eas d'ar gear. Jesus, o veza he gavet goudeze en templ, a lavaras dezhan adarre: «setu

c'houi pare brema ; divoallit da bec'hi hiviziken, gant aoun na errufe goassoc'h c'hoaz ganeoc'h.»

Hor zalver a reas ar miracl-se da zadorn, hag ar iuzevien a c'hrosmole ; rac credi a reant oa difennet ober eun dra evelse da zadorn. Evit clask rei dezho da goupren en doa guir da ober ar pez a rea, Jesus a lavaras : «va Zad a labour bepret, ha me ive.» Ar iuzevien, o velet e felle dezhan en em lakaat cavatal gant Doue, o devoue muioc'h-mui a zrouc outhan, hag o devoa c'hoant d'hen lakaat d'ar maro. Mes Jesus a zisclerias dezho a vouez huel oa e guirionez Mab da Zoue, hag oa carget gant he Dad da varn ar bed oll. Lavaret a reas dezho : «e guirionez m'hel lavar deoc'h, an nep a zelaou va c'homzou-me, hag a gred en Hini en deuz va digasset, hennez en devezo ar vuez a bado da viken, ha ne vezo ket barnet ; mes tremen a raio dioc'htu euz ar maro d'ar vuez. Dont a rañ ar mare, ha deuet eo dija zoken, ma clevo ar re varo mouez Mab an den. Ar re o devezo great ar mad a zavo euz ar bez evit caout ar vuez a bado da viken ; mes ar re o devezo great an drouc a zavo euz ar bez evit beza barnet ha coundaonet.» Hag evit discouez oa e guirionez Mab da Zoue, e lavaras dezho c'hoaz : «ar burzudou a ran a ro testeni oun digasset gant va Zad.»

Dija, en amzer al lezen goz, Doue a garie ober vad d'an dud en eul leac'h bennac choazet ganthan dreist an oll blasou all, evel pinsin Bethsaïda. Evelse ive, en amzer al lezen nevez, ez euz chapelou ha pardouniou e pere ec'h en em blij an Aotrou Doue o scuill varnomp he c'hrasou, gant muioc'h a largentez eget e nep leac'h all ebet.

## 29. Seiz Parabolen rouantelez Doue.

Jesus, o veza eun deiz e Kichen lenn Jenezareth, a bignas en eur vag, hag en em lakeas ac'hano da gelen ar bobl-tud a ioa oc'h he heul. Setu ama e pe feson e prezegas.



1. PARABOLEN AN HAD. — «Eun den, emezhan, a ioa eat da hada ed en he bark.

Hag epad m'edo o vont, darn euz ar greun a gouezas hed an hent, hag a oue ractal debret gant al labouset.

Darn all a gouezas var eun tamm-douar meinoc, hag a

ziouanas; mes mervel a rejont ive ker buhan abalamour



m'oa re zeac'h ha re galet an douar dezho. Darn all c'hoaz a gouezas etouez ar spern, hag a oue mouget gant ar re-ma dre ma savent. Darn all erfin a gouezas varn an douar mad, hag a zougas frouez, lod tregont, lod tri-ugent, ha lod all betec cant var unan. An nep en deuz diou-scouarn da zelaou, n'en deuz nemet coumpren.»

Hor zalver a roas he unan da anaout d'he ziskibien petra zinifie ar barabolen-ze. «An had, emezhan, eo comzou Doue. Ar greun a gouez hed an hent a verk ar re a glev comzou Doue, mes eb en em lakaat e poan d'ho c'houmpren; an diaoul a deu buhan goudeze da lamet ar c'homzou-ze euz ho c'haloun, gant aoun na deuffent d'en em zavetei o credi anezho hag oc'h ober ar pez a verkont. Ar greun a gouez var ar vein a verk ar re a zelaou gant joa comzou Doue, mes ne lezont ket ar c'homzou-ze da c'hrizienna doun en ho c'haloun; an dud-ze ne gredont nemet evit eur pennadic-amzer ebken, ha, kerkent ha ma stourm eun dra bennac outho, kerkent ha ma'z euz eur boan bennac da c'houzañv evit Doue, setu hi o trei kein d'ar virionez. Ar greun a gouez etouez ar spern a verk ar re a ra ive digemer mad da gomzou Doue, mes ne dennont frouez ebet anezho, abalamour ma'z int re nec'het gant traou ar bed-ma, ha ma'c'h en em lezont da veza touellet gant ar garantez direiz evit madou ha plijadurezou an douar. Erfin, ar greun a gouez var an douar mad a verk ar re a zelaou comzou Doue gant plijadur, ho mir gant respet en ho c'haloun, hag a zoug frouez dre ar boan a gemeront da gerzet dre an hent a ziscouez dezho ar c'homzou-ze.»

2. PARABOLEN AN DRAOC. — «Rouantelez an eñv a zo heñvel ouz eun den hag en doa hadet greun mad en he bark. Mes epad m'edo he dud o cousket, he enebour a ieas da hada draoc etouez ar guinis, hag heñ kuit goudeze. Pa deuas an ed da veza hir ha da zioda, e oue remerket an draoc en he douez. Ar zervicherien a lavaras neuze d'ho mestr: «daoust ha n'o poa ket hadet a c'hreun mad en ho park? Penaoz eta ez euz deuet kement-se a zraoc ebarz?» Ar mestr a respontas: «va enebour,

emezhan, eo en deuz great an dra-ze.» — «Mad, eme ar zervicherien, mar kirit, ni ia dioc'htu da denna al louzou fall-ze.» Mes ar mestr a lavaras : «arabad eo, gant aoun na deusse ar guinis ganeoc'h da heul an draoc. List an eil hag egile da greski betec an eost, ha, pa deui an eost, me lavaro d'ar re a ielo da vidi lakaat an draoc a gostez hag he zastum a hordennou da ober tan. Evit ar guinis avad, a livirinn dezho, taolit evez d'he c'horren piz e va grignol.» Jesus a roas da anaout evel-hen petra zinifie ar barabolen-ze : «an hini, emezhan, en deuz

hadet ar greun mad, eo Mab an den ; ar park eo ar bed, hag ar greun mad, bugale Doue. An draoc eo bugale an diaoul ; an enebour en deuz he hadet eo an diaoul he unan ; an



eost eo fin ar bed, hag ar re a ia da vidi, an elez. Evel eta ma vez lakeat an draoc a gostez da ober tan, evelse e vezo great ive da fin ar bed. Mab an den a zigasso he elez da lamet euz he rouantelez an dud a scouer fall hag an oll bec'herien, hag ar re-ma a vezo taolet ive en tan da zevi. Eno e vezo leñv ha scrign-dent. Neuze an dud vad, er c'houtrol, a lugerno evel an heol e rouantelez ho Zad pehini zo en eñv.»

3. PARABOLEN AR C'HREUNEN SEZO. — Jesus a lavaras c'hoaz : «rouantelez an eñv a zo heñvel ouz eur c'hreunen sezo a ia eun den da hada en he bark. Ar c'hreunen-ze, evit guir, eo ar bihanna euz an oll hajou ; mes pa

vez diouanet, n'euz louzaouen all ebet ker braz hag hi : dont a ra da veza eur vezen a behini ar scourrou a zervich da c'hlud d'al labouset.»

4. PARABOLEN AR GOELL. — «Rouantelez an eñv a zo heñvel ouz eun tamm goell a laka eur vaouez e tri damoueziat bleud, hag a ra d'an toaz oll goï.»

5. PARABOLEN AN TENZOR. — «Rouantelez an eñv a zo heñvel oc'h eun tenzor euzet en eur park. An nep a gav an tenzor-ze ne lavar ger da zen ; mes kement a joa en deuz da veza he gavet ma verz kement tra en deuz evit prena ar park e pehini ema.»

6. PARABOLEN AR BERLEZEN. — «Rouantelez an eñv a zo heñvel oc'h eur marc'hadour a zo o redet bro evit clask perlez. O veza cavet unan gaër, ez a buhan da verza kement tra en deuz evit he frena.»

7. PARABOLEN AR PESKET MAD HAG AR PESKET FALL. — «Rouantelez an eñv a zo c'hoaz heñvel ouz eur rouët a daoler er mor hag a deu enghan a bep seurt pesket. Pa greder eo dija leun, ar besketerien hen tenn er meaz, ha goudeze ez eont da azeza var an aod evit dibaba ar pesket. Ar re vad a zalc'hont gantho, hag ar re fall a stlapont kuit. Evelse e vezo great ive da fin ar bed. An elez a deuio da zispartia ar re vad dioc'h ar re fall, hag ar re-ma a vezo strinket e tan an ifern. Eno e vezo leñv ha scrign-dent.»

### 30. Jesus a ra d'an avel paouez da c'hoëza.

Eun dervez bennac goude beza kelennet ar bobl evelse, Jesus a lavaras d'he ziskibien : «pignomp en eur vag, ha deomp en tu all d'al lenn.» Neuze eun doctor euz al lezen a deuas d'he gaout en eur lavaret : «Mestr, me'm euz c'hoant da vont ganeoc'h.» Mes hor zalver, o c'houzout oa stag caloun an doctor-ze ous madou ar bed-ma, a lavaras dezhan : «al lern o deuz ho zoullou en d'ouar, hag al labouset o deuz ho neziou ; mes Mab an den n'en deuz ket eur plas da c'hourvez.» Ha var gement-se an doctor a ieas en dro.



Couls goude Jesus, o veza pignet er vag, en em roas da gousket. Ha setu eun avel greñ o tont da c'hoëza var al lenn, hag ar vag oc'h en em garga a zour. Diskibien hor zalver a deuas d'he zihuna, en eur lavaret : « Mestr, emamp o vont da goll. » Ha Jesus a respountas : « rac petra o peuz aoun, tud a nebeut a feiz ? » Ha setu heñ o sevel, hag oc'h en em lakaat da c'hourdrouz an avel hag ar mor, ha kerkent an avel hag ar mor a deuas da veza sioul. Hag an diskibien, souezet hag estlammet, a lavare an eil d'egile : « peseurt den eo hema-ta, pa'z e guir an avel hag ar mor a zent outhan ? »

Ar mor ama a verk ar bed, hag ar vag, an Ilis : an Ilis a harzo ouz an oll barrou-amzer, abalamour Jesus-Krist a zo ato ganthi.



### 31. Merc'h Jaïr; ar vaouez clanv.

Pa deuas Jesus en dro goude beza bet en tu all d'al lenn, eun den, he hano Jaïr, hag a ioa unan euz ar pennou braz euz ar vro, en em strinkas d'he dreïd en eur lavaret: «Aotrou, va merc'h a zo o vont da vervel. Deuit da lakaat ho taouarn varnhi evit ma pareo.» Ha Jesus a ieas ganthan.

Epad m'edo o vont, dre greiz ar bobl-tud a ioa deuet d'he gaout var ribl al lenn p'o doa elevel lavaret oa distro



euz an tu all, eur vaouez, hag a ioa clanv daouzec vloaz a ioa, a dosteas outhan dioc'h an adreñ. Ar vaouez geaz-se e devoa dispignet he zammic pe a dra o clask beza pareet gant ar vedicinet, ha vad ebet n'o devoa great dezhi. Hogen, o veza eat adreñ kein hor zalver, ne reaz nemet touch oc'h costez he zaë divar c'horreic, ha ractal e oue pare. Jesus a zistroas outhi en eur lavaret: «va merc'h, ho feiz en deuz ho saveteet; it e peoc'h!»



N'en doa ket achuet mad ar ger-ze pa denjer da lavaret da Jaïr : « d'ober petra ober poan d'ar Mestr eb ezom ? Ho mere'h a zo maro.» Mes Jesus, o veza clevet ar gomz-se, a lavaras d'an tad : « ne rit van ebet evit kement-se ; credit ebken hag ho mere'h a vevo.» Pa erruas e ti Jaïr, e cavas eno eleiz a dud o vouela hag oc'h hirvoudi. Hor zalver a lavaras dezho : « ne vouelit ket ; ar vere'h-se n'e ket maro ; cousket eo ez eo.» Mes hi a rea goab anezhan, o c'houzout ervad oa maro. Neuze ez eas e cambr ar vere'h gant he zad hag he mamm, ha gant Per, Jakes ha Ian, hag, o veza croget en he dorn, e lavaras dezhi : « plac'h iaouank, m'hel lavar deoc'h, savit !» Ha kerkent ar vere'h a zavas, hag en em lakeas da vale dre an ti.

### 32. Jesus a joaz an daouzec abostol.

Eun niver braz a dud a deue bemdez, hag a bell hag a dost, da glevet Jesus. Hor zalver en devoa calz truez outho ; rac heñvel oant ous bandennadou deñvet ha n'o deuz pastor ebet d'ho ren. Setu perac e lavaras d'he ziskibien : « puill eo an eost, mes al labourerien a zo nebeut anezho. Pedit eta Mestr an eost ma plijo ganthan digass labourerien d'he zastum.» Jesus a dremenas an noz varlerc'h o pedi. Antronoz-vintin e c'halvas he ziskibien en dro dezhan, hag e choazas en ho zouez daouzec, da bere e roas an hano a *ebestel*, da lavaret eo, cannadet. Setu ama hanoïou an daouzec abostol : Per hag Andre ; Jakes, mab da Zebedee, ha Ian ; Philip ha Barthelemi ; Thomas ha Maze ; Jakes, mab da Alphee, ha Thaddee ; Simon, ar c'hananean, ha Judas Iscariot, pehini a oue an treïtour. Jesus a gassas an daouzec-se dre ar Judee, en eur reï dezho ar c'halloud da barea ar re glañv, da lakaat ar re varo da zont adarre e buez, ha da gass an drouc-sperejou euz a gorfou an dud, ma vijent eat enno. Araoc ho c'hass, e comzas outho evel-hen : « it eta da brezec en eur lavaret : tostaat a ra rouantelez an eñv. Ne gassit netra ganeoc'h nemet ho paz. Pa'z eoc'h

en eun ti bennac, livirit : ar peoc'h ra vezo en ti-ma ! Ha mar d'eo an ti-ze din a beoc'h, e vezo great dezhan hervez ho coulenn ; ma n'e ket, ar pez o pezo goulennet evithan a vezo roët deoc'h oc'h unan. Pa gavoc'h unan bennac ha ne fello ket dezhan ho tigemeret, pe selaou ho comzon, deuit kuit euz an ti pe euz ar gear-ze en eur heja ar boultren dioc'h ho treid. E guirionez m'hel lavar deoc'h : Sodom ha Gómorr ne vezo ket ker reuzeudic ho doare da zeiz ar varn ha ma vezo hini an ti pe ar gear-ze. Ho cass a ran evel oanet etouez bleizi ; o pet eta ijinn ar zarpant, mes it ato eññ gant oc'h hent evel ar goulm. Divoallit rae an dud : ho kolver a rañt dirac ar varnerien, hag ar re-ma a roïo urs d'ho scourjeza. Ho lakaat a rañt zoken d'ar maro, ha dall aoualc'h e vezint evit credi e plijint da Zoue oc'h ober goassa ma c'hellint deoc'h. An diskib n'ema ket en tu all d'he vestr : mar d'eo bet galvet ar Mestr, Beelzebuth, peseurt hano ne vezo ket roët d'he ziskibien ? N'o pezet ket aoun rac ar re a laz ar c'horf ha ne c'hellont ober drouc ebet d'an ene ; mes o pezet aoun kent rac an hini a c'hell cass ar c'horf hag an ene d'an ifern. Digorit frank ho kinou da rei testeni ac'hanon-me dirac an oll. — An nep a anzavo ac'hanon dirac an dud, me ive hen anzavo dirac va Zad pehini zo en eñv. An nep a gar he dad pe he vamm muioc'h egedon-me, n'e ket din ac'hanon. Hag an nep ne zoug ket he groaz evit dont d'am heul n'e ket din ac'hanon. An nep piou bennac ho selaou-c'houi, am zelaou-me ; hag an nep piou bennac ho tisprij-c'houi am disprij-me. An nep ho tigemer-c'houi am digemer-me, hag an nep am digemer-me a zigemer an Hini en deuz va digasset. An nep piou bennac a roïo deoc'h eur banne dour em hano-me, ne gollo ket he recoumpans.»

An ebestel a ieas eta daou ha daou da brezec ar binijen. Ober a reant d'an drouc-sperejou kuitaat corfou an dud ma vezent eat enno, ha para a reant calz tud clañv o touch outho ho biziet soubet en eol. Divezatoc'h, Jesus a jozas c'hoaz daouzec ha tri-ugent diskib all evit sicour an ebestel, hag evit mont, eveldho, daou ha daou en he raoc.

Ar grasou m'oa deuet hor zalver da zigass var an douar a oue scuillet gant an daouzec abostol, evel ar vennoz roët gueich all gant Abraham a ioa bet ingalet etre daouzec mab Jacob. An ebstel, nemet eur vaz gantho en ho dorn, a c'hounezas ar bed oll dre an nerz euz a gomzou Doue a brezgent d'an dud; evelse Jedeon, gant eur vandennadic soudardet ha ne oa gantho nemet troumpillou hag a bep a letern, goulou enghan, en devoa trec'het gueich all eun arme a enebourien ha ne c'helle den ho niveri.

### 33. S. Ian-Vadezour dibennet.

Herodes, roue ar Galilee, en devoa kemeret evit pried, a enep peb guir ha peb lezen, Herodiades, greg he vreur. Ian a ioa eat d'he gaout evit rebech dezhan ar scouer fall a roë e kement-se. «Pec'het o peuz, emezhan d'ar roue, o telc'her evit pried greg ho preur.» Herodes a ieas kement a zrouc enghan o clevet ar rebech-se ma roas urs da zastum Ian-Vadezour ha d'hen teuler er prizoun, carget a chadennou. Mes an dra-ze ne oue ket aoualc'h evit Herodiades: houma, en he c'hounnar, a glaskas an tu da lakaat d'ar maro ar prophet calounec; rac ne c'helle mui he c'houzañv abalamour ma coundaone he buez direol.

Hogen, d'an deiz m'oa ganet, Herodes a roas eul lein vraz d'he offiserien ha d'an dud a renk huela euz ar Galilee. Merc'h Herodiades a zansas epad lein hag a blijas kement da Herodes, ha d'ar gour-



pagnunez a ioa oc'h taol, ma lavaras dezhi ar roue:

«goulennit diganeñ ar pezh a geroc'h, ha me hen roïo deoc'h, ha pa ve zoken an anter euz va rouantelez e ve.» Hag er memes amzer e touas var he le e talc'hje mad d'he c'her. Ar verc'h a ieas neuze er meaz euz ar zal da c'houlenn euzul digant he mamm. — «Va mamm, emezhi, petra c'houlenninn?» Hag he mamm dezhi kerkent: «goulenn penn Ian-Vadezour.» Ha setu ar verc'h da zistreñ da gaout Herodes, ha da lavaret dezhan: «me c'houlenn ma vezo digasset dinn ama dioc'htu penn Ian-Vadezour var eur plad.» Ar goulenn-ze a reas calz poan d'ar roue; mes abalamour m'en devoa touet var he le e raje ar pezh a vije goulennet diganthan, e cassas tud ractal da zibenna Ian-Vadezour en he brizoun. Ar penn a oue digasset er zal var eur plad, ha roët d'ar verc'h iaouank; hag houma a ieas rac eñ d'he gass d'he mamm.

Evel Ian-Vadezour, ar prophet santel Elias a ioa eat ive, gueich all, da gaout Akab, ar roue difeiz, hag hema, dre gassouni oc'h ar virionez, a ioa falvezet dezhan ive lakaat d'ar maro an den Doue.

#### 34. Jesus a laka ar bara da greski.

Araoc goueliou Pask, an ebstel a zistroas da gaout ho Mestr, evit counta dezhan ar pezh o doa great epad m'oant bet o vale dre ar vro, daou ha daou, en eur brezec. Jesus a lavaras dezho neuze: «deuit da ziskuiza eun tammic.» Setu hi eta da bignat en eur vag, ha da vont en tu all da vor ar Galilee, en eul leac'h gouez ha distro. Mes eur maread tud a ieas di var ho lerc'h. Jesus, o velet an niver braz-se a dud, en devoue truez outho. En em lakaat a reas da genta d'ho c'helen ha da barea ar re glañv a ioa en ho zouez. Dioc'h an abardaëz, he ziskibien a deuas d'he gaout, en eur lavaret: «emaomp ama en eul leac'h gouez, hag ema erru an noz. Livirit eta d'an dud-se en em denna er c'heriadennou hag er bourcou divar dro, el leac'h ma c'hellint prena eun tamm bennac da zibri.» Jesus a respountas: «roët dezho da zibri oc'h unan. Pet bara a zo ganeoc'h?» — «Pemp bara ha daou



besk ; mes petra eo an dra-ze etre kement all a dud?» a lavaras an diskibien. Jesus a roas urs couls goude da lavaret d'an dud azeza var ar geot ; ha goudeze e kemas ar pemp bara hag an daou besk, hag, o veza ho benniget en eur zavel he zaoulagad etrezec an eñv, e reas tammou anezho hag ho roas d'he ziskibien da ingala etre ar bobl. Hogen, bez' ez oa eno pemp mil den bennac ; dibri a rejont oll, hag oll o devoue leiz ho c'hof. Neuze Jesus a lavaras d'he ziskibien : « it da zastum ar pez a zo chomet a zilerc'h an dud, evit ne d'ãi netra da goll. » Mont a rejont, ha gant ar pez a ioa chomet a zilerc'h e oue pe a dra da garga daouzec paner. Ar bobl en devoue kement a anaoudegez vad evit hor zalver, abalamour d'ar miracl-se, m'en devoa c'hoant d'he lakaat da roue. Mes Jesus, o c'houzout petra zonje ar bobl, en em dennas kuit, hag a ieas fenez da Gapharnaüm gant he ziskibien.

### 35. Promessa divar benn sacramant an aoter.

Antronoz, ar bobl a glaske Jesus e peb leac'h; he gaout a reas erfin e Capharnaüm. Hor zalver, o velet ne glaske an dud-se anezhan nemet abalamour an dervez araoc o doa bet da zibri diganthan leiz ho c'horf, a lavar-as dezho : « n'e ket evit caout ar bouet a ia da netra eo e tleit labourat, mes evit caout ar bouet a roïo deoc'h Mab an den, hag a gasso ac'hanoc'h d'ar vuez a bado da viken. Me eo ar bara a vuez a zo diskennet euz an eñv; an nep a zebro euz ar bara-ze a vevo da virviken. Hag ar bara a roïnn-me da zibri eo va c'horf, a vezo lakeat etre daouarn ar vourrevien evit silvidigez ar bed.» Hiniennou euz ar re a ioa ouz he zelaou a lavar-as neuze : « penaoz e c'hello hema rei deomp he gorf da zibri? » Ha Jesus a respountas : « e guirionez, e guirionez m'hel lavar deoc'h : ma ne zebrit ket corf Mab an den, ha ma ne evit ket he c'hoad, n'o pezo ket ar vuez ennoc'h. An nep piou bennac a zebro va c'horf hag a evo va goad en devezo ar vuez a bado da viken, ha me a raïo dezhan sevel euz a varo da veo d'an deiz diveza euz ar bed. Rac va c'horf a zo e guirionez eun dra da zibri, ha va goad, eun dra da eva.»

O clevet ar c'homzou-ze, meur a hini euz ar re a ioa oc'h heul hor zalver a deuas ho feiz da laoskaat, hag a ieas kuit en eur lavaret : « setu aze traou tenn da glevet; piou a c'hell credi kement all? » Mes Jesus a gendalc'has da brezec oa red credi ar pez en devoa discleriet divar benn ar sacramant adorabl euz an aoter, ha d'ar fin e c'houlennas digant he ebestel : « ha c'houi, c'hoant o peuz ive da vont kuit? » Per a respountas ractal en hano an oll ebestel : « Mestr, da gaout piou ez affempni? Ho comzou-c'houi a ro ar vuez a bado da viken. Evidompni a gred hag a anavez ervad eo c'houi ar C'hrist, hag ez oc'h e guirionez Mab da Zoue.»

Ar mann, guen ha dous evel ar mel, a gouezas bemdez euz an eñv keit ha ma chomas an Israelitet en dezert, evit maga ha creski enno buez ar c'horf. Ar mann-ze a

ioa eur merk euz ar bouet-se eb he bar a zisken bemdez euz an eñv var an aoter, hag a ziskenno betec fin ar bed, evit beza ingalet etre ar gristenien fidel, ha ser-vichout da vaga ha da greski en ho eneou ar vuez dreist-natur euz ar c'hras.

### PEMPET PENNAD.

*An trede blavez ma prezegas hor Zalver Jesus-Krist.*

#### 36. Ar Gananeeenn.

Jesus a skoas varzu Tir ha Sidon. Ha setu eur vaouez a Ganaan, hag hi pañanez, o tont etrezec enghan, en eur lavaret: «Aotrou, mab da Zavid, o pet truez ouzinn! Va merc'h a zo goal-gasset gant an drouc-speret.» Mes hor zalver ne reas van evit he c'hlevet. Ha setu he ziskibien da lavaret dezhan: «roït he c'hounje dezhi; rac ne ra nemet crial var hon lerc'h.» Ha Jesus a respountas: «n'oun bet digasset nemet da gaout an deñvet dianket euz ar bobl a Israël.» Neuze ar vaouez-se a dosteas outhan, hag en em strinkas d'he dreïd, en eur lavaret: «Aotrou, va zicourit, me ho ped.» Ha Jesus a respountas adarre: «n'e ket mad kemeret bara ar vugale evit hen teuler d'ar chass.» — «Guir eo, eme ar Gananeeenn; coulsgoude, Aotrou, ar chass bihan a zebr ar bruzunachou a gouez divar daol ho mistr.» Neuze Jesus a lavaras dezhi: «o maouez, ho feiz a zo braz. Ra vezo great deoc'h hervez m'o peuz goulennet!» Ha kerkent merc'h ar vaouez-se a deuas da barea.

Jesus a gav ar feiz etouez ar bañanet a Zidon, evel Jonas her c'hasas ive gueich all etouez ar bañanet a Niniv.

#### 37. Ar renk kenta roët da S. Per.

Jesus, o veza deuet da gear Cesaree, a c'houlennas digant he ziskibien: «piou a zonch deoc'h oun-me!» Ha setu Simon-Per da respount dioc'htu: «c'houi eo ar C'hrist, guir Vab Doue!» Neuze Jesus a lavaras dezhan: «eüruz oc'h, Simon, mab da Jonas, abalamour n'e ket



gant car na mignoun eo o peuz desket an dra-ze, mes gant va Zad pehini zo en eñv. Setu perac me a lavar deoc'h : c'houi a zo Per, da lavaret eo, mean, ha var ar mean-ze me a ziazezo va Ilis, hag an ifern gant he oll c'halloud ne vezo biken treac'h dezhi. Me a roïo deoc'h alc'houeziou rouantelez an eñv, ha kement tra o pezo liammet var an douar a vezo liammet ebarz en eñv, ha kement tra o pezo diliammet var an douar a vezo ive diliammet en eñv.»

Jesus a jozas an abostol s. Per evit beza ar mean-diazez hag ar penn euz he Ilis, abalamour m'oa bet ar c'henta o sevel he vouez evit discleria dirac an oll ec'h anaveze hor zalver evit guir Vab Doue. Setu dija tost daou vil bloaz zo m'ema an Ilis en he za, sounn ha dress, en despet d'an oll barrou-amzer a gouez varnhi, hervez ar bromessa great gueich all da s. Per gant hor zalver Jesus-Krist.

### 38. Transfiguration hor Zalver.

C'houec'h dervez goude, Jesus a gemeras Per, Jakes ha Ian, hag ho c'hassas ganthan var eur menez huel. Eno ec'h en em *dransfiguratus* dirazho; he dal a deuas da





veza skeduz evel an heol, hag he viscamant guen evel an erc'h. Ha setu Moïzes hag Elias o tont var ar menez da gomz ganthan. He galoun leun a joa o velet kement all, Per a lavaras neuze da Jesus: «eun dudi eo beza ama; mar kirit, ni zavo ama tri delt, unan evidoc'h, eun all evit Moïzes, hag eun all evit Elias.» N'oa ket he gomz ganthan peur-achuet pa oue goloët, heñ hag an daou abostol all, gant eur goabren lugernuz. Ha setu eur vouez o tont euz a greiz ar goabren, hag o lavaret: «Hema eo va Mab muia caret, an hini m'eo va oll flijadur sonjal ennhan; selaouit-heñ.» O cievei ar vouez-se, an diskibien a oue spountet, hag a gouezas var ho fenn d'an douar. Mes Jesus a ias d'ho c'haout, hag a douchas outho, en eur lavaret: «savit, ha n'o pezet aoun ebet.» Sevel a rejont ractal ho daoulagad, ha ne veljont mui den en dro dezho nemet Jesus. Hor zalver a lavaras dezho neuze: «ne livirit ger euz ar pez o peuz guelel ama, ken na vezo savet Mab an den euz a varo da veo.»

Hor zalver, en he dransfiguration, en em ziscouez d'he ziskibien e creiz etre an daou zen brudeta euz al lezen goz; Moïzes, an hini a roas al lezen d'ar bobl a Israël, hag Elias, ar prophet-se a reas kement a viraclou. Mes mar d'oa caër ar re-ma da velet, kement-se ne oa netra e scoaz ar pezh ma'z oa Jesus he unan. Ilor zalver a falvezas dezhan rei da anaout dre eno eo diganthen e teu peb genet ha peb nerz ken el lezen goz, ken el lezen nevez.

**39. Jesus, mignoun ar vugale. — Ar pec'het a scouer fall.**

Eun dervez, Jesus a ioa dija skuiz o prezec. Ha setu e teujot da zigass dezhan eur maread bugaligou vihan, evit ma plicheuse ganthen lakaat he zaouarn varnezho hag ho bennigen. An ebestel a scandale ar mammou, hag o doa c'hoant d'ober dezho mont en dro gant ho



bugale. Mes Jesus a lavaras d'he ebestel: « list ar vugaligou-ze da zont betec ennon; rac d'ar re-ze ha d'ar re a zo heñvel outho eo rouantelez an eñv. » Ha

neuze e kemere ar vugale-ze euz a-dre divreac'h ho mammou, e vriate anezho gant carantez, hag ec'h astenne he zaouarn varnho evit ho bennigen.

Eur veich all diskibien hor zalver a c'houlennas diganthan : « piou a vezo ar brassa e rouantelez an eñv ? » Neuze Jesus a c'halvas eur c'hrouadur, hag, o veza he lakeat e creiz he ziskibien, e lavaras d'ar re-ma : « e guirionez m'hel lavar deoc'h, ma ne deuit ket da veza heñvel ous bugaligou vihan, ne d'eoc'h ket da rouantelez an eñv. An nep a vezo humbl evel ar c'hrouadur-ma, hennez a vezo ar brassa e rouantelez an eñv. Hag an nep a zigemero em hano-me eur bugel evel hema, am digemero-me va unan. Mes an nep piou bennac a roïo scouer fall da unan euz ar vugaligou-ze a gred ennon, guell e vije dezhan e vije bet staget eur mean-milin ouz he c'houzoug, hag e vije bet taolet evelse e goueled ar mor. Malheur d'an den a ro scouer fall ! Divoallit da zisprijout unan ebken euz ar vugaligou-ma ; rac, m'hel lavar deoc'h, ho elez mad a vel bepret fas va Zad pehini zo en eñv. »

Evel Tobias a oue henchet ha divoallet dioc'h peb drouc gant eun eal, evelse ive an dud oll o deuz eun eal evit ho divoal, petra bennac ne c'heller ket he velet gant daoulagad ar c'horf.

#### **40. Divar benn pardouni an offansou. Ar zervicher ne fell ket dezhan pardouni.**

Eun dervez an abostol s. Per a c'houlennas digant hor zalver : « Mestr, pet gueich e renkinn-me pardouni d'am breur, p'en devezo va offanset ? Betec seiz gueich ? » Ha Jesus a respountas : « ne lavaran ket deoc'h betec seiz gueich ebken, mes betec dec ha tri-ugent gueich seiz gueich. Setu perac rouantelez an eñv a zo heñvel ouz eur roue hag a c'hoanteas guelet penaoz edo ar gount etre he zervickerien hag heñ. Hogen, unan euz ar re-ma a vanke dezhan dec mil pezh arc'hant. Evel n'en doa ket a be a dra da baëa, ar roue a roas urs d'he verza, heñ, he c'hreg, he vugale, ha kement munud mad en doa, evit

sevel ar pezh a vanke. Mes ar zervicher-ze en em strinkas da dreïd he vestr, en eur lavaret : « gortozit ganeñ, me ho ped, ha divezatoc'h me ho paëo. » Ar roue a gemeras neuze truez outhan hag hen lezas da vont kuit : pardouni a reas dezhan zoken ar pezh a vanke. Ar zervicher-ze, o veza en em gavet goudeze gant eur zervicher all hag a vanke dezhan cant diner, a lammas dioc'htu da gregi en he c'houzoug, en eur lavaret : « ro dinn ar pezh a vankes. »



Ar zervicher all en em strinkas d'he dreïd oc'h he bedi da gaout truez outhan. « Roit amzer dinn, emezhan, ha divezatoc'h me ho paëo. » Mes heñ ne falvezas ket

dezhan gortoz, hag a reas dastum he goupagnoun hag he lakaat er prizoun ken n'en devije paët he zle. Couls-goude ar zervicherien all euz ar palez a gavas an dra-ze eun dra iskiz, ha setu hi da gounta d'ar roue ar pezh a ioa c'hoarvezet. Ar roue a c'halvas neuze dirazhan ar zervicher digaloun, hag a lavaraz dezhan : « servicher fallacr, m'em euz pardounet deoc'h ho tle abalamour m'o peuz va fedet ; ha ne dliac'h-hu ket eta ive caout truez ouz ho coumpagnoun evel m'am euz-me bet va unan truez ouzoc'h ? » Ha var gement-se ar roue, drouc enghan, a lakeas ar zervicher-ze etre daouarn ar vourrevien ken n'en devije paët ar pezh a vanke guennec evit guennec. Setu aze petra raïo deoc'h ive va Zad pehini zo en eñv, ma ne bardounit ket d'ho preudeur euz a greiz ho caloun. »

**41. Ar c'halloud da liamma ha da ziliamma  
roët d'an ebestel.**

D'ar memes mare Jesus a lavaras d'he ebestel : «e guirionez m'hel lavar deoc'h, kement o pezo liammet var an douar a vezo liammet ebarz en eñv, ha kement o pezo diliammet var an douar a vezo ive diliammet ebarz en eñv.»

«Hag an nep ne zelaou ket an Ilis a zo heñvel oc'h eur pañan hag och eur publican.»

An nep ne zelaou ket an Ilis a erruo ganthan ar pez a erruas gant an dud a veve en amzer Noë : mont a rañ da goll evel an dud-se, pere ne rejont van ebet ken nebeut evit clevet an aliou mad a roë Noë dezho a berz Doue.

**42. Parabolen ar Samaritan.**

Eun doctor euz al lezen a deuas eun deiz da gaout Jesus evit he denti : «Mestr, emezhan, petra dlean-me da ober evit caout ar vuez a bado da viken?» Jesus a c'houlennas outhan d'he dro : «petra zo scrivet el lezen?» Hag an doctor a respountas : «caret a reoc'h ho Toue euz oc'h oll ene, euz oc'h oll nerz hag euz oc'h oll spe-ret ; ha caret a reoc'h ive ho nessa eveldoc'h oc'h unan.» — «Respount mad o peuz great, eme hor zalver ; n'o peuz nemet ober an dra-ze, hag e vevoc'h.» — «Mes, a c'houlennas adarre an doctor, piou eo va nessa?» Neuze Jesus a lavaras dezhan : «eun den a ioa o tisken euz a Jerusalem da Jeriko pa zaillass varnhan eur vanden laëroun. Ar re-ma hen lakeas, coulz lavaret, en noaz, ha, goude beza goal-skoët ganthan, ez ejont kuit, hag hen lezchont anter-varo var an hent. Eur belec a dremenas dre eno ha ne reas van evit he velet. Eur zervicher all euz an templ a ieas ive ebiou eb en em zale da rei sicour ebet dezhan. Erfin, eur samaritan hag a ioa o veachi, o veza remerket e pe stat edo an den-ze, a gemeras truez outhan. Mont a reas d'he gaout, ha, da genta, e voalc'has he c'houlou gant eol ha guin, hag e lakeas varnho eun dra bennac da stanka ar goad. Goudeze e sammas



anezhan var  
he loan, hag  
her c'hassas  
ganthand'an  
hostaliri.

Antronoz e  
roas daou  
ziner d'an  
hostis, en  
eur lavaret :  
« o petsoursi  
euz an den  
am euz di-  
gasset ama  
deac'h, ha,  
ma n'o peuz

ket a arc'hant aoualc'h aze, pa vinn distro, me baëo deoc'h ar pezo o pezo dispignet ouspenn.» — Pehini euz an tri-ze, eme hor zalver d'an doctor, a gav deoc'h a oue nessa an den a ioa couezet etre daouarn al laëroun?» An doctor a respoutas : « an hini en deuz kemeret truez outhan.» — « Mad, eme Jesus, it, ha grit evel en deuz great.»

#### 43. Martha ha Mari.

Jesus a erruas goudeze e bourg Bethanii. Eno, eur vaouez, he hano Martha, hen digemeras en he zi. Martha



e devoa eur c'hoar, hanvet Mari; houma a deuas da azeza eharz treïd hor zalver gant aoun da goll eur ger euz ar pezo a lavarje. Coulsgoude Martha a ioa prez varnhi o clask pourchass eun tamm bennac da zibri. Mont

ha dont a rea dre an ti eb ehana; erfin e chomas en he

za dirac Jesus hag e lavaras dezhan : « Mestr, ne velit-hu ket e lez va c'hoar an oll labour ganeñ da ober? Livirit dezhi-ta sevel d'am zicour. » Mes hor zalver a respountas : « Martha, Martha, poan ha tregaz a gemerit gant calz a draou. Hogen, n'euz nemet eun dra hag a ve red. Mari e deuz choazet evithi al loden vella, hag al loden-ze ne vezo ket lamet diganthi. »

#### 44. Peden an Aotrou.

Eun dervez m'oa bet Jesus o pedi en eul leac'h distro, unan euz he ziskibien a lavaras dezhan : « Mestr, deskit deomp pedi evel m'en deuz Ian desket d'he ziskibien. » Ha Jesus a respountas : « pa bedoc'h, livirit evel-hen : Hon Tad pehini zo en eñv, oc'h hano bezet santifiet, ho rouantelez deuet deomp, ho polontez bezet great var an douar evel en eñv. Roit deomp hirio hor bara pemdezic, ha pardounit deomp hon offansou evel ma pardounomp d'ar re o deuz hon offanset, ha n'hon lezit ket da goueza en dentation, mes hon dilivrit dioc'h an drouc. Evelse bezet great ! »

Jesus a lavaras c'hoaz : « deuit oll davedon-me, c'houi pere a zo er boan hag a zindan ho peac'h, ha me a raïo vad deoc'h. En em lakiit e va zervich, ha deskit ganeñ-me beza dous hag humbl a galoun. Evelse e cavoc'h ar peoc'h a glask oc'h eneou. Rac e va zervich-me n'euz netra tenn, ha va gourc'hemennou a zo eur beac'h scañv da zougen. »

#### 45. An danvad dianket hag ar pastor mad.

Jesus a ieas da Jerusalem evit gouel an tabernaclou; eno e kelennas ar bobl hervez he gustum hag e countas parabolennou euz ar re gaëra. Etouez ar re a ioa aketuz da vont d'he zelaou, ez oa publicanet ha tud anavezet gant an oll evit pec'herien vraz. Ar pharizianet hag an doctoret euz al lezen a gave abec e kement-se. Hor zalver a ziscouezas dezho dre eur barabolen perac e carie gulet ar bec'herien o tont d'he gaout. « Ma ve unan bennac





ac'hanoc'h,  
emezhan,  
hag en deffe  
cant dañvad,  
ha ma teuffe  
da goll unan  
anezho,  
daoust ha ne  
lezfe ket an  
naontec ha  
pevar-ugent  
dañvad all el  
leac'h m'em-  
aïnt o peuri,  
evit mont da  
redet var-

lerc'h an hini en deuz collet? Hag eur veich m'en deffe he gavet, e sammfe anezhan laouen var he choug, ha, pa ve erruet er gear, e c'halvfe he vignounet hag he amezeien, en eur lavaret: «deuit da gemeret perz em joa; rac va dañvad a ioa dianket, ha setu em euz he gavet adarre.» Evelse, m'hel lavar deoc'h, e vezo muioc'h a joa en eñv evit eur pec'her a rañs pinijen, eget evit naontec ha pevar-ugent den just pere n'o deuz ket a ezom da ober pinijen.»

«Me eo ar pastor mad. Eur pastor mad a gass he zeñvet var ar peuri; bale a ra en ho raoc, hag hi a ia d'he heul, abalamour ma'c'h anavezont he vouez. Evelse va deñvet-me a deu d'am heul; rac me a anavez anezho, hag hi a anavez ac'hanon. Me eo ar pastor mad. Eur pastor mad a ro he vuez evit he zeñvet. Mes an hini ne zivoal an deñvet nemet evit arc'hant, hennez a dec'h kuit pa vel ar bleiz o tont. Evidon-me a ro va buez evit va deñvet. Bez'em euz c'hoaz deñvet all ha n'emaïnt ket etouez ar vanden-ma. Red e dinn ho gervel da zont en he zouez; selaou a rañt va mouez, hag evelse ne vezo nemet eur vanden deñvet ha nemet eur pastor.»



## 46 Ar mab prodic.

Jesus a lavaras c'hoaz : « eun den en devoa daou vab. Hag ar iaouanka anezho a lavaras d'he dad : va zad, roït dinn va lod euz ho tanvez. Hag an tad a rannas he zavez etre he vugale. Abenn eun dervez bennac goude, ar mab iaouanka a reas he bacad da vont kuit euz ar gear. Ha setu heñ d'en em denna en eur vro bell, evit beva eno en he roll. Mes o ren ar vuez a rene, ar pez en devoa a denzas buhan etre he zaouarn. Edo dija var an douar noaz, pa deuas eur gernez vraz er vro-ze. Evit herzel oc'h an naoun, ec'h en em lakeas neuze e servich eun den euz ar vro. Hema her c'hassas da eun ti en doa var ar meaz da zivoal ar moc'h. Hogen, ar mab prodic a vije bet joa ganthan carga he gof gant ar mez a zebre ar moc'h ; mes ne gave den da rei dezhan. Erfin, e tistroas ennhan he unan, hag e lavaras : «nag a bet mevel a zo er gear, e ti va zad, hag o deuz bara da zibri leiz ho c'hof, ha me a zo ama dare da vervel gant an naoun ! Mes ne jominn ket mui ; nan, mont a rinn da gaout va zad, ha lavaret a rinn dezhan : va zad, pec'het am euz a enep Doue hag en oc'h enep-c'houi. N'oun mui din da veza galvet ho mab ; mes kemerit ac'hanon da vihana evit ho mevel.» Ha var gement-se, setu heñ en hent evit distrei da gaout he dad. He dad, o veza he remerket o tont a ziabell, en devoue truez outhan ; en eur redaden e oue en he gichen, ha kerkent e lammas d'he vriata ha da boket dezhan. Couls goude ar mab a lavare : va zad, pec'het am euz a enep Doue hag en oc'h enep-c'houi ; n'oun mui din da veza galvet ho mab ! Mes an tad ne roas ket amzer dezhan da achui, hag a lavaras d'he zerviche-rien : it buhan da gerc'hat brava saë am euz em armel da rei dezhan da viska ; digassit ganeoc'h ive eur bizou da lakaat dezhan var he viz, hag eur re voutou da lakaat en he dreïd. Ha goudeze it d'ar c'hraou da laza al leue lard a zo eno, ma vezo great eur goan vraz e verr. Rac va mab a velit aze a ioa maro, ha setu heñ beo adarre ; collet oa, ha setu heñ cavet. — Couls goude ar mab cossa



a ioa er park o labourat. Pa deuas d'ar gear dioc'h an abardaëz, e oue souezet o clevet trouz ha jolori en ti, ha setu heñ da c'houlenn ouz eur mevel petra a ioa a nevez. Ar mevel a gountas dezhan edot o pourchass eur goan vraz en honor d'he vreur a ioa distro. O clevet an dra-ze, ar mab eossa a i eas drouc enghan, hag he dad o veza deuet d'he gaout, ec'h en em glemmas outhan en eur lavaret : abaoue keit all a amzer zo m'emaoun o labourat evidoc'h, n'o peuz biscoaz roët dinn eur c'havrie ebken da zibri gant va mignounet ; ha coulsgoude me'm euz great ato ho polontez e peb tra. Mes kerkent ha m'eo distroët d'ar gear ar mab-se en deuz lonket he zanvez o veva en he roll gant merc'hed fall, o peuz lakeat laza evithan al leue lard a ioa er c'hraou. Neuze he dad a lavaras dezhan : va mab, e'houi a zo ato ganeñ, ha kement tra a zo dinn a zo deoc'h ive. Mes red oa ober eur fest hirio da goan hag en em reï d'ar joa, abalamour ho preur a ioa maro, ha setu heñ beo adarre ; collet oa, ha setu heñ cavet.»

Ar barabolen-ze a zo eur gentel roët deomp gant Jesus-Krist divar benn ar zacramant a binijen. Ar mab prodic a anavez da genta he bec'het, keuz en deuz dezhan, ha

*lakaat a ra calet en he benn* distrei da gaout he dad. Ouspenn-ze, *coves* a ra he bec'het, ha prest eo da *zatisfia* pe da ober pinijen evit ar pec'het-se, en eur goll he hano a vab evit beza mevel ebken e ti he dad. Evelse ar c'hristen a dle ive anaout he bec'hejou, caout keuz dezho, ho c'hassaat, ho c'hoves, hag ober ar binijen a zo merket dezhan. Er feson-ze e teu adarre da veza mignoun da Zoue dre an absolven a ro dezhan ar belec.

#### 47. Ar fals pinvidic hag ar paour-keaz Lazar.

Jesus a gelennas c'hoaz ar bobl dre barabolennou all evel houma : « bez' ez oa, emezhan, eun den pinvidic pehini a veze guisket caër hag a rea cher-vad bemdez. Bez'ez oa ive eur paour keaz, he hano Lazar, hag a ioa he gorf goloët a c'houliau. Hema a veze gourvezet eharz dor an den pinvidic, o c'hortoz carga he gof gant ar bruzunachou a goueze divar he daol ; mes den ne deue da zigass dezhan ar bruzunachou-ze : ne dostea outhan nemet ar chass euz an ti, a deue da lipat he c'houliau gant ho zeod. Hogen, dont a reas ar maro d'ar paour keaz-se, hag he ene a oue douget gant an elez d'al limbou e coumpagnunez Abraham. Dont a reas ive ar maro d'an den pinvidic, hag ene hema a oue stlapet en ifern. O veza savet he zaoulagad, epad m'edo eno o leski, e velas a ziabell Abraham ha Lazar en he gichen. Ha setu heñ da grial : tad Abraham, o pet truez ouzinn, ha digassit Lazar da zouba penn he viz en dour evit refreski va zeod eun tammic ; rac n'oun ket evit herzel gant ar boan am euz e creiz ar flammou-ma. Mes Abraham a respountas : va mab, o pet sonch peger mad oa ho toare epad m'edoc'h var an douar, ha peger fall oa neuze hini Lazar ; brema Lazar a zo er joa, ha c'houi er boan : peb hini d'he dro eo ! Ouspenn zo, ac'hann d'al leac'h m'emaoc'h ez euz keit ma n'ema ket e galloud den mont ac'hann di, pe dont ac'hano ama. »

« Ar fals pinvidic a lavaras neuze : me ho ped da vihana, tad Abraham, da gass Lazar da di va zad da lavaret d'ar pemp breur am euz c'hoaz beo petra zo er plas-ma a boan, gant aoun na errufe gantho ive ar peza a zo erruet



ganeñ-me. Mes Abraham a respontas adarre : ho preudeur o deuz evit ho c'helen Moïzes hag ar brophetet ; perac ne zelaouont ket ar re-ze ? — Guir eo, eme ar fals pinvidic ; mes ma'z affe d'ho c'haout unan bennac euz a douez ar re varo, me gred e teuffent kentoc'h da ober pinijen. — Nan, a respontas erfin Abraham ; ma ne zelaouont na Moïzes nag ar brophetet, ne raffent ket muioc'h a van ha pa'z affe unan bennac euz a douez ar re varo da brezec dezho.»

#### 48. Jesus a bare eun den ganet dall.

En eur zont euz an templ, eur zadornvez, da c'houel an tabernaclou, Jesus a erruas gant eun den hag a ioa ganet dall. He ziskibien a c'houlennas diganthan : « Mestr, pe abalamour d'he bec'hejou he unan, pe abalamour da bec'hejou he dud, eo an den-ze ganet dall ? » Jesus a respontas : « ne d'eo nag abalamour d'he bec'hejou he unan, nag abalamour da bec'hejou he dud ; mes evit rei tro da



Zoue da ziscouez he c'halloud burzuduz.» O veza comzet evelse, hor zalver a grañchas d'an douar, a reas pri gant he granch, hag a lakeas ar pri-ze var daoulagad an den dall, en eur lavaret dezhan : «it d'en em voalc'hi e pinsin Siloë.» An den dall a ieas, hag en eur zistrei ac'hano e vele ker selear ha peb hini.

Ar re hen anaë, hag o devoa he velet meur a veich o elask an aluzen, a ioa souezet maro. Digass a rejont anezhan da gaout ar pharizianet, evit counta dezho penaoz oa bet pareet gant Jesus. Goude beza clevet he histor, ar pharizianet a lavare, hiniennou anezho : «ar Jesus-se ne deu ket a berz Doue, pa'z e guir ne vir ket ar zadorn.» Coulsgoude hiniennou all a lavare ive : «penaoz e c'helfe eur pec'her ober miraclou evelse?» Lod all erfin ne felle ket dezho credi e vije bet dall an hini a ioa dirazho. Gervel a rejont eta he dud, hag e c'houlennjont digantho : «hag hema eo ho mab, an hini a livirit a zo ganet dall? Penaoz eta eo deuet ar guelet dezhan?» Hi a respountas : «gouzout a reomp eo hema hor mab, hag ez eo ganet dall. Mes evit lavaret deoc'h avad penaoz eo deuet ar guelet dezhan, n'her gouzomp ket. Goulennit

diganthan he unan, mar kirit; oad aoualc'h en deuz da respount deoc'h.» Ar pharizianet eta a c'houlennas adarre digant an hini a ioa bet dall : «penaoz en deuz Jesus digoret deoc'h ho taoulagad?» Hag heñ a respountas : «lavaret am euz great deoc'h dija; perac e fell deoc'h clevet diou veich ar memes tra? Daoust ha c'hoant o peffe ive da veza diskibien da Jesus?» Ar respount-se a dennas varnhan a bep seurt malloziou ha goal-bedennou a berz ar pharizianet. Couls goude e lavaras dezho c'hoaz : «me zo souezet gancoc'h, ne c'houlfac'h ket euz a be-leac'h eo ar Jesus-se en deuz digoret dinn va daoulagad. Abaoue m'ema ar bed-ma en he za, n'ez euz biscoaz clevet lavaret e ve bet digoret he zaoulagad da eun den ganet dall. Ma ne vije ket bet a berz Doue an hini en deuz va fareet, n'en devije gellet biken ober kement all.» O clevet ar c'homzou-ze, ar pharizianet a ieas muioc'h-mui a gounnar ennho : «c'houi, emezho d'an hini a ioa bet dall, n'euz nemet fallagriez ouz oc'h heul, hag e fell deoc'h ober scol deompni?» Ha var gement-se e lakejont anezhan er meaz euz ho zi.

Jesus a glevas oa bet lakeat er meaz gantho, hag, o veza cavet anezhan goudeze var he hent, e c'houlennas diganthan : «credi a rit-hu e Mab Doue?» Hag heñ a respountas : «piou eo, Aotrou, evit ma credinn ennhan?» — «He velet a rit, eme Jesus; rac heñ he unan eo a gomz ouzoc'h.» Neuze an den a ioa bet dall a lavaras : «credi a ran, Aotrou,» ha ractal ec'h en em strinkas d'an douar evit adori hor zalver.

Ama e velomp o tont da vir en eur feson burzuduz ar pez en devoa discleriet gueich all ar prophet Isaias : «ar re zall a zigoro ho daoulagad!» Eur miracl evel hennec ne c'hell beza great nemet gant an hini a zo «sclerijen ar bed.»

#### 49. An dec den lor.

Goude gouel an tabernaclou, Jesus a dremenas dre ar Samarii hag ar Galilee. Ha setu dec den lor oc'h en em gaout ganthan, hag hi o chom a za dal m'her gueljont

hag o sevel  
ho mouez a  
ziabell, en  
eur lavaret :  
« Jesus, hor  
Mestr, o pet  
truez ouz-  
omp ! » Jesus,  
o veza ho  
remerket, a  
lavaras dez-  
ho : « it d'en  
em ziscouez  
d'ar ve-  
leien. » Ha  
setu, epad



m'edont o vont, ec'h en em gavchont pare. Unan anezho, o velet oa pare, a deuas dioc'htu var he giz en eur veuli Doue a vouez huel. Ha setu heñ d'en em strinka da dreïd hor zalver evit he drugarekaat. Hogen, an den-ze a ioa eur samaritan, ha Jesus a lavaras dezhan : « daoust ha n'oc'h ket pare ho tec ? E peleac'h eta ema an nao all ? Var dec n'euz nemet unan, ha c'hoaz eo eun divroad, hag a ve distroët da rei gloar da Zoue ! » — « Savit, eme hor zalver neuze d'ar samaritan-ze, hag it e peoc'h ; ho feiz en deuz ho saveteet. »

### 50. Ar publican hag ar pharizian.

Jesus a gountas c'hoaz ar barabolen-ma evit rei eur gentel da liniennou a fisie re var ho zantelez ho unan hag a rea faë var ar re all : « daou zen, emezhan, a icas d'an templ da ober ho feden ; unan anezho a ioa eur pharizian, hag egile, eur publican. Ar pharizian a jome en he za e creiz an templ, hag a rea he beden evel-hen : « me ho trugareka, o va Doue, abalamour n'oun ket heñvel ouz an dud all, ne d'int oll nemet laëroun, scraberien, avoultrerien, evel ma'z eo ar publican-ze. Me a



iun diou veich er zizun , hag aketuz oun ato da baëa an deog euz a gement am euz.» — Ar publican en em zalc'he e traoñ an templ , ha ne grede ket zoken sevel he zaoulagad etrezec an eñv ; mes skeñ a rea var boul he galoun , en eur lavaret : «va Doue , o pet truez ouzinn , rac ne d'oun nemet eur pec'her.» — E guirionez m'hel lavar deoc'h , eme hor zalver , ar publican-ze a zistroas d'ar gear gant gras Doue en he galoun ; mes egile , nan . Rac an nep piou bennac en em huela a vezo izeleat ; hag an nep piou bennac en em izela a vezo hueleat.»

### 51. An den iaouank pinvidic.

Eun den iaouank pinvidic a deuas da gaout hor zalver , hag a lavaras dezhan : «Mestr mad , petra renkan da ober evit caout ar vuez a bado da viken?» Jesus a respontas : «n'o peuz nemet miret ar gourc'hemennou.» — «Pere ,» a c'houlennas an den iaouank . — «Ar re-ma , eme hor zalver : arabad eo laza ; arabad eo ober avoul-triach ; arabad eo laëres ; arabad eo dougen fals testeni . Hag ouspenn : henorit ho tad hag ho mamm , ha carit ho nessa eveldoc'h oc'h unan.» — «Mes , eme an den





iaouank, an traou-ze oll am euz miret adalec va iaouankis ; petra vank dinn c'hoaz?» Jesus a reas neuze varnhan eur zell a garantez, hag a lavaras dezhan : «eun dra a vank deoc'h c'hoaz : mar fell deoc'h beza parfet, guerzit kement tra o peuz ha roït-heñ d'ar paour, hag o pezo eun tenzor en eñv ; ha goudeze deuit d'am heul.» O clevet ar c'homzou-ze, an den iaouank a i eas kuit, teñval he benn, rac pinvidic braz e oa. Jesus a lavaras neuze d'he ziskibien : «e guirionez m'hel lavar deoc'h, diez eo d'ar re binvidic mont da rouantelez an eñv. Mes an nep en devezo kuiteat he di, pe he dud, pe he vreudeur, pe he bried, pe he vugale, abalamour dinn-me, hennez a recevo cant kement all er bed-ma, hag er bed all en devezo ar vuez a bado da viken.»

## 52. Labourerien ar vinien.

Goude beza comzet d'he ziskibien divar benn ar recoumpans a dlïe da reï er bed all d'ar re a vije bet aketuz d'he zervicha epad ar vuez-ma, hor zalver Jesus-Krist a gountas c'hoaz dezho ar barabolen-ma : «rouantelez an eñv a zo heñvel ouz eun ozac'h pe eur penn-tiegez, hag a i eas

mintin-mad euz ar gear da glask tud da labourat en he vinien. Goude beza great marc'had outho da labourat evit eun diner hemdez, e cassas anezho da liorz ar rezinn. Var dro nav heur, ez eas adarre da ober eur bale er meaz euz he di, hag, o veza cavet devezourien all ha n'o doa netra da ober, e lavaras dezho: it ive, c'houi, da labourat em guinien, ha me roïo deoc'h ar pez a vezo dleet da reï. Hag hi mont dioc'htu. An ozac'h a reas c'hoaz eun bevelep bale da gresteiz ha da deir heur, ha bep veich e teue ganthan eul labourer all bennac. Erfin, da bemp



heur dioc'h an abardaëz, ez eas adarre da ober eun dro, hag e cavas c'hoaz devezourien hag a ioa en ho za, dibreder-caër ha croazet gantho ho divreac'h. Ha setu heñ da lavaret dezho: perac

e chomit-hu evelse epad an deiz eb ober netra? — Abalamour, emezho, n'euz deuet den d'hor goulenn. — Mad, eme an ozac'h, it, c'houi ive, da labourat e va liorz-rezinn. — Pa deuas an noz, an ozac'h a lavaras d'he vestrmevel: galvit al labourerien ha roït dezho arc'hant ho dervez, en eur baëa da genta ar re zo erruet da ziveza; ha goudeze e paëoc'h ar re all an eil goude egile, en eur lezel varlerc'h ar re a zo erruet er mintin-ma. Hogen, ar re n'oant erruet nemet da bemp heur dioc'h an abardaëz a oue roët dezho a bep a ziner. Ar re a ioa erruet da genta a zonje o devije muioc'h. Mes pa deuas ho zro da veza paët, ne oue roët ken nebeut nemet eun diner da

bep hini anezho. Neuze ec'h en em lakejont da c'hrosmolat ha d'en em glemm euz an ozac'h, en eur lavaret : ar re-ma, a zo erruet da ziveza, n'o deuz labourer nemet eun heur, hag o peuz ho faët kement ha ni, ni pere a zo bet croummet hed an deiz a zindan ar beac'h euz al labour hag euz ar c'hor ! Mes an ozac'h a respountas da unan anezho : va mignoun, ne ran gaou ebet ouzoc'h. Daoust ha n'oc'h ket en em glevet ganeñ da labourat evit eun diner ? Kemerit eta ar peuz o peuz gounezet, hag it en oc'h hent. Mar fell dinn rei d'ar re-ma all, a zo deuet da ziveza, kement a dec'houi, piou a c'hell miret ouzinn ? Daoust ha va danvez n'e ket dinu eo da ober ar peuz a girinn ganthan ? Ha perac e cavit-hu abec ennon abalamour ma'm euz c'hoant da ober vad d'ar re all ?»

Jesus a lavaras goudeze : « evelse e vezo ive e rouantelez an eñv : ar re ziveza a vezo ar re genta, hag ar re genta, ar re ziveza ; rac eleiz a zo galvet, mes nebeut a zo choazet.»

Dija, daou vil bloaz araoc donedigez hor zalver, ar iuzevien a ioa bet *galvet* da veza pobl muia caret an Aotrou Doue. Mes dre ho dizentidigez e lakejont ar c'hrasse da veza didalvez evitho, en eun hevelep feson ma n'ez euz nemet eun niver bihan anezho hag a ve bet *choazet* evit caout perz e rouantelez Jesus-Krist. Ar boblou paian, er c'hontrol, a deuas eur maread anezho da anaout Jesus-Krist evit ho Mestr hag ho Doue. Evelse ar re ziveza a zo deuet da veza ar re genta, hag ar re genta, ar re ziveza.

### 53. Resurrection Lazar.

Epad gouel dedi an templ a Jerusalem, Jesus en devoa lavaret a vouez huel : « vâ Zad ha Me ne reomp nemet unan.» Abalamour da ze ar iuzevien o devoa bet c'hoant d'he labeza, da lavaret eo, d'he laza a daoliou mein. Mes en em dennet oa euz a-dre ho daouarn, ha goudeze oa eat e costez ar Jourden. Eno en devoue kemennadurez digant an diou c'hoar Mari ha Martha, euz a vourg Bethanii, da lavaret dezhan oa toc'hor ho breur Lazar. « Aotrou, a lavare ar c'hannad a berz an diou c'hoar, an

hini a garit a zo goal glañv.» Jesus a respountas kerkent : « n'e ket clañv da vervel ; ar c'hleñvet-se n'eo deuet dezhan nemet evit gloar Doue, evit lakaat an dud da rei gloar da Vab Doue.» Abenn daou zervez goude, hor zalver a lavaras d'he ziskibien : « deomp da Vethanii ; Lazar, hor mignoun, a zo cousket ; mes me a ia d'hen dihuna.»

Pa erruas Jesus e Bethanii, Lazar a ioa dija he gorf er bez pevar dervez a ioa. Martha a deuas da ziambroug hor zalver kerkent ha ma clevas oa erru, hag a lavaras dezhan : « Aotrou, ma vijac'h bet ama, va breur ne vije ket maro. Mes brema zoken me c'hoar ervad e roio Doue deoc'h ho coulenn, n'euz fors petra c'houlennoc'h diganthan.» Jesus a respountas : « ho preur a deni adarre e buez.» — « Ia, eme Vartha, gouzout a ran ervad e teui, pa deuio ar re all, d'an deiz diveza euz ar bed.» Neuze Jesus a lavaras dezhi : « me eo an hini a zigass euz a varo da veo, me eo a ro ar vuez ; an nep a gred ennon-me a vevo, ha pa ve dija maro. Ha kement hini a vev hag a gred ennon-me, ne varvo ket da virviken. Credi a rit an dra-ze? » — « Ia, Aotrou, eme Vartha, credi a ran eo c'houi ar C'hrist, guir Vab Doue, a zo deuet er bed-ma evit hor zavetei.»

O veza comzet evelse, Martha a ieas da c'hervel he c'hoar Mari, hag a lavaras dezhi goustadic : « ar Mestr a zo a-hont ouz da c'hortoz.» Mari a zavas ractal da zont da gaout Jesus. Rac hor zalver a ioa chomet ato e kichen ar bourg, el leac'h m'oa eat Martha d'he ziambroug. Mari en em strinkas d'he dreid en eur erruout, hag a lavaras dezhan, an daëlou en he daoulagad : « Aotrou, ma vijac'h bet ama, va breur ne vije ket maro.» Hogen, an dud a ioa gant Mari en he zi a ioa deuet d'he heul, hag an dud-se a leñve ive eveldhi. Jesus, oc'h ho guelel oll o leñva, a oue tenereat he galoun, hag a c'houlennas : « e peleac'h o peuz lakeat anezhan? » — « Deuit, emezho, hag e veloc'h.» Ha Jesus he unan en em lakeas da leñva. Hag ar iuzevien a lavare : « guelit pebez carantez en devoa evithan ! » Jesus a deuas eta da gaout ar



bez, hag erruet eno, e lavaras: «lamit ar mean a zo var c'horre.» — «Mes, Aotrou, eme Vartha, c'houez zo ganthan dija.» Ha Jesus a respountas: «n'em euz-me ket lavaret deoc'h e veljac'h gloar Doue, mar carjac'h credi?» Lamet e oue eta ar mean, ha neuze Jesus en em lakeas da bedi, he zaoulagad savet etrezec an eñv, ha goudeze e lavaras gant eur vouez creñ: «Lazar, deuit er meaz!» Ha kerkent an hini maro a zavas euz ar bez leun a vuez.

#### 54. Ar iuzevien a fell dezho lakaat Jesus d'ar maro.

Ar pharizianet hag an doctoret euz al lezen, o veza clevet en devoa hor zalver lakeat Lazar da zont adarre e buez, en em assambles e ti unan anezho evit kemeret cuzul an eil digant egile. «An den-ze, emezho, a ra calz miracloù; mar lezomp anezhan da ober, ar bobl oll a gredo ennhau; mes penaoz miret outhan?» — «Bah! eme Gaïphas a ioa belec braz er blavez-se, c'houi ne c'houzoc'h netra; daoust ha n'e ket guelloc'h e varvfe

eun den ebken evit ar hobl eget na deuffe ar bobl oll d'en em goll?» Adalec an deiz-se e sonjont lakaat Jesus d'ar maro. Setu perac hor zalver a dec'has dioutho, hag en em dennas e costez an dezert en eur gear a reat Ephrem anezhi.

Dre vouarizi eo e falvezas d'ar iuzevien lakaat Jesus d'ar maro, abalamour m'oa anad d'an oll e rea traou ha ne c'helle nenet Doue ho ober. Dre vouarizi eo e teuas ive Cain gueich all da laza he vreur Abel, abalamour Doue en devoa discouezet caout muioc'h a garantez evit hema.

C'houec'h dervez goude, Jesus a gemeras an daouzec abostol en ho fart ho unan, hag a gomzas outho evelhen: «deomp brema da Jernsalem; setu deuet ar mare ma vezo lakeat Mab an den etre daouarn ar brinset euz ar veleien hag an doctoret euz al lezen. Ar re-ma her c'houndaono d'ar maro, hag hen lakañ etre daouarn ar baianet evit beza goapeat, scourjezet ha staget ouz ar groaz. Mes d'an trede deiz e savo adarre euz a varo da veo.»

### 55. Zachee, mestr ar publicanet.

Hor zalver a dremenas dre gear Jeriko. Eno ez oa eun den pinvidie, he hano Zachee, hag heñ publican hag ar mestr zoken etouez ar publicanet. An den-ze a zavas c'hoant ganthan da velet Jesus; mes ker bihan oa a vent, ha kement a dud a ioa en dro d'hor zalver, ma ne c'helle ket he velet, caër en devoa. Setu heñ



neuze da redet araoc, ha da bignat en eur vezen sicomor, evit gellout he velet pa dremenje ebiou eno. En eur erruout dirac ar vezen-ze, hor zalver a zavas he zaoulagad, hag, o veza remerket Zachee, e lavaras dezhan : « Zachee, hastit affo disken, rac me renk loja hirio en ho ti.» Zachee a ziskennas ractal, mall ha joa ganthan digemer Jesus en he di. O velet kement-se, an oll a c'hrosmole, en eur lavaret : « da di eur pec'her eo ez a da loja ! » Mes Zachee a lavaras d'hor zalver : « Aotrou, me ro an anter euz va danvez d'ar paour ; ha, mar em euz great gaou ouz unan bennac, me roïo dezhan pevar c'hement all evit ar pez am euz kemeret divar he goust.» Ha Jesus a respountas : « hirio e great silvidigez an ti-ma ; rac Mab an den a zo deuet da glask ha da zavetei ar pez a ioa collet.»

**56. Mari Madalen a scuill louzou a c'houez-vad var dreïd Jesus.**

Hor zalver a ias neuze euz a Jeriko da Vethanii, hag eno e oue pourchasset lein dezhan e ti Simon ar c'hacouz. Lazar a ioa ive oc'h taol gant an diskibien all, ha Martha eo a zerviche lein. Hogen, Mari Madalen e devoa digasset ganthi eul lur louzou a c'houez-vad euz an hini kera ; ha setu hi da scuill al louzou-ze var dreïd Jesus, en eun hevelep feson m'az eas ar c'houez vad anezhan euz an eil penn euz an ti d'egile. Goudeze e sec'has treïd hor zalver gant he bleo. O velet kement-se, Judas Iscariot a lavaras : « perac mont da goll an traou evelse ? Daoust ha ne vije ket bet guelloc'h guerza al louzou-ze, ha rei an arc'hant a vije bet evithan d'ar paour ? » Judas a gomze evelse, n'e ket ma raje calz a fors euz ar beorien, mes abalamour m'oa stag he galoun ouz an arc'hant. Hor zalver a respountas dezhan : « list ar vaouez-se ; eun dra vad e deuz great em c'heñver ; rac discouezet e deuz deoc'h petra vezo great da va c'horf araoc he lakaat er bez. Peorien aouale'h o pezo ato da zicour ; mes me ne vezinn ket ato ganeoc'h. E guirionez m'hel lavar deoc'h :

e kement leac'h ma vezo prezeget an Aviel, e vezo countet ive ar pezh e deuz great ar vaouez-se e va honor.»

Bez' ez euz c'hoaz meur a hini hag a lavar, evel Judas gueich all, eo forani an traou eget rei eun dra bennac d'an ilis. «Guelloc'h e ve, eme an dud-se, sicour ar beorien da veva ha d'en em viska.» Mes hor zalver Jesus-Krist en deuz lavaret: «grit an dra-ma; mes arabad eo evit kement-se lezel an dra-hont da ober.»

### 57. Honor great da Jesus p'edo o vont da Jerusalem.

Antronoz, hor zalver a ieas da Jerusalem; Erruet e kichen kear, eharz menez olivet, e lavaras d'he ziskibien: «it da vourg Bethphaje a zo aze dirazoc'h; caout a reoc'h eno eun azen iaouank ha n'euz bet c'hoaz den ebet var he gein. Distagit-heñ, rac caout a reoc'h anezhan



stag, ha digassit-heñ ama. Ha mar goulenn unan bennac diganeoc'h d'ober petra hen distagit, n'o peuz nemet respount: «abalamour ar Mestr en deuz ezom anezhan.»



An diskibien a i eas, hag a gavas an traou evel m'en doa hor zalver lavaret dezho. Digass a rejont gantho an azen iaouank ; teuler a rejont ho dillad var he gein, ha goudeze e lakejont hor zalver da azeza var c'horre. Epad m'edo Jesus o vont evelse da Jerusalem, eur maread tud a ioa oc'h ober coumpagnunez dezhan. Calz anezho a lede ho dillad var an douar dre ma tremene, ha lod all a drouc'he scourrou guez, hag ho zaole var an hent dirazhan. Oll, kercoulz ar re a iea araoc evel ar re a deue varlerc'h, e crient a vouez huel : « gloar da vab David ! Benniget ra vezo an hini a deu en hano an Aotrou Doue ! »

Evel an niver euz an dud-se a iea ato var gresk, ec'h en em gavas ive en ho zouez eur pharizian bennac. Ar re-ma a zavas drouc ennho o velet ober kement-se a henor d'hor zalver, ha setu hi da lavaret dezhan : « Mestr, livirit-ta d'ho tiskibien chom peoc'h. » Ha Jesus a respountas dezho : « m'bel lavar deoc'h, mar teu an dud-ma da devel, ar vein ho unan a grio. » Hor zalver a gendalc'has goudeze da vont etrezec Jerusalem eb lavaret ger, epad ma tregarne ar vro a bep tu gant mouez ar bobl o rei gloar dezhan hag oc'h ober he veulendi. P'edo o tisken en traoñ da venez Olivet, ha pa velas kear Jerusalem oc'h en em zispaka oll dirazhan, ec'h en em lakeas da vouela en eur zonzal ennhu, hag e lavaras : « O Jerusalem, ma c'houffes, da vihana en deiz-ma a zo lezet c'hoaz ganes, petra c'hell rei d'id ar peoc'h ! Mes nan, cuzet eo an dra-ze ous da zaoulagad. Dont a rañ eta eun amzer ma vezi, te ha da vugale, goasket a bep tu gant da enebourien, hag ar re-ma ne lezint ket ennoud daou vean an eil var c'horre egile. »

En eur erruout e kear, hor zalver a i eas var eun d'an templ. Eno e pareas an oll dud clañv a oue digasset d'he gaout. Ha setu ar vugale ho unan d'en em lakaat da grial : « gloar da vab David ! » O velet kement-se, ar pharizianet a i eas muioc'h-mui a zrouc ennho, hag a lavaras dezhan : « ne glevit-hu ket ar pezh a lavar ar vugale-ze ? » Ha Jesus a respountas : « eo, clevet mad a ran ; mes c'houi, ha n'o peuz-c'houi ket a zonzh euz ar c'hom-

zou-ma euz ar Scritur : euz a c'hinou ar vugale hag ar re a zo c'hoaz ous bronn ho mamm eo e deuet guella meuleudi a zo bet great ac'hanoc'h.»

Ar prophet Zakarias en devoa lavaret gueich all : «en em laouenañt, merc'hed Jerusalem, ha laoskit criadennou a joa. Setu ho roue hag ho salver o tont varzu ennoc'h ; dont a ra var eun azen evel eur paour ; mes prezec a rañ ar peoc'h d'an oll boblou euz an douar, hag he c'halloud a dizo betec ar penn pella euz ar bed.» — Jesus-Krist a erruas e Jerusalem an dervez ma tlie ar iuzevien ober ho fourchass euz an oan pascal ; erruout a reas evelse evel ar guir oan bascal a gemer varnhan pec'hejou ar bed.

### 58. Ar banket-eured.

An dervez varlerc'h, hor zalver a gelenne ar bobl ebarz en templ, hag a lavare : «rouantelez an eñv a zo heñvel ouz eur roue hag a reas eur banket evit eured he vab. Cass a reas he zervicherien da bedi an dud da zont d'ar banket ; mes ar re a oue pedet ne felle ket dezho dont. Neuze ar roue a gassas servicherien all da lavaret dezho :

setu lazet  
ganeñ va  
ejennet ha  
va chatal  
lard, ha  
pourchasset  
peb tra a hent  
all ; deuit eta  
d'ar banket.  
Mes hi ne  
rejont van a  
gement-se,  
hag a i eas,  
lod da bour-  
men, ha lod  
all da labou-



rat. Hiniennou anezho zoken a grogas e servicherien ar roue, a voal-skoas gantho, hag ho lazas. Pa erruas ar

c'helou-ze gant ar roue, ez eas drouc ennhan, hag é cassas soudardet da lakaat ar vuntrerien-ze d'ar maro, ha da zevi ho c'hear. Goudeze e lavaras d'he zervicherien : ar banket a zo prest ; mes ar re a ioa pedet n'oant ket din da zont. It eta var al leur-gear, ha pedit da zont kement hini a gavoc'h eno. Ar zervicherien a ieas, hag eb dale sal ar banket a oue leun a dud. Ar roue a deuas er zal da velet ar re a ioa oc'h taol, hag o veza remerket eno eun den ha n'oa ket a zaë a eured ganthan, e lavaras dezhan : va mignoun, perac oc'h-lu deuet ama eb ar zaë a eured ? Hag an den-ze ne respountas gric. Neuze ar roue a lavaras d'he zervicherien : liammit dezhan he zaouarn hag he dreïd, ha taolit-heñ er meaz, en toull teñval, el leac'h ma vezo leñv ha scrign-dent.»

Rouanet ar zao-heol gueic'h all a ioa boaz da gass saëou a eured d'ar re a bedent da eur banket bennac evelse. An den-ma a ioa bet faë ganthan guiska ar zaë a ioa casset dezhan : setu perac e tennas varnhan droulans ar roue.

### 59. Divar benn paëa ar guiriou da Zesar.

Ar pharizianet hag an doctoret euz al lezen a goumprenas ervad oa hi an dud m'en devoa Jesus comzet anezho er barabolen ziveza, an dud-se a ioa bet pedet gant ar roue da vont da eured he vab, ha n'oa ket bet falvezet dezho mont.

Setu perac o devoue muioc'h-mui a gassouni ouz hor zalver, hag ec'h en em glevchont entrezho da glask an tu da gaout abec en he gomzou, evit gellout he goundaoni. Cass a rejont eta ho diskibien, ha tud all euz a balez Herodes, da c'houlenn diganthan : « Mestr, ni a c'hoar e carit ar virionez, ha n'o peuz aoun rac den. Livirit deomp eta petra zonjit var gement-ma : ha pec'het eo, pe n'e ket, paëa ar guiriou da Zesar ? » Jesus, oc'h anaout ervad ho fallagriez, a lavaras dezho : « perac e tentit ac'hanon evelse ? Digassit dinn eun diner. » Ha setu hi da rei unan dezhan. Neuze Jesus a c'houlennas outho d'he dro : « imach hag hano piou a zo var hema ? » — « Imach hag hano Cezar, » emezho. — « Mad, eme hor



zalver, roït eta da Zezar ar pez à zo da Zezar, ha da Zoue ar pez a zo da Zoue.» Ar respount-se a gavchont ker fur ma ne gredjont mui lavaret ger.

**60. Jesus a ro da anaout petra dle erruout gant Jerusalem, ha petra a c'hoarvezo da fin ar bed.**

P'edo hor zalver o tont er meaz euz an templ, he ziskibien a ziscoueze dezhan peger caër ha peger calet oa ar vein a ioa oc'h he ober. Mes heñ a respountas dezho : « e guirionez m'hel lavar deoc'h, an templ-se a vezo discaret, ha ne jomo ket ennhan daou vean an eil var c'horre egile.» O veza pignet goudeze var menez Olivet, Jesus a azezas eno dirac an templ, ha neuze he ziskibien a c'houlennas diganthan : « pe da vare ec'h erruo an dra-ze, ha dioc'h peseurt merk e vezo gellet anaout ho tonedigez da fin ar bed ? » Hag hor zalver a respountas : « pa veloc'h eun arme a enebourien en dro da Jerusalem, neuze e c'helloc'h lavaret n'e deuz mui pell da jom en he za. Ar re a vezo er Judee a ve mad dezho neuze tec'het var ar meneziou, ar re a vezo e kear, mont var ar meaz, hag ar re a vezo er broïou pell, chom el leac'h m'emaïnt. Rac an amzer-ze a vezo ken trubuiluz ma

n'ez euz bet biscoaz bete vrema, ha ma ne vezo mui hiviziken eun amzer all heñvel outhi. Calz tud a vezo lazet gant ar c'hleze; re all a vezo casset dre bevar c'horn ar bed evel esclavourien, ha Jerusalem a vezo bresset etre treid ar baianet ken n'o devezo an oll boblou euz an douar great ho amzer. Pa vezo bet prezeget an Aviel d'an oll boblou euz an douar, ha p'o devezo ar re-ma great ho amzer, neuze an heol a deui da veza teñval, hag al loar a gollo he sclerijen. Ar steret a gouezo euz an eñv hag an oabl a horjello. An encrez hag an drubuill a reno var an douar abalamour d'an trouz estlammuz a rañ ar mor gant he darziou counnaret; an dud a zizec'ho var ho zreid gant ar spount rac ar pez a dle erruout gant ar bed. Neuze e vezo guelet gitoun Mab an den o para e barr an oabl, ha Mab an den he unan o tisken var eur goabren e creiz an oll sked euz he c'hloar hag euz he c'halloud. Cass a rañ ractal he elez da zini an droumpill, ha da c'hervel ar re vâro, gant eur vouez skiltr, euz a bevar c'horn ar bed. Mes evit an deiz hag an heur ma tle an traou-ze erruout, den n'ho anavez; an elez euz an eñv n'ho anavezont ket zoken. N'euz nemet an Tad ebken hag ho anavesfe.»

Ar pez a lavaras hor zalver divar benn an dismantr a dlie beza great euz a Jerusalem a deuas da veza guir, ger evit ger, dec vloaz ha tri-ugent goude. Ar pez a lavaras divar benn fin ar bed a deui da veza guir ive d'ar mare merket gant Doue. Evit discouez ar c'halloud en deuz da c'hervel eun deiz an oll dud varo euz ar bez, Jesus-Krist a zigass adarre e buez, dirac daoulagad ar iuzevien, an den iaouank a Naïm, merc'h Jair ha Lazar.

**61. Ar pemp plac'h iaouank a skiant, hag ar pemp plac'h iaouank diskiant.**

Jesus a lavaras c'hoaz goudeze: «evel en amzer Noë an dud a rea faë var ar pez a lavaret dezho, ken na deuas an dour-diluch da gass peb tra ganthan, evelse a ernno ive pa deui Mab an den da fin ar bed. Bezit eta var evez, abalamour ne c'houzoc'h ket pe da vare e tiguezo ho

Mestr hag ho parner. Neuze rouantelez an eñv a vezo heñvel ous dec plac'h iaouank, a gemeras a bep a gleuzeur evit mont da ziambroug an dud nevez, da zeiz eun eured dioc'h an abardaëz. Pemp anezho o doa skiant; mes ar pemp all n'o devoa ket. Ar re-ma n'o doa ket sonjet cass eol gantho da lakaat en ho c'hleuzeriou; ar re all, er c'houtrol, o devoa bet sonch mad euz an dra-ze. Evel ma talee an dud nevez da zont, an dec plac'h iaouank en em roas oll da gousket. Ha setu, e creiz an noz, e oue clevet eur vouez o crial: «ema erru an dud nevez;



hastit affo dont d'ho diambroug.» Kerkent ar plac'het iaouank a oue var zao, hag hi da allumi ho c'hleuzeriou. Ar re anezho n'o doa ket bet a skiant aoualc'h a lavaras neuze d'ar re all: «roït deomp lod euz oc'h eol; rac hor c'hleuzeriou-ni ne jomont ket var elum.» Mes ar re all a respountas: «guelloc'h e deoc'h mont da brena da di eur marc'hadour, gant aoun ne ve ket aoualc'h evidoc'h hag evidomp.» Hogen, epad m'edont o vont da di ar marc'hadour, ec'h erruas an dud nevez, hag ar

plac'het iaouank a ioa ouz ho gortoz, ho c'hleuzeuriou var elum, a ieas gantho d'ar zal a eured ; ha goudeze e oue serret an or. Ar plac'het iaouank all a erruas ive d'ar fin, ha setu hi da c'hervel ar goaz nevez en eur lavaret : «Aotrou, Aotrou, digorit an or deomp.» Mes heñ a respountas : «e guirionez m'hel lavar deoc'h, me n'oc'h anavezan ket.» — Bezit eta var evez, abalamour ne c'houzoc'h nag an deiz nag an heur ma teuio Mab an den.»

## 62. Parabolen an talanchou.

Jesus a lavaras c'hoaz : «d'an deiz merket evit fin ar bed, an Aotrou Doue en em gomporto en ho keñver evel eun den en doa eur veach hir da ober, hag a c'halvas he zervicherien abarz mont euz ar gear evit lakaat he arc'hant etre ho daouarn. Da unan anezho e roas pemp



*talant*, da eun all daou, ha da eun all unan ebken ; rei a reas evelse da bep hini hervez m'oa goest da c'hounit, ha goudeze ez eas ractal en hent. Hogen, an hini en devoa bet pemp talant ho lakeas da dalvout, hag a c'hounezas gantho pemp talant all. Er memcs tra, an hini en devoa bet daou dalant, a c'hounezas ive daou all gantho.

Mes an hini n'en devoa bet nemet unan, a reas eun toull en douar, hag a guzas eno arc'hant he vestr. Abenn pell amzer goude, mestr ar zervicherien-ze a zistroas, hag a c'houlennas count digantho euz an arc'hant en devoa lakeat etre ho daouarn. Neuze an hini en devoa bet pemp talant, a ziscouezas d'he vestr pemp talant all, en eur lavaret: «Aotrou, pemp talant o poa roët dinn; setu ama pemp all am euz gounezet gantho.» He vestr a respountas ractal: «va bennoz deoc'h, servicher mad ha leal; abalamour m'o peuz implijet mad an nebeut am oa lakeat etre ho taouarn, me a roïo deoc'h brema calz muioc'h. Deuit da gemeret perz e joaüsdet ho mestr.» An hini en devoa bet daou dalant a deuas goudeze, hag a lavaras: «Aotrou, daou dalant o poa roët dinn; setu ama daou all am euz gounezet gantho.» He vestr a respountas dezhan evel d'an hini kenta: «va bennoz deoc'h, sevicher mad ha leal; abalamour m'o peuz implijet mad an nebeut am oa lakeat etre ho taouarn, me a roïo deoc'h calz muioc'h. Deuit da gemeret perz e joaüsdet ho mestr.» Dont a reas ive erfin an hini n'en doa bet nemet eun talant, hag hema a lavaras: «Aotrou, me c'houïe oc'h eun den hag a zo striz an urs ganthan; fallout a ra deoc'h caout eost el leac'h n'o peuz taolet greunen ebet en douar, ha dastum el leac'h n'o peuz hadet netra. Setu perac em euz bet aoun razoc'h hag em euz euzet ho talant en douar. Delit, setu heñ ama: rei a ran deoc'h en dro ar pez a zo deoc'h.» Hogen, he vestr a respountas dezhan: «servicher fall ha lezirec, gouzout a reac'h e fell dinn caout eost el leac'h n'em euz taolet greunen ebet en douar, ha dastum el leac'h n'em euz hadet netra. Red oa eta lakaat va arc'hant da c'hounit, ha, pa vijen deuet en dro, m'em bije he gavet gant ar pez o pije gounezet ganthan.» — «Lamit, eme ar mestr neuze, lamit digant ar zervicher-ze an talant a zo ganthan, ha roït-heñ d'an hini en deuz dija dec; rac d'an hini en deuz gounezet eun dra bennac e vezo roët c'hoaz, ken na vezo leun he zaouarn; mes an hini n'en deuz gounezet netra, ne vezo ket lezet ganthan zoken ar pez a ioa



bet roët dezhan e prest.» — Ar mestr a lavaras erfin goudeze : «stlapit ar zervicher didalvez-se er meaz, en toull teñval, el leac'h ma vezo leñv ha serign-dent.»

### 63. Depeign ar varn diveza.

Setu ama penaoz e comze hor zalver d'he ziskibien divar benn ar varn diveza : «pa deui Mab an den e creiz an oll sked euz he c'halloud, hag an elez oll en dro dezhan, é vezo guelet da genta oc'h azeza var an tron euz he c'hloar. Neuze an oll boblou euz an douar en em zastumo dirazhan, hag heñ ho dispartio an eil dioc'h egile evel eur pastor a zisparti an deñvet dioc'h ar bouc'het. Renka a rañ an deñvet en tu deou dezhan, hag ar bouc'het en tu cleiz, ha goudeze e lavaro d'ar re a vezo en tu deou : deuit, tud benniget gant va Zad, deuit da gemeret perz er rouantelez a zo pourchasset evidoc'h abaoe m'eo crouet ar bed. Rac m'em euz bet naoun, ha c'houi o peuz roët dinn da zibri ; m'em euz bet sec'het, ha c'houi o peuz roët dinn da eva. Bet oun bet eb ti nag oz, ha c'houi o peuz va repuet ; bet oun bet en noaz, ha c'houi o peuz va guisket ; bet oun bet clañv, ha c'houi zo deuet d'am guelet ; bet oun bet er prizoun, ha c'houi a zo deuet di d'am c'haout. Neuze ar re zalvet a c'houlenno : Aotrou, peur or beuz-ni great an traou-ze oll evidoc'h ? Ha Mab an den a respounto : e guirionez m'hel lavar deoc'h, bep veich m'o peuz great an dra-ze d'an disterra euz va breudeur, dinn-me va unan eo o peuz her great.»

«Lavaret a rañ ive d'ar re a vezo en tu cleiz dezhan : en em dennit diouzinn, tud milliget, it d'an tan a bado da viken, d'an tan-ze a zo bet c'hoëzet evit an diaoul hag he zrouc-elez. Rac m'em euz bet naoun, ha n'o peuz ket roët dinn da zibri ; dare oun bet gant ar zec'het, ha n'o peuz ket roët dinn da eva ; bet oun bet en noaz, ha n'o peuz ket roët dinn eun tamm dillad da viska ; bet oun bet clañv hag er prizoun, ha n'oc'h ket deuet d'am guelet. Neuze ar re gollet a c'houlenno ive : Aotrou, peur eta oumpni bet manket da ober an traou-ze evi-

doc'h? Ha Mab an den a respouto : e guirionez m'hel lavar deoc'h, bep veich m'oc'h bet manket da ober an dra-ze d'an disterra euz va zervicherien, dinn-me va unan eo oc'h bet manket d'hen ober. Ha var gement-se ar re-ma a ielo d'al leac'h ma vezint' er boan da virviken, hag ar re all d'al leac'h ma vevint ato er joa hag en eürusdet.»

Ar veich genta, Jesus-Krist a zo deuet var an douar, evel eur zalver trugarezuz, en eur stat paour ha dister; evit an eil gueich, e teuio, evel eur barner didruez, e creiz an oll sked euz he c'hloar hag euz he c'halloud. Ar c'hitoun a vezo gueleet o para en he raoc, e barr an oabl, a vezo ar groaz, a ioa ken disprijet abarz m'eo deuet da veza treac'h d'ar bed.



C'HOUEC'HVET PENNAD.

*Passion ha maro Jesus-Krist.*

**64. An oan pascal.**

D'an deiz kenta a c'houeliou Pask, d'an deiz ma thiet laza an oan pascal, Jesus a lavaras da Ber ha da Ian : «it da bourchass deomp ar goan bascal.» Mes hi a c'houlennas : «da beleac'h e fell deoc'h ez affemp d'he fourchass?» Ha Jesus a respoutas dezho : «en eur

vont e kear e cavoc'h eun den, eur podad dour ganthan var he benn; it varlerc'h an den-ze en ti ma'z aï, ha livirit da vestr an ti-ze: hor mestr a c'houlenn ouzoc'h ha caout a raffe ama eur plas da zibri ar goan bascal gant he ziskibien. Ractal e tiscouezo deoc'h eur zal vraz, ha renket mad an traou ennhi; pourchassit deomp eno ar goan bascal.»

An daou abostol a ieas hag a gavas peb tra evel m'en devoa lavaret dezho hor zalver; pourchass a rejont eta ar goan bascal. Pa deuas an noz, Jesus en em lakeas ous taol gant he ziskibien. Neuze e lavaras d'ar re-ma: «mall braz am oa da zibri ar goan bascal-ma ganeoc'h. Rac an hini ziveza eo a zebromp assambles, da c'hortoz ma teui ar mare da dañya en eñv ar guir banket a joa a zo merket dre hema.»

Jesus-Krist, guir Oan Doue lakeat d'ar maro evit pe-c'hejou ar hed, a ioa merket he unan dre oan bascal ar iuzevien. Scuillet en deuz he c'hoad var ar groaz d'an deiz ha d'an heur ma veze lazet bep bloaz an oan pascal en templ a Jerusalem.

### 65. Jesus a voalc'h ho zreïd d'he ebestel.

Goude beza debret an oan pascal gant he ziskibien, hor zalver a zavas dioc'h taol, a ziviskas he zaë, hag a lakeas en dro dezhan eun torch lien guen. Neuze e taolas dour en eur plad doun, hag ec'h en em lakeas da voalc'hi ho zreïd d'an ebestel an eil goude egile, ha d'ho zec'ha gant an torch a ioa ganthan en dro d'he gorf. Pa deuas da gaout Simon-Per, hema a lavaras: «biken avad, va Mestr, ne voalc'hoc'h va zreïd dinn-me.» — «Mad, eme Jesus, ma ne voalc'han ket ho treïd deoc'h, n'o pezo ket a berz em rouantelez.» — «Oh, neuze, a lavaras ker-kent Simon-Per, goalc'hit, va Mestr, n'e ket ebken va zreïd, mes goalc'hit ive va fenn ha va daouarn.» Mes hor zalver a respountas: «nan, aoualc'h eo dinn goalc'hi ho treïd; rac c'houi zo neat a hent all: n'oc'h ket oll coulsgoude.»



Goude beza goalc'het ho zreïd d'he ebestel, ha guisket adarre he zaë, hor zalver en em lakeas adarre ous taol, ha neuze e comzas evel-hen : « guelel o peuz petra'm euz great deoc'h. C'houi a c'halv ac'hanon Mestr hag Aotrou, ha mad a rit; rac bez' ez oun e guirionez. Mar em euz eta, me ho Mestr hag oc'h Aotrou, goalc'het deoc'h ho treïd, c'houi a dle ive goalc'hi ho treïd an eil d'egile. Discouez am euz great deoc'h ar scouer, evit ma reoc'h d'ar re all ar pez am euz great deoc'h va unan.»

En eur lavaret eo red goalc'hi an treïd, hor zalver a felle dezhan rei da anaout e renker goalc'hi an ene dre ar zacamant a vadiziant ha dre ar zacamant a binijen, evit lamet divarnhan ar c'haillar euz ar pec'het.

**66. Hor zalver Jesus-Krist oc'h institui sacramant an aoter.**

Deuet oa ar mare ma tlie hor zalver rei deomp ar brassa merk a garantez a c'helle da rei, en eur bourchass evidomp ar bouet-se eb he bar, ar banket sacr ha dreist-natur-ze divar benn pehini en devoa dija lavaret d'he



ziskibien: «an nep a zebro euz ar bara-ze a vevo da virviken!» Prest eta goude beza goalc'het ho zreïd d'he ebestel, Jesus a gemeras etre he zaouarn ar bara a ioa var an daol, hag, o veza savet he zaoulagad etrezec an eñv evit ober eur beden d'he Dad oll-c'halloudec, e vennigas ar bara-ze, ha, goude beza great tammou anezhan, hen roas da zibri d'he ziskibien, en eur lavaret dezho: «kemerit ha debrit euz an dra-ma oll; rac an dra-ma eo va c'horf a vezo lakeat d'ar maro evidoc'h.» Dre ar c'homzou-ze hor zalver a jenchas ar bara en he gorf sacr. Goudeze e kemeras eur c'halir hag a ioa guin enghan, hag, o veza great adarre eur beden da Zoue he Dad, e vennigas ive ar guin-ze, hag hen roas da eva d'he ziskibien en eur lavaret: «evit euz an dra-ma oll, rac an dra-ma eo va goad, goad an allians nevez, pehini a vezo scuillet evidoc'h hag evit eleiz a dud abalamour dezho da gaout ar pardoun euz ho fec'hejou. Grit an dra-ma da zalc'her sonch ac'hanon.» Dre ar c'homzou-ze, hor zalver a jenchas ar guin en he c'hoad presius, hag

a instituas evit ato, betec fin ar bed, ar zacramant adorabl euz an aoter.

Jesus eo Melchisedek an allians nevez pehini en em ginnig he unan da Zoue he Dad, evel roue hag evel belec braz, a zindan ar spesou a vara hag a vin.

**67. Jesus a ro da anaout e vezo trahisset gant Judas ha nac'het gant Per.**

Goude beza instituet ar zacramant adorabl euz an aoter, hor zalver a deuas eur beac'h encrez var he speret; rac gouzout a rea oa bet Judas Iscariot, unan euz he ebestel, oc'h en em glevet dre guz gant prinset ar veleien ha gant ar pennou braz euz a gear, hag en doa roët he c'her dezho da lakaat he vestr etre ho daouarn evit tregont pezar arc'hant. Setu perac, var fin coan, Jesus a gomzas evelhen ouz he ziskibien: «e guirionez, e guirionez m'hel lavar deoc'h, unan ac'hanoc'h a dle va zrahissa.» An ebestel a oue glac'haret braz o clevet kement-se. Da genta ne reant nemet sellet an eil ouz egile; erfin e c'houlennjont ouz hor zalver peb hini d'he dro: «Mestr, na me eo?» Ha Jesus a respountas: «unan ac'hanoc'h ho taouzec eo, unan euz ar re a ioa o tibri euz ar memes plad ganeñ. Mab an den a ia, evit guir, varzu he Dad adarre, evel m'eo merket er Scritur. Malheur coulsgoude d'an nep a drahisso Mab an den; guell e vije bet dezhan ne vije bet biscoaz ganet!» Ian, pehini a ioa caret gant hor zalver dreist an ebestel all, a ioa en he gichen oc'h taol. Per a reas sin d'an abostol-ze da c'houlenn ous Jesus euz a biou e comze. Ian a droas ractal he benn, hag, o veza he alcodet var gerc'hen he Vestr, e c'houlennas outhan goustadie: «piou eo, Mestr?» Ha Jesus a respountas: «an hini ma'z ann da ginnig dezhan eun tamm bara soubet er zaoz, hennez eo.» Hag, o veza soubet eun tamm bara er zaoz, hor zalver hen roas da Judas Iscariot. Hema n'en devoue ket kent debret ar c'hinaouad vara-ze ma'z eas an diaoul en he gorf. Jesus a lavaras dezhan neuze: «grit buhan ar

pez o peuz c'hoant da ober.» Kerkent Judas a ieas er meaz euz ar zal evit peur-achui he dorfet.

Pa oue eat kuit, hor zalver a gomzas evel-hen ouz he ziskibien : « brema Mab an den a ia da veza glorifiet, ha Doue a vezo glorifiet dreizhan. N'em euz mui nemet eun nebeut amzer



da jom ganeoc'h.» Var gement-se Simon-Per a c'houlennas outhan : « Mestr, da beleac'h ez it? » Ha Jesus a respontas : « d'al leac'h ma'z ann, c'houi ne c'hellit ket dont brema ; mes dont a reoc'h divezatoc'h. » Ha setu Per da lavaret : « perac ne c'helfenn ket mont dioc'htu ? Me zo prest da reiñ va buez evidoc'h. » Hag hor zalver a respontas dezhan : « e guirionez m'hel lavar deoc'h, abarz m'en devezo ar c'hilloc canet diou veich en noz-ma, c'houi o pezo va nac'het abenn teir gueich. Coulsgoude m'em euz pedet evidoc'h evit na deui ket ho feiz da vankout ; pa vioc'h eta distroët ous Doue, lakiit ho poan hag ho soursi da ober d'ho preudeur chom stard en ho hini.»

Joseph a ioa bet guerzet gueich all gant he vreudeur. Mes dre greiz ar poaniou hag an trubuilhou en devoue da c'houzañv e teuas da veza mestr var an Ejipt evit mez hag ive evit silvidigez he vreudeur.

**68. Ar c'homzou diveza a lavaras hor zalver d'he ebestel araoc he bassion.**

Jesus a gomzas c'hoaz evel-hen : « en eur gimiada diouzoc'h, me a ro deoc'h eur gourc'hemenn nevez : en

em garit an eil egile, evel ma'm euz caret ac'hanoc'h va unan. Dioc'h ar garantez o pezo an eil evit egile eo e vioc'h anavezet evit va diskibien. Arabad e deoc'h lakaat diez ho speret mar teuann brema d'ho kuitaat. Mont a ran da bourchass eur plas deoc'h e ti va Zad. Pa'm bezo pourehasset ar plas-se, me zistroïo d'ho caout evit ho cass neuze ganeñ. Da c'hortoz, me bedo va Zad da zigass deoc'h eun all e va leac'h evit rei nerz ha joa d'ho caloun. Hennez a zesko deoc'h peb tra, hag a jomo ganeoc'h da virviken. Rac bez' ez eo ar Speret a virionez ne c'hell ket ar bed da receo. Me eo an hent, ar virionez hag ar vuez ; den ne c'hell mont da gaout va Zad nemet dreizon-me. Me eo ar guir vinien, ha va Zad eo ar mestr euz ar vinien-ze. Ar scour ne zougo ket a frouez a vezo lamet kuit ganthan ; hag an hini a zougo frouez a vezo crennet ha kempennet he vlenchon evit ma tougo c'hoaz muioc'h. An nep a jom ennon-me, ha me enghan, a zoug frouez a fors. Mes an nep ne jom ket ennon-me a vezo taolet kuit evel ar scour didalvez ; neuze e teui da zec'ha, hag erfin e vezo dastumet ha stlapet en tan da zevi. E guirionez m'hel lavar deoc'h, mar goulennit eun dra bennac digant va Zad em hano-me, e vezo roët deoc'h ho coulenn. Me lez ganeoc'h ar peoc'h, me ro deoc'h ar peoc'h ; mes ar peoc'h a roann-me n'e ket heñvel ouz an hini a ro ar bed.»

Goude beza comzet evelse, hor zalver a zavas he zaou-lagad etrezec an eñv, hag a lavaras : « va Zad, setu deuet an heur ; glorifiit brema ho mab evit ma teui ho mab d'ho elorifia, ha ma c'hello rei ar vuez a bado da viken d'ar re o peuz roët dezhan. Evit caout ar vuez a bado da viken, eo red oc'h anaout, c'houi, n'ez euz ken Doue nemedoc'h, hag an hini o peuz digasset var an douar, Jesus-Krist. Tad santel, ho pedi a ran evit ar re o peuz roët dinn, evit ma plijo ganeoc'h ho divoal dioc'h peb drouc. Sicourit anezho d'en em zele'her en ho cras, ha d'en em zantifia muioc'h-mui, evit n'o devezo oll nemet eun hevelep caloun, evel c'houi ha me n'or beuz hon daou nemet eun hevelep natur. N'e ket evitho ebken



eo e pedan, mes ouspenn evit ar re a lakaïnt da gredi ennon dre ho c'homzou, evit n'o devezo ar re-ma eveldhe nemet eun hevelep speret hag eun hevelep caloun; evel c'houi ha me, va Zad, a vev hon daou euz eun hevelep buez.»

### 69. Jesus er jardin olivet.

Goude beza achuet ar beden-ze, hor zalver a ieas gant he ziskibien da jardin Jethsemani, e kichen menez olivet. Pa oue erruet eno, e comzas evel-hen ouz he ziskibien : « azezit ama, c'houi, epad ma'z inn a-hont lareoc'h da ober va feden.» Coulskoude e cassas ganthan tri euz he



ebestel, Per, Jakes, ha Iam, ha, pa oue he unan gant an tri-ze, e lavaras dezho : « anken ar maro a zo var va speret; gortozit ac'hanon ama, ha beillit ganeñ.» Neuze e pelleas dioutho eun tammic, hag, o veza en em strin-ket d'an daoulin, he benn harp en douar, e reas ar beden-ma da Zoue he Dad : « va Zad, ra'z aï ar c'halir-ze ebiou dinn ma n'e ket red dinn he eva; coulskoude, ho polontez-c'houi bezet great, ha nan va hini-me.» O veza

pedet evelse, e tistroas da gaout he ebestel ; mes cousket oant. Ha Jesus a lavaras da Ber : « Simon, cousket oc'h ? N'o peuz ket gellet beilla ganeñ eun heur ebken ? Beillit ha pedit, gant aoun na veac'h trec'het gant an dentation. Caloun vad o peuz, evit guir ; mes an den a zo ato simpl. » Goudeze ec'h en em dennas adarre a gostez da bedi, hag e lavare evel ar veich genta : « va Zad, mar renkan eva ar c'halir-ze, ra vezo great ho polontez ! » Ha setu heñ da zevel ha da zont da gaout he ziskibien evit an eil gueich ; mes cousket oant evel an dro genta ; rac ho fenn a ioa ker pounner ma ne c'hellent ket chom dihun. En dro-ma hor zalver ho lezas e peoc'h, hag a i eas da bedi evit an drede gueich. Hogen, en he beden e lavare ato ar memes trá. Neuze e couzas en angouni, ha ken tenn e teuas da veza varnhan ma tivere dioc'h he gorf var an douar evel eur c'houezen a c'hoad. Mes eun eal a ziskennas euz an eñv evit rei nerz d'he galoun. Erfin e teuas adarre da gaout he ziskibien, hag e lavaras dezho : « savit brema ha deomp ac'hann ; setu deuet an heur ma tle Mab an den beza lakeat etre daouarn ar bec'herien. An hini a dle va zrahissa n'ema mui pell. »

Jesus-Krist a zougas ar beac'h euz ar valloz en devoa hon tad kenta Adam tennet varnhan ha var he vugale dre he bec'het ; croummet dindan ar beac'h pounner-ze, hor zalver a c'hilipias an douar gant he c'hoad sacr, evel Adam gueich all, coundaonet da veva divar boan he zivreact'h, en devoa he c'hilipiet gant ar c'houezen euz he dal. An tri abostol, a ioa bet test euz a dransfiguration hor zalver var menez Thabor, a oue ive, mes hi ho zri ebken, test euz he angouni er jardin olivet.

## 70. Jesus en em laka etre daouarn he enebourien.

Hor zalver n'en doa ket achuet mad he c'her diveza pa erruas er jardin eur vanden soudardet ha tud all, digasset gant prinset ar veleien ha gant ar pennou braz euz a gear. Judas Iscariot a ioa e penn ar vanden. An treitour en devoa lavaret d'ar re a deue var he lerc'h : « an hini ma roñn eur pok dezhan, hennez eo ; n'o pezo nemet cregi enghan. » O veza eta erruet er jardin, Judas

a dosteas ous Jesus en eur lavaret : « dont a ran, Mestr, d'ho saludi ; » ha ker buhan e lammas da boket dezhan. Hogen, Jesus a respontas : « d'ober petra oc'h-hu deuet ama ? Ha dre eur pok, Judas, eo e trahissit Mab an den ? »

Hor zalver a c'houïe var eün kement tra a dlïe c'hoarvezout ganthan. Setu perac ez eas a benn d'ar vanden dud-se, a ioa clezeier, bisier ha leterniou gantho en ho daouarn, hag e c'houlennas outho evel-hen : « piou a glaskit ? » Hi o veza respountet : « Jesus a Nazareth, » hor zalver a lavaras : « me eo. » Mes kerkent e couezchont oll a stok ho c'horf d'an douar. Couls goude hor zalver a c'houlennas outho evit an eil gueich : « piou a glaskit ? » Hi o veza respountet evel ar veich genta : « Jesus a Nazareth, » hor zalver a lavaras : « deuet oc'h d'am c'hemeret ama gant clezeier ha gant bisier, evel pa ve eul laër e venn. Perac n'o peuz ket sonjet cregi ennon kentoc'h, p'e guir edon bemdez en ho touez o kelen ar bobl ebarz en templ ? Couls goude, [mar d'eo me eo a glaskit, list va diskibien e peoc'h. » — Neuze ar zoudardet a astennas ho daouarn da gregi enghan. O velet kement-se, he ziskibien a lavaras : « Mestr, ha ma roffemp eun taol cleze bennac dezho ? » Ha ker buhan Per a gemeras he gleze, hag o veza darc'hoët eun taol ganthan var Malkus, unan euz a zervicherien ar belec braz, e trouc'has dezhan he scouarn deou. Mes hor zalver a lavaras da Ber : « lakiit ho cleze en he blas. Ha ne c'houzoc'h-hu ket n'em euz nemet pedi va Zad, hag e tigasso ractal d'am zicour kement ha ma kirinn a elez ? Mes penaoz e teuffe neuze da vir ar pez a zo merket er Scritur divar va fenn ? Ha ne dlean-me ket eva ar c'halir en deuz roët va Zad dinn da eva ? » O veza comzet evelse, hor zalver a bareas he scouarn da Valkus en eur douch outhi ebken ; ha goudeze ec'h en em lakeas etre daouarn ar zoudardet. Var gement-se, he ziskibien a gemeras oll an teac'h, nemet Per ha lan pere a heulias ho Mestr a ziabell.

## 71. Jesus dirac ar belec braz.

Ar zoudardet, o veza liammet he zaouarn d'hor zalver, her c'hassas da genta da di ar belec braz, Annas. Hema a c'houlennas digant Jesus petra oa he ziskibien, ha peseurt kelennadurez a roë dezho. Ha Jesus a respountas : «prezeget em euz dirac an oll, ha morse n'em euz lavaret netra e euz. Perac eta goulenn diganeñ peseurt kelennadurez am euz roët? Ar re a zo bet ous va zelaou a c'hoar petra'm euz lavaret dezho : n'o peuz nemet goulenn ouz ar re-ze.» O clevet ar respount-se, unan euz a zervicherien ar belec braz a roas eur javedad d'hor zalver, en eur lavaret : «hag evelse eo e respountit d'ar



belec braz?» Ha Jesus a respountas dezhan gant dousder : «mar em euz comzet fall, discouezit dinn penaoz ; ha mar em euz comzet mad, perac e skoit ganeñ?»

Annas a reas cass hor zalver da di he dad-caër, ar belec braz Caïphas. An doctoret euz al lezen hag ar re genta euz a gear a ioa dija assamblet eno, ha prinsset ar veleien hag hi a glaske eun desteni faoz bennac a enep hor zalver, evit gellout he goundaoni d'ar maro. Mes ne gavent hini hag a vije hervez ar pez a renker, petra bennac n'e ket an testou faoz a vanke. Goude beza clevet an testou-ze, Caïphas a lavaras da Jesus : «ne respountit netra d'ar pez a lavar an dud-ma en oc'h enep?» Mes muzellou hor zalver a jomas serret. Neuze ar belec braz a lavaras dezhan adarre : «en hano an Aotrou Doue oll-c'halloudec, me ho ped da ziscleria

deomp ha c'houi eo ar C'hrist, guir Vab Doue.» Ha Jesus a respontas : « ia, me eo ; ha gullet a reoc'h eun deiz Mab an den azezet en tu deou d'an Aotrou Doue oll-c'halloudec, hag o tisken var goabr an eñv.» O clevet ar respount-se, ar belec braz a rogas he zillad en eur lavaret : « hag ezom or beuz-ni brema a destou ? He glevet o peuz oc'h unan o voal-gomz a enep Doue ; petra livirit var gement-se ? » Ha kement hini a ioa eno a respontas ractal : « din eo a varo ! »

## 72. Jesus nac'het gant Per.

Epad an amzer-ze ar zoudardet ha servicherien ar belec braz o devoa great tan er porz evit en em zifen oc'h ar riu ; rac goal ien oa an noz. Hogen, Per a ioa eno o toma assambles gantho. Ha setu eur plac'h pe eur



vatez euz an ti o tremen ebiou, hag hi da lavaret dezhan : « sell, c'houi a ioa ive gant Jesus a Nazareth.» Mes Per hen nac'has dirac an oll, hag a respontas : « me ? ne anavezan ket anezhan zoken.» Ha kerkent e canas ar c'hilloc. Eur penna-die goude, eur plac'h pe eur vatez all, o veza he remerket, a lavaras d'ar re a ioa eno : « hema a ioa ive gant Jesus a Nazareth.» Mes Per hen nac'has adarre, en eur doui var he le ne anaie ket zoken hor zalver. Abenn eun heur goude, e teuas er porz unan euz a vevellet Caïphas hag a ioa car d'an hini m'en doa Per trouc'het he scouarn dezhan gant eun taol cleze. Hennez, o veza anavezet an

abostol, a lavaras dezhan ractal : « c'houi zo sur unan euz a ziskibien Jesus ; rac m'em euz ho cuelet en he gichen er jardin olivet ; hag ouspenn, dioc'h ho clevet o comz, eo anad oc'h, eveldhan, euz ar Galilee. » Neuze Per en em lakeas da doui var he le evit an drede gueich ne anaïe ket zoken an den-ze, en eur leusker c'hoaz a bep seurt malloziou varnhan he unan ma n'oa ket guir ar pez a lavare. Kerkent e canas ar c'hilloc evit an eil gueich, hag er memes amzer, dre eun or pe eur prenest bennac, hor zalver a reas eur zell var he abostol digaloun. Ker buhan e teuas da zoneh da Ber euz ar gomz-ma en devoa lavaret dezhan he Vestr : « araoc m'en devezo ar c'hilloc canet diou veich en noz-ma, c'houi o pezo va nac'het abenn teir gueich. » Hag, o veza eat er meaz euz ar porz, e tirollas da vouela dourec d'he bec'het.

An den a zo simpl meurbet. Per en devoa guelet he Vestr var menez Thabor e creiz ar c'hloar euz he dransfiguration, ha coulskoude e teu d'he nac'h pa her guel o coueza er boan hag en dismegans, en devoa lavaret he unan a dlie dont varnezhan. Beillit eta ha pedit.

### 73. Dizesper Judas.

Judas, o velet oa coundaonet Jesus d'ar maro gant ar pennou braz a Jerusalem, a zavas keuz ganthan, hag a deuas da zigass da brinset ar veleien an tregont pez arc'hant en devoa bet evit priz euz he dreitouriach. Hag heñ a lavare en eur ginnig an arc'hant-se dezho en dro : « pec'het am euz bet o lakaat etre ho taouarn buez an den-ze n'ca netra da damall dezhan. » Mes hi a respountas : « petra ra ze deompni ? An dra-ze a zell ousoc'h. » Var gement-se Judas a daolas he arc'hant en templ, ha goudeze ez eas d'en em grouga. Prinset ar veleien, o veza dastumet an arc'hant, a lavaras entrezho : « arabad eo he lakaat en tenzor abalamour m'eo priz ar goad eo. » O veza neuze kemeret cuzul an eil digant egile, e prenjont gant an arc'hant-se park eur podeur evit ober anezhan eur veret da enterri an divroïdi. Setu perac ar park-se a zo galvet Haceldama, da lavaret eo, *park ar goad*.

#### 74. Jesus goapeat.

Goude m'oa bet hor zalver coundaonet d'ar maro, an dud a ioa oc'h he zivoal en em lakeas da ober goab anezhan, ha da ober divar he goust a bep seurt farserez iud hag euzuz. Crañchat a rejont varnhan en he fas; moucha a rejont dezhan he zaoulagad, ha goudeze e skoënt ganthan a daoliou dorn pe a gravanadou, en eur lavaret: «divin, Krist, digant piou az peuz bet an taol-ze.» Hag eleiz a voal-gomzou all a lavarent c'hoaz evelse. Hogen, Jesus ne zigore ket he c'hinou da leusker eur glemmaden.

#### 75. Jesus dirac Pilat hag Herodes.

Ar pennou braz a Jerusalem en em assambles adarre dioc'h ar mintin, hag a zisclerias evit an eil gueich oa hor zalver din a varo. Coulsgoude ne c'hellent lakaat den ebet d'ar maro eb assant pe aotreadur ar gouarner roumen. Setu perac e cassjont Jesus da di Bilat, a rene neuze ar vro en hano an impalaër a Rom. Pilat a deuas er meaz euz he di d'ho digemeret, hag a c'houlennas outho: «petra o peuz da damall d'an den-ze?» Hag hi a respountas: «an den-ma a ro kentelliou fall d'ar bobl en eur zifen outhan paëa an taillou da Zesar, hag en eur lavaret ez eo heñ ar C'hrist a dle ren var Israël.» Neuze Pilat a reas eun dro var he zeuliou evit mont d'ar pretouer, da lavaret eo, d'al leac'h m'oa custum da varn ar bobl; hag, o veza azezet eno var he gador a varner, e roas urs da zigass hor zalver dirazhan, hag e comzas outhan evel-hen: «c'houi eo roue ar iuzevien?» Ha Jesus a respountas: «ia, roue oun; mes va rouantelez ne d'eo ket euz ar bed-ma. Me a zo deuet var an douar evit rei testeni d'ar virionez. Kement hini a gar ar virionez a zelaou va mouez-me.» Var gement-se Pilat a ieas adarre er meaz euz he di, hag a lavaras da brinset ar veleien ha d'ar re all a ioa gantho: «ne gavan abec ebet en den-ze.» Mes hi a zave ho mouez goassoc'h-goaz a enep hor zalver, en eur lavaret: «ne ra nemet planta

pennadou er bobl adalec ar Galilee betec ama.» O clevet hano euz ar Galilee, Pilat a c'houlennas hag euz ar vro-ze oa hor zalver; hag, evel ma oue respountet dezhan oa euz ar vro-ze, e reas he gass ractal da di Herodes, gouarner euz ar Galilee, pehini a ioa deuet ive da Jerusalem evit goueliou Pask. Herodes en devoe eur joa vraz o velet Jesus; pell a ioa en doa c'hoant d'he velet; rac clevet en devoa hano meur a veich euz ar burzudou a rea, hag esper en doa e raje eur miracl bennac dirazhan. Mes caër en devoe trei ha distrei he gomzou e peb giz, hor zalver ne respontas netra d'an oll goulennou a reas dezhan. Herodes a reas neuze guiska eur zaë venn da Jesus, evel da eun den diskiantet, ha goudeze her c'hassas en dro da di Bilat. Adalec an deiz-se, Pilat hag Herodes a deuas da veza mignounet euz a enebourien touet ma'z oant aziagent.

### 76. Jesus ha Barabbas.

Pilat en devoa c'hoant da zavetei he vuez d'hor zalver; rac credi a rea e tamallet anezhan e gaou. A hent all, ar gouarner a ioa bet spountet gant ar gemennadurez-ma a ioa bet digasset dezhan a berz he c'hreg: « list an den santel-ze e peoc'h; rac me'm euz bet en noz-ma divar he benn eun uvre hag en deuz great calz poan dinn.» Evit eta savetei he vuez d'hor zalver, setu ama petra zonzas Pilat da ober. Da c'houeliou Pask oa custom bep bloaz da rei he c'hras da eun torfetour bennac. Hogen, d'ar mare-ze ez oa e prizoun Jerusalem eun den brudet dre he fallagriez, eul laër hag eur muntre, he hano Barabbas. Pilat a lakeas en he speret rei da joaz d'ar bobl, etre Jesus ha Barabbas, evit ar prizounier a vije roët he c'hras dezhan er blavez-se. Biken n'en devije credet ar gouarner e vije guell gant ar bobl goulenn gras evit Barabbas eget evit Jesus. Ha coulsgoude, setu petra a erruas. Pa deuas Pilat da c'houlenn ouz ar iuzevien, bodet dirac he balez: « da behini euz an daou-ma, pe da Varabbas, pe da Jesus, hanvet Krist, e fell deoc'h e roffenn he c'hras er bla-ma evit goueliou Pask?» Ar bobl oll,



touellet gant prinset ar veleien hag ar pennou braz euz a gear, n'en devoue nemet eur vouez evit respount : « laoskit Barabbas da vale, ha dalc'hit Jesus ganeoc'h. » Neuze Pilat a c'houlennas adarre : « petra fell deoc'h eta a raffenn da Jesus ? » Hag ar bobl oll a respountas a bouez-penn evel ar veich genta : « he staga ouz ar groaz ! He staga ouz ar groaz ! » — « Mes, eme ar gouarner c'hoaz, peseurt drouc en deuz-heñ great ? Evidon-me ne gavan abec ebet enghan evit hier c'houndaoni d'ar maro. Mont a ran eta da reiñ urs d'he scourjeza, ha goudeze m'hen lezo da vont e peoc'h. »

Barabbas a verk an den pec'her pehini, oc'h en em zevel a enep Doue, a lam diganthen he unan ar vuez euz ar c'hras, hag a deu evelse da veza muntrer he ene. Liammou an den pec'her a ia da veza torret ; rac Jesus-Krist a zo en em garget da baëa evithan ar boan dleet d'he bec'hejou. — Pilat en devoa c'hoant da zavetei he vuez d'hor zalver, mes n'en devoue ket a nerz-caloun aoualc'h evit difen betec ar fin an hini a c'houie ervad n'oa netra da damall dezhan. Evelse a reas ive Ruben gueich all, pa falvezas d'he vreudeur guerza Joseph a enep peb guir ha iealdet.

### 77. Jesus scourjezet ha curunet gant spern.

Pilat a reas cass hor zalver er meaz euz ar pretouer, hag he lakaat etre daouarn eur vanden soudardet. Ar re-ma a lamas diganthen he zillad, hag, o veza he staget ouz eur peul, ec'h en em lakejont d'he scourjeza ken na oue he gorf oll leun a c'hoad ha goloët a c'houliau. Goudeze e taoljont var he ziouscoaz eur vantel scarlat, evit ober goab anezhan ; hag, o veza great eun tourked gant scourrou spern hir ha calet, e sankchont au tourked-se en he benn egiz eur gurunen. Erfin, en he zorn deou e lakejont eur benduen evit servichout dezhan da voualen a roue. Neuze e stouent d'an daoulin dirazhan, en eur lavaret dre fars : « ni ho salud, roue ar iuzevien. » Ouspenn-ze e crañchent varnhan en he fas hag e roënt dezhan javedadou. Aveichou all c'hoaz e crogent er benduen a ioa lakeat dezhan en he zorn, hag e tarc'hoënt



taoliou ganthi var he benn, evit ober d'ar spern sank  
ennhan dounnoc'h-dounna.

### 78. Jesus coundaonet d'ar maro.

Pilat, o sonjal e teuje ar iuzevien da gaout erfin truez ouz hor zalver o velet e pe stat oa lakeat gant ar zoudardet, a deuas d'hen discouez dezho, en eur lavaret : «setu ama an den!» Jesus a ioa eno e kichen ar gouarner gant he gurunen spern var he benn hag ar vantel searlat var he ziouscoaz. Mes ar bobl criz ha digaloun ne rea nemet crial goassoc'h-goaz : « ar groaz dezhan ! Ra vezo staget onz ar groaz ! » Coulsponde Pilat ne c'houie ket calz c'hoaz pe du trei pa deuas prinset ar veleien hag ar pennou braz euz a gear da lavaret dezhan : «ma laoskit an den-ze da vale, n'oc'h ket mignoun da Zesar ; rac an nep piou bennac a fell dezhan beza roue en em zav a enep Cesar.» O clevet ar c'homzou-ze ar gouarner a gemeras aoun, hag, o velet ne c'hounenze netra gant

enebourien hor zalver, e reas digass dour dezhan, hag e voalc'has he zaouarn dirac ar bobl, en eur lavaret : « evidon-me a zo neat va daouarn euz a c'hoad an den santel-ma; eun dra eo hag a zell ouzoc'h. » Hag ar bobl oll a respountas : « he c'hoad ra gouezo varnomp-ni ha var hor bugale ! » Neuze ar gouarner a roas Jesus d'ar iuzevien evit he lakaat d'ar maro var ar groaz, ha couls-goude en doa anzavet he unan n'en devoa cavet abec ebet enghan.

Goad Jesus-Krist a zo couezet e guirionez var ar iuzevien. Abaouz trivac'h cant vloaz zo emaint o veva dre ar bed, ama hag a-hont, eb caont mui bro ebet dezho ho unan; hag ar beac'h euz a vuavegez Doue a zo bepret varnho e kement leac'h ma'z eont. Heñvel int ous Cain a ioa bet ive gueich all coundaonet gant Doue da vale tu-ma tu-hont gant eur merk var he dal, evit ma vije anavezet gant an oll, abalamour m'en devoa lazet he vreur Abel.

### 79. Hent ar C'halvar.

Goude m'oa bet douget ar zetans, ar zoudardet a grogas e Jesus evit her c'hass gantho var menez Calvar pe menez Golgotha, e peleac'h e tlie beza lakeat d'ar maro. Guiska a rejont dezhan adarre he zillad, ha goudeze e sammjont var he ehoug ar groaz var behini oa coundaonet da vervel. Hor zalver a gouezas meur a veich dindan ar beac'h pounner-ze. Ar zoudardet, o veza cavet var ho hent eun den a Ciren, he hano Simon, a reas dezhan Sicour Jesus da zougen he groaz.

Assambles gant hor zalver e casset d'ar maro daou dorfetour. Eun niver braz a dud a deue varlerc'h. En ho zouez ez oa calz gragez pere a vouele hag a hirvoude o velet e pe stat edo hor zalver. Jesus a zistroas outho en eur lavaret : « merc'het Jerusalem, ne vouelit ket varnonme, mes gouelit kent varnoc'h oc'h unan, ha var ho pugale. Dont a rañ eun amzer, ha n'ema ket pell mui, ma vezo lavaret d'ar meneziou : meneziou, couezit varnomp; ha d'an torgennou : torgennou, goloit ac'hanomp.



Rac mar greer evel-hen d'ar c'hoat glaz, petra ne vezo ket great d'ar c'hoat seac'h ha didalvez?»

Jesus-Krist, guir Vab Doue, ha n'en denz Doue ken mab nemethan dre natur, a zoug eb en em glemm ar groaz var behini e tle mervel. Evelse e tleomp ive dougen a galoun vad ha gant eur volontez sentuz ar c'hroaziou a zigass Doue deomp. Salver ar bed a zo casset d'ar maro e coumpagnunez daou laër; evelse Joseph, en Ejipt, a ioa bet lakeat ive er prizoun e coumpagnunez daou zen fall.

### 80. Jesus staget ouz ar groaz.

Pa errujont var beg menez Calvar, ar zoudardet a ginnigas d'hor zalver eur banne guin ha vestl mesket en eun douez, evit m'en devije nebeutoc'h a boan pa vije staget ouz ar groaz. Mes hor zalver ne falvezas ket dezhan eva. Neuze ar zoudardet a ziviskas he zillad diganthan, hag a stagas anezhan ouz ar groaz gant tachou, e creiz etre an daou laër. Goudeze e rannjont he zillad entrezho, hag e tennjont plouz berr da velet da biou e vije he zaë.

Saé hor zalver a ioa oll en eun tamm, ha ne oa gri ebet eunhi; eur merk oa euz a llis Jesus-Krist a zo ive oll a bez, ha ne c'hell ket ken nebeut beza great tammou pe lodennou anezhi.

### 81. Jesus er groaz.

Jesus a ioa eta a zistribill ouz ar groaz, ha criz meur-bet oa ar poaniou en devoa da c'houzañv. He c'hoad a zivere dioc'h he gorf var an douar. Couls goude ar iuzevien ne reant van evit guelec'h ar stat truezuz e pehini oa lakeat. Plijadur a gemerent c'hoaz, er c'hontrol, oc'h ober goab anezhan, en eur lavaret: «c'houi a c'helle, var ho meno, pilat an templ d'an traoñ, hag he zével a nevez abenn tri dervez; en em zaveteil eta brema oc'h unan, ha diskennit divar ar groaz-se.» Ha Jesus a lavare: «va Zad, pardounit dezho, rac ne c'houzont ket petra a reont.» Unan euz an daou laër, a ioa var eur groaz a bep tu dezhan, a voal-gomze ive en he enep. Mes egile a scandale he goumpagnoun en eur lavaret: «n'az peuz ket eta aoun rac Doue petra bennac ma'z eo ken tost ar maro d'id? Evidompni, n'e ket eb abec eo e c'houzañvomp ar poaniou-ma; mes hema n'en deuz great drouc ebet.» Goudeze e lavaras da Jesus: «Aotrou, o pet sonch ac'hanon, pa vloc'h eat d'ho rouantelez.» Ha Jesus a respountas dezhan ractaf: «e guirionez m'hel lavar deoc'h, hirio zoken c'houi a vezo ganeñ er baradoz.»

Eur zell a fisians, taolet var Jesus stag ouz ar groaz, a zo aoualc'h evit para cleñvejou an ene, n'euz fors pegen grevuz e vent. Eveise, gueich all, ar guel euz ar zarpant koueur-ha-stean, en devoa lakeat Moizes da zével e beg eur peul, a ioa aoualc'h evit rei adarre ar iec'het da gorf ar re a veze bet flemmet gant ar zarpantet binimuz.

### 82. Ar Verc'hez Vari eharz treid ar groaz.

Mari, mamm da Jesus, hag an abostol s.-lan, a ioa eharz treid ar groaz. En eur zellet outho, Jesus a lavaras d'he vamm: «setu aze ho mab;» ha d'an abostol s. lan:

«setu aze ho mamm;» hag adalec neuze s. Ian a zalc'has ganthan mamm Jesus.

Mari, o chom a za ehaiz treid ar groaz, a zo heñvelous mamm calounec ar seiz breur Makabee. Chom a ra eno eb flach, petra bennac ma'z eo treuzet he ene gant seiz cleze a c'hlac'har. E persounach an abostol s. Ian, an oll gristenien a zo bet roët evit bugale da vamm Doue.

### 83. Jesus a varv er groaz.

Var dro cresteiz an douar oll a oue goloët a deñvalijen, hag an deñvalijen-ze a badas betec teir heur. Abenn an amzer-ze, Jesus, o velet oa dilezet gant Doue ha gant an



dud, a lavaras gant eur vouez creñ : «va Doue, va Doue, perac o peuz va lezet en abandoun?» Eun nebeudic goude, e lavaras c'hoaz : «sec'het am euz.» Neuze eur zoudard a zoubas eun tamm spoue er guinegr, hag, o veza he lakeat e beg eur gorzen, her c'hinnigas d'hor zalver da zuna. Jesus a zunas an tamm spoue, hag a lavaras goudeze : «brema ne jom mui netra da ober.» Hag, o veza soublet he benn, e tremenas.

Kerkent an douar a grenas, ar beziou a zigoras, ha calz tud, maro e gras Doue, a deuas adarre e buez. Gouel an templ en em rannas etre daou adalec an traoñ betec al laëz. An ofliser hag ar zoudardet a ioa var menez Calvar, evit ober goard en dro d'hor zalver, a oue spountet ho unan, ha ne ouent ket evit miret da lavaret : « e guirionez, an den-ze a ioa Mab da Zoue. » Hag ar re a ioa deuet di euz a Jerusalem evit beza test euz a varo Jesus, hag eur maread a ioa anezho, a zistroë d'ar gear mantret-oll, hag en eur skeï var boul ho c'haloun.

Setu aze peur-c'hreat ar pez en doa Mab Doue da ober evit hor prena. Stag ouz ar groaz, he zaouarn astennet, an Hanterour-ze, deuet euz an eñv, en deuz trec'het an ifern ha saveteet an den, evel Moïzes, a zalc'he he blas gueich all, en devoa trec'het an Amalecitet, ha saveteet ar bobl a Israël, en eur bedi ive var eur menez, he zivreac'h astennet. Dre he bemp gouli, Mab Doue en deuz paët ar pez a dliemp da justis he Dad evit hor pec'hejou. Evelse David gueich all a ioa deuet abenn euz ar jeant Goliath, enebour he bobl, o vont d'en em ganna outhan gant pemp mean ebken. Euz a c'houliau hor zalver e redas an dour a c'hras hag a bardoun, evel, gueich all, e tilammas dour euz eur garrec evit recur ho buez d'an Israelitet dare da vervel gant ar zec'het ebarz en dezert. An den a zo eta saveteet; sinet eo ar peoc'h etre Doue hag heñ; an allians goz e deuz great he zro. Setu perac gouel an templ pehini en doa, bete neuze, lakeat disparti etre ar bobl hag al leac'h santel, a deu da regi e daou-anter. Ar sacrificiou coz, e pere e scuillet goad al loanet, o deuz collet hiviziken peb talvoudegez dirac sacrificis hor zalver Jesus-Krist, ar sacrificis-se, n'euz nemethan hag a ve eur sacrificis guirion ha din a Zoue.

#### 84. Jesus lakeat er bez.

Hor zalver a ioa bet staget ouz ar groaz derc'hent ar zadorn. Hogen ar zadorn-Fask a ioa eun deiz braz evit ar iuzevien. Evit eta ne jomche ket corfou ar re a ioa bet foundaonet d'ar máro a istribill ouz ar groaz abenn an deiz-se, ar zoudardet a beur-gassas an daou laër en eur

derri dezho ho divesker. Evit hor zalver, pa veljont oa dija tremenet, ne scojont taol ebet var he zivesker ; mes unan anezho a reas eun toull dezhan en he gostez gant eun taol lans, ha kerkent e redas ac'hano dour ha goad. Dioc'h an abardaëz, Joseph a Arimathii, unan euz a ziskibien Jesus, hag unan ive euz ar pennou braz a Jerusalem, (gant aoun rae ar iuzevien n'en devoa ket anzavet bete neuze e vije diskib da Jesus), a denas da c'houlenn corf hor zalver digant Pilat, ha Pilat hen roas dezhan. Joseph a ieas neuze, eun all, he hano Nicodem, hag heñ, da zistaga corf Jesus dioc'h ar groaz. An daou-ze



en em zicouras da scuill louzou a c'houezvad var ar c'horf sacr, ha d'he liena gant eul liner venn ; ha goudeze e lakejont anezhan en eur bez nevez a ioa e liorz Joseph, hag a

ioa bet toullet en eur garrec. Lakaat a rejont, ouspenn, eur mean braz da stanka var ar bez.

Coulsgoude prinset ar veleien hag ar pharizianet n'oant ket evit repos. Mont a rejont eta da gaout Pilat, hag e leverjont dezhan : « an den-ze en deuz lavaret epad he vuez : me a zavo a varo da veo abenn tri dervez. Roñt eta urs da ober goard en dro d'he vez betec an trede deiz gant aoun na deuffe he ziskibien da gere'hat he gorf ha da lavaret d'ar bobl : ema savet adarre euz a varo da veo.» Pilat a roas dezho ar goardou a c'houlennent. Ar re-ma en em renkas en dro da vez hor zalver, goude beza lakeat ar ziel var ar mean a ioa oc'h he stanka.



Evel Eva, hor mamm hervez an natur, a zo bet tennet euz a gostou Adam, evelse an Ilis santel catholic, hor mamm hervez ar c'hras, a zo deuet euz a gostez digor hor zalver Jesus-Krist. Difennet oa ouz ar iuzevien bruzuna eskern an oan pascal ; setu perac ne one .torret nuncun euz a ijili hor zalver Jesus-Krist, ar guir oan pascal.



SEIZVET PENNAD.

*Buez gloriuz hor zalver Jesus-Krist.*

**85. Jesus-Krist o sevel a varô da veo.**

Daou zervez a ioa m'edo corf hor zalver er bez. Mes d'an trede deiz, dioc'h ar mintin, mintin-mad, an douar a grenas, hag hor zalver a zavas euz ar bez leun a vuez. Eun eal a ioa diskennet euz an eñv da lamet ar mean a ioa lakeat da stanka var ar bez, ha goudeze oa azezet var c'horre ar mean. O velet an eal-ze, a ioa guen evel an erc'h ha skeduz evel eul luc'heden, ar goardou a oue spountet ha strafillet-oll ; coueza a rejont a stok ho c'horf d'an douar evel tud anter-varo gant ho encrez, ha goudeze e tec'hjont kuit kenta ma c'heljont.

Coulsgoude Mari-Madalen, Mari, mamm da Jakes, ha Salome, a deuas ive en deiz-se d'ar bez, kerkent ha



sao-heol, evit scuill louzou a e'houez-vad var gorf hor zalver. Hag hi a lavare entrezho en eur zont gant an hent: « piou a zavo deomp ar mean a zo o stanka var ar bez? » Hogen, pa errujont, e veljont ar mean lamet euz he blas hag ar bez goulou. O velet kement-se, Mari-Madalen a ieas dioc'htu en dro da gass ar c'helou d'an ebestel. Ar grazez all a jomas eno; mes, o veza remerket an eal, e kemerjont kement a aoun ma ne gredent ket sevel ho daoulagad dioc'h an douar. Mes an eal a lavaras dezho: « n'o pezet aoun ebet. Me c'hoar e claskit Jesus a Nazareth; mes perac clask etouez ar re varo an hini a zo leun a vuez? Savet eo a varo da veo; n'ema mui ama; setu al leac'h e pehini oa bet lakeat he gorf. It'affo da lavaret d'he ziskibien, ha dreist oll, da Ber, eo savet euz a varo da veo, hag e vezo en ho raoc er Galilee; eno e c'helloc'h he velet, evel m'en deuz he unan discleriet deoc'h.»

Prestic goude m'oa eat ar gragez-se kuit, ec'h erruas ive an daou abostol Per ha Ian. Mari-Madalen a ioa bet o lavaret dezho n'edo mui corf Jesus er bez. Mes hi a c'hoanteas guelel gant ho daoulagad ho unan ha guir oa ar pez o devoa clevet. Dont a rejont eta ho daou betec ar bez ; mes ne gavchont emhan nemet ar pez a ioa bet o liena ar c'horf santel, ha var gement-se ez ejont ractal en dro d'ar gear.

Jesus a jomas er bez keit ha m'oa bet Jonas e cof ar pesk. D'an trede deiz e teuas da vir ar pez a zo merket er pemzecvet psalm : ne lezoc'h ket corf ho Mab santel da vreina e caloun an douar. Hor zalver a deuas euz ar bez leun a c'hloar, dre he c'halloud he unan, ha gant eur c'horf ha n'en doa mui an doare en devoa aziagent. Hervez ar pez en doa discleriet gueich all ar prophet Isaias, he vez a vezo douget henor ha respet dezhan, betec fin ar bed, gant an oll boblou kristen.

### 86. Jesus en em ziscouez da Vari Vadalen.

A veac'h oa eat Per ha Ian kuit pa deuas adarre Mari-Madalen da glask corf hor zalver. Eun anken vraz a ioa var he speret abalamour n'her c'have mui el leac'h m'oa bet lakeat. Coulskoude, o veza great c'hoaz eur zell er bez, e velas eno daou eal, guisket e guen, hag a lavaras dezhi : «maouez, perac e vouelit?» Hag hi a respountas : «abalamour m'o deuz casset gantho corf va Mestr, ha ne c'houzoun ket e peleac'h o deuz hen lakeat.» O veza comzet evelse, e troas he fenn da zellet adreñ he c'hein, hag e velas Jesus en he za dirazhi. Mes hi ne anavezas ket anezhan, hag a zonjas dezhi oa ar jardiner oa. Setu perac e lavaras dezhan : «mar d'e c'houi eo o peuz her c'hasset ganeoc'h, livirit dinn e peleac'h o peuz hen lakeat, ma'z inn d'he gerc'hat.» Neuze Jesus a c'halvas anezhi dre he hano, en eur lavaret : «Mari!» Ker buhan Mari-Madalen a anavezas hor zalver, hag, o veza en em strinket d'he dreid, e lavaras d'he zro : «o va Mestr!» Hogen Jesus a lavaras dezhi : «it da gaout va breudeur, ha livirit dezho evel-hen euz va ferz : mont a ran da



bignat varzu va Zad hag oc'h hini, varzu va Doue hag ho Toue.» Mari-Madalen a ias ractal da gounta an dra-ze d'an diskibien; mes ar re-ma ne felle ket dezho credi ar pezh a lavare.

**87. Ar goardou a ia da gounta da brinset ar veleien ar pezh a zo erruet.**

Ar goardou, o veza kuiteat ar bez gant ho spout, a ias da gounta da brinset ar veleien ar pezh a ioa c'hoarvezet. Ar re-ma a assambles ar pennou braz euz a gear, hag, o veza en em glevet gantho, e rojont eun dornad mad a arc'hant d'ar zoudardet, en eur lavaret dezho: «livirit eo deuet he ziskibien da gerc'hat he gorf en noz epad m'oac'h cousket. Ha mar clever ar gouarnner an dra-ze, ni a gomzo evidoc'h, ha ne raio drouc ebet deoc'h.» Ar zoudardet a gemeras an arc'hant, hag a reas evel m'oa bet gourc'hemennet dezho.

88. Jesus en em ziscouez da zaou ziskib a ioa  
o vont da Emmaüs.

En deiz-se c'hoaz, dioc'h an abardaëz, ez oa daou ziskib o vont da Emmaüs, eur bourg pe eur geria den hag a zo var dro diou leo dioc'h Jerusalem. En eur vont gant ho hent, an daou ziskib-se a gomze entrezho divar benn hor zalver. Ha setu Jesus he unan oc'h en em ziscouez en ho c'hichen evel eun den hag a ioa o vale dre eun hevelep hent gantho. Mes hi ne anavezchont ket anezhan. Neuze hor zalver a c'houlennas digantho :



« euz a betra e comzit evelse ho taou, ha perac eo ken teñval-ze ho penn ? » Hag unan anezho, he hano Cleophas, a respontas : « c'houi n'oc'h ket eta euz a Jerusalem ma ne c'houzoc'h ket petra zo c'hoarvezet eno en deziou-ma ? » Var gement-se an daou ziskib en em lakeas da gounta d'ho c'houpagnoun o devoa credet oa Jesus a Nazareth ar Messias, abalamour d'an traou caër ha burzuduz a rea. « Mes, emezho, prinset ar veleien hag ar pennou braz euz a gear o deuz lakeat he goundaoni d'ar maro, ha setu hirio an trede deiz abaoue m'ema he gorf

er bez.» Neuze hor zalver a lavaras : « na c'houi zo berr ho speret, ha poud da gredi ar pez o deuz discleriet ar brophetet ! Daoust ha n'oa ket red d'ar C'hrist gouzañv ar poaniou en deuz gouzañvet abarz erruout en he c'hloar ? » Goudeze, en eur vont euz an eil levr d'egile euz ar Scritur sacr, adalec levriou Moïzes betec scridou ar brophetet, e roas da anaout selear d'an daou ziskib ar pez a ioa merket eno divar he benn. O veza erruet evelse e bourg Emmaüs, Jesus a reas an neuz da vont larcoc'h. Mes an daou ziskib a reas dezhan chom gantho, en eur lavaret : « chomit ganeomp, rae pardaëz eo dija ha bremaie ema an noz. » Jesus a jomas eta en ho c'houmpagnunez, hag, o veza eat gantho en ti ma'z eant, ec'h en em lakeas ous taol eveldho. Neuze e kemeras eun tamm bara, hag, o veza he venniget, hag he rannet etre daou, her c'hinnigas da zibri d'an daou ziskib. Kerkent daouladad ar re-ma a zigoras, hag ec'h anavezehont ho Mestr. Mes hor zalver a zisparissas ractal. An daou ziskib, leun a joa, a zavas ive dioc'h taol, hag a zistroas dioc'htu da Jerusalem.

Ar iuzevien n'oa ket bet falvezet dezho anaout Jesus evit ar Messias, en despet d'ar burzudou a bep seurt en devoa great en ho zouez. Setu perac ive hor zalver n'en em ziscouez ket dezho goude m'oa savet a varo da veo. N'en em ziscouez nemet d'he ziskibien, a grede enghan, hag a glaske anezhan euz a greiz ho c'haloun. Evelse ive, en deiz a hirio, Jesus a deu gant he c'hras da gaout ar re hen digemer a volontez vad ; mes dilezel a ra ive erfin ar re a gendalc'h da zerra outhan dor ho c'haloun, petra bennac m'en deuz dija goulennet digor outho meur a veich hag e meur a fesoun.

### 89. Jesus en em ziscouez d'an oll ebestel assambles.

Pa erruas an daou ziskib e Jerusalem, goude beza great ho zro e Emmaüs, an ebestel hag an diskibien all a ioa assamblet eno en eur zal, hag a lavaras dezho : « mad ! guir eo e savet hor Mestr a varo da veo ; rac Simon en deuz he velet. » Neuze hi en em lakeas da gounta, d'ho zro, ar pez a ioa c'hoarvezet gantho en hent,

ha penaoz o devoa anavezet Jesus p'en devoa rannet eun iamm bara entrezho. Epad m'edo an ebestel hag an diskibien all o comz euz an traou-ze, serret-cloz gantho an doriou var al leac'h ma edont gant aoun rac ar iuzevien, setu hor zalver he unan oc'h en em ziscouez e creiz ar zal hag o lavaret dezho: «ar peoc'h ra vezo ganeoc'h!» An ebestel a oue strafillet ha spountet-oll o velet ho Mestr; rac credi a reant oa eur speret eo a ioa dirazho. Neuze Jesus a gomzas outho evel-hen: «rac petra o peuz-c'houi aoun, ha perac e lezit-hu ar zonzou-ze da c'hounit ho caloun? Sellit ous va daouarn hag ous va zreid; me va unan eo; touchit ouzinn hag e veloc'h piou oun: eur speret n'en deuz na kig nag askorn evel a velit am euz-me.» Hag, o veza comzet evelse, e tiscouezas dezho he zaouarn hag he dreid. Goudeze e c'houlennas digantho: «bez' o peuz ama eun dra bennac da zibri?» An ebestel a ginnigas dezhan eun tamm pesk poazet oc'h an tan hag eun dellien-goâr; ha Jesus a zebras dirazho.

## 90. Hor zalver oc'h institui ar zacramant a binijen.

Jesus a lavaras goudeze d'he ebestel: «ar peoc'h ra vezo ganeoc'h! Evel m'oun bet digasset gant va Zad, evelse me ho cass d'am zro». Neuze e c'hoëzas varnho, hag e lavaras adarre: «recevit ar Speret-Santel; ar pec'hejou a vezo pardounet d'ar re m'o pezo ho fardounet; ha ne vezint ket pardounet d'ar re n'o pezo ket ho fardounet.»

An ebestel a dlie mervel, mes an Ilis a dle padout ato. Setu perac ar c'halloud roët d'an ebestel a zo chomet gant ar re a zalc'h brema ho flas, da lavaret eo, gant an eskibien. Ar re-ma, hag ar veleien a zo oc'h ho zicour, o deuz bepret, a rumm da rumm, ar c'halloud da bardouni ar pec'hejou, pe da jom eb ho fardouni. Mes peur e tleont-hi pardouni ar pec'hejou, ha peur e tleont-hi chom eb ho fardouni? Setu ar pez ne c'hellont ket da c'houzout nemet dre ar gonnession.



### 91. Jesus ha S. Thomas.

S. Thomas n'edo ket gant an ebestel all pa oa hor zalver en em ziscouezet dezho. Pa'z eas eta an ebestel all da gounta dezhan o devoa gueleet ho Mestr, Thomas ne fellas ket dezhan credi. «Ne gredinu ket, emezhian, ken n'am bezo gueleet merk an tachou en he zaouarn, ha lakeat va biz e toullou an tachou, ha va dorn er gouli euz he gostez.» Hogen, eiz dez goude, an diskibien a ioa adarre assamblet, ha Thomas gantho. Evel ar veich all, an doriou a ioa serret-eloz var al leac'h ma edont. Ha setu Jesus oc'h en em ziscouez adarre en ho zouez hag o lavaret dezho : «ar peoc'h ra vezo ganeoc'h!» Goudeze e lavaras da Domas : «lakiit ho piz ama ha sellit ous va daouarn ; tostaït ive ho torn ha lakit-heñ er gouli euz va c'hostez, hag hiviziken ne d'it ket da ober an den discredic, mes bezit eun den a feiz beo ha stard.» Neuze Thomas en em strinkas da dreïd hor zalver, en eur lavaret : «va Mestr ha va Doue!» Ha Jesus a respountas : «credet o peuz, Thomas, abalamour m'o peuz gueleet. Eüruz ar re a gred eb beza gueleet!»

### 92. An abostol S. Per lakeat da genta pastor.

Hervez an urs roët dezho gant hor zalver, an ebestel o devoa kuiteat Jerusalem hag a ioa en em dennet er Galilee. Eno Jesus en em ziscouezas dezho var lenn Jenezareth, hag, o veza ho lakeat da baka eun niver braz a besket, e tebras he unan gantho. Goude ar pred e c'houlennas evel-heñ ous Simon-Per : «Simon, mab da Ian, va c'haret a rit-hu muioc'h eget ar re-ma?» Ha Per a respountas : «o va Mestr, c'houi a c'hoar e caran ac'hanoc'h.» Neuze Jesus a lavaras dezhan : «bezit pastor va oanet.» Goudeze e c'houlennas diganthan evit an eil gueich : «Simon, mab da Ian, va c'haret a rit-hu?» Ha Per a respountas evel ar veich genta : «ia, va Mestr, c'houi a c'hoar e caran ac'hanoc'h.» Var gement-se Jesus a lavaras dezhan adarre : «bezit pastor va oanet.» Ha goudeze e c'houlennas outhan evit an drede gueich :





«Simon, mab da Ian, va c'haret a rit-hu?» Per en devoue poan o clevet hor zalver o c'houlen outhan evit an drede gueich hag he garet a rea, ha setu heñ da respount : «o va Mestr, c'houi a anavez peb tra, c'houi a c'hoar ervad e caran ac'hanoc'h.» Neuze Jesus a lavaras dezhan : «bezit pastor va dañvadezet.»

An oanet eo an oll dud fidel euz an Ilis, hag an dañvadezet eo an eskibien a zo carget da ren an dud fidel en hent euz ar zilvidigez, ha d'ho maga gant comzou Doue ha gant ar zacramanchou. Hor zalver Jesus-Krist en deuz roët ato da anaout, keit ha m'e bet var an douar, oa s. Per ar c'henta euz an ebestel. Great en deuz anezhan ar penn hag ar mean-diazez euz he Ilis, hag hen lakeat en deuz da bastor var an eskibien ho unan kercoulz ha var an oll dud fidel a zo en ho c'harg. Ar renk kenta-ze, roët gueich all da s. Per, a zo tremenet var he lerc'h d'ar pabet euz a Rom pere a zalc'h brema he blas.

### **93. Jesus a lavar d'he ebestel e tigasso dezho ar Speret-Santel.**

Hor zalver en em ziscouezas c'hoaz meur a veich d'he ziskibien, hag a gomzas gantho divar benn an Ilis, pehini eo he rouantelez var an douar. D'an daou-ugentvet

dervez goude m'oa bet savet euz a varo da veo, ee'h en em ziscouezas evit ar veich diveza d'he oll ebestel, assamblet e Jerusalem. Reï a reas urs dezho da jom er gear-ze ken n'o devije recevet ar Speret-Santel. Lavaret a reas dezho : « abarz nemeur ama ar Speret-Santel a ziskenno varnoc'h ; heñ a roïo deoc'h an nerz da reï testeni ae'hanon-me e Jerusalem, e kement corn zo er Judee, ha betec ar penn pella euz ar bed.»

**94. Jesus o kimiada dioc'h he ebestel, hag o pignat en env.**

Goude beza lavaret d'he ebestel e figassche dezho ar Speret-Santel, hor zalver ho c'hassas ganthan var menez Olivet. Eno e comzas outho evel-hen : « peb galloud a zo roët dinn en eñv ha var an douar. It eta dre ar bed



oll da brezec an Aviel d'an oll boblou euz an douar ; badezit anezho en hano an Tad, ar Mab hag ar Speret-Santel, ha deskit dezho miret kement gourc'hemenn ha

kement kelennadurez am euz-me roët deoc'h. Setu, me va unan a vezo ganeoc'h bemdez keit ha ma chomo ar bed-ma en he za. An nep piou bennac a gredo ennon hag a recevo ar Vadiziant, a vezo salvet; an nep ne gredo ket a vezo coundaonet.»

Jesus a zo ato gant he Iis, petra bennac ne c'heller ket he velet gant daoulagad ar c'horf; kendelc'her a ra da brezec dre c'hinou an eskibien hag ar veleien, da ginnig sacrifisou da Zoue dre ho daouarn, ha da ren e persounach hon Tad santel ar pab.

Goude beza comzet evelse, hor zalver Jesus-Krist a zavas he zaouarn da vennigen lie ebestel, hag, epad m'edo oc'h ho bennigen, e pignas dirazho en eñv, el leac'h m'eo azezet en tu deou da Zoue. An ebestel, estlammet ha glac'haret, ne dennent lagad ebet divar ho Mestr, ken na oue erfin cuzet outho gant eur goabren. Neuze daou eal, hag hi guisket e guen, a deuas da lavaret dezho : « tud a C'halilee, perac e chomit-hu aze da zellet ouz an eñv? Ar Jesus-se o peuz guelet oc'h en em zavel en eñv, a ziskenno adarre eun deiz egiz m'o peuz he velet o pignat.» Var gement-se an ebestel a adoras ho Mestr hag a zistroas da Jerusalem en eur veuli Doue.

Jesus-Krist a zo pignet en eñv evit ren ive evel den e gloar Doue. Ar pezh a erruas gant Elias gueich all a verke ar pezh a dlie hor zalver da ober. Ar prophet-se a oue savet en eñv en eur c'har tan, ha dont a dle adarre var an douar, hervez ar prophet Malachias, eun nebeut araoc eil donedigez hor zalver. Adam, dre he bec'het, en devoa lakeat an dud da zistrei ho daoulagad divar ho guir bro; Jesus, an eil Adam, hon laka adarre, en eur bignat en eñv, de zavel hon daoulagad varzu eno, hag a ro deomp an esperans da gaout perz ive eun deiz en eürusdet a bado da viken.

### 95. Eur ger en eur achui.

Kement tra a zo bet merket ama divar benn buez, oberou ha comzou Jesus-Krist, a zo tennet divar ar pevar aviel. Mes hor zalver en deuz great ha lavaret calz traou all ha n'euz hano ebet anezho er pevar aviel. Rac, evel

a lavar an abostol s. Ian, ma vije bet c'hoant da scriva kement tra en deuz great pe lavaret Jesus-Krist epad n'eo bet var an douar, ne vije ket cavet er bed oll, peger braz bennac ma'z eo, plas aoualc'h da lakaat al levriou a vije bet red da ober evit kement-se.



## EIL LODEN.

### HISTOR AN EBESTEL.

#### 96. Eur ger araoc.

Jesus a ioa deuet er bed-ma evit lakaat Doue da ren var an douar e plas an diaoul. Setu perac, en eur bignat en eñv, e lezas var he lerc'h eun Ilis vihan pehini a dlie creski hag en em skigna dre ar bed oll. An ebestel eo a oue carget da genta da lakaat evelse rouantelez Doue var an douar, da lavaret eo, an Ilis santel, da greski ha d'en em astenn dre ar bed. Mont a reomp brema da gounta petra rejont evit kement-se.

#### 97. S. Mathias choazet evit abostol.

Goude m'oa pignet hor zalver Jesus-Krist en eñv, an ebestel a zistroas da Jerusalem. En em denna a rejont neuze, ar Verc'hez Vari, an diskibien all hag hi, en eur gambr pe eur zal, hanvet ar *Cenacl.* Eno, epad dec dervez dioc'htu, e tremenjont ho oll amzer o pedi, evit en em lakaat e stat vad da receo ar Speret-Santel. Var dro c'houec'h-ugent a ioa anezho, ha lavaret e vije great n'o devoa oll nemet eur galoun hag eur speret. Eun dervez s. Per a gomzas d'he vreudeur divar benn choaz eun abostol all e plas an treïtour Judas. Ar pez a lavaras s. Per a oue cavet mad. Goulenn a rejot da genta sclerijen digant Doue, ha goudeze e oue tennet d'ar zort, hag ar zort o veza couezet var an diskib Mathias, hema a oue choazet evit an daouzecvet abostol.

98. Ar Speret-Santel o tisken var an ebestel.



D'an devet dervez goude m'oa pignet hor zalver en eñv edo Pantecost ar iuzevien. En deiz-se, dioc'h ar mintin, an ebestel a glevas, en eun taol-count, an ti el leac'h ma edont o tregarni penn-da-benn gant eun trouz braz, a deue euz an eñv, hag a ioa heñvel ous trouz eur gorventenn ; ha kerkent e veljont ive evel teodou tan o strinka en ho zouez, hag o tont da blava, unan var benn peb hini anezho. Racta! e ouent oll leun euz ar Speret-Santel, hag ec'h en em lakejont da gomz a bep seurt langachou disheñvel. Hogen, d'ar mare-ze ez oa e Jerusalem iuzevien euz a gement corn zo er bed, deuet di da dremen gouel ar Pantecost. Ar brud euz ar pez a ioa c'hoarvezet gant an ebestel o veza eat dre gear, eur maread euz ar iuzevien-ze en em assambles dirac an ti el leac'h ma edont, hag oll e ouent souezet maro o clevet anezho o comz peb hini euz al langachou a gomzent ho unan. « Biscoaz kement all, a lavare ar iuzevien-ze gant

ho estlamm; daoust hag an dud-se n'int ket euzar Galilee? Penaoz eta e c'hellont-hi comz al langachou a gomzer er broïou e pere emaompni o chom?» Hiniennou coulsgoude a rea goab euz ar re a ziscoueze beza ker souezet. «Bah! emezho, an dud-ze a zo savet ar guin d'ho fenn.» Neuze s. Per, en he za, hag an ebestel all en dro dezhan, en em lakeas da gomz evel-hen a vouez huel: «tud euz ar Judee, ha c'houi oll a zo o chom e Jerusalem, selaouit ac'hanon! Nan, an dud-ma n'e ket savet ar guin d'ho fenn evel m'o peuz c'hoant da lavaret e ve; mes guelet a rit hirio o tont da vir dirazoc'h ar pez en deuz discle-riet gueich all an Aotrou Doue dre c'hinou ar prophet Joël: dont a raï eun amzer, eme an Aotrou Doue, e pehini me gargo peb den euz va Speret. Tud a Israël, selaouit ar c'homzou-ma: Jesus a Nazareth, an den-ze pehini en deuz discouezet deoc'h ker sclear, dre ar bur-zudou a rea en ho touez, e teue a berz Doue, ha pehini oc'h euz-c'houi coulsgoude lakeat d'ar maro var eur groaz dre zaouarn ar vourrevien; an den-ze a zo brema en eñv, azezet en tu deou da Zoue, hag heñ eo en deuz lakeat he Speret da zisken hirio varnompni, hervez an desteni a ro deoc'h ho taoulagad hag ho tiouscouarn. Red eo eta da bep hini ac'hanoc'h anaout hag anzaio eo Jesus Salver ha Mestr ar bed oll.»

Ar re a ioa o selaou s. Per, epad ma comze evelse, a oue ho c'haloun rannet gant glac'har, hag a c'houlennas outhan hag ouz an ebestel all: «breudeur, petra dleompni da ober?» Ha s. Per a respountas: «grit pinijen, ha deuit peb hini ac'hanoc'h da receo ar vadiziant en hano Jesus-Krist evit ma vezo pardounet deoc'h ho pec'hejou; ha goudeze e recevoc'h ive ar Speret-Santel.» Var dro tri mil a oue badezet dioc'h-tu en deiz-se. Oll e talc'hent mad da vont da zelaou an ebestel, da bedi ha da gom-munia assambles gantho; hag an niver anezho a greske a zeiz da zeiz

Da zeiz ar Pantecost ar Speret-Santel a sclereas sperejou an dud, evit ma c'heljent coumpren langach an ebestel, hag anaout ar virionez euz ho c'homzou. Gueich all, er

c'hountrol, pa oa bet c'hoant da zavel tour Babel, Doue en devoa rouestlet ha kemmesket langach an dud our-gouilluz o devoa lakeat ar zonch-se en ho speret, en eun hevelêp feson ma ne c'hellent mui en em goupren an eil egile. Ar Pantecost kenta a ioa bet gueich all evit ar iuzevien eun dervez a spount hag a encrez; rac da geñver an deiz-se eo oa deuet an Aotrou Doue da zigass dezho he lezen, divar menez Sinaï, e creiz an tan euz al luc'het hag an trouz euz ar gurun. Ar Pantecost kenta euz al lezen nevez a oue, er c'hountrol, eun dervez a joa hag a laouenedigez evit an ebestel, hag evit an oll eneou fidel a zigoras ho c'haloun gant carantez ha gant anaoudegez vad da receo donezounou ar Speret-Santel. En amzer al lezen goz, gouel an eost a errue assambles gant gouel ar Pantecost; d'ar Pantecost kenta euz al lezen nevez, ar Speret-Santel a zastumas ive eun eost caër etouez ar iuzevien, dre an niver braz a eneou a heulias hag a lakeas da dâl-vout ar sclerijen a roas dezho.

### 99. S. Per a bare eur paour-keaz camm eharz an templ.

Er memes deiz, var dro teir heur dioc'h an noz, s. Per ha s. Ian a ioa o vont d'an templ da ober ho feden. Ha setu, e kichen an or a reat an *or vras* anezhi, e cavchont eur paour-keaz hag a ioa ganet camm. Ar paour-ze a veze douget di bemdez evit goulenn an aluzen ouz ar re a deue d'an templ. O velet s. Per ha s. Ian o tremen ebiou dezhan, ec'h astennas he zorn da c'houlenn digantho eun draic bennac. Neuze s. Per a lavaras: «n'em euz nag aour, nag arc'hant; mes ar pezh am euz a roan deoc'h a galoun vad. En hano Jesus-Krist a Nazareth, savit en ho sa ha kerzit.» Er memes amzer s. Per a grogas en he zorn evit he zicour da zavel, ha ker buhan ar paour-keaz camm a deuas nerz dezhan en he zivesker; poueza a c'hellas var blantou he dreïd, hag, o veza savet en he za, ec'h en em lakeas da gerzet, hag ez eas en templ gant an daou abostol evit trugarekaat Doue.

Ar brud euz ar miracl-se o veza eat dre gear, ar bobl a ziredas d'an templ a bep tu, hag an oll a oue souezet-marô o velet ar paour-keaz camm o vale ken eun ha ken dress ha peb hini. Neuze s. Per a zavas he vouez dirac ar bobl, hag a gomzas evel-hen: «tud a Israël, perac





oc'h-hu ker  
souezet gant  
ar pezh a velit  
ha perac e  
sellit-hu  
ouzompni  
gant an  
daoulagad  
estlâmet-  
se, evel pa  
ve ni, dre  
honnerzh hag  
hor galloud  
hon unan,  
eo or beffe  
roët ar c'her-

zet d'an den-ze? N'e ket ni eo or beuz great an dra-ze; mes Doue hon tadou eo en deuz glorifiet he Vab Jesus, an hini o peuz-c'houi lakeat d'ar maro, petra bennac ma'z eo diganthan eo e teu ar vuez. Ar Mab-se da Zoue eo en deuz, dre an nerz hag ar c'halloud euz he hano, ha dre ar feiz or beuz-ni en nerz hag er c'halloud-se, great ar burzud ma'z oc'h oll test anezhan. Ia, Heñ eo en deuz lakeat an den-ma, a velit ama dirazoc'h hag a anavezit a bell zo, da veza pare piz dioc'h ar pezh a vire outhan da boueza var he zivesker ha da gerzet evel ar re all. Gouzout a ran, va breudeur, ne c'houi'ac'h ket petra reac'h p'o peuz lakeat Mab Doue d'ar maro. Grit eta pinijen ha distroït ouz ho salver, hag e vezo pardounet deoc'h ho pec'hejou.» Ar c'homzou-ze, hag ar miracl great e keñver an hini a ioa ganet camm, a skoas eun taol ker pounner var galounou ar re a ioa eno, ma teuas pemp mil den dioc'htu da c'houlenn beza badezet.

**100. S. Per ha s. Ian dirac ar pennou braz a Jerusalem.**

S. Per ha S. Ian a ioa c'hoaz o comz ouz ar bobl pa zigouezas eno ar veleien hag an offiser a ioa e penn goardou an templ. Ar re-ma a ieas drouc enno o velet an



ebestel o prezec d'ar bobl a vouez huel, ha ractal e rojont urs d'ho dastum ha d'ho c'hass d'ar prizoun da dremen an noz. Prinset ar veleien hag ar re vraz euz a gear, o veza en em assamblet antronoz, a reas digass dirazho s. Per ha s. Ian. Goulenn a rejont da genta ouz an daou abostol : «dre beseurt galloud, pe en hano piou o peuz-c'houi great ar pez o peuz great deac'h?» Ha kerkent s. Per a respountas : «selaouit, prinset a Israël : ra zeui peb hini ac'hanoc'h ha ra zeui ar bobl oll da anaout ar virionez ! Mar d'ema an den-ze a ioa ganet camm en he za ama dirazoc'h, mar d'eo pare piz dioc'h ar pez a vire outhan da gerzet, n'e d'eo nemet dre an nerz hag ar c'halloud euz a hano hor zalver Jesus-Krist. Ar zalver-ze, c'houi o poa hen lakeat d'ar maro var eur groaz ; mes Doue en deuz lakeat anezhan da zével euz ar bez leun a vuez. Heñ eo ar mean a zo bet taolet ganeoc'h-hu a gostez, hag a zalc'h an ti oll en he za. N'ez euz silvidigez ebet da c'hortoz nemet dreizhan ; rac n'ez euz var an douar etouez an dud hano all ebet, nemet he hini, hag en deffe ar c'halloud d'hor zavetei.»

Var gement-se ar pennou braz a Jerusalem hag ar veleien a roas urs da gass an daou abostol er meaz euz ar zal. Goudeze ec'h en em lakejont da gemeret cuzul an eil digant egile. «Petra a raïmp d'an dud-se? emezho. Ar miracl o deuz great a zo anavezet gant kement den a zo e Jerusalem ; setu aze eun dra hag a zo sclear, ne c'hellomp ket hen nac'h. Mes evit ne d'aï ket larcoc'h ar brud euz ar miracl-se, ni ia da zifen grons ouz an dud-se lavaret ger ebet mui divar benn an hano a Jesus.» Mes s. Per ha s. Ian, o veza bet digasset adarre d'ar zal, a respountas : «guelit oc'h unan hag eun dra vad e ve dirac Doue senti ouzoc'h kent eget senti outhan. Ni n'oump ket evit miret da gomz euz ar pez or beuz guelet ha clevet.» Goude ar respount-se, ar varnerien a lezas an daou abostol da vont el leac'h ma carjent. Ho gour-drouz a rejont c'hoaz, evit guir, ma kendalc'hjent da brezec evel o devoa great dija ; mes ne gredjont ober drouc ebet dezho gant aoun rac ar bobl.

**101. Buez ar gristenien genta.**

Ar gristenien genta a rene eur vuez santel meurbet. Delc'her a reant mad da vont da zelaou an ebestel, da bedi ha da gommunia assambles gantho. N'o devoa oll nemet eur galoun hag eun ene. Nicun anezho ne zonje e vije dezhan he unan ebken ar pezh en devoa; peb tra a ioa boutin entrezho. Setu perac ne oa paour ebet en ho zouez; rac ar re o devoa tiez, douarou, ho guerze hag a zigasse ar priz anezho eharz treid an ebestel, hag ar re-ma a ingale an arc'hant-se etre an oll dud fidel, en eur rei da bep hini hervez he ezom. Ar garantez-se a vreudeur o devoa ar gristenien genta an eil evit egile a rea d'ar bobl caout eun istim hag eur respet braz evitho, hag an niver anezho a greske a zeiz da zeiz.

**102. Ananias ha Saphir.**



En amzer-ze e veve daou bried, eur goaz hanvet Ananias, hag he c'hreg, hanvet Saphir. Ar re-ma a verzas eur park o devoa, hag en em glevas da zalc'her gantho lod euz an arc'hant o doa bet evithan. Ananias a ieas da gass an nemorant d'an ebestel, hag a roas ar

pez a ioa eat ganthan evel pa n'en devije guerzet he bark nemet kement-se. Mes s. Per a lavaras dezhan : «Ananias, perac o peuz-c'houi lezet Satan da c'hounit ho caloun, ha da lakaat ac'hanoc'h da lavaret gevier d'ar Speret-Santel, en eur zelc'her ganeoc'h lod euz an arc'hant o peuz bet evit ho park? Mestr oac'h da ober ar pez a garjac'h gant an arc'hant-se; mes kement ha m'o poa sonjet hen digass ama, e tliac'h beza lavaret ar virionez. Pec'het o peuz eta; rac n'e ket d'an dud ebken, mes da Zoue he unan, eo o peuz lavaret gevier.» A veac'h oa ar c'homzou-ze peur-achuet ma couezas Ananias d'an douar maro-mic.

Abenn teir heur goude, ec'h erruas ive Saphir. Houma a fellas dezhi nac'h ar virionez evel he goaz, ha ker buban e couezas ive maro-mic eharz treïd s. Per. An daou varo scrijuz-se a lakeas ar spount etouez ar gristenien, hag a reas dezho caout eun doujans vraz evit an ebestel.

### 103. An ebestel taolet er prizoun.

An ebestel a rea alz miraclou; euz ar c'hearriou divar dro e tigasset da Jerusalem tud clañv ha tud hag a ioa eat an diaoul en ho c'horf, hag an ebestel ho faree oll. E s. Per, dreist ar re all c'hoaz, e tiscouezet caout ar fisians ar vrassa. Pa dremene dre eur ru pe eur blasen bennac, e tigasset var he hent tud clañv ha tud mac'hanniet, guele hag all, en eur zonzal e vijent pare ma c'helje ar skeud ebken euz an abostol mont betec enno. O velet ar burzudou-ze a rea an ebestel, hag ar respet a zouge dezho ar bobl, prinset ar veleien a gemeras muioc'h-mui a gaz outho, hag a lakeas ho zeuler er prizoun. Mes eun eal a deuas, a berz Doue, da zigeri doriou ar prizoun epad an noz, hag, en eur lakaat an ebestel er meaz, e lavaras dezho : «it d'an templ da brezec d'ar bobl ar c'homzou a ro ar vuez.» An ebestel a ieas eta d'an templ mintin-mad, hag en em lakeas da brezec. Epad an amzer-ze, e teujer d'ho c'hask d'ar prizoun evit ho c'hass dirac prinset ar veleien hag ar pennou



braz euz a gear. An archerien a ioa carget euz ar gevridi-ze a gavas doriou ar prizoun serret-cloz dioc'h an diañveaz, hag ar goardou en ho za e kichen ; mes pa'z ejont ebarz, ne gavchont mui nemet plas an ebestel. Prinset ar veleien hag ar pennou braz euz a gear a oue nec'het maro ha stravillet-oll pa glevchont ar c'helou-ze. Etre daou unan bennac a deuas da lavaret dezho edo an ebestel en templ o kelen ar bobl. Neuze an offiser a ioa e penn goardou an templ a i eas di dioc'htu gant he zoudardet, hag a zigassas ganthan an ebestel eb ober couls-goude drouc ebet dezho ; rac aoun en devoa da veza labezet, pe lazet gant ar bobl a daoliou mein. Pa erruas an ebestel dirac ar re a ioa assamblet evit ho barn, ar belec braz a gomzas outho evel-hen : « ha n'or boa-ni ket difennet ouzoc'h grons comz mui euz an hano-ze ? (An hano a Jesus). Ha setu n'euz ken brud e Jerusalem nemet euz ho prezegennou ; hag e fell deoc'h lakaat goad an den-ze da goueza varnompni. » Mes s. Per hag an ebestel all a respontas : « red eo senti ous Doue kentoc'h eget senti ouz an dud. » Hag er memes amzer e rojont adarre testeni a vouez huel oa Jesus-Krist, an hini a ioa bet staget ouz ar groaz, savet euz a varo da veo. O clevet kement-se, prinset ar veleien hag ar re all a grene

gant an drouc hag ar gounnar a ioa enno. Edont dija o sonjal coundaoni an ebestel d'ar maro pa deuas unan euz ar re a ioa en assemble pe er c'honseil da zével en he za. An den-ze a ioa eun doctor euz al lezen, he hano Gamaliel. Goulenn a reas da genta ma vije lakeat an ebestel er meaz eur pennadic, ha goudeze e comzas evelhen : «tud a Israël, lakiit evez oc'h ar pez a reoc'h e keñver an dud-se. Evidon-me a roffe ali deoc'h d'ho lezel e peoc'h. Ma n'e ket a berz Doue eo e prezegont, ar pez o deuz c'hoant da ober a ielo da netra anezhan he unan; mes mar d'eo a berz Doue eo e prezegont, caër o pezo, ne c'helloc'h ket cass da netra ar pez a reont, hag, oc'h en em ziscleria en ho enep, e teuffac'h d'en em ziscleria a enep Doue he unan.» Prinset ar veleien hag ar re all ne falvezas ket dezho heul an ali-ze penn-da-benn. Mes, o veza galvet an ebestel da zont adarre er zal, e rojont urs d'ho scourjeza, hag e tifennjont outho a nevez lavaret ger ebet mui divar benn an hano a Jesus. Goudeze evelato e lezchont anezho da vont kuit. An ebestel a deuas ac'hano ar joa en ho c'haloun, abalamour m'oant bet cavet din da c'houzañv eun dra bennac evit an hano a Jesus. Kendelc'her a rejont goudeze da gelen ar bobl evel aziagent, ha da brezec Jesus-Krist bemdez en templ hag en tiez all.

**104. S. Stephan kenta merzer hag unan euz ar seiz avieler kenta.**

O veza ma creske an niver euz ar gristenien, e savas eur c'hlemm bennac en ho zouez divar benn ar bouet hag an aluzennou a veze ingalet bemdez entrezho. Neuze an ebestel a assambles an diskibien all hag a lavaraz dezho : «breudeur ker, choazit en ho touez, evit ingala ar bouet hag an aluzennou, seiz den ha n'euz netra da lavaret anezho, seiz den hag a zo anad, dre ho furnez, ema ar Speret-Santel o ren en ho c'haloun. Evidompni or bezo aoualc'h da ober o pedi hag o vaga an eneou gant comzou Doue.» An diskibien all a gavas mad ar pez a lavare an ebestel. Choaz a rejont eta seiz avieler hag a

vije en ho c'harg pourveñ ar gristenien euz ar pezh a zellous magadurez ar c'horf. Stephan ha Philipp a oue an daou genta euz ar seiz avieler-ze. Pa ouent choazet ho seiz, an diskibien ho digassas dirac an ebestel, hag ar re-ma a lakeas ho daouarn varnho en eur bedi, evit reiñ dezho an urs sacr da behini oant galvet. Hogen, Stephan, dre ma'z oa leun a c'hrasou hag a c'halloud Doue, a rea burzudou ha miraclou braz etouez ar bobl. Coulskoude hiniennou euz ar iuzevien en em zavas en he enep, hag a glaskas beza treac'h dezhan gant ho zeod. Mes red e oue



dezhho plega dirac ar furnez euz he respontchou, ha dirac ar Speret-Santel a gomze dre he c'hinou.

Neuze e tamalljontanezhan da veza goal-gomzet a enep Moïzes hag a enep Doue, hag e

rejoint he gass dirac ar c'honseil braz a Jerusalem. Tud ar c'honseil-ze, o veza sellet outhan, a gawe dezho gullet eun eal dirazho. Mes Stephan o veza rebechet dezho e reant ato ar scouarn vouzar ous mouez ar Speret-Santel, hag o devoa lakeat hor zalver d'ar maro, an dud-se a ias kement a zrouc ennho ma verve ho goad ha ma scrigne ho dent gant ar gounnar o doa ouz an avieler calounec. Coulskoude Stephan, o veza savet he zaoulagad etrezec an eñv, a velas eno an Aotrou Doue en he c'hloar, ha Jesus azezet en tu deou d'he Dad, ha kerkent e roas da anaout petra vele en eur lavaret: «me vel an eñv digor, ha Mab an den azezet en tu deou da Zoue.»

O clevet ar c'homzou-ze, ar re a ioa er c'honseil en em daolas oll varnhan en eur ioue'hal a bouez-penn, hag en eur lakaat ho biziet da stanka ho dioucouarn evit miret na vijent bouzaret. He vounta a rejont evelse da vont en ho raoc er meaz euz a gear evit he laza a daoliou mein. Neuze ar re o devoa douget testeni en he enep a ieas da rei ho dillad da zivoal da eun den iaouank hanvet Saul. Hogen, Stephan a bede Doue, epad m'edot o vanna mein outhan, hag a lavare: «salver Jesus, recevit va ene.» Goudeze ec'h en em lakeas var bennou he zaoulin, hag e lavaras gant eur vouez creñ; «va Doue, pardounit dezho ar pec'het-ma.» Hag, o veza comzet evelse, e roas he ene da Zoue.

Ar iuzevien o devoa goal-gasset ha lakeat d'ar maro ar brophetet hag hor zalver he unan: ober a rejont ar memes tra d'ar re a ioa bet carget gant hor zalver da brezec an Aviel var he lerc'h. Mes seul-vui ma reer brezel d'ar virionez, seul-vui e teu da c'hounit ha d'en em skigna. Goad ar verzerien a zo eun had var behini e sao eun eost puill a gristenien nevez. Evel Jesus-Krist, scouer an oll verzerien, Stephan a varv en eur bedi evit ar re hen lakea d'ar maro.

**105. An avieler Philipp a vadez calz tud e Samarii, hag an ebestel a deu goudeze d'ho c'houzumenna.**

An dervez m'oa bet lazet s. Stephan a daoliou mein, e savas eur bersecution vraz a enep ar gristenien e Jerusalem. Saul a ioa e penn ar re a ziscoueze caout ar muia counnar outho. Mont a rea he unan d'an tiez, hag an oll gristenien a gave, ken goazet, ken merc'het, a gasse ganthan evit ho zeuler er prizoun. O velet kement-se, an diskibien en em dennas tu-ma tu-hont e costez ar Judee hag ar Samarii; ne jomas e Jerusalem nemet an ebestel. Coulskoude an diskibien a gendalc'he ato da brezec an Aviel dre gement leac'h ma tremenent. An avieler Philipp a erruas evelse e kear Samarii. Tud ar gear-ze o doa heuliet bete neuze kentelliou ar majician Simon; mes, dre he brezegennou ha dre ar miraclou braz a reas en ho zouez, Philipp ho gounezas oll d'ar feiz hag a roas dezho ar vadiziant. An ebestel, o veza clevet oa goune-



zet kear Samarii d'ar feiz, a gassas euz a Jerusalem di s. Per ha s. Ian evit couzumenna ar gristenien nevez. An daou abostol-ma, pa errujont, a astennas ho daouarn var ar re a ioa bet dija badezet gant Philipp, evit lakaat ar Speret-Santel da zisken varnezh gant he oll donezou-nou, dre ar sacramant a Gouarnement.

Evel an Ilis, instituet gant Doue, e deuz bet calz da c'houzañv en he c'henta amzer euz a berz ar iuzevien, evelse ar roue David gueich all, sacret dre urs Doue, en devoa bet ive calz da c'houzañv a berz Saül. — N'euz nemet an ebstel hag an eskibien hag o deffe ar c'halloud da rei ar sacramant a Gouarnement; setu perac an avieler Philipp ne c'helle ket couzumenna ar re en devoa badezet.

Eun eal a berz Doue a deuas neuze da gaout Philipp, hag a lavaras dezhan : « it ac'hann etrezec ar c'hresteiz var an hent braz a ia euz a Jerusalem da gear Gaza. » Philipp a zentas. En eur erruout var an hent-se e velas eun den azezet en eur c'har hag eul levr ganthan en he zorn. An den-ze oa tenzorier rouanez an Ethiopii, a ioa bet oc'h adori Doue e Jerusalem, hag a zistroë d'ar gear en eur lenn ar prophet Isaias. Poulzet gant ar Speret-Santel,





Philipp a dosteas ouz ar c'har hag a c'houlennas ouz an tremeniad: «cumpren a rit-hu ar pez a lennit aze?» Hag heñ a respontas: «penaoz e cumprenfenn nemet eun all a roffe sclerijen dinn?» Neuze e pedas Philipp da bignât er c'har ha da azeza en he gichen. Philipp ne c'hortozas ket ma vije pedet eun eil gueich, ha ractal e roas da anaout d'an den-ze oa euz hor zalver Jesus-Krist e comze ar prophet Isaiâs el leac'h m'oa digor al levr ganthan, hag ac'hano e kemeras he dro evit deski dezhan an oll guirioneziou euz ar relijion gristen. Evel ar c'har a iea ato araoc, e tigouezchont evelse ho daou en eul leac'h e pehini ez oa dour, ha kerkent an tenzorier a Ethiopii a lavaras: «setu aze dour; petra vir ouzoc'h d'am badezi ama dioc'htu?» — «Mar credit a greiz ho caloun, eme Philipp, e c'hellan hen ober.» Hag an tenzorier a respontas: «ia, credi a ran eo Jesus-Krist Mab da Zoue.» Var gement-se e oue badezet gant Philipp, ha goudeze ez eas adarre en hent scañv he goustians ha laouen he galoun. Mes Philipp n'edo dija mui en he gichen p'oa deuet euz an dour; casset oa bet ac'hano en eun taol gant ar Speret-Santel.

## 106. Conversion S. Paol.

Epad an amzer-ze caloun Saul a ioa gounezet muioc'h-mui gant ar gassouni ouz ar gristenien ha gant an ioul direiz d'ober poan dezho ha d'ho lakaat d'ar maro. Eun dervez ez eas da gaout ar belec braz da c'houlenn liziri diganthan evit ar re a ioa e penn ar *sinagogou* o devoa ar iuzevien e kear Damas. He zonch a oa mont di gant al liziri-ze, ha, mar cavche dre eno eur re bennac, goazet pe verc'het, hag a heulje ar relijion gristen, ho digass ganthan da Jerusalem carget a chadennou. Mont a reas eta en hent gant ar zonch fallacr-se en he speret. Hogen, p'edo dija tost da Zamas, e teuas en eun taol euz an eñv eur sclerijen skeduz da bara en dro dezhan. Dallet gant



ar sclerijen-ze, e couezas divar he varc'h d'an douar evel pa vije bet skoët gant ar gurun. Kerkent e clevas eur vouez hag a lavare dezhan : «Saul, Saul, perac e res-te brezel dinn-me?» Hag heñ a respountas : «piou oc'h-hu, Aotrou?» Hag ar vouez a lavaras adarre : «me eo Jesus

da behini e rez brezel.» Neuze Saul, stravillet-oll, a c'houlennas en eur grenn: «Aotrou, petra a fell deoc'h a raffenn?» Hag ar vouez a respontas: «savit hag it e kear; eno e vezo lavaret deoc'h petra o peuz da ober.» Saul a zavas en he za, mes, pa zigoras he zaoulagad, e remerkas en doa collet ar gaelet. Ar re a ioa oc'h ober coumpagnunez dezhan a renkas he ren dre an dorn betec Damas, hag her c'hassas evelse da di eun den hag a ioa Jud he hano. Chom a reas eno tri dervez dioc'htu eb dibri nag eva, hag epad an amzer-ze oa ato dall-put.

Bez' ez oa e Damas eun diskib hanvet Ananias. Doue a roas urs d'an diskib-se da vont da gaout Saul. Mont a reas, hag, en eur astenn he zaouarn var he benn epad m'edo var he zaoulin o pedi, e lavaras dezhan: «Saul, va breur, hor zalver Jesus, an hini en deuz comzet ouzoc'h en hent, en deuz va digasset ama evit rei deoc'h ar gaelet, hag evit lakaat ar Speret-Santel da zisken var-noc'h.» Ker bulan e couezas dioc'h daoulagad Saul traou heñvel ous skant pesket, hag e teuas ar gaelet dezhan adarre. O veza neuze savet en he za e oue badezet dioc'htu gant Ananias, ha ractal goudeze ec'h en em lakeas da brezec er sinagogou oa Jesus Mab da Zoue. Kement hini her c'hileve a ioa souezet; rac an oll a c'houie peger counnaret oa aziagent a enep ar gristenien. Coulskoude ar iuzevien, o velet e tiffenne brema relijion Jesus-Krist, a gemeras caz outhan, hag a glaske an tu d'hen lakaat d'ar maro. Mes an Aotrou Doue a reas dezhan en em denna euz a-dre ho daouarn.

Setu aze deuet da vir ar pezh en devoa lavaret gaeich all ar patriarch Jacob d'he vab Benjamin, en eur rei dezhan he vennoz diveza: «Benjamin a zo heñvel ouz eur bleiz prest da daga; dioc'h ar mintin ne glasko nemet lounka he breiz; mes, pa deui ar pardaëz, e vo gaelet o rei lod d'ar re all.» Saul a ioa euz a lignez Benjamin. En he iaouankiz n'en devoa ken ioul nemet da zailla var ar gristenien, ha da ober a bep seurt drouc dezho; mes, divezatoc'h, pa oue deuet var an oad, e tastumas ar iuzevien hag ar baianet en dro dezhan, evit ho lakaat oll evel eur preiz sacr eharz treid Jesus-Krist.

**107. S- Per a ra he genta vizit a bastor, hag a vadez ar païan Corneill.**

Pa oue ehanet ar bersecution a enep ar gristenien, s. Per a ieas da velet an oll barreziou euz ar Palestin evit ho c'hreñvaat er feiz. En eur erruout e kear Lidda e pareas eun den, hanvet Eneas, hag a ioa eiz vloaz a ioa var he vele, seïzet-oll. E Joppe e tigassas adarre e buez eur gristenez nevez maro ; ar gristenez-se a rea aluzennou braz hag a ioa he hano Tabitha. Ar brud euz ar miraclo-ze a ieas dre gement corn a ioa er vro, hag a reas da galz a dud credi e Jesus-Krist. En amzer-ze e veve e Cesaree eun offiser païan, he hano Corneill. An offiser-ze a ioa eun den a zoujans Doue, kercoulz hag oll dud he di. Ober a rea forz aluzennou d'ar bobl, ha ne ehane da bedi. Eun dervez e velas o tont betec enghan eun eal a berz Doue, hag an eal-ze a lavaras dezhan : « ho pedennou hag oc'h aluzennou a zo pignet betec tron an Aotrou Doue, hag o deuz lakeat anezhan da gaout sonch ac'hanoch. Brema eta cassit unan bennac da Joppe da lavaret da Simon, lezhanvet Per, dont d'ho caout. Henez a zesko deoc'h petra o peuz da ober.» Corneill à gassas ractal da Joppe tri den a zoujans Doue. Pa erruas ar re-ma er gear-ze, s. Per a ioa o pedi var lein an ti el leac'h m'edo o chom ; an ti-ze a ioa plat divar c'horre hervez giz ar vro. Hogen, epad he beden, ez eas evel pa lavarfen he speret diganthan, hag e velas an eñv digor ; hag euz an eñv digor e velas eun doucher vraz o tisken betec an douar, ha var an doucher-ze ez oa a bep seurt aneñvalet, kercoulz euz ar re a vale var bevar droad, evel euz ar re a ia var ho c'hof a ruzou, hag euz ar re a nij var ho diouaskel. Er memes amzer e clevas eur vouez o lavaret dezhan : « savit, Per, lazit an aneñvalet-se ha debrit ar c'hig anezho.» Mes s. Per a respontas : « Doue ra viro na zeprenn euz a gig an aneñvalet-se ! Biscoaz n'em euz tanveet netra a gement na vije ket neat hervez al lezen.» (Hervez lezen Moïzes gueich all ez oa meur a seurt loanet hag a ioa difennet dibri ar c'hig anezho ;

euz al loanet-se e veze lavaret n'oant ket neat hervez *(lezen.)* Mes ar vouez a lavaras evit an eil gueich: «ne d'it ket da lavaret ne ve ket neat ar pez a zo bet neteat gant Doue.» S. Per a glevas ar memes mouez abenn teir gueich dioc'htu, ha goudeze ne velas mui netra.

Epad m'edo o clask gouzout petra zinifie ar pez en devoa guelel, Speret Doue a lavaras dezhan: «aze ez euz tri den o clask ac'hanoc'h, savit eta, diskennit d'an traoñ, hag it gantho eb mare'hata; rac me eo am euz ho digasset.» S. Per, o veza diskennet, a gavas eharz dor an ti an tri den digasset gant Corneill. Antronoz ez eas gantho da Cesaree, da di Corneill. Hema o veza countet ar pez en devoa lavaret an eal dezhan, s. Per a gomprenas neuze petra zinifie an doucher-ze goloët a aneñvalet a bep seurt, ken euz ar re a ioa neat hervez al lezen, ken euz ar re n'oant ket. Coumpren a reas oa falvezet da Zoue rei dezhan da anaout dre eno e tliet ive receo ar baïanet e Ilis Jesus-Krist, petra bennac ma tifenne lezen Moïzes ober darempred ebet gantho. S. Per en em lakeas goudeze da gomz euz a Jesus maro var ar groaz ha savet adarre euz a varo da veo. Lavaret a reas penaoz ar re a gredche enghan, n'euz fors piou e vijent, a recevje, dre ar c'halloud euz he hano, ar pardoun euz ho fec'hejou. N'oa ket achuet mad ar c'homzou-ze gant an abostol ma tiskennas ar Speret-Santel var gement hini a ioa oc'h he zelaou. Ar gristenien a ioa deuet da ober coumpagnunez da s. Per a oue souezet o clevet ar baïanet-se o rei gloar ha meuleudi da Zoue, hag o comz meur a langach lia ne anaïent ket aziagent. Neuze s. Per a lavaras: «petra vir ouzomp da rei ar vadiziant a zour d'ar re o deuz recevet dija ar Speret-Santel evel-dompni?» Ha ractal e roas urs da vadezi an dud-se en hano hor zalver Jesus-Krist.

Adalec an deiz-se an Aviel a oue prezeget d'ar baïanet, dreist oll gant s. Paol ha s. Barnabas e kear Antioch. Er gear-ze eo e oue roët evit ar veich genta d'ar re a heulie relijion Jesus-Krist an hano a *gristenien*.

Jesus-Krist a zo maro evit an dud oll; n'e ket eta dar iuzevien ebken, mes ive d'ar baïanet, eo e tle an Aviel beza prezeget. N'e ket ebken an Ejiptianet hag an Israelitet eo a vagas Joseph gueich all en Ejipt, epad ar bloaveziou a gernez hag a naounegez, mes, ouspenn, an oll boblou a deuas da c'houlenn ed diganthan. Ar baïanet a receo an Aviel gant eur galoun sentussoc'h eget ar iuzevien; setu perac ar boblou païan dreist oll eo a vezo roët gant Jesus-Krist evit bugale d'he Ilis. Evelse, gueich all, etouez ar vicherourien a oue carget gant ar roue Salomon da zevel an templ a Jerusalem, ez oa muioc'h a baïanet eget a iuzevien.

### 108. S. Per taolet er prizoun.

Var dro ar bloaz 44 goude ginivelez hor zalver, ar roue Herodes Agrippa a c'hoëzas tan ar bersecution a enep ar gristenien, en esper beza deuet mad gant ar iuzevien. Reï a reas urs da zibenna s. Jakes, breur da s. Ian, ha goudeze e reas prizounia s. Per, en eur c'hourc'hemenn stard teuler evez mad anezhan: he zonch a oa hen lakaat d'ar maro goude goueliou Pask. Mes an Ilis ne ehane da bedi evit he c'henta pastor. An noz kent an dervez ma tlie Herodes he gass d'ar maro, s. Per a ioa cousket e creiz etre daou zoudard, diou jaden en dro d'he gorf, ha goardou e tal an or o tivoal ar prizoun dioc'h an diañvez. Ha setu eun eal a berz Doue o tont da gaout s. Per, hag eur sclerijen vraz o para er prizoun. An eal, o veza dihunet an abostol, a lavaras dezhan: «savit alesse, lakiit ho tillad ha guiskit ho poutou, ha deuit d'am heul.» S. Per her greas, mes eb gouzout da vad pe heñ a ioa oc'h uvreal, pe n'edo ket. Coulskoude ar chadennou a ioa couezet dioc'h he zaouarn kerkent ha m'en doa an eal comzet outhan. O veza tremenet evelse ho daou ebiou d'ar c'henta ha d'an eil rumm goardou, ec'h errujont gant an or houarn a sko var gear, hag an or-ze a zigoras dirazho anezhi he unan. Pa ouent eat er meaz, an eal a gendalc'has c'hoaz da gerzet araoc an abostol betec ar penn all d'ar ru; mes eno e tisparissas en eun taol. Neuze s. Per, o veza deuet enghan he unan, a lavaras: «brema e velan ervad en deuz digasset Doue

he eal evit va zenna euz a-dre daouarn Herodes hag ar iuzevien,» Goudeze ez eas da c'houlenn digor da di eur c'hristen hanvet Marc, el leac'h ma'z oa calz tud fidel o pedi assambles. Evel ma skoë var an or, eur plac'h iaouank, he hano Rhode, pe Rosa, a deuas da velet piou a ioa. Houma, o veza anavezet mouez s. Per, e devoue kement a joa ma redas dioc'htu, eb digeri an or, da lavaret d'ar re a ioa e diabarz an ti: «ema Per a-hont.» Mes an dud fidel a ioa eno ne felle ket dezho he c'hredi. Coulskoude, evel ma kendalc'he s. Per da skei var an or, e teujont erfin da zigeri, hag, o veza anavezet anezhan, e ouent estlammet-oll. S. Per a gountas dezho neuze penaoz oa bet tennet euz ar prizoun gant an Aotrou Doue, hag, o veza lavaret dezho mont da gass ar c'helouze da s. Jakes, escop Jerusalem, ez eas adarre er meaz, hag ec'h en em dennas en eul leac'h all.

Pa deuas an deiz, arzoudardet a oue nec'het maro o clask gouzout petra oa deuet s. Per da veza. O velet n'her c'havet ket e nep leac'h, Herodes a ieas en egar ouz ar goardou, hag a roas urs d'ho funissa en eur feson didruez. Ar roue<sup>2</sup>-ze he unan ne vevas mui pell goudeze. Eun dervez ma receive e kear Cesaree cannadet a ziañveaz-bro, ar bobl, evit rei lorc'h dezhan, a lavaras a vouez huel: «n'e ket evel eun den eo e comzit, mes evel eun doue.» Ker buhan e oue skoët gant eun eal abalamour m'en devoa lezet evelse ar bobl da ober eun doue anezhan. Mervel a reas prest goude e creiz ar brassa poaniou, he gorf oll crignet ha debret ez-veo gant ar preñvet

Evel ar gristenien genta, ni a bed ive evit an hini a zalc'h ar renk huella e Ilis Jesus-Krist, da lavaret eo, evit hon Tad santel ar pab; ha n'e ket a c'hinou ebken, mes ive a galoun eo e kemeromp perz en he joaiou hag en he drubuillou.

### 109. Kenta beach apostolic an abostol s. Paol.

(er bloaz 45 goude donedigez hor zalver.)

Goude m'oa bet gounezet d'ar feiz er feson burzuduz m'or beuz merket hueloc'h, s. Paol a ioa bet casset gant

s. Barnabas da gaout an ebestel, hag ar re-ma o devoa bet eur joa vraz oc'h he velet. Goudeze s. Paol a jomas c'hoaz eur pennadic e Antioch. Mes ar Speret-Santel o veza lavaret d'ar re a ioa e penn an dud fidel euz ar gear-ze choaz s. Barnabas hag heñ da vont da brezec an Aviel d'ar baïanet, s. Paol en em lakeas dioc'htu en hent evit mont da ober he genta beach apostolic. E kement leac'h ma'z ea, e prezege da genta d'ar iuzevien, mes evel ar re-ma a rea faë var he gomzou, ez ea goudeze da brezec d'ar baïanet, hag e c'houneze calz anezho da Jesus-Krist.

Neuze e teuas da vir ar pezh en devoa discleriet gueich all an Aotrou Doue dre c'hinou ar prophet Isaias: «me, eme an Aotrou Doue, a joazo hiniennou euz ar re a vezo bet salvet evit ho c'hass da gaout ar boblou a zo o chom e kichen ar mor, en Afric hag e Lidii, etouez an dud a c'hoar steigna ar voarec; ho c'hass a rinn ive d'an Itali, d'ar Gress, d'an enezennou ar re bella, da gaout ar re n'o deuz biscoaz clevet hano ac'hanon ha n'o deuz gullet morse ar sked euz va gloar o para dirac ho Jaoulagad. An dud-se am bezo choazet a roïo da anaout dre bevar c'horn ar bed peger braz eo va gloar ha va galloud, hag evelse peb den a deuio d'am adori.»

S. Paol a ieas da genla da enez Chipr, s. Barnabas hag heñ. Ar gouarner roumen euz an enezen-ze, he hano Serjius Paulus, a gemennas d'an daou abostol mont d'he gaout; rac c'hoant en doa da glevet comzou Doue. Mes bez'en doa ganthan en he di eur majician hag a glaske hen distrei dioc'h kement-se. S. Paol, o veza erruet, a lakeas he zaoulagad da bara lemm hag eün var re ar majician, ha goudeze, poulzet gant ar Speret-Santel, e lavaras dezhan: «den fallacr, ha mab an diaoul, ha ne baouezoc'h-hu ket da glask kaëat ous gras Doue? Evit ho punissa, Doue a ia da lakaat ac'hanoc'h da veza dall, ha da guzet ouzoc'h evit eur pennad sclerijen an heol.» Kerkent e couezas var daoulagad ar fals prophet-se eur goc'hen ken teñval ma ne vele mui banne. Ne rea nemet trei en tu-ma hag en tu-hont, o clask unan bennac da



reï he zorn dezhan. O velet eun hevelep miracl, ar gouarner a gredas e Jesus-Krist, hag en em c'hreas kristen. Euz a enez Chipr s. Paol ha s. Barnabas a ieas d'an Asii izela. En eur gear euz ar vro-ze, a reat ive Antioch anezhi, e prezecjont gant calz a frouez d'ar baïanet ha d'ar iuzevien. Mes o velet ar bobl o tiredet a bep tu d'ho zelaou, ar iuzevien a gemeras gouarizi outho, hag en em lakeas da gomz en ho enep, en eur lavaret n'oa ket guir ar pez a brezege s. Paol. Neuze s. Paol a lavaras dezho : «dec'houi eo e tliemp prezec da genta comzou Doue ; mes p'e guir e rit faë varnho, pa ne fell ket deoc'h caout perz er vuez a bado da viken, ni a ia da brezec d'ar baïanet.» Ar baïanet o devoue eur blijadur vraz o clevet an dra-ze, hag ar selerijen euz ar feiz en em skignas dre gement corn a ioa er vro. Couls goude ar iuzevien a deuas a benn da dreï ar re genta euz a gear a enep s. Paol ha s. Barnabas, hag a gavas evelse an tu da ober dezho mont kuit. An daou abostol calounec, o veza hejet ar boutren dioc'h ho zreïd, a ieas eta larcoc'h da gass an anaoudegez euz an Aviel.

E kear Listr, e bro Licaonii, s. Paol a bareas eun den hag a ioa seïzet he dreïd outhan adalec cof he vamm. Tud ar vro, o velet ar miracl-se, a gemeras s. Paol hag he goupagnoun evit daou zoue. Edont dija prest da ober eur sacrifics bennac en ho henor, pa ziredas an daou abostol var al leac'h, en eur lavaret : «o vont d'ober petra emac'h aze ? Ni ne d'oump nemet tud eveldoc'h, a zo deuet ama da zeski deoc'h dilezel an doueou-ze pere ne d'int netra, evit servicha ar guir Doue en deuz crouet an eñv, an douar, ar mor, ha kement tra a zo ennhou.» Poan aoualc'h o devoue couls goude o viret ouz ar bobl d'ho henori evel doueou. Mes prest goude ec'h erruas eno iuzevien euz ar c'heariou m'oa bet dija s. Paol o prezec ennhou. Ar iuzevien-ze, o veza troët buhan caloun ar bobl, en em lakeas da vanna mein ouz an abostol, ha, goude beza he bilet d'an douar, e stlejont anezhan er meaz euz a gear en eur zonjal e oa maro. Mes pa deuas an diskibien d'he gaout, s. Paol a zavas en he za hag a ieas adarre e kear assambles gantho.

S. Barnabas hag heñ a skoas neuze varzu Derb, eur gear all ha n'oa ket bet c'hoaz prezeget an Aviel enni. Mes ac'hano e tizrojont var ho c'hiz, en eur dremen dre an oll blasou e pere o devoa dija prezeget en eur vont. E peb leac'h ec'h aient ar gristenien da zele'ber mad d'ar feiz, hag e roënt an ursiou sacr d'ar re a gavent din da ren ar re all en hent euz ar zilvidigez. Pa ouent erfin distro da Antioch, e rojont da anaout d'an oll e pebez feson burzuduz en devoa an Aotrou Doue benniget ho beach, ha penaoz en doa lakeat ar bañanet da zigeri ho speret d'ar selerien euz ar feiz.

### 110. Concil pe Sened Jerusalem.

(50 vloaz goude donedigez hor zalver.)

Etouez ar gristenien a Antioch ez oa biniennou hag a ioa deuet di euz ar Judee. Ar re-ma a lavare d'ar re all : «ma ne heuliit ket penn-da-benn ar peza zo merket e lezen Moïzes, ne c'hellit ket beza salvet.» Mes s. Paol ha s. Barnabas a zavas ho mouez huel da lavaret n'oa ket guir an dra-ze. Evit miret na deuje den da fazia var ar poënt-ze, ec'h en em glevchot da c'houlenn euzul digant an ebestel. S. Paol ha s. Barnabas a oue eta casset da Jerusalem evit kement-se. Pa errujont, ha pa oue elevel gantho evit petra oant deuet, an ebestel en em assambles oll en eun hevelep leac'h evit kemeret euzul an eil digant egile, ha gulet petra a dliet da ziscleria divar benn ar pez a verket dezho. S. Per, ar penn euz an Ilis, eo en devoa ar plas kenta en assemble-ze. Heñ eo a zavas ive da genta en he za evit lavaret : «va breudeur, Doue, pehini a anavez ar c'halounou, n'en deuz lakeat kemm ebet etre ar bañanet ha ni, pa'z e guir en deuz roët dezho ar Speret-Santel evel deompni hon unan. Perac ober d'an diski-bien dougen eur beac'h pounner ha didalvez evit ho ene, evel pa n'en deffe ket Doue roët da anaout selear aoualc'h he volonteaz var ar poënt-se? Dre c'hras Jesus-Krist eo ec'h esperomp beza salvet, evel ar bañanet, ha nan en eur heul ar pez a zo merket e lezen Moïzes.» S. Jakes a



gomzas varlerc'h s. Per, hag a ziscouezas en doa roët Doue da anaout sclear aoualc'h, dre c'hinou ar brophetet, oa galvet ar baïanet d'ar feiz. «Me gred eta, emezhan, ne dleomp ket bec'hia ho c'houstians gant lezennou pere n'int ket bet douget evitho.» Var gement-se an assemble oll n'e devoue nemet eur vouez evit lavaret n'oa ken da ober nemet scriva evel-hen da gristenien Antioch: «ar Speret-Santel ha ni or beuz cavet mad ho tizamma euz ar beac'h-se, (euz ar ceremoniou merket e lezen Moïzes).»

An ebestel assambllet dre urs s. Per, pe an oll eski-bien euz ar bed catholic assambllet dre urs ar pab, gant s. Per pe ar pab he unan e penn an assemble, setu ar pez a c'halver eur c'honcil pe eur sened jeneral euz an llis. Eur c'honcil evelse ne c'hell ket fazia pa deu da ziscleria eun dra bennac divar benn ar pez a renker da gredi ha da ober evit beza salvet. Rac an llis he unan eo a gomz dre c'hinou eun hevelep assemble, hag an llis ne c'hell ket fazia p'e guir en deuz Jesus-Krist roët he c'her da veza ganthi bepret keit ha ma chomo ar bed-ma en he za.

### III. Eil beach apostolic an abostol s. Paol.

S. Paol ne zaleas ket d'en em lakaat adarre e penn an hent da ober eun eil beach apostolic. Goude beza baleet eur pennad dre ar Sirii hag an Asii-izela, en eur brezec e kement leac'h ma tremene, Doue a roas dezhan da anaout oa galvet da vont d'ar Macedoan. S. Paol a bignas eta en eul lestr gant he dri gounpagnoun, Silas, Lucas ha Timothee, hag, o veza treuzet ar mor, ec'h erruas eb drouc ebet e Philipp, ar gear-benn euz ar Macedoan.

Eno ez eas da loja da di eur varc'hadourez pourpr, a ioa he hano Lidia, hag a ioa nevez gounezet d'ar feiz. Hogen, bez'ez oa ive er gear-ze eur plac'h pe eur vatez hag a ioa divinerez pe sorcerez. Ar plac'h-se a iea calz tud d'he c'haout, hag a c'hounenze evelse fors arc'hant d'he mistri. Mes s. Paol, o veza erruet ganthi, a reas d'an diaoul mont kuit euz he c'horf. He mistri neuze, o velet ho brassa gounidegez o vont da netra, a grogas e s. Paol, hag e Silas a ioa oc'h ober coumpagnunez dezhan, hag ho c'hassas var ar blasen dirac ar pennou braz euz a gear, en eur lavaret: «ar re-ma ne reont nemet lakaat ar freuz hag ar rouestl en hon touez.» Ar pennou braz euz a gear a roas urs da scourjeza an daou zivroad, ha d'ho c'hass d'ar prizoun. Hogen, var dro anter-noz, epad m'edo s. Paol ha Silas o pedi hag o veuli Doue, e oue eur c'hren-douar ker creñ ma teuas oll doriou ar prizoun da zigeri, ha liammou an oll brizounerien da derri. An hini a ioa carget da deuler evez anezho, o veza dihunet hag o velet oll doriou ar prizoun digor, a gemeras he gleze evit en em laza; rac sonjal a rea oa eat an oll brizounerien kuit, hag aoun en doa da veza tamallet euz an dra-ze. Mes s. Paol a grias outhan a bouez-penn: «ne d'it ket d'ober drouc ebet deoc'h; emaomp oll ama.» Neuze an den-ze a ieas er prizoun gant eur c'hleuzeur, goulou enghan, hag eno ec'h en em strinkas en eur grena eharz treid s. Paol ha Silas. Goudeze, en eur ziscouez an hent dezho da vont er meaz, e c'houlennas outho: «petra renkan-me da ober evit beza salvet?»



Hag hi a respountas : « credit en hor zalver Jesus-Krist, hag e vioc'h salvet, c'houi hag oll dud ho ti. » En em lakaat a rejont neuze ractal da gelen an den-ze var ar guirioneziou euz ar relijion gristen, hag abarz fin an noz e vadezchont anezhan, heñ hag oll dud he di. Couls-goude ar pennou braz euz a gear, o veza clevet o devoa s. Paol ha Silas guir ha renk an dud ganet e Rom pe euz a c'hoad ar roumenet, a deuas ho unan antronoz da denna an daou abostol euz ar prizoun en eur c'houlenn pardoun outho da veza great dezho ar pez o devoa great. Rac al lezen a zifenne scourjeza ha lakaat er prizoun, eb barnedigez, an dud euz eun hevelep renk. S. Paol, goude beza poaniet da rei caloun d'ar re en devoa gounezet d'ar feiz e Philipp, a ieas ac'hano da Dessalonic, ha goudeze da Veree, ha da veur a gear all ; hag e kement leac'h ma'z ca ne ehane da brezec an Aviel ha da labourat da c'hounit eneou da Zoue.

Erruout a reas evelse e Athen, ar gear ar muia brudet euz ar Gress dre an descadurez hag ar vouisiegez euz an dud a ioa o chom ennhi. O velet pegen troët oa ar gear-ze var an idolatri, he speret ne c'helle ket chom e

repos, ha ne ehane da brezec, er sinagog d'ar iuzevien, ha, var ar blasen, da gement hini en em gave ganthan. Unan bennac her c'hassas eun deiz d'al leac'h m'oa custum ar pennou braz euz a gear d'en em assambli evit ober lezennou hag evit barn ar bobl. Pa erruas eno, s. Paol a gomzas evel-ben: «tud a Athen, var a velan, n'e ket relijion a vank deoc'h; nemet re n'o peuz ken, a c'hellan da lavaret. Hag eleal, en eur dremen dre ruiou kear, em euz guelet, etouez patromiou ho toueon all, eun aoter hag a ioa scrivet varnhi: *d'an Doue n'e ket anavezet*. Dont a ran da gomz deoc'h euz an Doue-ze a henorit eb he anaout. An Doue-ze eo en deuz crouët ar bed-ma ha kement tra a zo enghan, hag, evel ma'z eo ar Mestr euz an eñv hag euz an douar, n'e ket ebken e templou savet gant an dud eo ema o chom. Mar tenn eur c'hloar bennac euz ar pez a ra an dud en he honor, n'en deuz ezom ebet euz a gement-se; rac heñ eo a ro ar vuez da gement den ha da gement tra a zo er bed. Lakeat en deuz an dud oll da c'henel euz eun hevelep goad; merket en deuz da bep hini anezho an amzer hag al leac'h ma tlie beva var an douar, hag ho lakeat en deuz er bed-ma evit guelet hag hi a boanje d'he glask ha d'he gaout. Hag, evit guir, n'e ket diez he gaout; rac n'ema ket pell diouz peb hini ac'hanomp: enghan eo e vevomp, enghan e fiñvomp, enghan emaomp e peb giz. Betec hen Doue en deuz evel pa lavarfenn serret he zaoulagad var dallentez ar re n'e ket bet falvezet dezho he anaout; mes brema e teu da ziscleria d'an oll, n'euz fors piou ha n'euz fors e peleac'h e vent, eo deuet ar mare evitho da ober pinijen. Rac assinet en deuz an deiz ma tlie barn ar bed oll hervez al lealdet, hag, evit testeni euz ar virionez-se, en deuz lakeat da zevel a varo da veo an hini en deuz carget da ober eun hevelep barnedigez.» O clevet hano euz a *zevel a varo da veo* lod euz ar re a ioa o selaou s. Paol ne rejont nemet c'hoarzin hag ober goab; lod all a lavaras: «eur veich all ni zelaouo ac'hanoc'h var ar poënt-se.» Hiniennou couls-goude a oue gounezet d'ar feiz hag a heulias an abostol;

euz an niver-ze e oue Denis, unan euz ar re a ioa er c'honseil braz a Athen.

S. Paol a ieas euz ar gear-ze da Gorinth. Eno e prezas da genta d'ar iuzevien: mes, evel ar re-ma a rea faë var he gomzou, s. Paol a lavaras dezho: «goaz a-ze evidoc'h; m'em euz great va dever en ho keñver; mes p'e guir e fell deoc'h serra dor ho caloun ouz ar virionez, me ia brema da gaout ar baïanet.» Var gement-se ec'h en em lakeas da brezec d'ar baïanet, hag e c'hounezas calz anezho d'ar feiz. S. Paol a jomas eur bloaz-anter e Corinth, ha goudeze e treuzas adarre ar mor evit distrei da Antioch en eur dremen dre Ephes.

Eur burzuä eo e ve deuet an Ilis da greski ker buhan; ema anavezet dija dre ar bed oll coulz lavaret. Evelse e cresskas ive gueich all ar goumoullen vihan a zavas euz a voueled ar mor, dre urs ar prophet Elias, evit mez beleien Baal. Ar goumoullen-ze a c'holoas an eñv en eun taol, hag a roas erfin d'an douar ar glao a c'hortozet abaoe keit amzer. — Ar iuzevien ne rejont ket muioc'h a fors euz ar c'hras a rea Doue dezho d'ho gervel da genta d'ar feiz kristen eget na reas gueich all Esaü euz he vir a vab hena.

### 117. Trede beach an abostol s. Paol.

(euz ar bloaz 55 betec ar bloaz 58 goude donedigez hor zalver).

Nebeut amzer goude he eil veach apostolic, s. Paol a ieas adarre da redet dre an Asii-izela evit prezec an Aviel. Erruout a reas evelse e Ephes, ar gear-benn euz al loden euz an Asii a ioa dindan galloud ar roumenet. Eno e vadezas daouzec diskib ha n'o devoa c'hoaz recevet nemet ar vadiziant a binijen a roë gueich all s. Ian Vadezour. Goudeze ec'h astennas he zaouarn varnho evit rei dezho ar Speret-Santel dre ar sacramant a Gonfirmation. S. Paol a jomas ouspenn daou vloaz e Ephes, en eun hevelep feson ma'z eas lark tro-var-dro an anaoudegez euz a Jesus-Krist hag euz he Aviel. Ar c'halloud en devoa roë Doue d'an abostol-ze da ober miraclou a ioa ker braz ma'z oa aoualc'h, evit para ar re glañv, lakaat varnho tammou dillad hag a vije bet en dro d'he gorf. Ar guel

euz ar burzudou-ze a rea d'an oll beza souezet hag estlammet, hag etouez ar re a ioa dija gounezet d'ar feiz, ez oa calz hag a deue da goves ha da ziscleria a vouez huel ar pez o devoa great en ho buez.

E tro ar marcou-ze coulsgoude e savas eur bersecution vraz a enep s. Paol hag ar re a ioa oc'h ober coumpagnunez dezhan. Bez'ez oa e kear eun orfebrer, he hano Demetrius, hag a rea templouigou bihan en arc'hant en honor d'ar fals doueez Diana. Ar seurt imachou-ze, evit doare, a ioa calz fret varnho. Mes, evit ober ar vicher a rea, Demetrius a renke caout tud all d'he zicour, hag ar re-ma a veze paët mad. Hogen, eun dervez, an orfebrer-ze a lavaras d'ar re a ioa o labourat ganthan edo s. Paol o vont da lamet ho bara digantho dre ar relijion nevez a brezege. Kerkent, setu an dud-se er meaz anezho ho unan, hag ar bobl o veza buhan troët gantho, setu e kear eur c'hri hag eun trouz da vouzara ar vro. Abarz ar fin evelato unan bennac a deuas a benn da habaskaat ar sperejou ha da lakaat ar peoc'h.

Neuze s. Paol a ias evit an eil gueich d'ar Macedoan ha d'ar Gress, hag, en eur zistreñ ac'hano, e teuas adarre d'an Troad, el leac'h ma chomas eur zizun. Pa deuas ar zul, ar gristenien en em assambles en eur gambr vraz evit clevet an oferen ha communia, ha dioc'h an noz s. Paol en em lakeas da brezec dezho. Evel ma chome pell da brezec, eun den iaouank, pehini a ioa azezet en eur prenestr, en em roas da gousket, ha dre he gousk e couezas d'an traoñ euz an trede astach. Pa'z ejot var he dro, oa dija maro-mic; mes s. Paol a lakeas anezhan da zont adarre e buez.

S. Paol a ias goudeze da Vilet en eur dremen dre enezennou Lesbos, Kio ha Samos. Pa erruas e Milet, e c'halvas en dro dezhan ar bastoret euz a ilis Ephes, ha neuze e kimiadas dioutho en eur lavaret: « mont a ran da Jerusalem, ar Speret-Santel he unan eo am foulz da vont di. Ne e'houzoun ket petra dle erruout ganeñ, nemet ar Speret-Santel ne ehan da lavaret dinn ez euz eno chadennou ha trubuillou ous va gortoz. Mes n'em euz aoun



rac netra, ne brizan ket va buez hirroc'h eget na dal; gant ma c'hellinn kendalc'her betec ar fin da ober ar pez m'oun carget da ober, da lavaret eo, da brezec an Aviel, ne c'houlennan ken. Gouzout a ran ne veloc'h mui ac'hanon. Setu perac e lavaran deoc'h beilla varnoc'h oc'h unan, ha teuler evez mad euz an dud fidel a zo en ho carg; rac ar Speret-Santel n'en deuz great eskibien ac'hanoc'h nemet evit ren Ilis Doue, an Ilis-se en deuz prenet dre ar priz euz he c'hoad. Me c'hoar e teuio en ho touez, goude ma vinn eat kuit, bleizi prest da daga, ha n'o devezo damant ebet evit ho teñvet; hag euz ho touez-c'houi zoken è savo ive tud hag a roïo kelennadurez fall evit clask tenna eun diskib bennac d'ho heul. Beillit eta, hag o pezet souch euz an aket am euz bet noz-deiz epad tri bloaz da reï cuzulliou mad da bep hini ac'hanoc'h. Ha brema me ho lez dindan goard an Aotrou Doue, hag a c'halv varnoc'h gras an Hini a zo gallouduz aoualc'h evit cass peb tra da benn, hag evit reï deoc'h perz e gloar ar zent en he varadoz.»

Goude beza comzet evelse, s. Paol en em lakeas var bennou he zaoulin evit pedi gant ar re a ioa en dro dezhan. Ar re-ma neuze a zirollas oll da leñva, hag, o veza savet en ho za, ec'h en em daoljont an eil goude egile etre divreac'h an abostol evit poket dezhan gant carantez. Ho c'haloun a ioa rannet, dreist oll, abalamour m'en doa lavaret s. Paol dezho e velent anezhan evit ar veich diveza.

### 113. S. Paol taolet er prizoun ha lakeat d'ar maro.

Ar iuzevien o devoa ato eur gassouni vraz ous s. Paol, ha pa oue distro da Jerusalem, e lakejont ar bobl d'en em zevel en he enep. Ar gouarner roumen euz a gear a reas neuze he zastum er prizoun evit miret na vije lazet gantho, ha goudeze e lakeas anezhan etre daouarn ar gouarner roumen euz a gear Cesaree, hanvet Felix. S. Paol a jomas eno daou vloaz er prizoun. Da fin an daou vloaz-se e oue lakeat en eul lestr evit beza casset da Rom da gaout an impalaër; rac he unan en doa goulennet beza barnet gant an impalaër. Mes al lestr m'oa bet lakeat ennan a



benseas var droenez  
Malt. Couls goude s.  
Paol a c'hellas en  
em zaveteï, hag  
erruout goudeze e  
Rom. Eno e oue  
lezet da vont da jom  
d'he di he unan,  
nemet ma veze  
dalc'h-mad eur zou-  
dard oc'h ober goard  
e tal an or. En ti-ze,  
a zerviche dezhan da

brizoun, e tremenas daou vloaz all eb gellout mont  
ae'hano, hag ato chadennet. Mes, evel na viret ket outhan  
da brezec, nag ouz ar re o doa c'hoant d'he velet ha  
d'he glevet, da zont betec ennhan, e c'hellas c'hoaz,  
epad an amzer-ze, gounit eun niver braz a dud d'ar feiz,  
hag euz an niver-ze e oue meur a hini euz ar re dosta  
d'an impalaër, euz ar re a ioa o ehom en he balez. Goude  
beza tremenet daou vloaz en eun hevelep prizoun, s. Paol  
a oue laosket erfin da vont el leac'h ma carje. Bactal ec'h  
en em lakeas en hent evit mont da ober eur bale all c'hoaz  
dre an oll broïou m'en doa dija prezeget an Aviel enno.  
Var dro ar bloaz 67 goude donedigez hor zalver e tistroas  
adarre da Rom, hag eno e oue neuze dibennet epad ar  
bersecution scrijuz a zavas a enep ar gristenien en amzer  
an impalaër Neron.

#### 114. An ebestel all.

Ep ad m'edo s. Paol oc'h ober ar beachou m'or beuz  
comzet anezho, an ebestel all, peb hini deuz he gostez,  
o doa ive prezeget an Aviel e kement corn a ioa er bed. E  
kement leac'h ma'z eant, e lakeant eskibien da ren ha da  
gelen var ho lerc'h ar re o devoa gounezet d'ar feiz. E  
tro ar mareou-ze, hiniennou euz an ebestel hag euz an  
diskibien a reas meur a levr dre atiz ha gant sicour ar  
Speret-Santel. Al levriou-ze a oue dastumet gant an Ilis

a nebeut a nebeut,  
ha lakeat oll en eul  
levr braz a reer  
anezhan an *testa-*  
*mant nevez*. Da  
genta, s. Per en  
devoa choazet  
Antioch evel ar  
gear ma tie chom  
ennhi da ren an  
Illis. Mes an Aotrou  
Doue a roas dez-  
han da anaout n'e



ket eno edo he blas. Dont a reas eta da Rom. Hogen,  
Rom a ioa neuze ar gear-benn, hag, evel pa lavarfen-  
n, ar galoun euz ar bed paian. En eur vont di da jom, s.  
Per a reas anezhi ar gear-benn hag ar galoun euz ar bed  
kristen. Ac'hano eo e rene hag e kelenne an oll gristenien,  
an eskibien evel ar re all. Ac'hano eo e kendalc'h ar  
pabet a zo deuet var he lerc'h da ren ha da gelen an oll  
dud fidel. S. Per a oue merzeriet e Rom er memes dervez  
ma oue merzeriet s. Paol ; s. Per a oue staget ouz ar  
groaz, he benn d'an traoñ.

An ebestel all a scuillas ive ho goad, evel s. Per ha  
s. Paol, evit rei testi euz ho feiz e Jesus-Krist. S. Ian  
ebken a varvas en he vele, en eun oad braz, var dro 100  
vloaz goude donedigez hor zalver. S. Ian a ioa bet diskib  
muia caret hor zalver Jesus-Krist, ha goude maro he  
Vestr, oa en em garget euz ar Verc'hez Vari, hag e  
poanie, dre he garantez tener en he c'heñver, da zalc'her  
leac'h dezhi euz ar Mab e devoa collet. An abostol-ze a  
varvas e Ephes, el leac'h ne ehane, en he gozni, da  
lavaret ha da aslavaret d'ar gristenien en em garet an  
eil egile.

Abaoue m'e deuet s. Per da Rom, ar gear-ze a zo bet  
ato ar gear-benn euz ar bed catholic, evel m'oa gueich  
all Jerusalem ar gear-benn hag ar galoun euz a relijion  
ar iuzevien.

### 115. Eur ger evit achui.

Discouez or beuz great penaoz en deuz Doue, epad pevar mil bloaz, casset ar bed en dro en eun hevelep feson ma vije prest peb tra evit donedigez he Vab var an douar. Merket or beuz goudeze penaoz eo deuet Mab Doue d'en em ober den, abenn ar pevar mil bloaz-se, ha penaoz en deuz prenet an den dre ar priz euz he c'hoad.

Brema Jesus-Krist a zo pignet en eñv evit kemeret perz, evel den, e gloar he Dad, a zo bet a oll-viscoaz. An ebestel, carget ganthan da brezec an Aviel d'an oll boblou



euz an douar, a zo eat ive da gemeret ho flas e rouante-  
lez ho Mestr. Mes Jesus-Krist en deuz lezet var he lerc'h  
eun dra hag a bado keit ha ma pado ar bed he unan,  
me lavar, an Ilis santel catholic. An Ilis-se a zo diazezet  
var ar virionez, hag ar vein a zo oc'h he ober a zo evel  
pa lavarfenn staget an eil ouz egile gant goad Jesus-Krist,  
gant goad an ebestel, gant goad mil ha mil merzer scuil-

let evit reñ testeni d'ar virionez. Setu perac, ma ne c'heller morse miret ouz ar virionez da veza ar virionez, ne vezo gelletbiken ken nebeut cass da netra an Ilis santel catholic.

N'euz fors peger creñ e ve ar sourradennou avel a c'hoëzo varnhi, n'euz fors peger braz e ve ijinn ha galloud an dud a glasko he filat, n'euz fors peger bini-muz e ve an teodou fallacr a gomzo en he enep, **an Ilis-se ne vezo biken discaret, biken zoken ne horjello var ar garrec m'eo diazezet varnhi.**

Trugarekaomp Doue da veza great deomp ar c'hras da c'henel ha da veva en Ilis santel catholic. An nep a zalc'ho mad d'an Ilis-se betec ar maro, an nep a vezo aketuz da viret he gourc'hemennou, an nep en em lezo da veza sclereat, neteat, creñveat dre ar grasou m'eo carget da scuill varnomp, hennez a dremeno, eb mar ebet, euz ar vuez-ma da eur vuez all hag a bado keit ha ma pado Doue he unan. Bez' en devezo he lod euz ar joaüsdet-se eb he far e pehini e vev an elez hag ar zent er baradoz. Digemeret e vezo er Jerusalem-ze euz an eñv e pehini an Tad, ar Mab hag ar Speret-Santel a zo hag a vezo da viken meulet, benniget hag adoret gant an oll eneou eüruz, ken gant ar zent euz an allians goz, evel gant ar zent euz an allians nevez.





## Kentelliou tennet divar ar scritur sacr.

### I. AR PEZ O DEVOA DISCLERIET AR BROPHETET DIVAR BENN AR MESSIAS.

1° DIVAR BENN HE ZONEDIGEZ. «Ganet ez euz evidomp eur c'hrouadur bihan, hag eur mab a zo roët deomp. He hano a vezo *An Hini a laka an oll da veza souezet, An Hini a ro cuzul vad, Doue, An Hini n'en deuz ket he bar evit an nerz hag ar c'halloud, Tad an amzer da zont, Prins ar peoc'h.*» (Isaïas chabist 9, verset 6).

2° DIVAR BENN AN AMZER EUZ HE ZONEDIGEZ. «Ar stur ne d'añ ket euz a lignez Juda ken na zeui an Hini a dle beza digasset, hag a vezo an oll boblou var c'hed anezhan.» (Levr ar Jenes c. 49, v. 8).

An eal Gabriel a lavaras d'ar prophet Daniel: «gouezit eta, ha lakiit an dra-ma doun en ho speret, penaoz, azalec an urs a vezo roët evit sevel a nevez an templ a Jerusalem betec ma teui ar C'hrist a dle ren va fobl, e vezo seiz sizun ha dion zizun ha tri-ugent; ha goude ar zizuniou-ze ar C'hrist a vezo lakeat d'ar maro, hag ar sacrificiou coz a vezo taolet a gostez. An dra-ma a erruo var dro anter eur zizun all.» (Daniel, c. 9, v. 25).

Ar zizuniou-ze a zo sizuniou a vloaveziou. Hogen, 69 sizun, a zeiz vloaz peb hini, a ra 483 vloaz eñ hag eñ, ha setu aze ive e guirionez an amzer a dremenas adalec ma roas ar roue Cyrus urs da zevel a nevez mogeriou Jerusalem hag an templ betec ma'c'h en em lakeas hor zalver Jesus-Krist da brezec an Aviel goude beza bet badezet gant s. Ian e ster ar Jourden. Hor zalver a oue lakeat d'ar maro var dro tri bloaz goude hag eun dra bennac ouspenn; ar pez a ra ive var dro eun anter-sizun a vloaveziou.

3° DIVAR BENN MA TLIE DISKEN EUZ A LIGNEZ AR ROUE DAVID : «eur scour a zavo var gef Jesse, hag euz a douez he c'hriziou e tiouano eur boket. En amzer-ze ar scour savet var gef Jesse a vezo evel eun assign pe eur c'hitoun evit an oll boblou; ar re-ma a ziredo d'he adori, ha d'ar bez ma vezo bet lakeat enghan e roñt henor ha gloar.» (Isaïas, c. 11).

4° DIVAR BENN MA TLIE GENEL EUZ AR VERC'HEZ VARI : «eur verc'hez a goncevo hag a lakañ er bed eur mab hag a vezo hanvet Emmanuel, da lavaret eo, Doue ganeomp.» (Isaïas, c. 7, v. 14).

5° DIVAR BENN MA TLIE GENEL E BETHLEEM : «ha c'houi, Bethleem, Ephrata, c'houi a zo dister e scoaz ar c'heariou all a Juda; mes ac'hanoc'h-hu eo e teui an Hini a dle ren var Israël, hag a zo bet a oll-viscoaz.» (Michee, c. 5, v. 2).

6° DIVAR BENN AR MIRACLOU A DLIE DA OBER : «gulet e vezo neuze gloar ha galloud an Aotrou Doue. Livirit d'ar re a zo simpl ho c'haloun : n'o pezet aoun ebet; Doue a deui he unan d'ho savetei. Neuze daoulagad ar re zall a velo sclerijen an deiz, ha dioucouarn ar re vouzar a zigoro da glevet. Ar re gamm a lammo evel ar c'haro, hag ar re vut a deui ar prezec dezho.» (Isaïas, c. 35).

7° DIVAR BENN AR FESON MA TLIE DONT DA JERUSALEM EVIT AR VEICH DIVEZA : «dridit gant ar joa, tud a Jerusalem; setu ho roue hag ho salver o tont davedoc'h. Paour eo, ha var eun azen eo e teu d'ho caout; mes prezec a

rañ ar peoc'h d'an oll boblou, hag he c'halloud en em astenno euz an eil mor d'egile, ha betec ar penn pella euz ar bed.» (Zakarias, c. 9, v. 9 ha 10).

8° DIVAR BENN MA TLIE BEZA TRAHISSET GANT JUDAS : «an den ma veven e peoc'h ganthan, an hini m'edo va fisians ennhan hag a zebre euz va bara, hennez eo en deuz va zrahisset.» (psalm 40).

«Ma vije bet va enehour eo en devije goal gomzet em enep, n'em bije great van ebet; mes c'houi, unan euz ar re a veve e va c'houmpagnunez, unan euz ar re am boa choazet evit ren va fobl; c'houi, unan euz ar re dosta d'am c'halonn, unan euz ar re a zebre ouz ar memes taol ganeñ!» (psalm 44).

«Counta a rejont neuze tregont pez arc'hant evit ar baëamant m'oant en em glevet da reñ dinn. Ha me a gemeras an tregont pez arc'hant-ze hag a icas d'ho zeuler en templ da eur poudour.» (Zakarias, c. 11).

9° DIVAR BENN MA VIJE CROGET ENNHAN, HA MA IAJE AN EBESTEL PEB HINI EN HE DU : «ar C'hrist, hon Aotrou, a zo bet croget ennhan abalamour d'hor pec'hejou-ni.» (Jeremias, c. 4, v. 20).

«Deuet oun da veza evel eun divroad evit va breudeur.» (psalm 68).

«Pa vezo skoët ar pastor, an deñved a ielo tu-ma tu-hont.» (Zakarias, c. 13).

10° DIVAR BENN MA VIJE GOAPEAT HA MA VIJE GREAT DEZHAN A BEP SEURT IUDAZEREZ : «digoret o deuz ho ginou d'am lounka, evel leounet o iudal hag o clask taga.» (psalm 21).

«Testou faoz a zo en em zavet em enep.» (psalm 34).

«N'o deuz ket bet aoun o crañchat ouzinn e va fas.» (Job. c. 30).

«He velet or beuz, ha n'en doa na genet, na doare vad ebet. Caout a rea deomp guelet eun den a netra, an disterra euz an dud, eun den hag a anavez kement seurt poan a zo. Hag e guirionez en em garget eo euz ar beac'h-poaniou hag euz ar beac'h-ankenniou a ioa deompni da zougen. Kemeret or beuz anezhan evit eun den goloët a



lorgnez, evit eun den skoët gant Doue ha couezet izella ma c'heller coueza. Hogen, abalamour d'hor pec'hejou-ni eo e bet goloët a c'houliou, abalamour d'hon torfejou-ni eo e bet blonset he gorf. En em garget eo da c'houzañv ar boan ha da ober ar binijen a dlic rei deomp ar peoc'h, ha dre he c'houliou eo ez oump bet pareet. Ni a ioa faziet oll divar an hent mad evel deñved dianket, ha Doue en deuz sammet anezhan euz a bec'hejou peb hini ac'hanomp.» (Isaïas, c. 53).

«Astenn a ra he voc'h d'an nep a sko ganthan.» (Jeremias, c. 3).

«Lezet em euz va c'horf etre daouarn ar re a skoë ganeñ, ha n'em euz ket distroët va fenn dioc'h ar re a rea goab ac'hanon hag a grañche ouzinn.» (Isaïas, c. 50).

«He gorf a zo bronnduet-oll adalec ar penn betec an troad. Ne veler varnhan nemet roudou an taoliou, blonsadurez, ha gouliou ruz ha ledan n'euz scuillet banne eol ebet varnho d'ho zouplaat, na lakeat tamm lien ebet d'ho golo.» (Isaïas, c. 1).

«O c'houi oll pere a dremen dre an hent, guelit hag ez euz eur c'hlac'har heñvel ous va hini.» (Jeremias, c. 1).

11° DIVAR BENN AR FESON MA TLEIE MONT D'AR MARO : «deuit er meaz euz ho tiez, merc'hed Sion, deuit da velet ar roue Salomon, (ar roue Salomon a verke hor zalver Jesus-Krist), gant ar gurunen e deuz lakeat dezhan he vamm da zeiz he eured.» (Cantic ar c'hanticou, c. 3).

«Casset e vezo d'ar maro evel ma casser eun dañvad da laza, ha ne zigoro ket he c'hinou d'en em glemm euz he vourrevien, evel eun oan a jom sioul etre daouarn an hini a zo oc'h he douza.» (Isaïas, c. 53).

12° DIVAR BENN MA VIJE DIVISKET HE ZILLAD DIGANTHAN : «rannet o deuz va dillad entrezho, ha tennet o deuz plouz berr da velet da biou e vije va zaë.» (psalm 24).

13° DIVAR BENN MA VIJE STAGET OUZ AR GROAZ : «benniget ra vezo ar c'hoat en deuz saveteat ar bed!» (levr ar furnez, c. 14)

«Hag an Aotrou Doue a lavaras da Voïzes : grit eur zarpant koueur-ha-stean, ha lakit-heñ a zistribill e beg

eur giffien. An nep a vezo bet flemmet gant an aëret, hag a zello ouz ar zarpant-se, ne varvo ket. (levr an nive-rou, c. 21).

«Toulet o deuz va daouarn ha va zreid, ha countet o deuz va eskern.» (psalm 21).

«Vestl o deuz roët dinn evit magadurez, ha gant guin-egr eo falvezet dezho terri dinn va zec'het.» (psalm 68).

«Heñveloc'h oun ouz eur preñv-douar eget ouz eun den; an oll a ra faë varnon, hag euz ha donjer a ran d'ar hobl. Kement hini am guele a rea goab ac'hanon, en eur lavaret: fisians en deuz bet e Doue; ra zeui brema Doue d'he zicour, ra zeui brema Doue d'he zaveteï, mar d'e guir eo he vignoun eo.» (psalm 21).

«Va Doue, va Doue, perac o peuz-c'houi va lezet en abandoun?» (psalm 21).

«Va Doue, me a laka va ene etre ho taouarn.» (psalm 30).

14° DIVAR BENN MA TLIE SEVEL ADARRE EUZ A VARO DA VEO, HA PIGNAT EN EÑV: «va enebourez, divoallit da gaout re a joa abalamour ma'z oun couezet: me en em zavo adarre goude beza bet azezet e creiz an deñvalijen; rac Doue he unan eo va sclerijen. Dougen a rinn ar beac'h euz a vuanegez Doue, mes goudeze heñ a lakaï ac'hanon da dremen adarre euz an deñvalijen d'ar sclerijen.» (Michee c. 7).

«Ne lezoc'h ket ac'hanon e caloun an douar, ha ne c'houzañvoc'h ket e chomfe corf ho Sant eno da vreina.» (psalm 15.)

«En eur bignat en eñv, e casso ganthan ar gaptivet, hag e roïo he c'hrasou d'an dud.» (psalm 67)

15° DIVAR BENN HE VELEGIACH HAG AR PLAS EN DEVIJE EN EÑV EN TU DEOU D'HE DAD: «an Aotrou en deuz lavaret da va Aotrou: azezit en tu deou dinn-me. C'houi a zo belec da virviken hervez an urs a Velchisedek.» (psalm 109).

---

## II. KENTELLIOU EVIT REN EUR VUEZ YAD.

### I. DIVAR BENN AR BEDEN.

1° O pet sonch euz ho crouer en amzer ho iaouankiz, araoc ma couezo varnoc'h reuziou ar vuez-ma, ha ma teuio ar bloaveziou pounner-ze cuz a bere e leveroc'h : ar re-ma ne blijont ket dinn. (Levr an Ecclesiast, c. 12, v. 1).

2° Beillit ha pedit gant aoun da veza trec'het gant an dentasion. (S. Vaze, c. 26, v. 41).

3° Daniel a iea d'an daoulin teir gueich bemdez evit adori Doue hag he drugarekaat. (Daniel, c. 6, v. 10).

4° En em zastumit ennoe'h oc'h unan araoc pedi, ha ne vezit ket heñvel ouz eun den hag a ve lavaret en defie c'hoant da denti Doue. (Levr an Ecclesiastic, c. 18, v. 23).

5° An nep a ador Doue gant joa a vezo digemeret mad, hag he beden a dizo betec an eñv. Peden an hini en em izela he unan a dreuzo ar c'hoabr. (Levr an Ecclesiastic c. 35, v. 20—21).

6° Mar o peuz eur boan-speret bennac, pe eur c'hla-c'har bennac en ho caloun, pedit. (s. Jakes, c. 5, v. 13).

7° Pedit an eil evit egile evit ma vioc'h salvet peden an nep a zo e gras Doue e deuz eur c'halloud vraz pa vez great aketuz. (s. Jakes, c. 5, v. 16).

8° Goulennit hag e vezo roët deoc'h; ciaskit, hag e cavoc'h, skoit var an or hag e vezo digoret deoc'h. (s. Vaze, c. 7, v. 7.)

### 2. DIVAR BENN AR RESPET A DLEER DA GAOUT F'IT AN ILIS.

9° Va Doue, me a ielo d'ho ti, hag oc'h adoro gant doujans en ho templ santel. (Psalm 5, v. 8).

10° E guirionez Doue a zo ama. Pebes respet na dleer ket da gaout evit ar plas-ma ! la, ama ema ti Zoue ha dor an eñv. (Levr ar Jenes, c. 28, v. 16).

11° El leac'h ma vezo daou pe dri assamblet em hano-  
ræ, m'en em gavo ive en ho zouez. (S. Vaze, c. 18, v. 20).

12° An Aotrou Doue a zo o chom en he dempl santel ; ra zeui ar bed oll da devel dirazhan ! (Habacuc, c. 2, v. 20).

13° En em virit dioc'h ar c'homzou n'euz hano enno nemet euz a draou ar bed, ha ne reont vad ebet d'an ene. (Eil lizer s. Paol da Dimothee, c. 2, v. 16).

### 3. DIVAR BENN DEVERIOU AN TADOU HAG AR MAMMOU, HA DEVERIOU AR VUGALE.

14° Jesus a greske en oad, e furnez hag e gras dirac Doue ha dirac an dud. (S. Lucas, c. 2, v. 51—52).

15° Va mab, ne ancounac'hañt ket va lezen, hag heuil-lit va goure'hemennou euz a greiz ho caloun. Mar bezit aketuz d'ho miret, ec'h astennoc'h ho puez, hag e cavoc'h an eürusdet hag ar peoc'h. (Levr ar proverbou, c. 3, v. 1).

16° Selaouit, va mab, ar pez a lavar deoc'h ho tad evit ho kelen, ha divoallit da ober netra a enep bolontez ho mamm. (Proverbou, c. 1, v. 8).

17° An nep en deuz eur mab dizent hag aheurtet en he zizentidigez, eur mab ha ne fell ket dezhan selaou he dad hag he vamm, na senti outho, caër o deuz he scandalat, ha zoken kemeret ar vaz ganthan ; an nep en deuz eur mab evelse n'en deuz ken da ober nemet he zigass dirac ar varnerien, en eur lavaret : setu aze eur mab ha ne ra van ebet evit clevet he dad hag he vamm ; en despet d'ho oll aliou mad ha d'ho oll gourdrouzou, e kendalc'h da dremen he amzer er festou, ha da ren eur vuez fall ha direol. Ha var gement-se ar bobl en em lakañ da labeza ar mab dinatur-ze, da lavaret eo, d'he laza a daoliou mein ; rac mervel a dle, evit ma teui he varo da zervichout da scouer ha da ober aoun da oll vugale Israël. (Levr an Deuteronom, c. 21, v. 18).

18° An nep a ro he valloz d'he dad ha d'he vamm a velo ar goulou o vervel en he gleuzeur e creiz an deñvalijen. (Proverbou, c. 20, v. 20).

19° An nep a ra goab euz he dad, ha ne fell ket dezhan senti ouz he vamm, ra vezo diframmet he zaoulagad euz he benn gant ar brini gouez, ha ra vezint lounket gant ar scoulet bihan ! (Proverbou, c. 30, v. 17).

20° Eur mab fur a ra joa he dad ; mes eur mab direol a zo eur rann-galoun evit he vamm. (proverbou, c. 10, v. 1).

21° An nep en deuz damant da ler he vab ne gar ket anezhan ; mes an nep a gar he vab ne espern netra evit ober dezhan kemeret eur pleg mad. (Proverbou, c. 13, v. 24).

22° An den iaouank a gendalc'h da heul an hent m'en deuz kerzet dreizhan da genta ; hag en he gozni zoken ne guitaio ket an hent-se. (Proverbou, c. 22, v. 6.)

23° An nep a laër eun dra bennac divar goust he dad hag he vamm, hag a lavar n'e ket pec'het an dra-ze, a zo he blas etouez laëroun an henchou braz, e coumpagnunez ar re a c'houlenn ar ialc'h pe ar vuez. (Proverbou, c. 28, v. 24).

#### 4. DIVAR BENN AR VODESTI HAG AR BURETE.

24° Nag hi zo caër an eneou a veler ar chastete o lugerni enno gant sked ar iaouankiz. Biken na vezint ancounac'heat ; rac ar zonch anezho a zo ato e speret Doue hag e speret an dud. (levr ar furnez, c. 4, v. 1).

25° Ar bobl a lavaras da Judith : « c'houi eo gloar Jerusalem, joa Israël, hag henor ho pobl. N'o peuz ket lammet araoc ho skeud, ha n'e ket bet dare deoc'h fall-galouni, abalamour m'o peuz caret ar chastete. Abalamour da ze ive dorn Doue en deuz ho kennerzet, ha setu perac e vioc'h benniget da virviken. » (Judith, c. 15, v. 18).

26° Dalc'hit mad d'ar chastete ; an oberou mad a vezo anavezet, hag ar re fall ne c'hellint ket ken nebeut chom ato cuzet. (Kenta lizer s. Paol da Dimothee, c. 5, v. 22 ha 25.)

27° Doue a vel dre be hent e vale an den, hag evessaat a ra outhan bep cammed a ra. (Proverbou, c. 5, v. 21).

28° N'euz leac'h ebet teñval aoualc'h evit cuzet ar re a ra an drouc. (Job, c. 34, v. 22).

29° Ar zonzou fall a zo traou euzuz dirac Doue. Daoust hag e c'helfe eun den cuzet tan en he vruchet eb devi he zillad ? Daoust hag e c'helfe eun den bale var glaou beo eb devi plantou he dreid ? An nep n'e ket chast ne denn var

he hano nemet mez ha dismegans, ha biken brud vad ebet n'en devezo. (Proverbou, c. 6, v. 27, c. 15, v. 26).

30° Ar re n'int ket chast a zo blaz ar mel gant ho ginou; mes ar vlaz-se a deu erfin da veza c'houero evel an huelen, hag a drouc'h evel eur c'hleze a ziu zremm. Ar seurt tud-se a gerz var hent ar maro, ha bep cammed a reonte sankont dounnoc'h dounna en ifern. Lakit evez, va mab, da bellaat dioutho, evit n'o pezo ket a leac'h da vouela ha da hirvoudi divezatoc'h, ha da lavaret, o velet ho nerz o vankout deoc'h abred, hag ho corf o vont da netra araoc ar mare abalamour d'an uzach fall o pezo great anezhan: ah! perac n'e ket bet falvezet dinn-me plega dindan ar reolen a vuez a ioa c'hoant da rei dinn da heul? Perac am euz-me great faë var gentelliou va mistri? Perac n'am euz-me ket selaouet ar re a lakea ho foan d'am c'helen ha da ziscouez dinn an hent mad? (Proverbou, c. 5).

#### 5. DIVAR BENN AN AKET DA ZESKI HA DA LABOURAT.

31° Guelloc'h eo beza eur c'hrouadur paour ha fur eget beza eur roue diskiant. (Levr an ecclesiast, c. 4, v. 13).

32° An nep ne fell ket dezhan deski, pa gav an dro d'hen ober, a gouezo truez outhan. (Proverbou, c. 17, v. 16.)

33° An nep en deuz eun descadurez vad a c'hoar comz gant furnez. (An ecclesiastic, c. 34, v. 9).

34° Descadurez vad ha furnez a laka an den da veva eüruz. (Levr an ecclesiast, c. 7, v. 13).

35° El leac'h ma labourer calz, ne vank netra; mes el leac'h ne labour nemet an teod, ema an dienez. An nep a labour he bark en devezo bara leiz he gof; mes an nep ne ra netra a zo eun den diskiant meurbet. (Proverbou, c. 12, v. 11; c. 14, v. 23).

36° It d'ar scol gant ar verienen, tra didalvez, ha guelit Petra ra. Hi n'e deuz na mestr, na roue ebet da ober lezennou dezhi; ha coulsgoude e tastum epad an aïv pe a dra d'en em vaga abenn ma teui ar goañ hag

ar goal-amzer. Ac'hann da beur e chomoc'h-hu cousket, pezh dieguz? Peur eta e tihunoc'h? Cousket a reoc'h eur pennadic, moredi a reoc'h eun tammic, ha goudeze ec'h astennoc'h ho tivreac'h evit cousket adarre. Ha setu an dienez o tont da skei var ho tor evel eun den hag a deu a diz gant an hent; hag ar baourentez o cregi ennoc'h evel eun archer. (Proverbou, c. 6).

#### 6. DIVAR BENN AR GOAL GOUMPAGNUNEZIOU.

37° N'o pezet darempred ebet na gant an dud libertin, na gant ar re a voal-gomz a enep Doue, na gant ar vezvierien. Ne c'houzoc'h-hu ket ez euz aoualc'h euz eun nebeut goell evit lakaat an toaz oll e go? (Kenta lizer s. Paol d'ar bobl a Gorinth, c. 5, v. 6 hag 11).

38° Arabad eo fazia: ar c'homzou fall a denn d'ar vuez fall. (1. Corinth. c. 15, v. 33).

39° An nep a zarempred an dud fur a deu da veza fur he unan; mes mignoun an dud direol a deui da veza heñvel outho. (Proverbou, c. 13, v. 20).

40° Eur mignoun fall a denn he vignoun d'he heul, hag hen laka da vale dre eun hent ha n'e ket mad mont dreizhan. (Proverbou, c. 16, v. 29).

41° Va mab, mar teu ar bee'herien da glask ho touella, ne zelaouit ket anezho. Ha ma leveront: «deuz ganeomp», ne d'it ket d'ho heul, rac ne reont nemet redet varzu an drouc. (Proverbou, c. 1).

#### 7. DIVAR BENN AR GARANTEZ HAG AN DRUEZ A DLEER DA GAOUT EVIT AN NESSA.

42° An dud a zo carantez Doue en ho c'haloun a zo ive leun a vadelez hag a drugarez evit ho nessa. (Proverbou, c. 13, v. 13).

43° Grit an aluzen gant ho tanvez, ha ne zistroit ket ho taoulagad divar ar paour, evit na deui ket Doue da zistrei he re divarnoc'h. Mar o peuz calz, roit calz; mar o peuz nebeut, roit a galoun vad euz an nebeut o peuz. (Tobias, c. 4, v. 7).

44° Beza zo tud hag a ro lod d'ar re all euz ar pez o deuz, hag ho danvez ne ra nemet creski ; ha beza zo tud, er c'hontrol, hag a gemer ar pez n'e ket dezho, ha couls goude e chomont atopour. (Proverbou, c. 14, v. 24).

45° An nep a ra ar scouarn vouzar ous mouez ar paour ne vezo ket selaouet ken nebeut pa deui da zével he vouez d'he dro. (Proverbou, c. 21, v. 13).

46° An nep a voal-gomz ouz ar paour a offans he grouer, hag an nep a ra faë var he nessa n'ema ket eb pec'het ; mes an nep en deuz truez ouz ar paour a vezo eüruz. (Proverbou, c. 12, v. 10).

47° An dud vad o deuz ive truez ouz al loanet ; mes an dud fall o deuz eur galoun griz. (Proverbou, c. 12, v. 10.)

#### 8. DIVAR BENN AN TEOD.

48° An teod ne d'eo nemet eul lodennic vihan euz ar c'horf, hag evelato e c'hell ober calz drouc. Eun elfen a zo aoualc'h evit lakaat an tan-goal en eur c'hoat braz. An teod a zo heñvel ouz an elfen-ze. (s. Jakes, c. 3, v. 5).

49° El leac'h m'eo stank ar c'homzou eo stank ar pec'hejou ; mes an nep a zo piz var he gomzou a zo fur-braz, (Proverbou, c. 10, v. 19).

50° An nep a zalc'h mad var he deod a zivoal he ene. (Proverbou, c. 13, v. 3).

51° Ar ginou a laosk gevier da redet, a laz an ene. (levr ar furnez, c. 1, v. 11).

52° An den a gar ar virionez a vevo da viken ; mes an teod a gar ar gevier a ielo da netra en eun taol. Ar muzellou a laosk gevier da redet a ra euz da Zoue. (Proverbou, c. 12, v. 19 ha 22).

53° An nep a damall an nessa e gaou ha dre guz a ra evel an aër, a denn he flemm pa ne vezer ket o sellet outhi. (levr an ecclesiast, c. 10, v. 11).

54° Pellaït diouzoc'h an teodou fall, ha ne dostaït ket ouz ar muzellou a gar drouc-prezec. (Proverbou, c. 4, v. 24).

55° An nep a gred an teodou fall a zo fall he unan, hag an nep a zelaou ar muzellou a laosk gevier da redet, n'euz ket da fisiout enghan. (Proverbou, c. 17, v. 4.)



## 9 DIVAR BENN AN HUMILITE.

56° N'en em vezit morse da veza trec'het gant anourgouil nag en ho sonjou, nag en ho comzou; rac kement den a zo eat da goll a zo en em gollet da genta dre anourgouil. (Tobias, c. 4, v. 14).

57° N'en em fisiit ket var ho furnez oc'h unan; n'en em blijit ket o sonjal ennoc'h oc'h unan ez oc'h eun den fur. (Proverbou, c. 3, v. 5 ha 7).

58° Ha beza o peuz-c'houi eun dra bennac ha ne ve ket bet roët deoc'h? Ma n'o peuz ket, perac e tennit-hu gloar euz ar pez a zo ennoc'h evel pa ne ve ket bet roët deoc'h? A dra zur n'o peuz ket a leac'h d'en em fougeal. (1. Corinth. c. 4, v. 7; ha c. 5, v. 6).

59° Deskit an eil d'egile ac'hanoc'h beza humbl; rac Doue en deuz caz ouz an dud ourgouilluz; d'ar re humbl avad e ro he c'hras. (Kenta lizer s. Per, c. 5, v. 5.)

60° An nep piou bennac en em huella a vezo izeleat, hag an nep piou bennac en em izela a vezo hueleat. (s. Lucas, c. 14).

61° El leac'h ma vezo tud deuet var an oad, ne gomzit nemeur. Den iaouank, ne dleit ket comz a veac'h, ha pa ve evit en em zifen oc'h unan e ve. Tavit ha selaouit, ha dre ho modesti e c'hounezoc'h calounou an oll. (levr an ecclesiastic, c. 32).

## 10. DIVAR BENN BEZA GUIR VIGNOUN HA CARET AR PEOC'H.

62° Ar guir vignoun a zalc'h ganthan ar pez en deuz clevet gant an hini en deuz digoret he galoun dezhan. (Proverbou, c. 11, v. 13).

63° An den a zoujans Doue a ro sclerijen d'he goupagnoun da anaout he hent; mes an dud fall a laka ar re a zo en ho c'houmpagnutez da fazia divar ho hini. (Prov. c. 12, v. 26).

64° Va breudeur, n'o pezet ket a gassouni an eil ouz egile evit na vioc'h ket coundaonet; setu, ema ar barner en he za e tal an or. (s. Jakes, c. 5, v. 9).

65° Eur gomz dous a laka an den da habaskaat ; eur gomz rust a laka drouc da vont ennhan. (Proverbou, c. 15, v. 1).

66° Mar o peuz eun dra bennac da zigass e prof d'an ilis, ha mar teu da zonch deoc'h en hent en deuz ho preur eur gassouni bennac ouzoc'h, it dioc'htu var ho kiz, ha pa veac'h dija tost d'an ilis, ha ne deuit ket da zigass ho prof ken na vioc'h en em unanet gant ho preur. (s. Vaze, c. 5, v. 23).

67° Eüruz ar re a gar ar peoc'h, abalamour ma vezint galvet bugale Doue. (s. Vaze, c. 5, v. 9).

#### 11. DIVAR BENN HENT AR RE VAD HAG HENT AR RE FALL.

68° Bez' ez euz eun hent hag a zonch d'an den a zo eün ; mes er penn all d'an hent-se ema ar maro. (Proverbou, c. 16, v. 25).

69° Hent ar re vad a zo skeduz evel an heol o sevel ; mes hent ar re fall a zo teñval meurbet. (Proverbou, c. 4, v. 18 ha 19).

70° It dre an or striz ; rac ledan eo an or ha braz an hent a gass d'an daonasion, hag eleiz zo hag a ia dre an or ha gant an hent-se. Nag hi zo bihan an or, nag heñ zo striz an hent a gass d'ar vuez, ha pegen nebeut zo hag a gav an or hag an hent-se ! (S. Vaze, c. 7, v. 13 ha 14.)

71° An den diskiant ne ra van evit pec'hi hag offansi Doue ; mes tiez an dud fall a vezo discaret. (Proverbou, c. 14, v. 9 ha 10).

72° Abalamour n'e ket bet falvezet deoc'h dont d'am e'haout p'am euz ho calvet ; abalamour m'o peuz great faë var va alion, ha n'o peuz great fors ebet euz va gour-drouzou, me ive a e'hoarzo deoc'h hag a rai goab ac'hanoc'h, pa ho cuelinn pilet d'an traoñ ha prest da veza sammet gant ar maro. (Proverbou, c. 1, v. 24, 25 ha 26).

73° Ar pec'her a velo hag a vezo counnaret ; scrigna a rai he zent, ha dizec'ha a rai gant an dizesper ; ioulou ar bec'herien a ielo da netra. (Psalm 111, v. 10)

74° Ar zent a zo ho eneou e ti Zoue, el leac'h ne stag mui poan ebet outho. An dud diskiant a zonje oant maro evit mad; truezi o deuz great varnho p'edont en ho heur diveza, ha, pa'z int tremenet, o deuz credet oant eat da netra. Mes emaint brema eüruz; mar o deuz bet calz poaniou da c'houzañv var an douar, int digollet mad brema dre m'o deuz cavet ar pez a esperent, da lavaret eo, ar vuez a bado da viken. Lugerni a raïnt er c'hloar, ha barn a raïnt an oll boblou, ha Doue a vezo ho roue da virviken. (Levr ar furnez, c. 3, v. 1—8).

## 12. AR GER DIVEZA.

An eñv hag an douar a dremenno, mes va c'homzou-me ne dremenint ket. (s. Marc, c. 13, v. 31).



# AR GUIRIONEZIOU EUZ AR RELIJION

## HERVEZ MA'Z INT MERKET EL LEVR-MA.

### AR FEIZ.

- I *Red eo caout feiz.* — Abraham, pajen 14 ha 16; ar c'hantener roumen, pajen 178; ar Gananeenn, pajen 197; S. Thomas, pajen 262.
- II *Petra a renker da gredi.*  
*Kenta articl euz ar feiz: me gred e Doue an Tad oll-c'halloudec etc.*
- 1° Doue a zo oll-c'halloudec. — Crouidigez ar bed, pajen 1; miracl Cana, pajen 163; ar bara lakeat da greski, pajen 194; resurrection Lazar, pajen 217.
- 2° Doue a c'hoar peb tra. — Pec'het hon tud kenta, pajen 5; Cain, pajen 8.
- 3° He justis, he vadelez, he furnez, he drugarez, n'euz fin ebet dezho. — He justis: an dour-diluch, pajen 8; Sodom ha Gomorr, pajen 17; Core, Dathan hag Abiron, pajen 65. — He vadelez: baradoz an douar, pajen 3; Noë, pajen 11; ar C'hoaillet, ar Mann, hag an dour en dezert, pajen 55. — He furnez: histor Joseph, pajen 27—41. — He drugarez: ar zalver promettet evit ar veich genta, pajen 5.
- 4° Doue a zalc'h ato d'he c'her, pajen 67—69.
- 5° Bez' ez euz tri fersoun e Doue. — Jesus badezet gant s. lan, pajen 159; ar feson da rei ar zacramant a vadiziant, pajen 264; ar Speret-Santel promettet, pajen 238, ha pajen 264.
- 6° Doue en deuz crouët peb tra, pajen 1.
- 7° An elez, pajen 3; Tobias, pajen 109; an tri den iaouank e fournez Babilon, pajen 122; Habacue, pajen 126; eal pinsin Bethsaïda, pajen 183; elez-mad ar vugale, pajen 201.

8° An drouc-sperejou, pajen 3; Job, pajen 42 ha 43; Jesus tentet gant an diaoul, pajen 160; Jesus a gass an drouc-sperejou euz a gorfou an dud, pajen 169.

*Eil artiel euz ar feiz.* — Jesus-Krist merket dre Voïzes, pajen 48, ha dre Zavid, pajen 87.

*Trede artiel euz ar feiz.* — Jesus-Krist concevet dre vertuz ar Speret-Santel, pajen 146, ha ganet gant ar Verc'hez Vari, pajen 149.

*Pevare artiel euz ar feiz.* — Passion ha maro Jesus-Krist, pajen 232—255.

*Pempet artiel euz ar feiz.* — Jesus-Krist savet euz a varo da veo, pajen 255.

*C'houec'hvet artiel euz ar feiz.* — Jesus-Krist pignet en eñv, pajen 264.

*Seizvet artiel euz ar feiz.* — Parabolen an draoc hag ar greun mad, pajen 187; ar pesket mad hag ar pesket fall, pajen 188; ar pez a c'hoarvezo da fin ar bed, pajen 227; depeign ar varn diveza, pajen 231.

*Eisvet artiel euz ar feiz.* — ar Pantecost, pajen 267; an offiser Corneill, pajen 283

*Navet artiel euz ar feiz.* — an Ilis.

1° An Ilis e jeneral. — Allians an Aotrou Doue gant ar bobl a Israël, pajen 57; bag s. Per, pajen 171.

2° Ar pab. — Ar belec braz, pajen 63; ar renk kenta roët da s. Per, pajen 197 ha pajen 262; ar gristenien a bed evit S. Per epad m'edo er prizoun, pajen 284.

3° An eskibien. — An ebestel casset da brezec, pajen 191, ha carget da ren an Ilis, pajen 203, ha da gelen an oll boblou euz an douar, pajen 264; ar c'henta concil pe ar c'henta sened, pajen 288; S. Paol o kimiada dioc'h pastoret ilis Ephes e Milet, pajen 295.

4° Ar guir Ilis a zo :

*unan*, da lavaret eo, n'euz nemet eun Ilis hag a c'hell beza ar guir Ilis : ar pastor mad, pajen 206;

parabolen ar vinien, pajen 238, hag ar beden a ra hor zalver varlerc'h.

*Santel ha catholic*: an ebestel carget da brezec an Aviel d'an oll boblou ha d'ho zantifia dre ar zacramanchou, pajen 264; Jesus a vezo gant he Ilis betec fin ar bed; rac-se an Ilis a bado ato, pajen 265. Parabolen ar c'hreunen sezo, pajen 187.

*Apostolic*: an ebestel, dre ma'z eant, a rea beleien hag a lakea eskibien da ren an dud fidel, en eur rei dezho ar garg da gendelc'her da ober ar pezo devoa great ho unan, pajen 296 ha pajen 288.

*Navet articl euz ar feiz*. — Communion ar zent: Abraham a c'houlenn gras evit Sodom, pajen 17; Moïzes, evit ar iuzevien, pajen 60 ha pajen 64; Judith, evit he fobl, pajen 134; sacrific Judas Makabee evit an anaoun, pajen 142; Mari, hor mamm, pajen 252.

*Decvet articl euz ar feiz*: Remission ar pec'hejou: — Ar iuzevien hag ar zarpant koueur-ha-stean, pajen 67; an den seizet, pajen 171; ar benitantes Madalen, pajen 181 ha 182; ar mab prodic, pajen 207; al laër deou, pajen 251.

*Unnecvet artiol euz ar feiz*: Resurrection ar c'hig pe ar c'horfou. — Esperans Job, pajen 45; resurrection Lazar, pajen 217; resurrection Jesus-Krist, pajen 255.

*Daouzecvet articl euz ar feiz*: Ar vuez eternel. — Eleazar, pajen 137; ar seiz breur Makabee, pajen 138; ar fals pinvidic hag ar paour-keaz Lazar, pajen 209.

#### AR GOURC'HEMENNOU.

I *Gourc'hemennou Doue*. — Doue a ro he lezen d'ar bobl a Israël var menez Sinaï, pajen 58; deveriou ar gristenien, pajen 174; an den iaouank pinvidic, pajen 214.

*Kenta gourc'hemenn a Zoue*: eun Doue ebken a adori etc. 1° Red eo adori Doue a speret hag a galoun: Jesus e tal puns Jacob, pajen 167.

- 2° Red eo ive lakaat ar c'horf da rei henor ha gloar da Zoue en eun doare bennac: lezennou divar benn ar pezh a zell ous servich Doue, pajen 61; an arc'h a allians casset var menez Sion gant ar brassa lid, pajen 85; henor great da Jesus p'edo o vont da Jerusalem, pajen 222—224.
- 3° Ar pec'het a idolatri: al leue aour, pajen 59; ar bobl a Israël en amzer ar varnerien, pajen 69; idol Bel, pajen 124. — pajen 14.
- 4° Al laëronci sacrilach: ar Philistinet hag an arc'h a allians, pajen 75; ar roue Balthasar, pajen 124; Jesus a gemer eur fouet evit cass ar varc'hadourien euz an templ, pajen 164.
- 5° Mad eo henori an imachou hag ar relegou. — An imachou: an daou cherubim a ioa var an arc'h a allians, pajen 61; ar zarpant koueur-ha-stean, pajen 67. — Ar relegou: eskern Elisee, pajen 104; dillad bet en dro da gorf s. Paol, pajen 193.
- 6° Red eo caret Doue euz a greiz ar galoun: pajen 67 ha pajen 203.
- 7° Red eo ive caret an nessa evel domp hon unan: trugarez David e keñver Saül, pajen 81; parabolen ar Samaritan, pajen 203.
- 8° Red eo caret zoken ar re a ra drouc deomp: pajen 175; peden hor zalver evit lie vourrevien, pajen 251; S. Stephan, pajen 277.

*Eil gourc'hemenn a Zoue.* — Arabad eo toui e nep feson, pajen 177; Antiokus, pajen 141; s. Per, pajen 243.

*Trede gourc'hemenn a Zoue:* Jesus e Capharnaüm pajen 169.

*Pevare gourc'hemenn a Zoue.* —

- 1° Ar vugale vad: Isaac, pajen 19; Tobias, pajen 108—112; ar Mabic Jesus, pajen 157.
- 2° Ar goal vugale: Kam, pajen 12; bugale Heli, pajen 73; Absalon, pajen 86; an aillounet a reas goab a Elisee, pajen 102.

*Pempct gourc'hemenn a Zoue.* —

1° Divoal da laza: Cain, pajen 8; bugale Bethleem, pajen 155; Herodiades, pajen 194.

2° Divoal da gaout cassouni oc'h den: pajen 174.

3° Divoal da rei scouer fall: Eleazar, pajen 137; grevusdet euz ar pec'het a scouer fall, pajen 201.

*C'houec'hvet ha navet gourc'hemenn a Zoue.* — Sodom ha Gomorr, pajen 17; Salomon var fin he vuez, pajen 93; sarmoun var ar menez, pajen 175; Herodes hag Herodiades, pajen 193.

*Seizvet ha decvet gourc'hemenn a Zoue:* — Jiezi, servicher Elisee, pajen 103.

*Eisvet gourc'hemenn a Zoue.* —

1° Divoal da lavaret geier: ar c'hannadet fallacr, pajen 64; ar goardou carget da zivoal bez hor zalver, pajen 258; Ananias ha Saphir, pajen 272.

2° Divoal da damall an nessa e gaou: greg Putiphar, pajen 31; an daou varner digoustians, pajen 120.

3° Divoal da varn eb guir abeg: sarmoun var ar menez, pajen 177.

II *Gourc'hemennou an Ilis.* —

Ar c'halloud da ober lezennou roët d'an ebestel, pajen 192 ha pajen 203.

*Kenta gourc'hemenn euz an Ilis:* goueliou ar iuzevien, pajen 62.

*Eil gourc'hemenn euz an Ilis:* sacrificou ar iuzevien, pajen 62; s. Paol e Troad, pajen 294.

*Pevare gourc'hemenn euz an Ilis:* ar Mabic Jesus en templ, pajen 156.

*Pempet gourc'hemenn euz an Ilis:* ar frouez difennet, pajen 4; iun an Ninivitet, pajen 105; Jesus en dezert, pajen 160.

*C'houec'hvet gourc'hemenn euz an Ilis:* Eleazar hag ar seiz breur Makabee, pajen 137. S. Per, pajen 282.

AR PEC'HET.

I *Ar pec'het e jeneral:* pec'het an elez, pajen 3; pec'het hon tud kenta, pajen 5.



II *Ar seiz pec'het capital.* —

*An ourgouil* : tour Babel, pajen 12 ; ar roue Pharaon, pajen 50 ; Goliath, pajen 78 ; Roboam, pajen 94 ; Aman, pajen 130 ; ar pharizian, pajen 213.

*An avarisdet* : Saül a zalc'h ganthan ar peb guella euz ar pez en devoa kemeret var an Amalecitet, pajen 76 ; Jiezi, servicher Elisee, pajen 103 ; ar zervicher ne fell ket dezhan gortoz gant an hini a ioa dleour dezhan, pajen 202 ; Judas, pajen 221.

*Al luxur* : tud Sodom ha Gomorr, pajen 17 ; greg Putiphar, pajen 31 ; Salomon en he gozni, pajen 93.

*An avi* : Satan en deuz avi ouz hon tud kenta, pajen 4 ; Caïn hag Abel, pajen 7 ; bugale Jacob, pajen 27 ; Jonas, o velet ec'h esperne Doue Niniv, pajen 105 ; ar pharizianet, pajen 219.

*Ar gourmandis* : Noë, pajen 12 ; Esaü, pajen 22 ; ar iuzevien o deuz keuz da gig an Ejipt, pajen 55 ; Holofernes, pajen 154.

*Ar vuanegez* : Esaü a gemer drouc ous Jacob, pajen 24 ; cassouni Saül ous David, pajen 80.

*An diegi* : ar zervicher lezirec, pajen 230 ; Pilat, ar gouarner a volonteze sempl ha laosk, pajen 248.

III *Ar pec'hejou a enep ar Speret-Santel* : dizesper Caïn, pajen 8 ; dallentez Pharaon, pajen 52 ; dizesper Judas, pajen 244.

*Ar vertuz e jeneral* :

ar pemp plac'h iaouank a skiant, hag ar pemp plac'h iaouank diskiant, pajen 227.

*An humilite* : Joseph, pajen 31 ha pajen 33 ; Moizes, pajen 50 ; Ian-Vadezour, pajen 158 ; ar c'hantener, pajen 178.

*Al largentez* : largentez Pharaon e keñver Joseph hag he dud, pajen 40 ; Booz, pajen 72 ; intañvez Sarepta, pajen 98 ; Naaman, pajen 103 ; an daou Dobias, pajen 112.

*Ar chastete* : Joseph, pajen 31 ; Sem ha Japhet, pajen 12 ; Suzanna, pajen 120 ; Judith, pajen 135 ; ar Verc'hez Vari, pajen 146.

*Ar gaioun vad* : Abraham, pajen 15 ; merc'h ar roue Pharaon, pajen 47 ; Rebecca, pajen 21 ; Ruth, pajen 72 ; Elizabeth, pajen 147.

*An demperans* : Daniel hag he dri vignoun, pajen 119 ; Ian-Vadezour, pajen 158.

*An dousder* : Job, pajen 44 ; Moizes, pajen 64 ; David ha Semeï, pajen 87 ; Jesus-Krist, pajen 242 ; S. Stephan, pajen 276.

*An aket e servich Doue* : Samuel, pajen 74 ; ar brophetet, pajen 117 ; Judith, pajen 134.

## AR PEZ A ZO RED PE A ZERVICH DEOMP EVIT EN EM ZANTIFIA.

I *Ar c'hras* : Doue gant Joseph, pajen 30 ha pajen 34 ; an dour o tont euz ar garrec, pajen 56 ; Jesus e tal puns Jacob, pajen 166 ha 167.

### II *Ar sacramanchou*.—

*Ar Vadiziant* : ar mor ruz, pajen 55 ; Naaman a ia d'en em voalc'hi e ster ar Jourden, pajen 103 ; Ian o vadezi, pajen 157 ha 158 ; Jesus ha Nicodem, pajen 156 ; ar Vadiziant instituet, pajen 264.

*Ar gonfirmation* : Per ha Ian a ia da gouzumenna ar re a ioa gounezet d'ar feiz e Samarii, pajen 278.

*Sacramant an aoter* : guezen ar vuez, pajen 4 ; sacrifis Melchisedek, pajen 15 ; goad an oan, pajen 53 ; ar Mann, pajen 56 ; ar procession gant an arc'h a allians, pajen 85 ; an dour chenchet e guin, pajen 163 ; promessa divar benn sacramant an aoter, pajen 196 ; sacramant an aoter instituet, pajen 235.

*Ar binijen* : David, pajen 86 ; an den lor, pajen 178 ; ar pastor mad, pajen 205 ; ar mab prodic, pajen 207—209 ; ar publican en templ, pajen 214 ; Zachee, pajen 221 ; sacramant ar binijen instituet, pajen 261.

*An nouen* : an ebstel a bare ar re glañv en eur douch outho ho biziet soubet en eol, pajen 192.

*An urs*: ar veleien euz al lezen goz; pajen 63; Core, Dathan hag Abiron, pajen 65; Ozias, pajen 115; an ebestel a ro an urs a avieler da S. Stephan ha da c'houec'h diskib all, pajen 276; ober a reont beleien nevez e kement leac'h ma'z eont da brezec an Aviel pajen 296 ha pajer. 288.

*Ar briedelez*: Adam hag Eva, pajen 4; Isaac a zimez da Rebecca, pajen 110; Jesus-Krist en eured Cana, pajen 162; santelez ar briedelez, pajen 175.

III *Ar beden*: Anna, mamm Samuel, pajen 73; peden Salomon, pajen 88 — 89; talvoudegez ar beden, ar iun hag an aluzen, pajen 112 ha pajen 175; peden Ezechias, pajen 115; Martha ha Mari, pajen 204; peden an Aotrou, pajen 205.

IV. *Benedictionou ha ceremoniou an Ilis*: Noë a ro he vennoz da Zem ha da Japhet, pajen 12; Isaac a ro he vennoz da Jacob, pajen 24; Jacob hag he vugale, pajen 41; Jacob a scuill eol var ar mean a ioa bet a zindan he benn en noz, pajen 25; Moïzes a renk tenna he voutou evit tostaat ouz an Aotrou Doue, pajen 49; lezennou divar benn ar pez a zell ous servich Doue, pajen 61; an dedi euz an templ a Jerusalem, pajen 91; Jesus en em lez da veza circonciset ha casset d'an templ, pajen 151, ha pajen 153; henor great d'hor zalver p'edo o vont da Jerusalem, pajen 222 — 224.



# DOARE AN DOUAR SANTEJ



- |  |  |                                    |                           |
|--|--|------------------------------------|---------------------------|
| 1. Sidon, hirio Saida.                     | 9. Al leac'h m'edo Ce-<br>saree-Philipp. | 15. Nazareth.                      | 20. Kear Heph-<br>Caïpha. |
| 2. Traonien al Liban,<br>ha canol Leontes. | 10. Canol Amana pe<br>Abassa.            | 16. Kear Tiberiad, pe<br>Tabaria.  | 21. Menez Carme           |
| 3. Menez Hermon.                           | 11. Saffat pe Sapha.                     | 17. Plenen Jenezarcth.             | 22. Kear Naim.            |
| 4. Canol Pharphar.                         | 12. Lenn Merom.                          | 18. Menez an eiz eü-<br>rusdet.    | 23. Bourg Endor.          |
| 5. Kear Damas.                             | 13. Kear S. Ian Acr pe<br>Akko.          | 19. Al leac'h m'edo<br>Capharnaüm. | 24. Menez Thabo           |
| 6. Tyr.                                    | 14. Plenen Jesrel pe<br>Esdrelon.        |                                    | 25. Bourg Magda           |
| 7. Menez Liban.                            |  |                                    | 26. Lenn Tiberia          |
| 8. Menez Antiliban.                        |  |                                    | 27. Bourg Bethsa          |
|  |  |                                    | 28. Kear al Levi          |

MA VE GUELET DIVAR NIJ.



- |                    |                      |                          |                        |
|--------------------|----------------------|--------------------------|------------------------|
| Dour Cisson.       | beriad, pe euz a 41. | Al leac'h m'edo Je-      | 48. Jardin Jethsemani. |
| Menez Garizim.     | vor ar Galilee.      | riko.                    | 49. Menez Olivet.      |
| Sichem pe Sikar.   | 36. Al leac'h m'edo  | 42. Bro ar Moabitet.     | 50. Feunteun Siloë.    |
| Menez Ebal.        | Cesaree ar mor.      | 43. Kear Joppe pe Jaffa. | 51. Ar mor maro.       |
| Al leac'h m'edo    | 37. Menez Ephraïm.   | 44. Kear Lydda.          | 52. Al leac'h m'edo    |
| Samarii pe Sebast. | 38. Dour Cedron.     | 45. Bourg Rama.          | Ascalon.               |
| Lenn Gadarah.      | 39. Galgala.         | 46. Bourg Emmaüs.        | 53. Bourg Ramla.       |
| Ster ar Jourden pa | 40. Al leac'h ma va- | 47. Dor Bethleem pe dor  | 54. Bethleem.          |
| deu euz a lenn Ti- | deze s. Ian.         | Jaffa e Jerusalem.       | 55. Ar mor Mediterra-  |
|                    |                      |                          | nee.                   |

# TAOLEN

Evit caout ar pezh a zo el levr-ma.



## HISTOR AN TESTAMANT COZ.

### LODEN GENTA.

#### Histor an amzer genta. Adalec Adam betek Abraham.

	pajen		pajen
1. Crouidigez ar bed . . . . .	1	zalver promettet evit ar veich genta . . . . .	5
2. Crouidigez an Elez . . . . .	3	6. Cain hag Abel . . . . .	7
3. Eürusdet hon tud kenta e baradoz an douar . . . . .	3	7. An Dour-diluch . . . . .	8
4. Pec'het hon tud kenta e baradoz an douar . . . . .	4	8. Noë a drugareka an Aotrou Done goude an dour-diluch . . . . .	10
5. Ar pec'het punisset, hag ar		9. Bugale Noë. Tour Babel . . . . .	12

### EIL LODEN.

#### Adalec Abraham betek Moïzes.

10. Galvidigez Abraham, pe, Abraham galvet gant Done . . . . .	14	19. Joseph er prizoun . . . . .	31
11. Vertuziou Abraham . . . . .	14	20. Joseph savet en eur renk huel . . . . .	32
12. Isaac a zimez da Rebecca . . . . .	20	21. Breudeur Joseph a ia d'an Ejipt . . . . .	34
13. Esaü ha Jacob . . . . .	22	22. Benjamin a ia ive d'an Ejipt . . . . .	36
14. Jacob o tec'het euz ar gear, o vont da jom da di Laban . . . . .	24	23. Tass-archant Joseph . . . . .	37
15. Jacob o tistreï d'ar gear . . . . .	26	24. Joseph en em ro da anaout . . . . .	39
16. Joseph e ti he dad . . . . .	27	25. Jacob o vont d'an Ejipt . . . . .	40
17. Joseph guerzet da vare'ha-dourien a zianveaz-bro . . . . .	28	26. Maro Jacob ha Joseph . . . . .	41
18. Joseph e ti Putiphar . . . . .	30	27. Patiantet Job . . . . .	42

### TREDE LODEN.

#### Ar bobl a Israël kelennet gant Doue en eur feson burzuduz adalec Moïzes betek David.

28. Ginivelez Moïzes . . . . .	46	d'he bunissa . . . . .	63
29. Galvidigez Moïzes, pe, Moïzes galvet gant Doue . . . . .	48	38. Core, Dathan hag Abiron . . . . .	65
30. Goualigner pe Gouliouan Ejipt . . . . .	50	39. Difisians Moïzes; ar zarpant koueur-ha-stean . . . . .	66
31. Maro ar mibien hena. — An oan pascal. — Ar bobl a Israël o vont kuit euz an Ejipt . . . . .	52	40. Moïzes o rei he ahou diveza d'ar bobl; he varo . . . . .	67
32. Ar bobl a Israël o treuzi ar mor ruz . . . . .	54	41. Ar bobl a Israël o vont d'an douar promettet . . . . .	68
33. Ar C'hoaillet, ar Mann, hag an dour en dezert . . . . .	55	42. Ar Varnerien . . . . .	69
34. An dec gourc'hemenn. Doue a gemer ar bobl a Israël evit he vobl muia caret . . . . .	57	43. Ruth, ar verc'h-caër carantezuz . . . . .	71
35. Al leue aour . . . . .	59	44. Samuel. Bugale Heli . . . . .	72
36. Lezennou divar benn ar pezh a zell ous servich Doue . . . . .	61	45. Kenta roue a Israel; Saül . . . . .	76
37. Ar c'hannadet fallacr; ar bobl o c'hrozmolat; Doue a deu		46. David, ar pastor-deñved . . . . .	77
		47. David hag ar jeant Goliath . . . . .	78
		48. Carantez Jonathas ha cassouni Saül evit David . . . . .	80
		49. Trugarez David e keñver Saül. Maro Saül . . . . .	82

PEDERVET LODEN.

Ar bobl a Israël e barr he vrud hag he c'halloud; azalec David betec ma oue rannet ar rouantelez en amzer Roboam.

	Paj.		Paj.
50. David ar roue braz ha santel a bez . . . . .	84	54. Dedi an templ a Jerusalem . . . . .	91
51. Absalon a glask didroni he dad. Penaoz eo punisset . . . . .	86	55. Madou braz Salomon. He varo . . . . .	92
52. David var fin he vuez . . . . .	88	56. Ar rouantelez rannet . . . . .	93
53. Furnez Salomon . . . . .	88		

PEMPET LODEN.

Ar bobl a Israël o vont var an discar a nebeut a nebeut adalec Roboam betec donedigez hor zalver.

KENTA LODENNIC.

Histor rouantelez Israël betec ma oue dismantret ha casset da netra gant ar rouanet a Assirii.

57. Taol-lagad var an histor-ze a bez . . . . .	95	63. Rouantelez Israël casset da netra . . . . .	106
58. Doue a zigass ar prophet Elias . . . . .	96	64. Tobias coz . . . . .	107
59. Elias ha beleien Baal . . . . .	98	65. Aliou Tobias coz d'he vab . . . . .	108
60. Guinien Naboth . . . . .	100	66. Beach mab Tobias . . . . .	109
61. Ar prophet Elisee . . . . .	101	67. Mab Tobias o tistrei d'ar gear . . . . .	111
62. Ar prophet Jonas . . . . .	104		

EIL LODENNIC.

Rouantelez Juda adalec ar bloaz 975 betec ginivelez hor zalver Jesus-Krist.

68. Taol-lagad var ar pez a zo c'hoarvezet a vrasa epad an amzer-ze	113
---	-----

KENTA PENNAD.

*Rouantelez Juda betec captive Babilon.*

69. Ar rouanet betec Ezechias . . . . .	114	titive Babilon . . . . .	116
70. Ar roue devot Ezechias . . . . .	115	72. Ar Brophetet . . . . .	116
71. Ar rouanet diveza araoc cap-			

EIL PENNAD.

*Amzer captive Babilon.*

73. Rouantelez Juda casset d'an traon . . . . .	117	76. An tri den iaouank e fournez Babilon . . . . .	122
74. Daniel hag an tri den iaouank	119	77. Daniel hag ar roue Balthasar	124
75. Daniel a zavete he buez d'ar c'hreg chast Suzanna . . . . .	120	78. Daniel hag idol Bel . . . . .	124
		79. Daniel e foz al leonet . . . . .	126

TREDE PENNAD.

*An histor santel adalec captive Babilon betec donedigez hor zalver.*

80. Distro ar luzevien d'ho bro	428	85. Merzerenti ar seiz breur Makabee . . . . .	137
81. Ar brophetet goude ar captive . . . . .	129	86. Mathathias ha Judas Makabee	139
82. Esther . . . . .	130	87. An amzeriou diveza araoc donedigez hor zalver . . . . .	142
83. Judith . . . . .	133		
84. Merzerenti Eleazar . . . . .	136		

# HISTOR AN TESTAMANT NEVEZ.

## KENTA LOIEN.

### Histor hor zalver Jesus-Krist.

#### KENTA PENNAD.

#### Ginivelez ha bugaleach ar Mabic Jesus.

	pajen		pajen
1. Eun eal a deu da lavaret da Zakarias e vezo tad da s. lan-Vadezour . . . . .	144	5. Ginivelez hor zalver Jesus-Krist . . . . .	149
2. An eal Gabriel a ziskan adarre euz an eñv da lavaret d'ar Verc'hez Vari e vezo mamm da Jesus . . . . .	145	6. Ar Bastoret o tont d'arc'hraou . . . . .	150
3. Mari a ia da velet Elizabeth . . . . .	147	7. An tri roue euz ar zao-heol . . . . .	152
4. Ginivelez S. lan Vadezour . . . . .	148	8. Ar Mabic Jesus casset d'an templ . . . . .	153
		9. Ar Mabic Jesus casset d'an Ejipt . . . . .	155
		10. Ar Mabic Jesus en templ . . . . .	156

#### EIL PENNAD.

#### Jesus-Krist oc'h en em zisrouez d'ar bed.

11. Ian Vadezour o prezec, hag o vadezi . . . . .	157	13. Jesus Oan Doue . . . . .	161
12. Jesus badezet gant S. lan, ha tentet goudeze gant an diaoul . . . . .	159	14. Kenta diskibien hor Zalver Jesus-Krist . . . . .	161
		15. Eured Cana . . . . .	162

#### TREDE PENNAD.

#### Ar blavez kenta m'ac'h en em lakeas Jesus-Krist da brezec.

16. Gant pebez nerz ec'h en em zav a enep ar re a vanke a respet d'an templ . . . . .	164	22. An den seizet . . . . .	171
17. Nicodem kelennet gant Jesus . . . . .	165	23. Ar zarmoun var ar menez . . . . .	173
18. Jesus e tal puns Jacob . . . . .	166	24. An den Ior. — Servicher ar c'hantener . . . . .	178
19. Jesus o prezec e Nazareth . . . . .	168	25. Den iaouank Naim . . . . .	179
20. Miraclou Jesus e Capharnaüm . . . . .	169	26. Ar bec'herez Madalen . . . . .	180
21. Ar besketerez miraculuz . . . . .	170	27. Cannadet Ian-Vadezour . . . . .	182

#### PEVARE PENNAD.

#### An eil blavez ma prezegas Jesus-Krist.

28. Jesus a bare eun den clanv 38 vloaz a ioa . . . . .	183	32. Jesus a joaz an daouzec abostol . . . . .	191
29. Seiz Parabolen rouantelez Doue . . . . .	184	33. S. Ian-Vadezour dibennet . . . . .	193
30. Jesus a ra d'an avel paouez da c'hoëza . . . . .	188	34. Jesus a laka ar bara da greski . . . . .	194
31. Merc'h Jair; ar vaouez clanv . . . . .	190	35. Promessa divar benn sacramant an aoter . . . . .	196

#### PEMPET PENNAD.

#### An trede blavez ma prezegas hor Zalver Jesus-Krist.

36. Ar Gananeenn . . . . .	197	43. Martha ha Mari . . . . .	204
37. Ar renk henta roët da S. Per . . . . .	197	44. Peden an Aotrou . . . . .	205
38. Transfiguration hor Zalver . . . . .	198	45. An danvad dianket hag ar pastor mad . . . . .	205
39. Jesus, mignoun ar vugale. — Ar pec'het a scouer fall . . . . .	200	46. Ar mab prodic . . . . .	207
40. Divar benn pardouni an ofansou. Ar zervicher ne fell ket dezhan pardouni . . . . .	201	47. Ar fals pinvidic hag ar paour-keaz Lazar . . . . .	209
41. Ar c'halloud da liamma ha da ziliamma roët d'an ebestel . . . . .	203	48. Jesus a bare eun den ganet dall . . . . .	210
42. Parabolen ar Samaritan . . . . .	203	49. An dec den Ior . . . . .	212
		50. Ar publican hag ar pharizian . . . . .	213



	pajen		pajen
51. An den iaouank pinvidic . . . . .	214	59. Divar benn paëa ar guiriou da Zezar . . . . .	225
52. Labourerien ar vinien . . . . .	215	60. Jesus a ro da anaout petra erruo gant Jerusalem, ha petra a c'hoarvezo da fin ar bed . . . . .	226
53. Resurrection Lazar . . . . .	217	61. Ar pemp plac'h iaouank a skiant, hag ar pemp plac'h iaouank diskiant . . . . .	227
54. Ar Iuzevien a fell dezho lakaat Jesus d'ar maro . . . . .	219	62. Parabolen an <i>talanchou</i> . . . . .	229
55. Zachee, mestr ar publicanet . . . . .	220	63. Depeign ar varn diveza . . . . .	231
56. Mari-Madalen a scuill louzou a c'houez-vad var dreid Jesus . . . . .	221		
57. Henor great da Jesus p'edo o vont da Jerusalem . . . . .	222		
58. Ar banket etred . . . . .	224		

### G'HOUEG'IVET PENNAD.

#### Passion ha maro Jesus-Krist.

64. An oan pascal . . . . .	232	72. Jesus nac'het gant Per . . . . .	243
65. Jesus a voalc'h ho zreid d'he ebestel . . . . .	233	73. Dizesper Judas . . . . .	244
66. Hor zalver Jesus-Krist oc'h institui sacramant an aoter . . . . .	334	74. Jesus goapeat . . . . .	245
67. Jesus a ro da anaout e vezo trahisset gant Judas ha nac'het gant Per . . . . .	236	75. Jesus dirac Pilat hag Herodes . . . . .	245
68. Ar c'homzou diveza a lavaras hor zalver d'he ebestel araoe ne bassion . . . . .	237	76. Jesus ha Barabbas . . . . .	246
69. Jesus er jardin Olivet . . . . .	239	77. Jesus scourjezet ha curunet gant spern . . . . .	246
70. Jesus en em laka etre daouarn he cnebourien . . . . .	240	78. Jesus coudaonet d'ar maro . . . . .	248
71. Jesus dirac ar belec braz . . . . .	242	79. Hent ar C'halvar . . . . .	249
		80. Jesus staget ouz ar groaz . . . . .	250
		81. Jesus er groaz . . . . .	251
		82. Ar vere'hez Vari eharz treid ar groaz . . . . .	251
		83. Jesus a varv er groaz . . . . .	252
		84. Jesus lakeat er bez . . . . .	253

### SEIZVET PENNAD.

#### Buez gloriuz hor zalver Jesus-Krist.


85. Jesus-Krist o sevel a varo da veo . . . . .	255	ebestel assambles . . . . .	260
86. Jesus en em ziscouez da Vari-Vadalen . . . . .	257	90. Hor zalver oc'h institui ar zacramant a binjen . . . . .	261
87. Ar goaidou a ia da gounta da brinset ar veleien ar peza zo erruet . . . . .	258	91. Jesus na s. Thomas . . . . .	262
88. Jesus en em ziscouez da zaou ziskib a ioa o vont da Emmaüs . . . . .	259	92. An abostol s. Per lakeat da genta pastor . . . . .	262
89. Jesus en em ziscouez d'an oll ebestel assambles . . . . .	260	93. Jesus a lavar d'he ebestel e tigasso dezho ar Speret-Santel . . . . .	263
		94. Jesus o kimiada dioc'h he ebestel, hag o pignat en eñv . . . . .	264
		95. Eur ger en eur achui . . . . .	265

### EIL LODEN.

#### Histor an Ebestel.

96. Eur ger araoe . . . . .	266	den goudeze d'ho c'houzumenna . . . . .	277
97. Mathias choazet evit abostol . . . . .	266	106. Conversion s. Paol . . . . .	280
98. Ar Speret-Santel o tisken var an ebestel . . . . .	267	107. S. Per a ra he genta vizit a bastor, hag a vadez ar paian Corneill . . . . .	282
99. S. Per a bare eur paour-keaz camm eharz an templ . . . . .	269	108. S. Per taolet er prizoun . . . . .	284
100. S. Per ha s. Ian dirac ar pennou braz a Jerusalem . . . . .	270	109. Kenta beach apostolic an abostol s. Paol . . . . .	285
101. Buez ar gristenien genta . . . . .	272	110. Concil pe sened Jerusalem . . . . .	288
102. Ananias ha Saphir . . . . .	272	111. Eil beach apostolic an abostol s. Paol . . . . .	290
103. An ebestel taolet er prizoun . . . . .	273	112. Trede beach an abostol s. Paol . . . . .	293
104. S. Stephan kenta merzer, hag unan euz ar seiz avieler genta . . . . .	275	113. S. Paol taolet er prizoun ha lakeat d'ar maro . . . . .	295
105. An avieler Philipp a vadez calz tud e Samari, hag an ebestela . . . . .	275	114. An ebestel all . . . . .	296
Kentelliou tennet divar ar Scritur Sacr . . . . .	300	115. Eur ger evit achui . . . . .	298
Ar guirioneziou euz ar relijion hervez ma'z int merket el lev-ma . . . . .	314		

# E TI O. HA N. BENZIGER BREUDEUR E EINSIEDELN



e caver ar marchadourez-ma: I Levriou da joaz ar pezh a gerer. Bez'ez euz 200 levr a zevotion dishevel an eil dioc'h egile, ha 26 anezho a zo e gallec. Evit moulla, golo ha liv al levriou-ze ez euz gouskerzou, eleiz anezho, hag a ha en dro dre nerz an tan. 2 Imachou a bep seurt, imachou archantel, alaouret, dantelezel etc. 3 Chapeledon var jaden, ousspenn 400 seurt anezho, ha croazion, metalemou etc

E tiez an Aotrounez **BENZIGER BREUDEUR** e **NEW-YORK**, e **CINCINNATI** hag e **ST. LOUIS**  
 e caver ar memes marchadourez, hag, ousspenn, ornamanchoù a lhis, caliron etc.

M. T. ... LIBRARY







